

國學基
本叢書
明

書

一



國學基本叢書

書

明

(一)

傅維鱗纂

商務印書館發行

明書目錄

卷一 本紀一

太祖高皇帝本紀一

卷二 本紀一

太祖高皇帝本紀二

卷三 本紀一

太祖高皇帝本紀三

卷四 本紀二

建文皇帝本紀

卷五 本紀三

太宗文皇帝本紀

卷六 本紀四

仁宗昭皇帝本紀

卷七 本紀五

宣宗章皇帝本紀

卷八 本紀六

英宗睿皇帝本紀

卷九 本紀七

景皇帝本紀

卷十 本紀八

憲宗純皇帝本紀

卷十一 本紀九

孝宗敬皇帝本紀

卷十二 本紀十

武宗毅皇帝本紀

卷十三 本紀十一

世宗肅皇帝本紀

卷十四 本紀十二

世宗肅皇帝本紀

卷十五 本紀十二

穆宗莊皇帝本紀

卷十六 本紀十三

神宗顯皇帝本紀未參實錄尙多闕略

卷十七 本紀十四

光宗貞皇帝本紀

卷十八 本紀十五

熹宗愷皇帝本紀

卷十九 本紀十六

懷宗端皇帝本紀未有實錄事闕

卷二十 紀一

宮闈紀一

太祖孝慈高皇后馬氏 諸妃附

興宗孝康皇后常氏 繼后呂氏

建文皇后馬氏

太宗仁孝文皇后徐氏 諸妃附

仁宗孝誠昭皇后張氏 諸妃附

宣宗廢后恭讓章皇后胡氏

別立孝恭章皇后孫氏 進稱皇后吳氏 諸妃附

英宗孝莊睿皇后錢氏

進稱孝肅皇后周氏 諸妃附

景帝貞惠安和景皇后汪氏

別立後廢后杭氏 妃李氏附

卷二十一 紀一

宮闈紀二

憲宗廢后吳氏 別立孝貞純皇后王氏

追稱孝穆皇后紀氏

進稱孝惠皇后邵氏 諸妃附

孝宗孝康敬皇后張氏

睿宗進稱慈孝獻皇后蔣氏 諸妃附

武宗孝靜毅皇后夏氏 諸妃附

世宗孝潔肅皇后陳氏 繼立復廢后張氏

別立孝烈皇后方氏

追稱孝恪皇后杜氏 諸妃附

穆宗追贈孝懿莊皇后李氏 孝安皇后陳氏

進稱孝定皇后李氏 諸妃附

神宗孝端顯皇后王氏

追稱孝靖皇后王氏 諸妃附

光宗孝元貞皇后郭氏 追稱孝和皇后王氏

追稱孝純皇后劉氏

熹宗懿安皇后張氏 諸妃附

懷宗端皇后周氏 諸妃附

公主附 宮闈女官附

卷二十二 表一

祖系故王表

卷二十三 表二

同姓諸王表一

卷二十四 表二

同姓諸王表二

卷二十五 表二

同姓諸王表三

卷二十六 表三

公侯伯表

卷二十七 表四

恩澤公侯伯表

卷二十八 表五

聖賢世裔表

卷二十九 表六

追封及贈王公侯伯子男表

卷三十 表七

輔臣部院正卿年表一

卷三十一 表七

輔臣部院正卿年表二至萬歷十二年止後未及列

卷三十二 表八

柱國公孤表

卷三十三 表九

學士祭酒表

卷三十四 表十

卿貳年表一至萬歷十二年止後未及列

卷三十五 表十

卿貳年表二

卷三十六 表十一

先設後革諸官表

卷三十七 表十二

制科取士年表

卷三十八 志一

司天志

卷三十九 志二

方域志一

卷四十 志二

方域志二

卷四十一 志二

方域志三

卷四十二 志二

方域志四

卷四十三 志二

方域志五

卷四十四 志三 尙有明閏中星年神筭未列

歷法志一

卷四十五 志三

歷法志二

卷四十六 志三

歷法志三

卷四十七 志三

歷法志四

卷四十八 志三

歷法志五

卷四十九 志三

歷法志六

卷五十 志四

郊祀志

卷五十一 志五

綸渙志一

卷五十二 志五

綸渙志二

明書 目錄

明書目錄

卷五十三 志五

綸渙志三

卷五十四 志五

綸渙志四

卷五十五 志五

綸渙志五

卷五十六 志六

禮儀志一

卷五十七 志六

禮儀志二

卷五十八 志六

禮儀志三

卷五十九 志七

樂律志一

卷六十 志七

樂律志二

卷六十一 志七

樂律志三

卷六十二 志八

學校志

卷六十三 志九

選舉志一

卷六十四 志九

選舉志二

卷六十五 志十

職官志一

卷六十六 志十

職官志二

卷六十七 志十一

土田志

明 書 目錄

明書目錄

卷六十八 志十二

賦役志

卷六十九 志十三

河漕志

卷七十 志十四

戎馬志一

卷七十一 志十四

戎馬志二

卷七十二 志十四

戎馬志三

卷七十三 志十五

刑法志

卷七十四 志十六

邊防志

卷七十五 志十七

經籍志一

卷七十六 志十七

經籍志二

卷七十七 志十七

經籍志三

卷七十八 志十八

服璽志一

卷七十九 志十八

服璽志二

卷八十 志十九

輿衛志

卷八十一 志二十

食貨志一

卷八十二 志二十

食貨志二

明 書 目錄

卷八十三 志二十

食貨志三

卷八十四 志二十一

營建志

卷八十五 志二十二

禮祥志

卷八十六 記一

皇子諸王宗室記一

卷八十七 記一

皇子諸王宗室記二

卷八十八 記一

皇子諸王宗室記三

卷八十九 記二

起兵諸國記一

滌陽王郭子興 宋韓林兒 天完徐壽輝 漢陳友諒

卷九十 記二

起兵諸國記二

吳張士誠 夏明玉眞 方國珍

卷九十一 世家一

開國王公世家一

中山王徐達 開平王常遇春

卷九十二 世家一

開國王公世家二

岐陽王李文忠 寧河王鄧愈 東甌王湯和 黔甯王沐英

卷九十三 世家一

開國王公世家三

穎國公傅友德 宋國公馮勝 韓國公李善長 營國公郭英

卷九十四 列傳一

勳臣傳一

胡大海耿再成

附子天璧

廖永安

附弟永忠

花雲 濮英 濮眞 傳

桑世傑附子 張德勝附弟汪興祖周顯陳文 趙得勝附弟及從子從孫等及死南昌十四人 程國勝曹良臣孫興祖附弟 愈通海

附弟通 韓成附三十源通淵 六人 傳

卷九十五 列傳一

勳臣傳二

康茂才吳良附弟 吳復丁德興韓政鄭遇春蔡遷胡海薛顯郭子興附弟 傳

曹興周武張龍張赫張銓華高仇成孫恪耿炳文周德興胡顯李新傳

卷九十六 列傳一

勳臣傳三

黃彬陸聚金朝興葉昇胡美朱亮祖梅思祖唐勝宗陸仲亨王志顧時陳德華雲龍楊璟傳

藍玉王弼趙庸曹震張翼陳桓朱壽費聚謝成納哈出傳

卷九十七 列傳一

勳臣傳四

馬雲葉旺甯正花茂傳

張輔柳升薛祿陳瑄朱榮何福任禮傳

陳懋劉榮費瓛傳

蔣貴趙安山雲傳

卷九十八 列傳一

勳臣傳五

方瑛楊洪郭登毛勝傳

孫鏜施聚曹義陳友焦禮楊信衛穎趙輔傳

朱永傳

毛忠劉聚仇鉞傳

卷九十九 列傳一

勳臣傳六

金忠吳允誠吳成和勇金順蔣信傳

楊善 附袁彬楊瑄沙
狐狸吳官童 傳

王驥王越傳

卷一百 列傳一

勳臣傳七

明 書 目錄

韓雍項忠馬昊傳

王守仁傳

伍文定傳

卷一百一 列傳二

忠節傳一

王綱

附王名善陳敬

王禕

附子紳孫稔

孫炎葉琛許瑗王愷熊鼎

附黃政

胡深傳

于光張子明

附徐明

傳

李仕魯陳汝輝青文勝薛祥葉伯巨周敬心傳

卷一百二 列傳二

忠節傳二

徐輝祖梅殷傳

方孝孺

附林右

盧原質廖鏞胡子昭葉惠仲劉端王高鄭公智劉政鄭居貞林嘉猷傳

齊泰黃子澄楊任傳

鐵鉉

附高賢

陳迪暴昭傳

卷一百三 列傳二

忠節傳三

練子甯

附徐子權

卓敬傳

景清

附劉固

茅大芳林英周濬司中甘霖王玘李文敏董鏞謝昇連楹丁志方王度傳

胡閏

附張仲禮

高翔鄒瑾

附子樸甥魏冕

陳繼之傳

郭任盧迴戴德彝宋徵巨敬韓永盧振黃彥清傳

張昺謝貴葛誠余逢辰杜奇湯宗倪諒彭二傳

龍鐔石撰程通傳

卷一百四 列傳二

忠節傳四

黃觀

附金有聲張同知

黃鉞陳性善

附黃埤陳子方彭與明劉伯完

傳

王良程本立曾鳳韶龔泰傳

王叔英王良陳忠廖昇周是修傳

高巍劉璟傳

張安國劉原弼何申方法王省陳思賢張倫儲福

附妻范

傳

姚善附王賓 錢芹 陳彥回附黃希范 張彥芳傳

卷一百五 列傳二

忠節傳五

顏瓌附子有為 唐于清 黃謙 向朴 鄭恕 鄭華傳

侯泰 葉福 陳植 樊士信 王彬附鄧崇剛 傳

馬宣附曾潛 宋忠附余瑛 孫泰 彭聚 楊松 潘忠 朱鑑 瞿能附小馬王 鄧戩 陳鵬 莊德附楚智 阜旗 張 楊本 宋瑄附徐讓 衛 鍵 周拱 元 傳

程濟 葉希賢 楊應能傳

卷一百六 列傳二

忠節傳六

牛景先 徐唇 高巽 志豐 寅初 劉亨 王進 孫鎮石 允常 孫岳 周縉傳

陳洽 劉儁 馮貴 侯保 史安 何忠 劉子輔 易先 李任 劉安 徐琪附蔡顯 傳

陳祚傳 曹鼎傳 章綸 廖莊 鍾同傳

卷一百七 列傳二

忠節傳七

劉球岳正楊瑄附子源林俊鄒智傳

韓文何遵黃鞏附陸震及諫死諸臣又張英附舒芬傳

孫燧許達傳

卷一百八 列傳二

忠節傳八

張原陸粲楊爵馮恩附子行可傳

楊繼盛沈鍊海瑞傳

卷一百九 列傳二

忠節傳九

吳中行趙用賢傳

楊漣附魏大中黃尊素李應昇繆昌期左光斗傳

卷一百十 列傳二

忠節傳十

周順昌附五人萬燝附劉廷佐周宗建方震孺傳

范景文等傳

卷一百一十一 列傳三

儒林傳一

汪克寬

趙汾

張美和

貝瓊

朱廉

趙俶

黃鼎

趙謙

蕭岐

曹端

薛瑄

胡居仁

陳真晟

卷一百一十二 列傳三

儒林傳二

吳與弼

陳獻章

邱濬

羅倫

周瑛

卷一百一十三 列傳三

儒林傳三

賀欽

丁璣

蔡清

張吉

楊廉

邵寶

章懋

洪若水

羅僑

陳茂烈

羅欽順

胡鐸

卷一百一十四 列傳三

儒林傳四

呂柟

王艮

林春

董澐

王畿

鄒守益

羅洪先

唐順之 羅汝芳 殷邁

卷一百十五 列傳三

儒林傳五

張元忭 趙貞吉 鄧以讚 楊起元 顧憲成 高攀龍

卷一百十六 列傳四

名臣傳一

章溢 附子存道 傳

陶安傳

唐鐸 嚴震直 韓宜可 羅復仁 傳

王濂傳 讚闕

王嘉會傳 讚闕

陳修傳 讚闕

杜敦傳 讚闕

吳伯宗傳

卷一百十七 列傳四

名臣傳二

樂韶鳳張智亮朱善吳沈劉仲質翟善滕毅錢唐任亨泰傳

周禎傳讚闕

端復初傳讚闕

劉敏傳讚闕

彭通傳讚闕

范常傳讚闕

汪叡傳讚闕

黃哲傳讚闕

程麒傳讚闕

王溥傳讚闕

王敏傳讚闕

道同傳讚闕

郭資傳讚闕

卷一百十八 列傳四

名臣傳三

黃淮傳

蹇義夏原吉傳

張紉傳讚闕

董倫傳讚闕

解縉傳

胡儼傳

況鍾傳讚闕

卷一百十九 列傳四

名臣傳四

金善王英儀智鄒濟傳

宋禮附金純周長藺芳傳

郁新傳讚闕

段民傳讚闕

錢幹附羅玘傳讚闕

胡廣胡濙傳

楊信民傳讚闕

顧佐軒輓魯穆熊繡邵清附師達向瑤周新潘禮胡拱辰王琦李崱朱裳孫儒陶琰薛遠

劉 實傳讚闕

卷一百二十 列傳四

名臣傳五

高穀王直林聰傳

楊士奇楊榮楊溥傳

范 理傳

卷一百二十一 列傳四

名臣傳六

呂 原傳讚闕

劉 儼傳讚闕

李時勉陳敬宗孫鼎魏驥陳選謝鐸附夏寅張悅魯鐸傳

劉 翊傳讚闕

陳 音傳讚闕

商 輅傳

周 忱傳

卷一百二十二 列傳四

名臣傳七

鄭埜王佐傳

樊 瑩傳讚闕

王 槩傳讚闕

崔 恭傳讚闕

王翺郭瑾李秉年富傳

何喬新傳讚闕

陳 俊傳讚闕

林 鶚傳讚闕

周洪謨傳讚闕

夏時正傳讚闕

卷一百二十三 列傳四

名臣傳八

姚夔傳讚闕

于謙傳

劉定之傳讚闕

楊繼宗傳讚闕

張甯傳讚闕

徐有貞傳

莊昶傳讚闕

陶魯傳讚闕

卷一百二十四 列傳四

名臣傳九

儲瓘傳讚闕

李東陽傳

馬文升余子俊葉盛傳

黃孔昭傳讚闕

王鴻儒傳讚闕

劉 鉉傳

卷一百二十五 列傳四

名臣傳十

陳鎬附弟傳讚闕

王圻羅通傳

顧 璘傳讚闕

耿九疇黃紱高明傳

李 賢傳

彭 時傳

卷一百二十六 列傳四

名臣傳十一

徐 溥傳

王 恕傳

劉大夏傳

程信秦紘鄧廷瓚

附程敏政
朱英姚鏞傳

劉健謝遷傳

卷一百二十七 列傳四

名臣傳十二

戴珊張敷華傳

倪岳周經童軒傳

石 珪傳

楊廷和毛澄蔣冕毛紀傳

卷一百二十八 列傳四

名臣傳十三

薛 蕙傳

譔闕

王 鏊傳

彭韶傅珪陳壽林瀚王雲鳳傳

劉忠費宏傳

楊守陳吳寬張元禎傳

卷一百二十九 列傳四

名臣傳十四

梁 儲傳

許進李承勛胡世甯傳

楊一清傳

梁材劉麟雍太吳廷舉傳

卷一百三十 列傳四

名臣傳十五

陳察陳寰傳

王以旂周金傳

張時徹喻時沈啓陳堯傳

卷一百三十一 列傳四

名臣傳十六

翟鑾李時傳

景陽傳

劉天和歐陽鐸傳

徐階傳

胡松傳讚闕

卷一百三十二 列傳四

名臣傳十七

陳其學傳讚闕

劉自強傳讚闕

夏言傳

鄭曉傳

呂本傳

卷一百三十三 列傳四

名臣傳十八

宋儀望傳讚闕

趙孔昭傳讚闕

李世達傳

陸光祖傳

嚴清傳讚闕

程文德傳讚闕

李遷傳

申時行傳

劉景韶傳讚闕

卷一百三十四 列傳四

名臣傳十九

孫鑰傳讚闕

林樹聲陸樹德傳

陳洪濛傳讚闕

王錫爵傳

陳有年傳讚闕

張佳胤傳

余懋學沈思孝羅萬化傳

卷一百三十五 列傳四

名臣傳二十

高拱傳

郭正域傳

李化龍傳讚闕

魏允貞趙南星傳

成基命傳

卷一百三十六 列傳五

孝義傳一

廖欽 林駟

朱煦 錢瑛

陳思禮 毛聚

崔敏 劉謹

何潤 王世名

陳雅言

祝大昌

吳宗元

楊敬

鄧學詩

瞿嗣興

朱環

顏琇

唐豫

邱鐸

危貞昉

胡剛

王順

伍洪

姚玘

鄭氏

潘樞

曾鼎

盧宗齊

顏氏

卷一百三十七 列傳五

孝義傳二

張翼 楊煥 蕭翀 杜元 李疑 姚伯華 麴祥

洪祥 虞謹 楊旻 劉和 歸鉞 何倫 崔鑑

劉閔 樂枏 鄭士利 高瑾 汪灌 王芳 羅璋

史五常 何宇新 楊成章 劉廷梅 李德智 朱仲福 阿寄

卷一百三十八 列傳六

循良傳一

魏觀 王宗顯 王興宗 方克勤 胡壽昌 王觀 郎敏

蘇恭讓 羅性 楊卓 吳履 蘭芳 顧光遠 歐陽銘

陳灌 錢本中 丁積

卷一百三十九 列傳六

循良傳二

徐咸 徐九經 程斲 唐侃 龐嵩 周思兼 樊玉衡

歐陽東鳳 馬思理 彭長宜

卷一百四十 列傳七

武臣傳一

張溫傳

朱能徐忠李彬陳珪李濬孫巖徐祥陳志張興梁銘趙彝郭亮高士文傳

邱福孟善火真李遠王忠王聰張武徐理傳

李震王信牟斌劉璽傳

卷一百四十一 列傳七

武臣傳二

楊銳馬永梁震傳 沈希儀俞大猷傳

萬表戚景通戚繼光傳

卷一百四十二 列傳八

隱逸傳

嚴明德

唐桂芳

梁寅

吳海

黎貞

李詞

陶宗儀

王景

徐舫

倪瓚

王元吉

王顯

陳洞

陳亮

鮑興

鄭天和

楊恆

梁田玉

郭良

梁中節

梁良玉

宋和

何州

雪菴尙和

河西傭

補鍋匠

馮翁

東湖夫樵

樂清夫樵

耶溪夫樵

雲門僧

卷一百四十三

列傳九

雜傳一

陳遇秦從龍附葉兌周良卿傳

朱升傳

劉三吾傳

宋訥傳

劉基傳

卷一百四十四

列傳九

雜傳二

宋濂傳

何真傳

朱守仁傳

安然李幹傳

詹同傳

危素傳

張以甯傳

程徐傳

吳雲傳

秦裕伯傳

卷一百四十五

列傳十

文學傳一

楊維禎

陶凱

李習

劉崧

陳繼先

蘇伯衡

陳觀

林弼

盧熊

王沂

胡連

唐之淳

吳勤

胡翰

李德 蕭執 秦約 張羽 徐賞 王佐

卷一百四十六 列傳十

文學傳二

孫蕡 楊基 高啓 王行 高棅 曾棨 李夢陽

何景明 康海

卷一百四十七 列傳十

文學傳三

楊慎 瞿景淳 王慎中 趙時春 李攀龍 陸師道 王世貞

王世懋

卷一百四十八 列傳十

文學傳四

胡應麟 宗臣 梁有譽 徐獻忠 俞文 盧柟 孫一元

宋登春 徐渭 孫宜

卷一百四十九 列傳十一

權臣傳一

嚴 嵩 附子世蕃 傳

卷一百五十 列傳十一

權臣傳二

張居正傳

卷一百五十一 列傳十二

藝術傳

宋克趙撝謙祝允明文璧傳

戴元禮蔣用文許紳傳

劉日新全寅皇甫仲和萬祺傳

袁 珙 附子忠徵 傳

王賢廖均卿金忠傳

于梓人冷謙傳

王冕周元素吳偉王綏唐寅沈周傳

卷一百五十二 列傳十三

列女傳

卷一百五十三 列傳十四

外戚傳

揚王陳公 徐王馬公 呂本 張昶 張昇 孫忠 吳安

周壽昌 錢承宗 王源 張巒 邵喜 夏孺 蔣輪

陳萬言 方銳 李偉 郭振明 王長錫 張國紀 周奎

李堅 胡觀 袁容 李讓 崔元

卷一百五十四 列傳十五

佞幸傳一

紀綱傳 石亨附從姪彭傳 馬良馬昂傳

神英附同時封者傳 江彬傳

卷一百五十五 列傳十五

佞幸傳二

錢甯傳

張孚敬桂萼席書方獻夫霍韜黃維熊浹黃宗明傳

仇鸞傳

卷一百五十六 列傳十六

殘酷傳

陳 瑛 開 濟 詹 徽 袁 泰 馬 順 陸 炳

卷一百五十七 列傳十七

奸回傳

胡惟庸附陳甯 汪廣洋楊憲傳

徐增壽李景隆王甯盛庸茹瑺王佐傳

金忠顧成張信王通房寬傳

徐正傳

劉吉萬安尹旻焦芳傳

王瓊傳

卷一百五十八 列傳十八

宦官傳一

雲 奇 阮 安 鄭 和 沐 敬 劉永誠 王 振 阮 浪

曹吉祥 金 英 懷 恩 阿 丑 汪 直 王 敬 覃 吉

李廣 梁芳闕

卷一百五十九 列傳十八

宦官傳二

蔣琮 王岳 蕭敬 孫裕 劉瑾附崔臬張永孫和蘇進等

李芳 陳奉 馮保闕 魏忠賢闕

卷一百六十 列傳十九

異教傳

金碧峯月庭宗泐來復永隆哈立麻溥洽板的達姚廣孝李贄傳

周顛張中張君實邵道人胡守法王世能張正常邵元節陶仲文傳

卷一百六十一 列傳二十

亂賊傳一

張玉 譚淵 唐賽兒 思任發 葉宗留 鄧茂七 黃蕭養

大藤峽賊

卷一百六十二 列傳二十

亂賊傳二

滿 四 劉 六 藍廷瑞 江西賊 李福達 汪 直

卷一百六十三 列傳二十

亂賊傳三

大同兵 師尙詔 葉 槐 哮 拜

卷一百六十四 列傳二十

亂賊傳四

楊應龍 奢崇明闕 安邦彥闕 徐鴻儒闕 李自成闕

卷一百六十五 列傳二十一

四國傳一

卷一百六十六 列傳二十一

四國傳二

卷一百六十七 列傳二十一

四國傳三

卷一百六十八 列傳二十一

四國傳四

明 書 目錄

卷一百六十九 列傳二十二

補元臣傳

擴廓帖木兒傳 陳友定傳 蔡子英傳

滕克恭簡祖英

附高彬

李徽臣傳

卷一百七十 列傳二十三

敘傳一

卷一百七十一 列傳二十三

敘傳二

明書卷一

靈壽傳維鱗纂

本紀一

太祖高皇帝本紀一

帝姓朱氏諱元璋初名興宗字國瑞顓頊之後封於郝去邑爲朱世居沛之相徙句容祖徙泗州卒葬焉父世珍母陳徙鍾離之東鄉生四子上其季也母娠時夢神人饋白丸置掌有光吞之明日上生紅光燭天見者駭爲火發迹之無有時元天厯元年戊辰九月十八日丁丑昉時也取河水澡浴忽有紅羅浮來遂取衣之士人名其地爲紅羅障嘗有老僧造門曰神龍在此稍長姿貌雄桀有奇相歲甲申大疫父母及伯仲兄相繼喪亡上年十七入皇覺寺爲僧寺衆乏食遂西歷光固汝穎至合肥遇兩紫衣人與俱上病兩人調護倍至病差不見凡三年還寺辛卯元至正十一年元政益失災異迭見天下兵起先是方國珍據台州劉福通奉欒城韓山童起兵山童死子林兒嗣據穎遂攻破上蔡真陽汝寧光息衆至十餘萬稱亂如徐壽輝芝蔴李等者甚衆壬辰元至正十二年春定遠郭子興拔濠州據之上憫四海分崩生民陷溺乃卜神惟從雄吉遂入濠見子興子興見而愛之甚親重凡攻戰命往輒勝以所育徐王馬公女

之。卽孝慈皇后。軍中稱曰朱公子。俄子興爲孫德崖所執。上救出之。尋歸鄉里募兵。所得甚衆。還授上鎮撫。癸巳。元至正十三年。時子興爲彭早住趙均用所制。馭下無道。乃與徐達等二十四人南略定遠。以計取驢牌寨。得壯士三千。又招降秦把頭得千餘。襲橫山澗得二萬。道遇李善長。與語悅之。語在李傳中。留麾下。相與取滁陽據之。上遣人賂早住均用。子興乃得率所部入滁。是年。張士誠據高郵。國號周。改元天祐。甲午。元至正十四年。滁大旱。上禱於柏子潭。獲雨。歲大熟。冬十月。元丞相脫脫圍高郵。分圍六合。其帥請救。子興與有卻。不應。上曰。六合破。滁不獨存。唇齒也。可以小嫌債大事乎。時元兵號百萬。衆怯懼。上請行。據瓦梁爲援。以計給之。得衛老弱俱還滁。旣而元兵抵滁戰。元兵大敗。獲其馬甚衆。時雖戰勝。然元兵強。上謀款其帥。具牛酒以所獲還之。告其帥曰。城主老病不任行。謹遣犒師。城中皆良民。結聚以備他盜。幸撫存以供軍需。今他處巨寇未滅。奈何舍之殲良民。帥信之曰。非良民。肯還馬耶。卽日解兵去。上見戰爭益甚。民以兵荒死者頗多。憂之。乃禱於天曰。羣雄勝負未決。生民塗炭。若元祚未終。亂宜早息。願先自某始。若羣雄中當膺天命者。蚤歸之。無貽生人陸危。期以三月歸附。多寡爲驗。上益盛。子興欲都滁。上謂非形勝不可。上威名日著。子興二子欲害之。謀洩。上以神給之。謀沮。終不萌害上意。

乙未。元至正十五年。宋

韓林兒龍鳳元年。

春正月。帝以和陽可圖。命張天祐耿再成取之。守將也先帖木兒乘夜遁去。上至和

陽。見諸將多殺擄。惻然。召謂諸將曰。軍無紀律。何以安衆。凡軍中所得婦女悉還之。民大悅。子興命上總

守和陽。上因諸將分工。蹙城未就。出子興檄。坐南面呼諸將曰。總兵主帥命也。不可無約束。今蹙城皆不。如約。事何由濟。自今違者。以軍法從事。諸將咸服。帖然無敢犯。二月。韓林兒入亳。稱皇帝。國號宋。改元龍鳳。招和陽諸將。張天祐赴之。齎檄推子興爲元帥。天祐右副元帥。上爲左副元帥。上不受。止用其年號。三。月。子興卒。上統其兵。時上欲渡江取金陵。苦無舟楫。巢湖水軍俞通海等擁千艘來降。上親往撫之。謂李善長曰。舟師來附。機不可失。殆天意也。夏五月。乘水漲。敗元將蠻子海牙軍於馬腸河。遂定渡江之計。時諸將欲直趨金陵。上曰。取金陵必自采石始。采石南北襟喉。得采石始金陵可圖。六月丙辰。乘風向牛渚。敵兵森列。常遇春奮戈先登。諸軍大呼。敵衆披靡。遂登厓。拔之。緣江諸壘。望風迎附。元總管靳義赴水死。上曰。義士。斂而葬之。乘勝取太平。儒士李習陶。安率父老出迎。見上曰。龍姿鳳質。非常人也。上召與論治道及建都之地。其言合上意。語在陶傳中。上大悅。寘太平。興國翼元帥府。諸將奉上爲大元帥。以李善長爲府都事。陶安參幕府。衣旃尙赤。辛酉。陳野先自方山來攻。生擒之。赦其黨。皆降。克溧水。秋七月。取溧陽。蕪湖。攻集慶不克。八月。縱陳野先還。九月丁亥。皇長子生。冬十二月。釋所獲元臣納哈出歸。劉福通奉宋主韓林兒自亳走安豐。再攻集慶。野先叛。郭元帥張天祐戰死之。野先尋爲盧德茂所殺。

丙申。元至正十六年。

宋龍鳳二年。

春正月。倪文俊迎徐壽輝都漢陽。二月。大破海牙兵於江。三月。上率諸將攻集慶路。初拔其柵。擒陳兆元。釋之。悉降其衆。其衆多疑懼。上覺。暮令入衛。解甲酣寢。疑解。及城破。元御史大夫福壽

戰死之。諸將皆降。得軍民五十餘萬。上入城。諭以除暴安民之意。因改府爲寧天。與翼統軍大元帥府。以廖永忠爲元帥。得儒士夏煜等用之。實上元江寧二縣。遂定都焉。葬福壽。時將取鎮江。慮諸將不戢。士爲害數前。故縱罪。欲法之。久之乃免。命徐達等進兵。戒以無得擄殺。丁酉。克鎮江。上親迎耆儒陳從龍。稱爲先生。不名。尋卒。徵處士陳汝輝不至。夏四月。取金壇。六月。取廣德路。改廣興府。秋七月。諸將奉上爲吳國公。置江南行中書省。江南行樞密院。帳前都指揮司。五翼帥府等官。置營田使。辛巳。徐達敗張士誠於鎮江。進攻常州。擒其弟士德。并其張湯二將軍。秋九月。上如鎮江。謁孔子廟。分遣儒士諭民勸農。尋還。冬十月。華雲龍等復敗張士信兵於舊館。士誠懼。奉書求好。歲輸銀米。上答書。諭以赤心相處。勿惑浮言。十一月。復破士誠援師於常州。謝國璽寇廣德。鄧愈擊敗之。

丁酉。元至正十七年。正月。李武崔德破商州。攻武關。毛貴陷膠州。二月。命耿炳文取長興。獲戰船三百。三月。宋龍鳳三年。

克常州。四月上。親督師克寧國。近屬皆降。夏五月。張士誠寇長興。擊走之。克泰興。進取青陽。敗呂珍於洞庭山。克江陰。秋七月。徇宜興。取常熟。西取績溪。進拔徽州。九月。婺源州元帥汪同來降。下武康。克池州。冬十月。上閱兵大通江。命繆大亨取揚州。克之。元帥張明鑑來降。十二月。釋囚。其時徐壽輝將明玉珍據成都。

戊戌。元至正十八年。春正月。張士誠石牌守將欒瑞來降。取婺源。二月。遷元帥康茂才爲營田使。上諭之曰。宋龍鳳四年。

比因兵亂。民廢耕耨。慮旱澇不時。有妨農事。命爾此務。在蓄洩得宜。大抵設官爲民。非以病民。若使紛擾。無益於民。而反害之。非專任之意。三月。命提刑按察司分巡郡縣。諭之曰。凡輕者釋之。重者從輕典。左右言用法太寬。上曰。百姓罹兵亂。創殘甚。今歸於我。正當撫綏。間有誤犯。寧可盡法。克建德。夏四月。陳友諒陷池州。據龍興。宋主入汴梁。都之。取浦江。秋七月。敗張兵於通州。奪九華山。八月。楊完者餘黨三萬來降。冬十月。取蘭谿。克宜興。進攻婺州。十一月。上以婺州久不下。自往征之。十二月。命籍戶口。壬午。上至婺。圍之。元石抹宜孫守處州。以兵來。大破之。婺州降。改寧越府。尋改金華。設儒學。命儒士宋濂等爲五經師。及學官。時喪亂之餘。至是始聞絃誦聲。發庫賑貧乏。禁酒。建觀星臺。辟儒士范祖幹等。問治道稱旨。加禮貌。命爲諮議。辭。

己亥。元至十九年。

宋龍鳳五年。

春正月。克諸暨。二月。張士誠寇江陰。吳良等擊敗之。三月。下令曰。皇天既命。予削平僭

亂。敢不順時敷惠。以闡至仁。況春氣發育。草木昆蟲。猶皆昭蘇。民有繫獄者。抑鬱愁苦。恐傷天和。予甚憫之。除大逆無道及敵之偵伺。餘與原有。方國珍以溫台處三州來附。以子關爲質。上以質子衰世事。命遣歸。五月。上將還師。命胡大海協守婺州。上至應天。秋八月。取無爲。九月。克潛山。取衢州。冬十一月。胡大海拔桃花嶺。葛渡。遂克處州。敗張兵於三溪。授方國珍官。十二月。徵劉基。宋濂。葉琛。章溢。及王禕等。至上優待用之。時陳友諒幽其主徐壽輝於江州。自稱漢王。

庚子。元至正二十年。春二月。福建行省參政袁天祿以福寧來歸。張希伯以福清來歸。三月。方國珍以金玉

宋龍鳳六年。

飾鞍馬來獻。上曰。吾方有事救民。所需文武材及布帛穀粟。寶玩非所好也。卻之。夏四月十七日癸酉。皇第三子生。是爲太宗。五月。陳友諒寇池州。徐達擊敗之。閏五月。攻陷太平。守將花雲。朱文遜。院判王鼎。許瓊。死之。友諒驕橫益甚。因弑其主徐壽輝。自稱皇帝。國號漢。改元大義。既僭號。乃約張士誠犯建康。左右欲先復太平以牽制之。或勸親征。上曰。不可。太平昔以巨艦乘城致敗。況我步卒趨百里外。而彼以舟師順流下步騎。豈可猝回。此兵法所忌。乃召康茂才給誘之。以速其來。善長曰。方以寇來爲憂。速之何也。上曰。使東西相合。何以支。先破友諒。則士誠膽落矣。茂才致書友諒。約內應。友諒喜。約至江東木橋。呼老康。上乃命設伏。易橋鐵石。友諒夜至。見橋鐵石。乃驚疑。呼老康無應者。乃急率千艘向龍灣。以萬人登岸立柵。時暑甚。諸將欲戰。上曰。天將雨。第就食。乘雨擊之。時天無雲。衆莫信。食已。雲忽合。須臾雨大注。戰合。雨止。夾擊。遂大敗之。潰兵趨舟。舟膠溺者無算。俘其卒二萬人。其將張志雄等皆降。友諒遁去。取信州。改廣信府。六月。復太平。更築其城。取安慶。秋七月。故徐壽輝將于光。左丞余椿等。擊走漢兵。據饒州來降。漢主友諒遣張定邊陷安慶。守將俞伯仲遁還。賜死。擢其弟庸僉樞密院。九月。大敗張兵於長興。故天完將袁國公歐普祥來歸。稅酒。築龍灣虎口城。冬十二月。取撫州。改臨川府。進下建昌。改肇慶府。尋復舊。

辛丑。元至正二十一年。

宋龍鳳七年。

春正月。下東流。議鹽法。寘局設官。聽商販十分取一。寘寶源局。鑄大中通寶錢。與歷代

錢兼行。貨物價值從民便。議茶法。每引每斤輸錢二百。二月。改樞密院爲大都督府。夏六月。漢李明道攻信州。夏德潤戰死。胡大海來援。破擒之。秋七月。漢張定邊陷安慶。上視事東閣。時大暑。左右更以衣進。皆經澀。參軍宋思顏曰。主公躬行節儉。真可示法萬世。但恐今日如此。後或不然。上喜曰。他人能言目前。不能及久遠。見已然不能見將然。思顏之言甚善。賜之幣以彰其直。秋八月。遣使通好。元將察罕帖木兒取浮梁樂平。上親征漢。先是漢數陷近疆。上怒。率舟師溯流而上。劉基以爲宜徑拔江州。傾其巢穴。上從之。時浮江有巨蛇趨蟠於舵。狀甚異。泊牛渚。復有龜蛇旋舵。竟日。至安慶。上先陳陸兵疑之。以舟師擣其水寨。大破之。長驅過小孤。漢守將丁普郎迎降。次湖。獲其邏卒。追至江州。遇漢兵大破之。友諒半夜挈妻子走武昌。師入江州。獲馬三千。糧數萬。甲辰。下南康。斬黃濟來降。傅友德率所部來歸。上用爲將。九月。漢平章王溥以建昌及九江。南豐州。金谿八縣來降。取德興。冬十一月。李伯昇圍長興。常遇春馳救。敗之。下撫州。撫州將鄧克明戰敗降。尋逃取瑞昌。

壬寅。元至正二十二年。宋龍鳳八年。

春正月。漢江西行省丞相胡廷瑞、平章祝宗來降。乙卯。上發九江。如隆興。謁孔子廟。召

父老諭之曰。陳氏據此。爾民甚苦。今吾悉去其弊。軍需供億。不以相勞。爾等各事本業。爲吾良民。民大悅。袁瑞、臨江吉安皆下。獲鄧克明。漢平章彭時中以龍泉降。二月。改建德爲嚴州府。金華賊蔣英等殺守臣胡大海。朱文忠遣元帥何世明復之。英等大掠。走降士誠。文忠率師至。撫其民。父老遮道訴曰。士民不幸。

遭叛寇。日望王師。今將軍至。吾屬無患矣。士誠寇諸全。大敗之。三月。泗州守將薛顯以城降。處州苗軍元帥李祐之賀仁得叛。耿再成孫炎罵賊死。上命邵榮討平之。李祐之自殺。賀仁得伏誅。改隆興爲洪都府。拓其城。以鄧愈爲江西行中書省參政鎮守。丙申。改中書分省爲浙東行中書省。開省金華。祝宗叛。陷洪都。癸酉。復處州。甲戌。復洪都。叛黨皆就擒。伏誅。夏五月。田豐等刺殺元平章察罕帖木兒。走入益都。元以子擴廓帖木兒代將。大破之。田豐等求救於宋。宋以劉福通赴援。敗績。還走安豐。擴廓拔其城。誅田豐等。遂復莒州。時宋將白不信。李喜喜略關中。俱兵敗奔蜀。李武崔德降於李思齊。山東地元悉復之。關先生毛貴亦敗亡。秋七月。平章趙榮參政趙繼祖驕蹇。出怨言。部將有欲告之者。二人不自安。謀作亂。至是上閱兵三山門外。伏兵門內。欲爲變。會大風猝發。吹旗觸上衣。上異之。易服從他道還。榮等不得發。爲宋國興所告。乃伏誅。八月。漢復破吉安。冬十月。羅友賢據池州神山作亂。討平之。設關市批驗所官。十二月。復吉安。元擴廓帖木兒致書并獻馬。還舊使人。

癸卯。元至正二十三年。宋龍鳳九年。

春正月。故徐壽輝將明玉珍稱帝於成都。國號大夏。改元大統。二月。申將士屯田之令。

諭獎康茂才。漢張定邊陷饒州。張士誠破安豐。殺劉福通。據其城。上遣徐達常遇春討敗之。時廬州左君弼出助士誠。又擊敗走。因圍廬州。閏三月。寬處州鹽稅。夏四月。漢陳友諒大舉寇洪都。朱文正等分城拒守。諸全守將謝再興叛降張士誠。五月。漢復陷吉安臨江及無爲州。癸酉。寘禮賢館。處諸名儒。講論經史。

及咨以時事。大見尊寵。六月。忠勤樓災。秋七月癸酉。上帥諸將救洪都。與漢兵大戰於鄱陽湖。康郎山。友諒敗死。先是。友諒圍洪都八十有五日。聞上至。解圍東出鄱陽湖。以逆我師。丁亥。遇於康郎山。友諒列巨艦。上覘之曰。彼舟首尾相連。不利進退。可破也。乃分舟師爲十一隊。戊子。破其前軍。獲巨舟。復乘風發火。礮焚溺甚衆。友諒將張定邊欲犯上舟。舟適膠。遇春從旁射中定邊舟。始卻。援舟至上。舟脫。永忠以飛舸追定邊。定邊被矢走。士卒多死傷。己丑。上集舟師奮擊。敵不能當。殺溺無算。至晡。上命以舟載荻葦置火藥。因風焚之。其水寨數百艘悉被燔。湖水盡赤。友諒弟友仁。友貴。及其平章陳普略等皆死。乘勝斬獲。不可勝計。上乘舟檣白。友諒覺。併力來攻。上知之。令盡白其檣。莫能辨。敵驚駭。辛卯。復大戰。友諒敗。退守鞋山。不得出。斂兵自守。上乃移舟泊左蠡。友諒徐移舟泊潞磯。相持者三日。友諒左右金吾來降。兵益弱。水陸截斷。友諒不敢出。上遣別將攻蘄州及興國克之。八月壬戌。友諒窮蹙。率樓船突湖口。上麾諸將邀擊之。友諒中流矢貫腦死。敵兵大潰。擒其太子善。平章姚天章等。降士卒五萬餘。定邊以小舸載友諒屍。挾其子理奔武昌。復立理爲帝。改元德壽。九月。上還健康。論功行賞。叛將謝再興以士誠兵犯東陽。李文忠破之。是月。張士誠自稱吳王。請於元。不許。元徵糧亦不應。冬十月。上親征武昌。圍之。擒其將張必先。號潑張。傅友德奪鷄冠山下瞰城中。城中喪氣。上名列兵四門立柵。水陸絕其出入。分兵徇漢陽。德安諸郡悉降。十二月。上還健康。先是。劉福通既死。宋主林兒無所歸。上曰。此楚義帝也。迎來健康。

甲辰

元至正二十四年宋龍鳳十年

春正月。徐達等屢勸進。上曰。戎馬未息。瘡痍未甦。天命難必。人心未定。若遽稱尊號。誠

所未遑。俟天下大定。行之未晚。羣臣固請。乃卽吳王位。置中書省官屬。及左右相國以下。以李善長徐達等爲之。令曰。卿等爲生民計。推戴予。然建國之初。先當正紀綱。元氏昏亂。紀綱不立。主荒臣專。威福下移。由是法度不行。人心渙散。遂致騷亂。今諸臣宜鑒其失。協心爲治。以成功業。安生民。毋苟且因循。徒取充位。又令曰。禮法國之紀綱。禮法立則人志定。上下安。諸將皆不得恣情任私。縱爲暴亂。須定名分。明號令。謹守此道。無謹始忽終。二月。復視師武昌。遣羅復仁諭降漢主陳理。率其衆出城降。厚遇之。城中賑饑民。漢沔荆岳皆降。李明道伏誅。立湖廣行中書省。三月。還都。封陳理爲歸德侯。置起居注給事中。罷翼元帥府。實武德等親軍十七衛指揮使司。以劉基爲太史令。江西行省以友諒鏤金牀進。上顧謂侍臣曰。此與孟昶七寶溺器何異。陳氏窮奢極靡。焉得不亡。命燬之。命舉人才。夏四月。中書省臣奏宗廟祭享月朔薦新禮儀。上覽畢悲涕。命定爲制。上考妣忌日。祭享如儀。敗張士誠兵於通州。建忠臣祠於鄱湖之康郎山。祀丁普郎等三十五人。封贈勳爵有差。有司歲時祭之。建忠臣祠於江西南昌府。祀趙德勝等十四人。如鄱湖。興湖廣鐵冶。徐達圍廬州。左君弼走安豐。定商稅三十取一。實貨泉局於江西。頒大中通寶五等錢鑄之。秋七月。克廬州。左君弼部將許榮以舒城來降。八月。常遇春率兵平新淦諸寨。次吉安。饒鼎臣棄城走。復其城。引兵趨贛。故漢平章以江陵降。改荊州府。方明善攻平陽。胡琛擊敗之。遂下瑞安。取夷陵及潭

州冬十月張士信侵長興大破之擒其將宋興祖士信怒復益兵湯和等擊敗之獲士卒八千人馬五百餘金大旺討撫州叛寇悉平之十二月克衡州辰州

乙巳

元至正二十五年
宋龍鳳十一年

春正月熊天瑞降贛州平其所統南安南雄韶州諸郡皆下捷書至上聞常遇春破

敵不殺喜甚使使褒之曰曹彬之下江南何以加之取寶慶於是靖州等安撫長官司皆降大都督朱文正驕橫謀叛上以兄子甚愛之不得已安置桐城二月下浦城張士誠寇諸全大破之擒其同僉韓謙等六百餘人軍士三千馬八百輜重無算夏四月克松溪五月克安陸及襄楚南充安福饒鼎臣父子走茶陵取樂清崇德以儒士滕毅楊訓文爲起居注諭之曰起居非專事紀錄要在輸忠納誨致主於無過之地今在吾左右不可不盡言秋七月沅陵民向珍作亂討斬之壬午設太史監以劉基爲太史令故漢將周文貴寇辰州何德擊敗之獲其千戶麻城民袁寶擒羅田妖賊藍忍兒以獻上賜綺帛旌之元平章余思志以竹山降九月置國子學立博士等官夏主玉珍遣使通好爲書報之蕭明寇饒州擊敗之取餘於克秦州於是海安通州皆下冬十一月饒鼎臣敗死餘黨皆散張士誠屢寇宜興吉安皆擊敗卻之

丙午

元至正二十六年
宋龍鳳十二年
先二年宋已失國至是年宋亡

春正月處州夏清四寇慶元敗之置兩淮都轉運驛使司張士誠窺江陰

上親率兵至鎮江遁去追敗之錄用諸司劾退官二月討周文貴破走之夏主明玉珍卒子昇立改元開禧三月諭中書省嚴選舉之禁取高郵夏主遣使來聘夏四月命祀天用木輅參政張昶對曰木輅戎輅

也。上曰：孔子爲萬世師，其斟酌四代禮樂，爲萬世法，乘木輅，何損於祭祀？況在誠敬，不在儀文。衆服謝克。淮安取興化，濠州李濟以城降。沂州王宣據海州，諭劉基等定常賦國計。元樞密同知陸聚以徐宿二州降。甲子，上發建康，如濠州省陵墓。宴濠州父老經濟等。上謂濟曰：吾與父老不相見久矣。今還故鄉，鄉人遭罹兵火，未遂生息，吾甚憫焉。濟等曰：久苦兵火，今賴主上威德，各得安息，勞主上憂心。上曰：濠吾鄉父，母墳墓所在，豈能忘之？因宴飲極歡。上謂之曰：諸父老皆吾故人，豈不欲朝夕相見？吾不得久留。父老歸，宜教子孫爲善。又曰：鄉人耕作交易無遠出，濱淮尙多寇兵，各宜自愛。濟等頓首謝，皆歡醉而歸。取沛縣并降。邳、蕭、宿遷、睢寧、徐達、克安、豐、獲、忻、鄆及費元帥竹昌、左君弼、走汴梁，引兵來戰，大破之。遂援徐州，破王保保兵。五月上還自濠州，諭中書省招撫流亡。命有司訪求古今圖籍，藏之祕府。秋八月，拓建康城，作新宮於鍾山之陽。命徐達常遇春帥師二十萬東征。諭之曰：今浙西姑蘇諸郡未下，卿等出征，務嚴戢擄掠，聞士誠母葬城外，勿侵毀。大抵克敵者必以成功爲效，樹德者必以廣恩爲務。勉之。九月，熊天瑞奔於張士誠。大兵自常州浮太湖，數戰皆捷。遂圍湖州。夏，主明昇遣使來聘，命參知政事蔡哲往報之。挾畫工圖其山川險易以獻。達圍湖州，屢擒其將。士誠親率兵來援，大戰於卓林之野，擒戴元帥及軍士三千餘。十月，取德清，取桐廬，克湖州。五太子以舊館降，得兵六萬。吳江降。十一月，下餘杭。紹興、嘉興、海寧相繼皆降。達率帥師至姑蘇圍之。十二月，永寧、鄞縣賊平。改諸全爲諸暨。取太倉。陳友定遣人來納款。宋主韓林兒殂。以明年爲吳元年。命有司立廟社。上親祀之。建宮室。有司繕圖以進。上見雕鏤奇麗者，卽去之。禁箋

文虛詞頌美。

丁未吳元年。元至正二十七年。春正月。有局匠告省臣云。見太白神。言吳王當平一天下。省臣奏上曰。此誕妄不可

信。今後凡事涉怪誕者勿以聞。免應天太平鎮江寧國廣德五處田租。二月。都城成。王保保攻徐州。傅友德擊卻。獲將十四百餘。馬百餘。寘兩浙都轉運鹽使司於杭州。設場三十六。松江嘉定降。取澧州石門。書諭左君弼。歸其母。君弼尋降。慈利思沅等處來降。丁酉。令設文武科取士法。夏四月。上海錢鶴皋作亂。討平之。諭起居注詹同等。國史貴直筆。凡平日言行善惡必書。五月。寘翰林院。免徐宿濠泗襄陽安陸糧。三年六月。進兵虎邱。屢敗張兵於外。定朝賀不用女樂。秋七月。選樂舞生設雅樂。召學士朱升領之。上親擊石磬定之。除郡縣官凡三百三十四人。定賜予及父母妻子道里費。佐幕官有差。己丑。雷震宮門獸吻。得物斧形而石質。上令負之於前。以謹天戒。遂肆赦。寘太常大理司農將作四司。八月。郊壇成。命冷謙協樂章。九月。太廟成。諭民有犯者無連坐。時圍姑蘇日久。城中作嚴礮以守。木石俱盡。達令以竹木架若屋。矢石不能傷。至是破葑門。遇春亦破閶門。遂入城。士誠親督兵登城拒戰。復大戰於萬壽寺東街。士誠僅以數騎歸。獨坐室中。達遣舊將李伯升理曉之。士誠瞑目不言。乃以盾舁至舟中。凡獲其官屬官吏將校軍民二十餘萬。并元宗室神保大王黑漢等。皆送建康。上以書送神保還元。士誠不食死。葬之。熊天瑞伏誅。取無錫。取天台。克台州。因下仙居諸縣。新內成。命侍臣書大學衍義於兩廡。冬十月。遣吳琳等持幣帛求

逸賢。徙蘇州富民實濠梁。命百官禮儀尙左。定國子學官制。朱亮祖兵至黃巖。方國珍遁去。令建元右丞余闕總管李黼二祠。置御史臺及各道監察御史。定律令。考正太廟雅樂。定樂舞之制。甲子。命右相國徐達等帥甲士二十五萬由淮入河北。取中原。諭之曰。此行要在削平禍亂。以安生民。遇敵則戰。若所經之處及城下之日。勿擄掠。勿廢農具。殺耕牛。民間或有遺棄孤幼者。親戚來求。卽還之。此陰鷲美事。好共爲之。命平章胡廷瑞等由江西取福建。平章楊璟等取廣西。遣世子標次子棣往臨濠謁陸墓。丙申。發檄文諭齊魯河洛燕薊秦晉之人。取寶慶新化諸州縣。克温州。沂州王宣納款。賀平張士誠。十一月。夏主明昇來聘。湯和自紹興進兵。慶元悉降之。方國珍浮海遁去。王宣叛。大將軍達追討斬之。甲子。上視園丘。方國珍降。得步卒九千。水軍萬有四千。馬二百。舟四百餘。糧物稱是。太史院進戊申大統歷。克滕州。克益州。下光澤。頒律令。孔子五十六世孫希學襲封衍聖公。是時竟以東皆降。寘尙寶司及內六尙局。上寢。夢神人以璧加頸。旣而項肉隱起。遂成骨隆。然甚異。時大將軍達等北征屢捷。上馳諭之曰。聞將軍已下齊魯諸郡。中外皆慶。予獨謂勝而能戒者可以常勝。安而能警者可以常安。戒者雖勝若始戰。警者雖安若屢危。夫屢勝易驕。久勞易潰。慮敗乃可無敗。慎成乃可有成。凡爲將者不可不知。邵武降。取建陽。下崇安。左相國宣國公李善長率羣臣奉表。勸卽帝位。上固卻之。明日。善長等復請曰。殿下謙謙之德。著於四方。感於神明。願爲生民計。早徇羣臣之請。上曰。中原未平。軍旅未息。吾意天下大定。然後議此。而卿等屢請不已。此大事不可草草。越數日。李善長等以卽位禮儀進。甲子。以諸臣推戴之意。祭告上帝神祇。傅友德取萊

陽。克福州。獲馬六百餘。海舟一百餘。金銀糧貨甚衆。因招諭興化漳泉諸郡。陳友定走延平。山東悉平。滅金華田租。禮部以冊立皇后。皇太子禮儀進。命於卽位日同舉。命世子及諸子名。祝告太廟。

明書卷二

本紀一

太祖高皇帝本紀二

洪武元年戊申。元至正二十八年是年元亡。

春正月乙亥。上祀南郊。卽皇帝位。定有天下之號曰大明。建元洪武。遂詣太

廟。追尊四代祖考妣皆爲帝后。時京師雨雪陰沍。至日。天宇廓澄。風和景霽。立妃馬氏爲皇后。初。帝率師渡江。后亦率將士妻妾繼至。太平。及居建康。與吳漢戰無虛日。躬率左右完衣屨。率將士。帝嘗焚香祝。願天早有所付。勿苦天下生民。后曰。方今豪傑竝爭。惟以不嗜殺人爲本。人心所在。卽天命所歸。上深是之。及册后。帝以同濟艱難。狀語侍臣。比之唐長孫后。及還宮。以語后。后曰。妾以夫婦相保。易君臣相保難。妾安敢比長孫后。但願陛下以堯舜爲法耳。立世子標爲皇太子。建南北太社稷。成天下官來朝。以善長達爲左右丞相。餘進爵有差。追封皇伯爲壽春王。皇兄爲南昌王。而下十一王。配皆夫人。詳在故王表。詔告天下。定誥首日。奉天承運。前代云上天眷命。上以未盡奉順之意。製太廟祭器。御奉天殿宴羣臣。戊寅。自舊內遷新宮。方國珍入見。賜第居京師。製傳國之寶及圭。省府請以皇太子兼中書令。不許。令廷臣勸德。

老成兼東宮官。定衛所官軍制。寘尙寶司。上訪得皇后親族。欲授以官。以后固辭乃止。遣官覈實田畝。頒大明令於天下。命鄧愈爲征戍將軍。取南陽以北地。立善世院。元教院。天下官來朝。陛辭日上戒諭之。克建寧路。克延平路。執陳友定。漳州降。二月。命廖永忠等由海道取廣東。汀泉皆降。詔以太牢禮祭先師孔子於國學。仍遣官詣曲阜致祭。戊申。上親祭社稷。克東昌。克邵陽。議賦役法。定天子祭祀冕服。詔復衣冠如唐制。下慶遠選國子監生侍太子讀書。諭以端心術養德性爲要。三月。元左丞何真以廣東郡縣迎降。蘄州進竹簾。卻之。克全州。下武岡。命戶部及行省鑄洪武通寶錢。近臣請開山東銀場。上曰。銀場之弊。利於官者少。害於民者多。今凋瘵之餘。豈可以此重勞民力。言者慙退。大將軍達取汴梁。左君弼降。夏四月。取南陽。免山東租稅。士民來朝。上諭遣之。丁未。上曰。富貴易驕。艱難易忘。命繪古孝行及身所經歷艱難戰伐之圖。以示子孫。克河南。廣州守將舉衆降。嵩州降。丙辰。上諭宦官不得典兵預政。克永州。取陝州。甲子。駕發京師。幸汴梁。馮宗異下潼關。至華州。李思齊張思道遁去。以郭子興守潼關。上駐蹕邳州。諭守土官。凡舊官願入京者。給廩餼。還者同。梧州。潯。貴。以次皆降。改太史院爲司天監。五月庚寅。帝至汴梁。改爲開封府。諸將朝行在。六月。上躬祀汴梁諸神。克靖江。元海南海北諸道元帥皆降。命中書稽將士軍功。命浙江江西蘇州九府運糧三百萬於開封。左江右江土官皆來降。秋七月。上親畫進征圖。授大將軍達進兵取元都。戒以克元都之日毋殺擄。凡元子孫宗戚皆善待之。新寨麻張叛。討平之。河北安邑等處皆降。丙申。駕發開封。郴州降。京師火。賑恤中原。立學校。閏七月。遣犒北征將士。大將軍達發汴梁。取河北州郡。

衛輝、彰德、皆降。丁未，上至京，取廣平。自邯鄲次臨清，張興祖自東昌，華雲龍自樂安，以師來會。徵天下賢才，授守令，厚賜遣之。庚戌，命傅友德開道通步騎，顧時浚開通舟師，詔定軍禮。凡親征，遣將禡祭，奏凱論功，行賞，皆有常制。克德州。戊午，大將軍達師進長蘆，元守將遁去，以海舟作浮橋濟師，夾河進兵。元兵望風皆潰。廣東何真率其官屬入朝，皆錄用之。師次河西務，下通州。元知院卜顏帖木兒迎敵，擊敗擒之。元主及后妃、太子、開建德門北走。八月庚午，大將軍達取元大都。先二日，駐師城東招降。元淮王帖木兒不花率衆城守，達命攻齊化門，遂登城。將士入都，執淮王帖木兒不花及太尉慶童、平章迭兒必失、朴賽不花、右丞相張康伯等，戮之。併獲宣府鎮南諸子六人及玉印二、玉璽一，封其府庫圖籍寶物，封後宮殿門，令宦寺護視。其妃主宮人，號令城內外士卒，毋侵暴人民。安堵。明日，竄伏西山及民間文武官吏皆降。獻捷京師。元亡。詔以金陵開封爲南北京，以張正常爲真人，革天師號。漳州通判王禕奏言：人君莫先於法天道，莫急於順人心，忠厚以存心，寬大以爲政。上嘉納之。丁丑，遣官釋奠於孔子，定六部官制。己卯，大赦。詔天下。上幸北京，改元大都爲北平府。徵元故臣入京師錄用之。詔停海運，命湯和等西分兵略地。大同、克裕州、癸巳，駕至北京。故元留守迭里失里等謀作亂，擒之。温州董孟怡等作亂，討平之。放元宮人，令書籍田器，免徵稅。令乘輿諸物應以金者易銅。置大都督府於北平，以孫興祖領之。九月，下永平，命詹同等十人分道訪賢哲隱逸之士，副將軍而下徇下保定、中山、真定，遂進取澤潞，以次皆平。冬十月，駕發北京。夏，主明昇遣使賀平元。元兵攻潼關，郭子興擊卻之。訪求應祀神祇、山川、帝王、忠烈，及有功軍民，著祀典。

致祭。丁丑。上至自北京。詔天下以元都平。南方平。征南師還。司天監進元所置水晶刻漏。上覽之。見其製作機巧。嘆曰。廢萬機之務。用心於此。以無益有害。若移此治下。豈至喪亡。命碎之。寘京畿都漕運司。十一月。戊戌朔。將祀南郊。告太廟。庚子。祀上帝於圜丘。還告太廟。孔希學仍襲衍聖公。收真定未附山寨。停蘇松嘉湖均工夫。克河中。定乘輿以下冠服及婚喪之制。十二月。大將軍達至太原。破擴廓帖木兒。克其城。置登聞鼓。以達民冤。築壇雞籠山。祭功臣。頒社稷制於天下。遣使新使高麗。易濟詔安南。太行各寨俱詣大將軍達營降。皆令復業。

二年。己酉。春正月。定祀典。以功臣廖永忠等配饗太廟。定翰林院官制。承旨而下有差。免山東北平燕南河東山西南畿田租。以卽位詔諭日本等國君長。師次大同。守將竹真棄城走。改中山爲定州。二月。耕籍田。詔修元史。占城入貢。上仁祖瀆皇帝陵名曰英。大將軍進兵陝西。故元也。速侵通州。擊卻之。三月。祭羣祀。下西安。取鳳翔。李思齊奔臨姚。寘北平廣西行省。增築國子學舍。夏四月。還高麗流人。賜其國王王顯書。寘陝西行省。令功臣子弟入學。徵元回回司天臺官。下隴州。進秦州。次鞏昌。降之。免秦隴田租。李思齊降。師抵開城。元豫王敗走。倭自山東掠太倉。守將翁德破之。五月。甲午朔。日有食之。更英陵曰皇陵。立衛守之。詔諭吐蕃克延安。平涼諸郡縣。慶陽降。未幾。張良臣叛。尋復平。造玉璽曰奉天。執中。追封皇外祖考。陳公爲楊王。外舅馬公爲徐王。六月。賜國子生夏衣。功臣廟上親定位次。生者虛其位。死者肖其像。封陳日燿爲安南國王。傅友德平迪北。會兵慶陽。克開平。元主先期遁北。薊北悉平。秋七月。詔儒士歐陽佑等。

往北平采故元事蹟。備修元史。副將軍平章軍國重事太子少保鄂國公遇春卒。西番寇臨洮。擊走之。廷臣奏徙洞蠻於內地。不許。王保保遣將侵原州涇州。達扼備之。夏主明昇來貢。八月。陝西悉平。元史初成。倭寇淮安。吳祐擊敗之。封高麗王顥爲國王。九月。以臨濠爲中都。上詔廷臣。問以建都之地。或言關中險固。或言洛陽正中。或言汴梁。或言北平。上曰。所言皆善。惟時不同耳。長安洛陽汴京。實歷代所建國。今民未休息。豈可重勞。北平就元宮室。不能無改作。今建業爲江南形勝之地。可以建都。朕意臨濠前江後淮。險可恃。水可漕。欲爲中都可也。羣臣稱善。遂有是命。造御寶六文。曰天子行寶。天子信寶。天子之寶。皇帝行寶。皇帝信寶。皇帝之寶。青三白三。征南將軍永忠還師。上率皇太子百官迎勞於龍灣。懽甚。命皇太子送至第。給高麗服制。占城入貢。賜元平章歐陽朝佐等冠服。用者二百餘人。冬十月。立郡縣學校。十一月。大將軍達還京。上如永忠還。議以仁祖配郊。遣元平章長壽等致元主書。并諭其丞相也速。十二月。楊璟自蜀還。言明昇闇弱可圖。上曰。兵之所加。必貴有名。西蜀一隅。安能久據。朕意俟其悔悟來歸。則師可不勞。民亦無苦。李文忠俘故元臣脫列伯等至京師。上曰。彼各爲其主。事敗至此。情實可矜。釋之。王保保襲蘭州。守將干光死之。定內侍諸司官。

三年庚戌。春正月。建楊王陳公廟於京師。上躬祭之。命大將軍達率師出陝西。討王保保。副將軍文忠出北平。取元上都。初定朝日夕月壇禮。遣使往占城諸國祀其山川。仍命圖各國疆域及摹錄其碑碣圖籍。付使者還。有司奏有罪官宜如先朝故事徙儋崖。上曰。前代在化外。以處罪人。今天下一家。何乃爲此。若

其地風俗未醇。正宜擇良吏化導。豈可以罪人居耶。定王府官制。二月。金朝興取東勝。獲故元平章荆麟。等。文忠取興和。華雲龍下雲川。獲元平章大兒忽荅等。追封故元帥郭子興爲滁陽王。立廟致祭。遣使賑西安鳳翔。詔再免山東河南北平南畿江西田租。上幸苑中。觀巢鵲卵翼。嘆曰。禽鳥且爾。況人母子之恩。令羣臣親老者許歸養。詔續修元史。免倉糧歲久耗折者。及運軍漂沒米數。癸未。詔曰。自古帝王開基立國。必賴賢俊之臣。共熙庶位。以康兆民。是故殷湯周武。旣定天下。克用又俊。列於庶位。故能光昭上下。澤流無窮。今朕統有萬邦。稽古建官。期臻至治。永惟六部政繁任重。而在位未盡得人。豈朕用賢之道未廣歟。抑賢知之士。抗其志節。而甘隱於巖穴歟。詔下之日。有司其悉心推訪。以禮送之。置察言司。三月。寘祕書監。大將軍達師至定西。保保定居車道峴。繼以兵千餘襲東南壘。胡德濟不支。達親率兵急擊破之。斬東南壘裨將以下。越次日力戰。保保敗。遂擒。獲故元郟王文濟王及國公閻思以下將二千人。將士八萬四千餘。馬萬五千。他物畜稱是。保保從古城奔和林。是時元主妥懽睦爾殂。其子愛猷識理達臘嗣立。德濟械送京師。上以故夙將功多。特宥之。夏四月辛酉。以封建諸王告太廟。禮成。宴羣臣於文華殿。上曰。先王封建。上衛國家。下安生民。周行之而久遠。秦廢之而速亡。漢晉以下。莫不皆然。其間治亂不齊。特顧施爲何如耳。越五日乙丑。詔曰。朕聞古昔皇帝之子。居嫡長者必正儲位。其衆子當封以王爵。分茅胙土。以名其國。朕今有子十人。卽位之初。已立長子標爲皇太子。諸子之封。本待報賞功臣之後。然尊卑之分。所宜早定。乃封第二子棧爲秦王。第三子櫛爲晉王。第四子棣爲燕王。第五子櫛爲周王。第六子楨爲楚王。

第七子搏爲齊王。第八子梓爲潭王。第九子杞爲魯王。第十子檀爲蜀王。姪孫守謙爲靖江王。皆授以冊寶。設寘相傳官屬。五月遣使訪歷代帝王陵寢致祭。寘司農司於河南。督墾中原荒田。嚴宮闈不預政事。令俾世守之。再詔聘賢士。文忠敗故元太尉蠻子平章沙不丁等。於白海之駱駝山。遂進次開平。其平章上都罕等皆降。都督孫興祖等與元兵於五郎口戰歿。贈左丞。仍塑像功臣廟。己亥。詔曰。朕聞成周之制。取才於貢士。故賢者在職。而其民有士君子之行。漢唐及宋。科舉取士。各有定則。然但詞章之學。而不求德藝之全。前元依古設科。而權家勢要。結納奔競。輒竊仕祿。所得資品。或居貢士之上。其懷才抱德之賢。恥與竝進。甘隱山林。風俗之弊。以至於此。今朕統一華夏。方與斯民。願得賢人君子用之。自今年八月爲始。特設科舉。以起多士。務在經明行修。博通今古。文質得實。才名相稱。其中選者。朕將親策於廷。觀其學識。第其高下。而任之以官。果才學出衆者。待以顯擢。使中外大臣皆由科舉而選。非科舉者不得爲官。彼游食之徒。自然易行。咨爾有衆。體予至懷。隨遣使頒詔於高麗。占城。安南諸國。大將軍達取漢沔。降興元。還軍西安。癸卯。文忠進應昌。聞元主殂。遂克之。獲元主嫡孫。買得里八刺。及后妃宮人。省院諸大臣。玉璽金寶十有五。玉章一。玉冊二。玉斧一。他寶稱是。駝馬畜物無算。遣人送京師。其太子愛猷識里達臘遁去。遂進興州及紅羅山。前後共得士卒五萬餘人。詔行大射禮。奉仁祖配地。祇於方澤。定服色。尙赤。土酋尊屋久作亂。詐降。復遁入溪洞。楊璟攻之不克。乃還。再免蘇州逋糧三十萬餘。給賜起兵將士無後者。令天下立義塚。禁水火葬。命刑部著之律。定大學資格。上以久不雨。素服草履。徒步詣山川壇。設藁席露坐。晝

曝夜臥地。令皇后親執爨。爲昔日農家食。皇太子捧榼雜麻麥菽粟進。出內帑賜軍校。令法司清獄。有司訪儒術明治道者。三日。遂大雨。皆霑足。詔各神祇以本山川名。去封諡。禁淫祠。及左道。諡元主曰順帝。文忠捷至。命凡曾仕元者不許稱賀。遣僧克新往西域土蕃。仍圖其山川地形以歸。定五等勳爵。文忠送元人至。省臣請獻俘。帝曰。古雖有獻俘之禮。武王伐殷。曾用否。對曰。武王事不可知。唐太宗曾行之。上曰。太宗是待王世充。若隋之子孫。恐不行此禮。元入主中國百年。生齒浩繁。家給人足。朕之祖父。享其太平。乃令服本俗衣以朝。罷賜冠服。遂封買得里八刺爲崇禮侯。俾與后妃同居。官給飲食服用。頒詔天下。遂遣使諭故元宗室部落臣民。使各安業。無自驚擾。右丞相汪廣洋罷居高郵。命葬宋理宗頂骨於紹興永穆陵。故元四大王犯大同。擊敗走。擒其三大王。脫忽的帖木兒。移江南民田臨濠。免相三年。寘都尉司及儀鸞司。故元陝西行省宣慰使何鎖及鎮西武諸王率所部來降。秋七月。續修元史成。編均工圖冊。詔建諸王府於所封之國。壬辰。寘水軍二十四衛。蜀將吳友仁寇漢中。傅友德擊走之。丙辰。上覽內藏。慨然曰。此皆民力所供。蓄積爲天下之用。吾何敢私。苟奢侈自娛。是以天下之積爲一己之奉。今國家無事。正宜儉約。以省浮費。八月。討平濟寧盜。詔諭三佛齊諸國。設京畿漕運司督倉。遣使瘞各處遺骸。是月。京師及各省初鄉試。募民輸粟中鹽。九月。改司天爲欽天監。免屯軍歲租。及陝西鹽米。遣降將江文清等招遼陽官民。西洋諸國來貢。冬十月。聘儒士爲諸將於午門。番直說書。召達及文忠。頒師。尋還京。初立礮法。十一月。丙申。大封功臣。封李善長等六人爲國公。湯和等二十八人爲侯。詳年表。賜宴文華殿。因諭之曰。創業之

際。朕與卿等勞心苦力，艱難多矣。今天下已定，朕日理萬幾，不敢斯須自逸。誠思天下大業，以艱難得之，必當以艱難守之。卿等今日安享爵位，優游富貴，不忘艱難之時，以致奢淫，奢淫之至，憂危乘之矣。已遂頒詔天下，乙卯封劉基爲誠意伯，餘進爵有差，故元主子失篤兒等來降，賜第宅居京師。甲子建奉先殿，禮部尙書凱請立東宮官，上曰：朕以廷臣兼東宮官，非無謂也。嘗慮不相能，遂成嫌隙，或生姦謀，離間骨肉。若古江充，可爲明鑑。今父子一體，君臣一心，庶幾無弊，免私販私鑄人死罪。命祭歷代帝王陵寢及無祀鬼神。十二月，命鑄齋戒銅人，立鹽法。趙王杞薨。

四年辛亥，春正月，太師李善長致仕。陸汪、廣洋爲右丞相，胡惟庸爲左丞相，魏公達往北平。上以夏主明昇招諭不服，親祀上下神祇，命中山侯湯和爲征西將軍，率京衛荆湘舟師，由瞿塘趨重慶。潁川侯傅友德爲征伐前將軍，率步騎由秦隴趨成都。諭之曰：今天下大定，惟川蜀未降，朕以明玉珍嘗遣使明事大之禮，故於昇憫其幼弱，屢爲開諭，冀其覺悟，乃惑於羣言，反以兵犯，不可不討。命卿等水陸竝進，勢當必克。但師行在嚴紀律，以懷降附，無肆殺掠。昔王全斌之事，可以爲戒。建壇廟於中都，復孔子子孫徭役，置玉圖書三廣運之記。上用厚載之記，賜中宮。大本堂記賜皇太子，立內城門禁，御史擬憲綱四十條。上親刪定著爲令。中書省上天下府州縣官數五千四百八十八員，令設科試連三年。後三年一舉，定文武歲祿。二月，城大同，改鑄小錢。故元平章劉益以遼東地圖并籍其兵馬錢糧來降。甲戌，上如臨濠。壬午，還京。都督藍玉擊敗敵兵於野馬川。三月，策天下貢士，賜吳伯宗等及第出身有差，罷司農司。玉擊敗王保保。

兵於土刺河。閏三月，賜功臣守墳人戶。收故元山東北平舊軍十萬九千餘戶。隸北平衛。楊璟攻瞿塘不利。湯和以江水漲，駐師大溪。友德進兵克階文，遂進白水江。下緜州，繼拔漢州。詔免江西兩浙田租冊開平王女爲皇太子妃。靖州蠻平。五月，達兵逾嶺戰，敗績。造用寶金牌及調兵符。時湯和駐大溪日久，上切責之。遂進次夔州，擒其元帥龔興，殺溺者無算。文州復陷，守將朱顯忠死之。夏守金川平章俞思率衆詣友德軍降。六月，友德攻成都。廖永忠進兵重慶。夏主與諸臣欲奔成都，昇母曰：「縱往成都，僅延旦夕，不如早降，以免生靈鋒鏑。」昇等遂詣永忠營降。永忠候和，和至，納降。送京師，尋封明昇爲歸義侯。徙山後民三萬五千八百戶散處衛府，復徙各處降民三萬四千餘戶於內地。秋七月，友德圍成都下之。進破崇慶。故夏平章丁世真寇秦川，爲其小校所殺。奏請賞之。上曰：「小校殺主將，非義，勿賞。」八月，淳泥、三佛齊、暹羅、日本、真臘國來貢。克保寧執吳友人蜀地悉平。賑關中倭寇福建。九月庚戌朔，日有食之。郫縣易文通作亂，討平之。冬十月，征蜀將士還京，給功臣佃戶。十一月，征南將士還京。十二月，華雲龍送故元惠王儲王等及金寶牌印於京師。上皆賜第宅優給之。吳禎籍方國珍無田民十一萬餘人充船戶。賞平蜀將士。以友德爲首。楊璟、趙庸、朱亮祖不與。革善世玄教二院。魏國公達還京師，徙歸德侯理歸義侯昇於遼東。五年壬子春正月，詔有犯充軍者發臨濠種田。瑣里國來貢。命王禕諭雲南梁王久留死之。諭琉球定武選法。瓜哇諸國來貢。時王保保爲邊患，上命魏公達出中路，曹公文忠出東路，宋公勝出西路，竝進以清沙漠。命衛公愈討湖貴洞蠻。二月，王師討潮州盜平之。癸未，臨濠火。故元知院阿輦真巴等來降。安南來

貢。詔。蜀。陝。西。負。糧。及。陽。曲。議。茶。易。馬。都。督。藍。玉。敗。王。保。保。於。土。刺。河。三。月。高。麗。賀。平。夏。貢。方。物。請。子。弟。入。太。學。許。詔。以。一。年。半。年。聽。歸。省。夏。四。月。澧。州。及。散。毛。等。諸。洞。蠻。平。廣。東。西。悉。平。五。月。大。將。軍。達。出。關。戰。不。利。斂。守。塞。詔。查。表。孝。子。順。孫。義。夫。節。婦。及。志。行。卓。異。者。六。月。申。宦。官。禁。令。定。宦。官。女。職。制。潁。川。侯。友。德。進。兵。甘。肅。故。元。將。上。都。驢。降。次。蘭。州。趨。西。涼。永。昌。直。抵。瓜。沙。屢。勝。擒。斬。俘。獲。太。尉。以。下。官。軍。畜。物。無。算。文。忠。進。兵。青。海。大。斬。獲。作。鐵。榜。申。戒。勳。臣。作。宮。禁。紅。牌。秋。七。月。文。忠。以。所。獲。故。元。子。孫。官。屬。一。千。八。百。餘。人。送。京。師。上。謂。都。督。府。臣。曰。官。屬。子。孫。有。可。用。者。量。才。用。之。餘。則。令。舊。校。李。伯。顏。不。花。領。之。隸。羽。林。高。麗。王。請。討。耽。邏。以。匿。蒙。古。故。詔。寢。之。選。民。間。婦。女。通。書。數。者。四。十。四。人。年。未。二。十。者。三。十。人。遣。還。倭。寇。沿。海。逐。走。之。永。忠。還。師。湯。和。遇。敵。戰。不。利。八。月。罷。天。下。進。貢。命。造。海。舟。禦。倭。九。月。德。興。平。鳳。泗。諸。蠻。冬。十。月。戊。子。詔。有。雜。犯。死。罪。免。死。發。臨。濠。輸。作。免。應。天。五。府。田。租。申。外。國。三。年。一。貢。之。例。詔。給。蘭。州。諸。邊。士。卒。絛。布。計。十。四。萬。餘。端。疋。靖。海。侯。吳。禎。盡。收。遼。東。未。附。地。尋。還。京。十。一。月。北。征。及。征。南。諸。將。悉。還。京。罷。京。師。及。臨。濠。工。役。加。封。姊。隴。西。長。公。主。爲。曹。國。大。長。公。主。駙。馬。都。尉。李。貞。爲。曹。國。公。停。飼。虎。豹。及。他。禽。獸。虎。豹。送。光。祿。寺。餘。縱。之。土。蕃。邀。烏。斯。藏。貢。物。命。衛。公。愈。率。師。討。之。命。有。司。考。課。必。書。學。校。農。桑。之。績。違。者。罪。之。六。年。癸。丑。春。正。月。乙。巳。諭。來。朝。守。令。曰。慈。祥。愷。悌。身。之。德。也。刻。薄。殘。忍。德。之。賊。也。君。子。成。其。德。去。其。賊。故。惠。及。於。人。爾。等。宜。勉。修。厥。德。以。施。惠。政。以。舉。人。張。唯。等。爲。編。修。入。文。華。殿。肄。業。上。時。幸。取。其。文。親。定。優。劣。每。食。皇。太。子。親。王。迭。爲。之。主。寵。遇。甚。厚。黜。右。丞。相。廣。洋。爲。廣。東。參。政。議。教。練。軍。士。律。二。月。罷。科。舉。舉。賢。良。

海南獻番香。卻之。四川蠻酋叛。平之。禁教坊及天下樂人。不得以古帝王聖賢爲優戲。增築國子學舍。城潞州。三月癸卯朔。日有食之。令有司上山川險易圖。諭諸將不得凌虐民命。魏公達曹公文忠等率師備邊。都督於顯出海東防倭。壬戌。城中都。夏四月。行屯田及中鹽法。定開國功臣已沒者諡號。辛丑。詔曰。賢才國之寶也。古聖王汲汲於求賢。蓋爲賢才不備。不足致治。鴻鵠之能遠舉。爲其有羽翼也。蛟龍之能騰躍。爲其有鱗鬣也。人君致治。以有賢人爲之輔。今山林有德行文藝可稱。有司以禮送京師。五月。武朔擾擊走之。六月。免河南旱蝗田租。秋七月。胡惟庸爲右丞相。白登擾擊敗之。八月。破北兵於天池山。斬其左丞忽都等。復破之於答刺海。度僧道九萬六千餘人。徙朔州民於內地。九月。代畿郡縣浙江江西今歲糧以緜布乙卯。命諸司常事啓皇太子。重事乃奏聞。戊午。鑄太和鐘成。改臨濠府爲中立府。徙邊民八千戶實之。暹羅斛國王進表中宮。卻之。後再進再卻。辛丑。卻高麗貢馬。眞臘入貢。冬十月。大明律成。江夏侯周德興招撫鳳儀等處一百一十七處民來附。魏公達敗故元兵於懷柔。擒其平章康同僉。復破之於大同。十一月。立元世祖廟於北平。停潞州貢人參。太原貢葡萄酒。上謂侍臣曰。朕聞人參得之甚難。豈不勞民。今後不須進。又曰。聖王不以口腹累人。宋太祖令子孫不得遠方取珍異。甚得貽謀之道。閏十一月。詔沿江蘆場聽軍民採用。定糾劾內官法。十二月。濬開封澧河。併僧道寺觀。每府州縣存其一。及禁女子爲尼。三佛齊國入貢。故元雲南梁王殺我使臣王禕等。七年甲寅。春正月。詔屯田於彰德濟寧眞定文忠敗故元兵於白登。俘其國公索羅帖木兒。二月。丁酉朔。

日有食之。修治闕里及其祭器樂器法服。其田產荒蕪者蠲稅。仍設孔顏孟三氏子孫教授。訓其族人。臨江侯陳德以所獲故元帥秃魯迷失等二百餘人送至京師。三月。蘭州民郭買的叛。誘番入寇。其兄著沙給斬之。上以兄故有罪。弟手刃之。乖天倫。詔止勿賞。轉漕粟於陝西。詔和子興等還師。夏四月。都督玉等攻拔興和。桂陽蠻叛。討平之。魏公達進故元俘五千餘人。命宋公勝等復鎮北邊。尋召還。遷塞外人於內地。上元縣民史廣妻李氏一產三男。詔給資乳之。有司奏致齋用犢。上曰。太牢非常用。致齋三日供三犢。徒傷物命。無益事神。賑蘇州饑民。發米三十九萬有奇。減蘇松嘉湖田租之半。五月。大雩。雨。六月。日本及西域諸國入貢。戊午。立皇陵祭署官。秋七月。曹公文忠出塞。大獲而還。八月。申兵衛之政。改中立府爲鳳陽。御史答祿與權請行禘禮。上以始祖所自出不可考。寢其議。九月。詔設六科給事中。擢釋氏郭傳爲翰林應奉。遣崇禮侯買的里八剌北還。厚賜。仍與其父愛猷識哩達臘書。冬十月。己未。皇長孫雄英生。命徙江南民十四萬於中都。置秦州茶馬司。十一月。哈蒼出復寇遼東。敗去。詔赦。詔有過官發鳳陽者還職。罷四川茶鹽運司。十二月。西蕃諸國來朝。封卜烟帖木兒爲安定王。詔鑿石灰山河。詔免籍方氏温台明故兵。

八年乙卯。春正月。汰冗官。命有司訪窮民無告者給衣糧屋舍。詔立社學於天下。命遣衛公愈等往陝西。中山侯和往眞定及彰德。永平各屯田戍守。奪濟寧侯顧時六安侯王志俸。以酬飲故。二月。享先農。初躬耕籍田。申明馬政。三月。詔造大明寶鈔。召大將軍達等還京。夏四月。上幸中都。尋還京。贊善大夫護軍誠

意伯劉基卒。罷中都役作。五月。市馬西蕃。命潁川侯友德等備邊。減漢中田租。六月。諭諸國三年一貢。若其王立則世見。秋七月己未朔。日有食之。辛酉。改作太廟。詔免江南湖北旱租。許百官聞親喪不待報卽歸。國子生未娶者。給衣錢婚聘。八月。故元將王保保卒。開登萊河。京師大旱。九月。改建大內宮殿。故元將張致道犯邊。捕斬之。召湯和等還京。冬十月。築鳳陽皇陵城。命皇太子秦晉楚靖江諸王講武中都。以贊善宋濂等從。因事規益。浚涇陽洪渠堰。十一月。增設六部官。十二月。陝州民獻天書。斬之。納荅出入寇。擊破之。擒斬無算。遁去。

九年丙辰。春正月。起鳳陽屯田官吏五百餘人。量才用之。册魏公達長女爲燕王妃。命友德等屯延安。二月。奉安州民得玉簡十六獻之。詔仍瘞其地。北部落伯顏帖木兒請和。詔諸將還。留友德獨備邊。三月。免天下田租。命秦晉燕等六王往鳳陽觀祖蹟。伯顏帖木兒犯邊。友德大破之。夏四月。日本來貢。庚戌。京師不雨。五月。雨。禁秦蜀軍民入西蕃互市。故元國公九住寇陝西。擊敗之。六月。詔改行中書省爲承宣布政使司。秋七月癸丑朔。日有食之。免蘇松嘉湖租。伯顏帖木兒復入寇。友德大破之。餘衆縛之以降。八月。遣官祭歷代帝王陵寢。九月。召六王還自鳳陽。故元太保神保等來降。閏九月。以災異。詔求直言。罷宏文館。冬十月。太廟成。四川黃平等處蠻寨平。十一月。徙山西眞定民於鳳陽。西域獻良馬。吐蕃寇西塞。命衛公愈等討之。定太廟侑享功臣。十二月。賑江南湖北。時主事茹太素上封事。累萬餘言。可行者少。上命定建言格式。頒示中外。上以故元官蔡子英哭思故主。敕有司送之歸塞北。置寧夏諸衛。

十年丁巳春正月罷匠作司思文監命都督玉練兵東昌詔自今仕官有田土者除輸租外悉免役著爲令蘇松浙西大水賑之夏四月征西將軍愈等討吐蕃破之斬獲數萬畜物稱是五月命韓公善長曹公文忠總中書省都督府御史臺同議軍國重事上因內官偶有言及政事者卽日斥去故元安定王爲其下所殺尋獲誅之許邊民團結防邊王基乞發山海寶藏及禁職官言事黜之戶主事趙乾往賑荆蘄坐遷延伏誅六月詔政事啓皇太子處分奏聞秋七月初命監察御史巡按州縣諭之曰凡爲治以安民爲則勿要名以取譽朕深居九重所賴以宣布條章達民情者在汝等其慎之八月詔改建園丘於南郊淡巴國遣人入貢暹羅斛國貢方物選武臣子弟入國學讀書九月免浙江田租冬十月社稷壇成賜百官公田封沐英爲西平侯己卯皇孫允炆生是爲建文皇帝宥天下罪人杖以下十一月瓜哇國入貢丁亥合祀天地於奉天殿都督濮眞征高麗被執不屈死之四川土酋董貼里叛討敗之十二月己巳朔日有食之董貼里來降錄死事及勞故功臣子孫五百餘人授官有差置神宮監復守謙靖江王徙雲南尋安置鳳陽

十一年戊午春正月封皇子椿蜀王柏湘王桂豫王樸漢王植衛王改封吳王櫛爲周王進封中山侯和爲信國公松潘蠻作亂討平之置松州衛敕中書省議二月減鹽價三月秦晉二王之國夏四月重建皇陵碑上自製文元嗣君愛猷識理達臘殂子脫古思帖木兒立凌淖沱河俘四川茶峒獠悉宥之製牙牌給文武朝臣五月免蘇松嘉湖逋租六十五萬有奇西夷犯河州擊破之六月遣使祭故元嗣君於沙漠

五開洞蠻叛。討平之。秋七月己未。皇孫高熾生。是爲仁宗皇帝。禁謫戍人不得上封事。蘇松台揚海溢。賑被災者。八月。免應天太平鎮江諸府秋糧。西蕃寇洮州。命西平侯等討之。尋平。九月。上感劉繼祖與宅兆葬皇考妣。追封爲義惠侯。十二月乙巳朔。日有食之。山西邊將送所獲。故元平章完者不花等至京。遣使還之於驢兒。以璽書諭之。遣高麗使人還。敕諭責之。故元四大王據蘆茅山詣晉府降。上以元子孫宥之。

明書卷三

本紀

太祖高皇帝本紀三

十二年己未春正月合祀天地於南郊二月命曹公文忠理隴西軍務命信公和等練兵臨清取播州下
疊州三月定遣使外國儀注夏四月免北平稅課遣工匠還家賜鈔錠日本貢方物秋七月召曹公文忠
還京八月討平眉縣亂賊彭普貴安置日本使僧於陝西九月西平侯英平西番班師還占城入貢冬十
月詔定致仕官居鄉禮十一月封藍玉十二人爲列侯十二月諭中書選卜筮官安置右丞相廣洋於海
南道賜死詔徵天下博學老成之士時江西布政司沈立本遣使招故元吏侍郎伯顏子中不就飲鴆死
開西安憩水渠

十三年庚申正月左丞相胡惟庸御史大夫陳寧中丞涂節等伏誅辭連李善長陸仲亨上以皆起兵時
腹心股肱特宥之宋濂孫慎坐黨逆被刑籍其家濂械至京上怒欲誅之賴皇后諫得免安置茂州道卒
罷中書省更定六部官秩改大都督府爲五府詔子孫不許立丞相臣下敢有奏立者處以極刑詔免天
下今年田租二月減蘇松嘉湖稅糧十之二永爲制太師韓公善長罷詔舉聰明正直孝弟力田賢良方

正文學術數之士。三月。燕王棣王北平之國。遣應天府官祀歷代忠臣曹彬等五廟。故元國公火脫赤等。屯和林爲邊患。上命沐英將兵討之。踰賀蘭山。涉流沙。獲其全部以歸。夏四月。都督張赫等率舟師海運。都督濮英襲元兵於西涼。大破之。開道通商。命羣臣各舉所知。五月。雷震謹身殿。肆赦。免天下田租。罷御史臺及提刑按察司。罷齊潭各王府役作。置諫院官。免太原大同鹽課。秋七月。詔京官復其家。罷祕書監。罷寶鈔提舉司。命溪洞民居京師。悉聽還鄉。八月。給天下師生廩膳。九月。日本再貢。卻之。置四輔官。十月。諭祭不備物者論如律。非土產者勿罪。詔求真才。十一月。魏公達還自北平。十二月。遣使諭日本。

十四年辛酉。春正月。乃兒不花等寇邊。命達和友德率師討之。創編賦役黃冊。上諭賞罰。或有失當。宜明白執論。罷造兵器。新授官各舉所知。詔求賢。近臣勸上儲財備用。上諭之曰。天地生財以養生。人君以養民爲務。君上儲財與庶人不同。庶人爲一家計。君爲天下主。當散財於天下。漢武用桑孔諸人剝民取利。海內苦之。宋神宗用王安石理財。小人競進。天下騷然。此爲可戒。孔子曰。百姓不足。君孰與足。此何謂也。言者慙退。二月。楚王楨之國。覈實天下官田。改明州府爲寧波府。三月。大赦。命宋公勝節制河南。詔免應天五府秋糧。頒五經四書於學校。夏四月。改建國子學於雞鳴山下。大將軍達等率師出塞。至北黃河。夜襲灰山敵營破之。遂班師。西平侯英出古北口。執故元知院李宣等。并其部而還。五月。建軍衛廬舍。官員居室。五谿蠻作亂。討平之。六月。捍海塘成。安南入貢。上惡其作姦生隙。敕自今關隘勿納。秋七月。復大理寺。九月。命友德爲征南將軍。討雲南。敕播州宣慰使楊鑑助討雲南。遣西域僧歸。冬十月。壬子朔。日有食。

之命法司論囚。會翰林院等官議定。乃奏定考課殿最法。周王橚之國。漳州古田及衢處溫賊亂。各討平之。覆天下廢寺田入官。諭吏兵部武臣子志於學者用之。十二月。僧宗泐自西域還。隨入貢者甚衆。征南將軍友德下普安。進曲靖。擒梁王將達里麻。梁王走死。進克雲南。封皇子權爲寧王。王大寧。令翰林院平駁諸司奏啓。

十五年壬戌。春正月。故元威楚平章閻乃馬歹等降。壬午。故元曲靖宣慰司怯列該等降。獻金銀銅印七十四。金牌馬匹。諭雲南民勿得挾兵刃。徵江臨安等處俱下。始改國子學爲國子監。命天下朝覲官各舉一人。二月。賑河南水災。雲南平。詔天下選致仕武官分守雲南。以播州隸貴州。克大理。其餘府州俱平。閏二月。賜雲南土酋冠帶。卽其位地。三月。改儀鑾司爲錦衣衛。夏四月。詔天下監學通祀孔子。免南畿浙江江西河南山東田租。廉州官奏請取水銀及青綠紫泥。上以勞民傷財。切責止之。置司經局。日本入貢。遷故元梁王威順王家屬居耽羅。雲南設儒學。烏撒諸蠻叛。友德討平之。五月己酉。皇長孫雄英薨。追封虞王。諡曰懷。太學成。上幸學謁先師。侍臣謂孔子雖聖人臣也。祇宜一奠再拜。上曰。孔子明道德以教世。豈可以職位論。朕君天下。敬禮百神。先師宜特加奠崇。遣使求經。明行修之士。六月。命國學官年老者免朝參。運糧遼東海多溺死。命議遼東屯田法。秋七月。免民間歷日工本錢。八月。詔禮部設科舉取士法。定三年一試。著爲令。頒學校禁例。審決重囚。征南將軍友德檄定百蠻。威加八譯。上敕勞之。丙戌。皇后馬氏崩。上哀甚。矢終身不立后。諡曰孝慈皇后。徵至秀才分六科。敍用。九月。經明行修之士鄭韜等三千餘人入

見分別授官鑄監察御史印文曰繩愆糾謬桂彥良上太平治要十二事詔嘉納之庚午葬孝慈皇后於孝陵禮成封李新爲崇山侯雲南諸彝復叛沐英討平之冬十月廣東平趙庸班師考覈儒學官詔自今以繁文出入人罪者罪之乙未齊王搏之國錄囚命御史袁凱送東宮覆審遞減之還復命帝問朕與東宮孰是凱奏曰陛下法之正東宮心之慈上喜設殿閣大學士以邵質吳伯宗吳沈宋訥爲之徵耆儒鮑恂余銓張長年爲大學士辭不拜十一月修國子監書板十二月浚儀眞河復設僧道官遂定服色吳沈薦方孝孺學行上召見喜其舉動閑雅稱曰莊士曰老其才而用尋爲讎家所誣應籍其家上見名釋之十六年癸亥春正月以曹國公文忠領國子監事遣使諭琉球三王勿互爭廢農殘民命遣行人十員分諭雲南新民命魏公達率列侯復鎮北平命徒流而下代農民力役贖罪諸蠻酋來朝獻馬二月上觀唐太宗帝範謂侍臣曰此雖非帝王精微之道然語意備至曲盡物情使其子孫克守其言亦足爲訓初令儒學歲貢生員上以雲南平諭友德班師沐英留鎮緬車里八百媳婦內附三月永免鳳陽濠稅役夏四月賜諸國進貢者勘合五月免應天五郡田租故元海西丞阿魯灰願內附令都司上衛所城池地里圖六月議三審五覆法秋七月各省錄囚八月壬申朔日有食之戒武官無受囑撓有司九月申國公鄧愈討龍泉山賊尋平拓皇覺寺改大龍興寺命給事中清天下軍命來朝官預進功業冊冬十月召還魏公達等卻高麗貢十一月定朝參官坐定歷代名臣祀典十二月賜京民元旦元宵節錢開濟等有罪伏誅

十七年甲子春正月魏公達復鎮北平信公和巡海道築沿海諸城以孔子五十七代孫訥襲衍聖公更定都察院官須文達那國入貢廣平獐平給丁憂官祿三月大赦令科舉薦舉並行同知軍國事曹公文忠卒追封岐陽王諡武靖友德班師進封穎國公餘將校賞賚有差夏四月改建三法司於太平門外更定內官品秩增築國子學舍高麗乞以馬代金許之六月詔天下朝覲官上人民土地圖大成樂器成頒天下儒學制祭服秋七月禁內外官文移往來創建朝天宮詔百官迎養老親者給舟車徵安南糧助雲南放北平降卒爲民盱眙人上天書誅之八月定考績法九月擢考最官通判戴莊等左右僉都御史有差冬十月魏公達上北平將士數乙丑册李氏爲淑妃攝中宮事賑河南北平水災閏十月魏公達還京十一月命遼東立學校胡昱請討納荅出不許弛世婚禁十二月詔大修祖陵

十八年乙丑春正月考察朝覲官陞賞處分有差高麗等國貢方物賜賚有差命天下第民戶分賦役輕重慶遠蠻寇韋富作亂討平之二月初昏五星并見詔求直言錄軍國重事太傅右丞相魏公達薨上慟悼罷朝親爲文祭之追封中山王諡武寧三月策士是科得練子寧黃子澄松州羌反討平之增造京官居舍上以諸進士未更事俾觀政諸司更定翰林官制詔久任罷考功監初選庶吉士夏四月修海蓋復三州城余燠以吏尙書擅逐祭酒宋訥誅之訥如故郭桓等以戶部盜官糧伏誅思州蠻作亂信公和討平之五月罷判祿司信公和乞骸骨還鳳陽許之命張赫運糧七十萬往遼東六月增錦衣衛力士取民萬四千充之秋七月平五開峒蠻免陝西田租封王禡爲高麗國王賜故王顥祭諡恭愍八月遣公侯伯

還鄉里。命宋公勝、穎公友德等備邊。賑河南。九月，古州蠻叛。楚王楨討平之。築障河隄。冬十月，御製大誥成。頒行天下。築觀星臺。赦孟氏子孫輸作者。徵天下武官赴闕。召宋公勝還。湘王柏魯、王檀各之國。命蜀王椿居鳳陽。十一月，詔免山東、河南稅糧二百八十萬有奇。潭王梓之國。信公和班師。十二月，詔舉孝廉。建寺雞鳴山。祀梁僧寶誌公。罷鐵冶。

十九年丙寅。春正月。穎公友德等率師討雲貴諸蠻。平之。賑北平、河南。罷四川茶馬司。賓雅州茶馬司。三月。罷審刑司。納哈出出營金山。數侵東塞。復頒五經四書於學校。夏四月。賜天下官柴炭鈔。丁酉。李景隆襲曹國公。河南大水。命贖民鬻子。五月。市馬於雲南。妖僧玉林等謀亂。建元天定。捕誅之。靖州蠻平。程鄉賊鍾文遠作亂。伏誅。平越蠻楊孟等作亂。友德討平之。六月甲辰。詔曰。昔元末播蕩。海內憂兵。所在黔黎。苦殃甚矣。如此者一紀有奇。朕命將削平。民得粗安。十有九年。然姦臣在位。謀間臣民。恩本施而弗及。德將布而沮行。政乖理悖。莫甚於此。先王之道。未究於行。失存問。高年及矜恤。繆寡孤獨。今特命有司。養老尊賢。報功賑貧。恤孤薦士。俾民得所。又詔曰。天下有經明行修。練達時務之士。年七十以上者。郡縣禮送。京師。賑青州。開封。旱災。平越苗叛。穎公友德討平之。秋七月。賜中山王等十四家鳳陽東西山場。八月甲辰。皇太子往盱眙。修陵薦衣冠。號曰祖陵。九月。復置寶鈔提舉司。雲南屯田。高麗占城入貢。以磁器賜眞臘等國。冬十月。給已故武官有父母者俸。免大同鹽稅。日本來貢。卻之。長興侯耿炳文上陝西訓練軍士數十二萬有奇。封何眞爲東莞伯。十一月。長興侯炳文率陝西軍移北平。十二月。築後湖城。岷州及巨津。

寇亂皆破之。安南入貢。

二十年丁卯。春正月。命宋公勝。穎公友德等率師二十萬討納哈出。焚錦衣衛刑具。己未。詔大修闕里孔廟。築高郵隄。寘兩浙防倭衛。所有奏言陝州開銀礦者。不聽。二月。進魚鱗冊。閱武午門外。三月。納哈出屯慶州。勝師出松亭關襲破之。擒其子弗藍等。遂城大寧。復役太原鐵冶。高麗送流民來歸。市馬耽羅。酬其直。徙民開成都荒田。夏四月。防倭築衛所。禁蕃使以麻鐵出境。罷磨勘司。五月。納哈出北走。六月。臨江侯陳鏞從北征。失道戰歿。勝師踰金山。其全國公觀童來降。閏六月。都督濮英殿軍。爲伏所乘。死之。丁未。宋公勝敗納哈出。降其衆。隨班師。己酉。元司徒完者不花來降。徵孝廉。秋七月。罷武成王廟。以太公從祀。帝王廟。北征所降。獲輿漢軍雜處。常茂驚潰。逮之。八月。行人唐敬等還自眞臘。其國王來貢。隨賜王金印。故元尙書塔不歹來降。市耕牛萬頭。往雲南屯田。銷六科關防印記。九月。封納哈出爲海西侯。安置鄭國公。常茂於龍川。詔永昌侯藍玉等清沙漠城。西寧回回等國入貢。乙未。萬壽節。上年六十大賀。冬十月。封朱壽軸。驢侯。張赫。航海侯。劍州酋楊奴等叛。討平之。罷宋國公馮勝歸鳳陽。惠州賊謝以青作亂。討平之。十一月。復置陝西鹽課司。信公和海上還。十二月。免徵鳳陽商稅。賜武官復職者千餘人。賑山東。正高麗國疆界。

二十一年戊辰。春正月。命穎公友德統番漢軍征雲南諸蠻寇。百夷思倫發叛。擊破之。尋平。大將軍玉送。故元將士及寡婦萬餘人至京。上命衣食之。及宣敕金銅牌入京。詔天下驛馬孳生者聽民鬻。故元將童

信來降。命曹公景隆率列侯防守漠北。廣西龍川捕象英德。及故元廣西軍叛。皆平之。二月。定班軍校藝法。詔以歷代名臣從祀帝王廟。定貴州貢數。散處塞外人於各衛。丁月米一石。調北平軍赴大寧代。重建天界寺。故元四大王來降。三月。策士賜任亨泰等。及第出身。有差。遣列侯從大將軍玉出師北伐。增修南郊壇壝。遣新進士行監察御史事。分巡郡邑。朵只生番入寇。討平之。夏四月。玉師次捕魚兒海。脫古思帖木兒敗走。獲其子地保奴等。及故太子必里禿。并妃主五十九人。又追獲吳王朵兒只代。王達里麻等二千九百餘人。軍士男女七萬七千餘人。得寶璽金銀畜物無算。捷至京。進封玉涼國公。諭西平侯英移兵景東。倘來歸納之。五月甲戌朔。日有食之。詔曰。元世祖入主中國。有恩惠及人。豈可無後。欲封之。又不可久居內地。遣使護送至琉球。厚賚之。命善撫視。詔減豐城租五之二。袁州民稱彌勒佛惑衆者。捕誅之。敕賜信公和還鄉。六月。東川諸蠻叛。命友德率列侯討之。秋七月。置北平行都司於大寧。故元王保保弟脫因帖木謀叛。戮之。詔天下武臣致仕者。予半俸。海西侯納哈出卒。子察罕嗣。改封瀋陽侯。八月。北征諸將還。罷天下所舉耆宿。金山侯濮英卒。贈樂浪公。改封子璵爲西涼侯。遷山西澤潞實北平河南曠地。召天下武臣任文官者。悉還京。九月。航海侯赫還自遼東。賜新除官衣帶。丙戌。秦晉等九王來朝。凡七日。敕歸國。越州酋阿資叛。友德討平之。隨遣將分討。東川悉平。眞臘入貢。造軍戶圖籍。賜御史解縉歸。諭其父以才生甚難。大器晚成。令益進學。十年來朝。進封常昇開國公。故元國公老撒等來降。十一月。女直千戶孛羅哥至沅江。叛走。尋平。十二月。安南黎季犛弑其主焯。高麗國王遜位於子昌。

二十二年己巳春正月拓大寧城占城入謝罪改大宗正院爲宗人府罷供奉司友德進兵越州阿資遁普安擒獲甚衆阿資尋降詔涼公玉經理四川二月禁武臣不得預民事九溪平越松藩蠻各叛討平之三月大將軍友德率二十四將軍還軍駐湖廣防西南夷詔遣公侯各還鄉運鈔於北方市糴備賑夏四月命江南民田淮泗官給農具免賦役三年改給事中卓敬等八十八人爲元士尋復舊起山東流民居京師復造一十至五十文鈔賑山東湖廣故元諸王來降俾居暹羅厚遣之都勻苗叛破平之置詹事院五月置朵顏三衛於兀良哈遣使敕諭故元遼王阿剌失里等各爲指揮分居三衛僉都御史黃政與子琬從征雲南還至普安遇寇皆死之六月以孝廉茂才爲行人試用之收銅鑄當二當十錢免河南夏稅竝寘各省寶源局友德平狼寇寘興隆衛秋七月友德有疾召還諸將皆班師除瑞金縣徭役清諸司案牘惟國子翰林勿問周王橚棄國之鳳陽遷雲南尋召還國令天下舉年高有德識達時務言貌相稱者更定大明律詔州賊亂討平之九月丙寅朔日有食之冬十月徙民墾閒田復增築國子監學舍十一月擢故元御史大夫福壽子陳襲福爲太僕少卿思倫發入貢百夷遂平安南遣使來朝十二月倭掠海寧命列侯練兵河南山陝遼東聽征調授六尙局宮官庚戌魯王檀薨高麗人幽其主禍廢其主昌二十三年庚午命燕王棣率友德等征漠北貴州苗贛賊湖蠻各叛竝討平之蜀王椿之國增江北養馬人戶定竈戶法二月考定王國合祀諸神涼公玉俘西番男女數千人來西番平捕河南妖寇朱黃頭等誅之築歸德黃河隄三月燕王率公侯出古北口故元太尉乃兒不花丞相咬住等來降至京命爲工部

侍郎等官。賜衣冠鈔錠有差。燕王不見敵而還。命征南將軍胡海等伐五溪撒毛諸洞蠻。自是悉平。故元國公藏卜來歸。夏四月。潭王梓與其妃自焚死。無子國除。築京師外城。詔免滌陽田租。官田免半。免湖廣被寇處田租。五月。播州貴州各宣慰司各遣其子入太學。許之。殺太師韓國公李善長。御史解縉等疏救不聽。播逆黨公侯等二十人於天下。詔求仙人張三丰。以道士邱清玄爲監察御史。辭不受。擢太常卿。六月。施南土官覃大勝叛。討平之。北征穎公友德等。西征涼公玉等。各還京。選用耆民有才德知典故者。秋七月。江南北海溢。清衛所將卒。八月。改鑄監察御史印。定使節制命。九月。庚寅朔。日有食之。冬十月。命誠意伯劉基孫薦襲封。其子仲璟爲閣門使。詔選舉勿錄隸卒。賑山東北平河南水災。嚴交通外番之禁。十一月。詔曰。善爲國者。惟以生道樹德。不以刑殺立威。自今惟犯十惡及殺人者論死。餘皆輸粟北邊以贖。高麗貢玳瑁筆。分賜翰林。罷天下有司織段疋及造弓矢。耆民百六十七人授官有差。遣使購遺書。是年大殺京民怨逆者。不分臧否無算。

二十四年辛未。春正月。築海隄。免山東稅糧。敕穎公友德率列侯備邊。二月。改封豫王爲代王。漢王爲肅王。衛王爲遼王。命種桐棕等樹於朝陽門外。各五十萬株。三月。戊子朔。日有食之。策士賜許觀等及第出身有差。友德兵出東塞。大獲而還。夏四月。鑄渾天儀。辛未。册皇子橈爲慶王。權寧王。榿岷王。穗谷王。松韓王。模藩王。楹安王。樞唐王。棟郢王。櫛伊王。命齊王樽獵開平。命友德討故元遼王阿札失里於朵顏。師出遁去。五月。命漢衛谷慶寧岷六王練兵臨清。浚縣縣錢湖。捕誅分宜妖民。賑北平水災。清理釋道教。嚴其

禁。久旱。清獄囚。頒書籍於學校。秋七月。穎公友德率兵深入黑嶺。鴉山。洮兒河。熊皮山等處。大獲人馬而還。徙天下富民五千三百戶實京師。免應天五府田租之半。八月乙卯。命皇太子巡撫陝西。秦王棧有罪。召還京師。尋遣歸。黃巖海賊引倭入寇。捕斬之。九月癸巳。皇太子至西安。都督宋成征哈密。大獲而還。罷造龍團茶。惟採葉以進。罷關門使。冬十月。命宋公勝等陝西練兵。遂請討西番。不許。十一月。占城入貢。以其國臣殺主絕之。更造黃冊成。十二月。皇太子還自陝西。獻相宅圖。五開蠻復叛。討平之。阿資復叛。復降。治四川道路。

二十五年壬申。春正月。河決開封。築隄免其田租。俞通淵進兵古州等處。蠻平。靖江王守謙以罪置卒。命其贊儀爲世子。宥死罪。輸粟於邊。晉周燕楚湘五王來朝。二月。免山東魚課。召在外公侯伯皆還京。命學校兼習射。高麗李成桂幽其主瑄而自立。三月。命宋公勝等分往各省練兵。屯田。罷築鳳陽城。敕州賊亂。封平之。命涼公玉征西番。夏四月。建昌蠻叛。擊敗之。丙子。皇太子薨。諡曰懿文。上御東閣門。召廷臣曰。朕老矣。太子不幸。若此。命也。古云國有長君。社稷之福。朕第四子英武似朕。欲立爲太子。如何。學生劉三吾對曰。陛下言此。置秦晉二王於何地。遂不果。五月。招諭河州諸番。皆降之。秋七月。修連雲棧。貴州苗寨悉平。治貴州險道。雲南土官王春叛。討降之。八月。代王桂之國大同。琉球遣子弟入監讀書。上喜。賜閩人三十六姓。以閩事誅江夏侯周德興。庚申。葬懿文太子。邊將獻塞外所獲於京師。上擇官之。令齋榜招諭。穎公友德等往山西抽丁屯守。建官署。以胡黨誅靖遠侯葉昇。鑄各按察分司印四十八道。庚辰。立皇孫允

熉爲皇太孫。疏溧陽河道。詔訪求知歷數者。爵列侯。周敬奏言。國祚修短。在德厚薄。非歷數可定。陛下但當修德。則祚永長。何必問小技之人。上納止之。因言及慎刑止殺諸事。上頗納之。冬十月。度正陽門外地。爲上林苑。尋以妨民寢其事。先是西平侯英卒。追封黔寧昭靖王。子春嗣。鎮雲南。更高麗爲朝鮮。十一月。金水橋成。涼公玉獲。月魯帖木兒誅之。十二月。籍廣東島人爲兵。宋公勝等皆還朝。命諸兼東宮師保官。穎公等復往山西河南練兵。

二十六年癸酉。春正月。冊有子諸妃免朝覲。寘越嶲衛。救周晉王塞外築城屯田。癸亥。肅王禩。遼王植。慶王櫛。寧王權。各之國。二月。寘宣大十七衛。廣寧七衛。以謀反誅藍玉。坐黨者千餘家。皆殺之。因誅詹徽等。朝鮮進馬。西番貢龍馬。瓜哇緬甸國皆來貢。三月。代王出塞。夏四月。太白經天。京師大旱。求直言。錄囚徒。詔郡縣遇饑先賑。後奏。絕安南朝貢。五月。越嶲侯俞通淵有罪削爵。六月。戒公侯僭侈。秋七月。甲辰朔。日有食之。召諸王入朝。選秀才張宗璿等爲東宮官。捕斬妖賊王天錫。開騰脂河。赦胡藍株連人。道州普定。樂昌各亂。俱討平之。九月。賜京師寺田。冬十月。宥朝鮮罪。革中都國子監。復有罪削爵者。官十一月。雲貴蠻悉平。徙封岷王於雲南。閏十二月。罷越嶲中鹽。

二十七年甲戌。春正月。復寘平陽鐵冶。再歸併僧道。丙寅。爲諸皇孫選婚。練兵防倭。罷諸司公宴。二月。免荒田租。三月。策士賜張信等及第出身。有差。命天下種桑棗。令韓王松藩。王模。徧省秦晉燕周齊王。甲禁元俗嫁娶。收軍器。夏四月。罷司牧局。五月。卻安南貢。改移文稱聖旨者。曰欽。六月。全州獠亂。討平之。秋七

月益兵備倭。八月，新建京師酒樓成，命天下修水利，鈔法沮壞，禁用錢。九月，撒馬見罕入貢，遼東屯田十年始收租，停岷府工。冬十一月，阿資復叛，西平侯春討之，遁走。乙丑，勒太子太師穎國公傅友德自殺。十二月，擊廣西南河，殺定遠侯王弼，貴州蠻亂，討平之。

二十八年乙亥，春正月，命周興捕野人，階文平，敕寧正從秦王檄征洮州，沐春討阿資，擒斬之。二月，殺宋國公馮勝，復分宜鐵冶，徙民墾東昌閒田。三月，谷王穗之國宣府，癸丑，秦王棧薨，罷太僕寺官，以馬隸有司討西番破之。夏四月，停遼府工。五月，四川賊平。六月，肅王樸之國甘肅，四川雲南犛地立學校。周興等兵至黑松林，獲男女畜物，不及戰而還。己丑，禁黥宮腓，劓之刑。秋七月，確山縣野蠶成繭，羣臣請賀，上曰：如此繭可以衣被天下，則當賀一邑，偶然何賀爲？戊午，詔儒學生始讀春秋。方士獻丹書，卻之。詔大臣犯重罪得免者列九品後。八月，楊文等討趙宗壽，尋降來朝。信國公湯和卒。九月，岷王榷之國雲南，燕王獻嘉禾，上製嘉禾詩賜之。崇山侯李新有罪，誅免山東及應天五府稅糧。閏九月，冊燕王子高熾爲世子。定宗藩歲賜祿米。冬十月，冊馬氏爲皇太孫妃，蠻寇悉平，設衛所守之。十一月，徙民二萬戶於京師，充倉夫，討貴州廣西土官，悉平之。命魏公輝祖往陝西練兵，海外諸國重譯來貢，詔天下新栽桑，蠶免起科，停築邊城，朝鮮入貢，表文不遜，留使詰撰文者罪之，乃遣使還。楊文等班師，命傅安等使西域，趙達等使暹羅解。

二十九年丙子，春正月，疏西定水渠，定擒獲倭賊賞格，榔桂蠻亂，胡冕討平之。二月，緬國百夷相攻，遣行

人諭解之。陝西軍士老幼悉徙黃河南岸屯種。三月，燕王出塞逐寇，遁去。清水江蠻叛，捕戮之。夏四月，增海運糧至八十萬石。五月，築河防。貴州亂，殺士官，討平之。六月，捕廣平叛蠻三千餘人，俘至京師。秋七月，丁振禦倭，卻逮誅。八月，寘開平四衛，思恩土賊平，免太平五府田租，修興安三十六隄，溉田，遂通漕運。朝鮮入貢，送撰表文人，上釋之。封閉延安三郡鹽池，詔曰：凡首壬辰至甲辰及十二年以前武臣，雖致仕賜晉一級。冬十月，命屯軍更代。甲寅晦，皇曾孫文燿生，詔勿賀。十一月，鑄渾天儀，諭責安南使還司明侵地，討永寧賊及瀧水蠻。

三十年丁丑，春正月，諭朝鮮勿用輕薄人，撰文啓釁。長興侯炳文等備邊，漢沔盜起，肅王樸率諸將討平之。寘行太僕寺於山西等五處，命楊文屯田遼東，城開平，改禮儀司爲鴻臚寺。二月，遷江西貧民於武陵，遣靖江世子贊儀省諸王。甲辰，廷臣請討安南，上曰：彼恃頑終必取禍，姑宥之。三月，策士賜陳郊等及第，出身有差。平廣東蠻寇李敬宗，諭蜀王椿嚴茶馬禁，申疏鈔法，禁金銀交易，刑部署尙書夏愨請加叛逆三族法，不許。夏四月，敕晉燕二王備邊，申禁海外互市。戊子，市馬西番，古州蠻叛，擊破之。革鐵冶。五月，壬子朔，日有食之。朝鮮貢馬，以非時卻之。徙山西實山東曠土，復三年，築遼王府。天下講讀大誥，師生十九萬三千餘人來朝，賜鈔遣還。六月，再策士，賜韓克忠等及第，出身有差。劉三吾以前典試事賜死，駙馬歐陽倫以販私茶賜死。秋七月，賜左都御史楊清死，以私其繫獄鄉人，改狀草。八月，以稅戶人湯行等爲吏部侍郎等官，諭王府不得私有興作。九月，築銅鼓城。冬十月，平緬蠻刁幹孟逐思倫發，命西平侯春率

兵討之。十一月，重建國子監先師廟成。宥武定侯英擅殺家奴罪。十二月癸未，上不豫。

三十一年戊寅，春正月，令山東河南墾荒田，暫開鐵冶，設學於虎踞關，選儒士，倭掠山東，擊敗之。考授舉人爲教官，劣者爲州首領。古州蠻平，楊文還擒獲叛酋賈哈刺。三月，定武官承襲例。己未，晉王桐薨，賜琉球國王冠帶。夏四月，罷回回司天監。廷臣請討朝鮮，不許。五月，西平侯春討刁幹孟，大破擒之。開四川鹽井。甲寅，上不豫。燕代遼寧谷五王率諸將出北平備邊。有司請徵徙耕民田租，命再復一年。閏五月乙酉，上崩於西宮。壽七十一。上自撰遺詔曰：朕受皇天之命，膺大任於世，定禍亂而偃兵，安生民於市野，謹撫馭以膺天命。三十有一年，憂危積心，日勤不怠，專志有益於民，奈何起自寒微，無古人之博智，好善惡惡不及多矣。今年七十有一，筋力衰微，朝夕危懼，慮恐不終。今得萬物自然之理，其奚哀念之有。皇太孫允熒，仁明孝友，天下歸心，宜登大位，以勤民政。中外文武臣僚同心輔佐，以福吾民。葬祭之儀，一如漢文帝。勿異。布告天下，使知朕意。孝陵山川因其故，無改。諸王臨國中，無得至京。王國所在，文武吏士聽朝廷節制，惟護衛官軍聽王。諸不在令中者，推此令從事。辛卯，皇太孫卽皇帝位。是日葬孝陵。六月甲辰，諡曰聖神。文武欽明，啓運俊德，成功統天，大孝高皇帝，廟號太祖。

史官贊曰：帝以聰明神武之資，憫昏濁之餘，以至鼎沸，提三尺蹶起，淮甸心切安民，用以仰承天意。不十餘年，平一中原，掃清荒漠，彼聲教不通之地，咸奉正朔，稽首闕廷。於是民獲所歸，得有共主。雖曰天命云乎，要亦鋒矛所及，戒殺掠以輯甯萬姓之所致也。卽位後釐正典章，制作明備，貽謀創法，過古人遠甚。盡

美盡善不可更僕數。獨其優前代。勵忠節。崇儒重道。下逮卑微。莫莫及矣。第立法過嚴。用刑太峻。而二黨京民之戮。頗傷天和。噫。吁。元朝姑息之後。汗久難拔。亦有不得已者。論者謂其再造之功。高乎萬古。洵哉。至出言成文。思如宿構。則又帝王之餘爾。

明書卷四

本紀二

建文皇帝本紀

帝諱允炆。太祖之孫。懿文皇太子之子也。太子妃常氏生子雄英。宮人呂氏生帝。未名。常妃薨。呂爲次。而帝始賜名。生於洪武十年十月己卯。少聰慧。慈仁。性至孝。好讀書。侍宴命題賦。詩立就。太祖深愛之。當時燕王棣獨英毅殊衆。太祖稔其非人。臣相并偉。其世子高熾。顧太子父子微歎息。詣奉先殿卜而出。且慍且喜曰。身後有托。柰多一番擾攘何。帝生六年而雄英卒。又十年而懿文卒。太祖年六十有五矣。御門向羣臣泣。時秦晉燕周四王壯。太祖屬意燕。學士劉三吾進曰。皇孫世適。富於春秋。正位儲極。四海繫心。皇上無過憂。太祖雪涕稱善。二十九年九月。詔曰。曩古列聖相繼。馭宇者首立儲君。朕自甲辰卽王位。戊申卽帝位。於今二十九年矣。操將練兵。平天下亂。偃天下兵。奠萬民於田里。用心多矣。及一統以來。除奸暴。去豪強。亦用心多矣。近來蒼顏皓首。儲嗣爲重。嫡孫允炆。以九月十三日册爲皇太孫。嗣奉上下神祇。以安民庶。詔告臣民。想宜知悉。於是。以宋公勝。穎公友德等爲東宮官。命定諸王相見儀。禮官曰。諸王來朝。冕服見天子。次見東宮。先坐受拜。次敍家禮。坐則正中。諸王侍。奏上從之。諸王以尊屬多不悅。時太祖春

秋高。中外萬幾。嘗付帝裁決。時政尙嚴覈。帝濟以寬大。於刑獄尤多所減省。遠近忻忻愛戴。三十一年閏五月乙酉。太祖崩。帝遵遺詔。止諸王會葬。諸王怒。燕王獨入臨。至淮。帝令還國。是月辛卯。卽皇帝位。詔曰。天佑下民。作之君。我高皇帝受天之命。統有萬邦。宵衣旰食。弘濟斯民。凡事有益天下者。無所不用其心。政教休明。規模宏遠。朕以眇躬。纂承大統。恭依遺詔。於洪武三十一年閏五月十六日。卽皇帝位。夙夜惶恐。思所以克相上帝。寵綏四方。以無忝我皇祖之大命。永維寬猛之宜。誕布維新之政。其以明年爲建文元年。大赦天下。嗚呼。德惟善政。政在養民。當遵先聖之言。期致雍熙之盛。百辟卿士。體朕至懷。其日葬太祖於孝陵。上太祖諡。并諡高皇后馬氏爲孝慈昭憲。至仁文德承天順聖高皇后。上欲行三年喪。羣臣執奏。以日易月。上諭曰。朕非敢效古人諒陰不言。郊社宗廟。朕將執紼而行事。朝貢訟獄。罔敢不親。但朝則麻冕。退則齊衰。食則饘粥。何不可。羣臣頓首曰。陛下不廢政事。敢不唯命。立孝陵衛。命舉賢才。定保舉連坐法。尊生母呂氏爲皇太后。追諡懿文太子爲興宗。孝康皇帝。懿文皇太子妃常氏爲孝康皇后。册妃馬氏爲皇后。子文奎爲皇太子。弟允熲。吳王允熿。徐王允熒。徐王。大賚。革冗員。省府州縣。六月。兵部尙書齊泰。太常寺卿黃子澄。預參國事。召方孝孺爲翰林侍講。尋直文淵閣。徵北平總兵楊文還京。以殉葬宮人父兄官千百戶有差。秋七月。坐周王橚謀反。廢爲庶人。遷之雲南。燕王大簡壯士爲護衛。八月。命徐輝祖練兵山東。時燕王多招致異術。輝祖密奏之。詔李景隆副之。賜太學生衣帶省親。敕修太祖實錄。徵處士楊士奇等爲編纂官。命何福爲征虜將軍。征百夷平之。增洮州茶馬司。九月。罷築銅鼓城。召輝祖等還京。

革左右布政使。特設布政使。罷操三衛軍。復設大理寺。革廣通茶鹽所。冬十月。四川岳池教諭程濟告燕變。上以妄言將殺之。程請囚俟之。乃下於獄。十一月。顧成平水西五開諸蠻班師。賞賚有差。詔舉山林才德之士。謫前御史解縉爲河州衛吏。以赴臨非詔旨。御史尹昌隆以懈弛諫。上曰。所言切中朕過。命頒行天下。不惟朕有過人得知之。且使庶官有所警戒。遣代王桂如蜀。齊王樽有異謀。爲其下所告。召入朝留之。以工部右侍郎張昺爲北平布政使。謝貴爲都指揮使。伺燕王動靜。十二月。上省郊壇。改天地壇爲南郊祠。盡釋黥面軍及囚徒還家。賜明年天下田租之半。免民賃舍錢。先後大改官制。陞尙書正一品。增侍中位。尙書下翰林院。增文學博士。餘更置有差。詳職官志。詔求直言。遼州人高巍請行主父偃推恩之命。分王諸王子弟。不當聽晁錯削奪之策。上見其書大奇之。是冬。各王府有上變者。燕府尤甚。詔出其長史康汝楫爲安岳知縣。罷北平等五省學校貢士。

建文元年己卯。春正月。癸酉朔。謁奉先殿。朝皇太后。詣孝陵祭。還御殿受朝。不舉樂。庚辰。大祀天地於南郊。奉太祖高皇帝配。詔薦賢。養老。墾田。興學。賑貧乏。贖民鬻子。減田租。頒卽位詔於四裔。遣使告卽位於天下神祇。特祀闕里。詔京省開科鄉試。二月。命都督韓觀練兵於德州。令親王不得節制文武官吏。以方孝孺等爲侍講學士等官。日與上講論古道。處便殿。每事輒咨之。三月。上躬行釋奠禮。幸太學。燕王棣來朝。行皇道。登陞不拜。卓敬曾鳳韶皆劾其不敬。上涵茹之。再免民賃舍錢。革松藩衛。調北平等衛屯彰德。敕都督宋忠等分屯臨清山海等處。廷臣請徙燕王南昌。以絕禍本。上大驚曰。燕王至親骨肉。卿何得及

此對曰。楊廣隋文何如。帝默然。北平僉事湯宗上變。且言按察使陳瑛多受燕王金錢。逮寘廣西。遣暴昭爲採訪使。巡行天下。問民疾苦。燕王還國。遣子三人入朝。或曰。不宜并遣。燕王曰。使朝廷勿疑也。廷臣欲留之。上皆遣還。燕王見曰。天贊我也。因具得京師動靜。夏四月。湘王柏僞造寶鈔及殘殺人。上敕責之。尋發兵討之。王自焚死。齊府人曾名深上變。廢齊王樽爲庶人。幽代王桂於大同。五月。詔僧道田人留五畝。餘以賦民。六月。召解縉還入翰林。燕山衛倪諒上變。建其官旗於諒周鐸誅之。遣中使逮燕府官屬。博士黃彥清見市不拾遺。奏之上。且曰。陛下德化。上曰。昨宮中二人譁。朕諭之云。朕寬刑尙德。中外愉愉。爾獨犯教。意朕有乖德歟。二人謝過。因釋之。宮內尙未能齊。敢言德化。秋七月。癸酉。燕王棣兵起。號靖難。北平掌布政侍郎張瑄謝貴等俱死之。都指揮馬宣巷戰不勝。走薊州。俞瑱走居庸。都督宋忠退走懷來。燕王自署官屬。燕王上書請誅齊泰黃子澄。都指揮張信輸款於燕。馬宣起兵薊州。攻北平不克。死之。通薊遵密附燕。俞瑱走懷來。燕兵破懷來。宋忠被執死。彭聚孫泰戰死之。永平附燕。總兵劉貞。都督陳亨。指揮卜萬。進攻遵化。亨陰附燕。忌萬。遂縛萬下獄。籍其家。八月。祭告天地宗廟。詔告天下。以長興侯耿炳文爲大將軍。率列侯及駙馬都尉李堅等爲副。分道討燕。給朝覲官勘合。寘平燕布政司於眞定。以暴昭掌司事。徵雲南兵。削燕屬籍。書諭諸王。封李堅爲濼城侯。己酉。炳文兵次眞定。壬子。燕兵屠雄縣及鄆州。逼眞定。耿炳文戰失利。入城。燕遂圍城。其時李堅等俱被執。附燕。癸亥。吳傑援眞定。北兵去。傑兵潰遁還。降之。敕誠北征將士曰。昔蕭繹舉兵入京。而令其下曰。一門之內。自極兵威。不仁之極。今爾將士與燕王對壘。務

體此意。無使朕負殺叔父名。九月。赦程濟爲翰林編修。充軍師。護諸將軍。命曹國公景隆爲大將軍。馳至軍中。會諸將進兵。齊秦奏奸邪不可用。不聽。谷王穗自宣府遁入京。召遼王植甯王權入京。甯王權不至。徒封遼王於荊州。江陰侯吳高等率遼兵圍永平。燕兵援永平。吳高退守山海。復襲破大甯。指揮朱鑑死之。房寬叛附燕。劉貞浮海還京。諸將皆附燕。燕兵益盛。燕王以計挾甯王權之北平。冬十月。景隆攻北平。別將攻通州。皆不克。燕王以大甯諸軍及三衛驍騎援北平。十一月庚午。景隆逆戰敗績。再戰大敗。奔保德州。十二月。吳高有罪徙廣西。以楊文鎮遼東。廣昌守將楊宗以城附燕。薊州鎮撫曾璿起兵攻北平不克。死之。燕王傳檄誅左班文臣齊秦等。河北諸衛官張倫等結盟南奔。上見燕檄。罷兵部尙書齊泰。太常寺卿黃子澄。遷肅王樸於蘭。詔選謀勇之士。減囚十之三。高巍願使燕。陳禮義。曉禍福。許之。至燕。稱國朝處士。臣巍上書燕國大王。幾數千言。請罷兵。燕王不聽。

二年庚辰。春正月。天下官來朝。免賀。燕兵攻蔚州。守將王忠以城附燕。遂逼大同。二月。令蘇松浙江人得官戶部。并均其賦。甲子。詔曰。頃以治獄煩興。易御史臺爲都察院。與刑部分理庶獄。今賴宗廟神靈。斷獄頗簡。仍以都察院爲御史府。專糾貪殘。舉循良。匡政事。宣教化。爲職。省御史二十八人。務爲忠厚。以底治平。塞北諸部落納款於燕。景隆出紫荊關。援大同。燕兵還北平。保定知府雒僉以城附燕。景隆遣燕書勸息兵。燕不答。三月丙寅朔。日有食之。策士賜胡靖等一百一十人及第。出身有差。定壹榜。舉人署教格。武臣犯法失職者。悉奔燕。燕盡復其官。夏四月。景隆兵次德州。郭英等兵次眞定。約日合兵進攻。先是遣中

官賜景隆璽書斧鉞。渡江遭風雷。舟破沈。至是復賜之。景隆遂專恣。號令煩數。諸將玩之。辛丑。燕王率兵屯武清。抵固安。景隆至河間。前鋒駐白溝。郭英移營保定。會白溝。乙卯。大雨。平地水深二尺。己未。燕兵渡白溝。平安伏精兵萬騎。邀擊燕王。曰。堅子往從吾出塞。故敢前。今且破之。戰殺傷等。景隆等聯兵六十萬。列白溝旁。以火器攻燕營。及夜。燕不支。燕王僅以三騎殿。迷失道。下馬視流。辨東西。倉卒歸營。庚申。復率兵渡河。騎兵有叛歸燕者。盡掩殺之。景隆進戰。破燕後軍。燕復合兵戰。愈通淵。瞿能等皆戰沒。燕王退就張軍。景隆呼噪進。矢石雨發。燕王馬三易。三被創。矢盡揮劍。劍折。急登隄。僞爲招人狀。景隆疑燕王復集衆戰。會風折大將旗。景隆營大亂。燕兵戰益力。郭英潰而西。景隆潰而東。委輜重。畜物鉅萬。璽書諸物悉失去。殺溺者幾二十萬。附燕者十萬。景隆奔德州。五月。燕兵復至。奔濟南。燕兵破德州。教諭王省集諸生於明倫堂。大哭。觸槐死之。參贊高巍。參政鐵鉉。自臨邑入濟南。丁丑。燕王引兵趨濟南。景隆戰城下。敗績。入城。濟南被困。攻之急。城內悉力防禦。大挫燕衆。諸生高賢作論射燕營。請罷兵。不省。都督朱榮棄師遁還京。誅之。六月。眞資德院及官屬八百媳婦國入貢。鐵鉉誘燕王入城。幾死。走免。遣尙寶寺丞李得成入燕軍。諭罷兵。燕王不許。秋七月。平安率兵二十萬次單家橋。欲絕燕糧道。以燕將高燧兵至不果。八月。濟南圍解。燕兵北走。平安追戰。斬其將陳亨。遂復德州。盛庸守之。承天門及乙字庫災。詔求直言。九月。改承天門爲皋門。午門爲端門。端門爲應門。前門爲路門。募健武克衛壯士。徵洪武勳臣。誤廢者子孫錄用之。冬十月。更定監生選用法。燕陷滄州。賞濟南功。封盛庸爲歷城侯。充平燕將軍。鐵鉉爲布政使。尋晉兵部

尚書召入。卽命往贊軍機。召李景隆還。練子甯請誅之。不報。十一月。庸屯德州。將北進。燕兵抵臨清。移屯館陶。掠大名。糧舟皆被焚。十二月甲午。燕兵至汶上。掠濟寧。庸鉉兵躡其後。屯東昌。圍燕兵。燕潰圍走。斬其將張玉。殺傷以數萬計。燕兵退守館陶。庸飛檄邀燕歸路。北平震動。詔舉優通文學之士。三年辛巳。春正月。使者還自雪山。得美玉。琢爲璽。面方四寸。命曰凝命神寶。其文曰。天命明德。表正萬方。精一執中。宇宙永昌。至是成告。天地宗廟。宣示遐邇。辛未。上祀天地於南郊。享廟。大宴羣臣。賦詩諮政事。東昌獻捷。平安等追燕兵。敗還。燕王歸北平。召復齊泰。黃子澄還。任議軍國事。二月己巳。燕王復出兵。列營滹沱。庸兵屯單家橋。三月丙午。庸及燕兵大戰夾河。斬其將譚淵。及明日再戰。風沙大起。庸敗走。莊得等戰沒。諸將遵上諭。燕王鳴角穿營而去。相顧不敢發一矢。眞定兵敗績。閏三月。戰藁城。會逆風復失利。安傑入眞定。己酉。燕兵掠順德。辛亥。掠廣平。癸丑。掠大名。四月。罷齊泰。黃子澄。謝燕。燕王請撤德州。眞定兵。詔大理少卿薛嵩報。嵩辱命。燕王遣嵩南歸。五月。禮制成。頒行天下。吳傑等扼燕兵餉道不克。燕王遣武勝上書。上覽書曰。王本皇考母弟。於朕爲叔父。柰何必用兵。爲命繫羈之。六月。燕兵掠濟寧及沛。焚餉舟萬艘。河水沸。水族皆死。漕卒散走。京師大震。壬午。都督袁宇率師邀擊。敗績。殺指揮張壽。以飲中言國事急。坐妖言律。遣官朝鮮市馬。秋七月。燕兵掠彰德。趙清禦之。平安邀擊燕將於平村。敗績。遣人貽書問燕王父子。計不行。復限僧道定銓選法。八月。老撾入貢。放還不識字人材及年幼者。九月。燕兵攻定州。大同將房昭駐易州水西寨。約攻北平。尋被圍。眞定將韋諒往援之。大戰花英。失利。被執。昭等棄寨走。定州

附燕。冬十月，倭寇浙東，禁約奉差中官。真豐沛軍指揮司乙卯，燕兵還北平。徙慶王於寧夏。十一月，遼東總兵楊文攻永平不克。命官招集兩浙義勇。平安敗燕兵於楊村。皇子文圭生。十二月，詔有司但遇內官奉使暴橫者，卽縛送京師。內官怨甚。於是密言燕王直擣京師，約爲內應。丙寅，燕王率兵復出北平。命駙馬都尉梅殷鎮守淮安。燕王遣殷書云：入京進香，殷答以皇考有禁，不遵者爲不孝。燕王銜之。試翰林史官楊士奇等錄用太祖實錄成。命徐真馬溥率偏師北進。平安攻通州不克，與燕兵大戰於九門城。四年壬午，春正月，德州將葛進與燕兵戰，敗績。指揮賈榮等敗於衡水。燕兵陷東阿及東平。吏目鄭華死之。燕兵攻汶上，抵沛縣。指揮王顯附燕。知縣顏伯璋等死之。二月甲寅，燕王攻徐州。城中兵出戰，敗績。更定勳階。始真京衛武學教官。燕兵自徐州攻宿州。平安躡之戰敗。燕兵斷徐州餉道，遂陷蕭縣。知縣鄭恕死之。夏四月甲寅，平安與燕兵戰於小河，斬其將陳文。再戰勝之，斬其將王真。燕王自督戰，幾爲平安所獲。安馬蹶，燕將王麟救免走。燕兵大懼。適何福引兵來會，燕諸將俱欲還。燕王大怒督戰，復交戰於靈璧。敗績。辛巳，再戰又敗績。平安等及文武內臣一百八十七人皆被執。何福走。癸未，吐番入寇，陷保寧。五月，燕王至泗州。守將周景初降燕。辛卯，盛庸率兵數萬戰艦數千列淮南。燕將丘福未能潛濟，出庸後。庸軍亂，盡棄其軍資戰艦。燕兵遂渡淮。是時梅殷屯淮安。知府徐安屯鳳陽，毀橋斂舟。燕師不能渡江，遂趨揚州。抵天長。守將皆附燕。次揚州，遂次六合。及儀真，諸軍戰，敗績。癸卯，遣人四出徵兵。甲辰，詔曰：燕兵勢將犯闕，中外臣民坐視予之困而不予救乎。凡文武吏士宜卽日勤王，共除大難。宗社再安，予不敢忘報。時

燕兵屯江上。江南密投款者衆。詔下京城內外臣慟哭。召黃子澄還。蘇州知府姚善、寧波知府王璉俱率師勤王。遼兵入援。潰於直沽。敕刑部尙書侯泰轉餉淮安。徽州知府陳彥回、樂平知縣張彥方率衆勤王。皆死之。六月癸丑。燕王至浦口。盛庸逆戰敗績。乙卯。燕兵渡江。庸率海艘戰。又敗績。庚申。燕兵至龍潭。遣慶成郡主如燕軍。議割地罷兵。燕王不聽。復遣李景隆等。景隆等辱命歸。命諸王分守京城諸門。魏公徐輝祖開公常昇分道出師禦戰。甲子。遣人齎蠟書促勤王兵。爲燕軍所獲。命曹公李景隆守金川門。黃子澄固諫止。上決遣之。燕兵圍都城。議輕舸幸蜀。及幸浙幸湖湘。皆不果。乙丑。燕兵逼金川門。谷王穗與李景隆開門迎燕王入城。徐輝祖率師巷戰。敗績。上手誅徐增壽於左順門。時徐增壽倡迎降議。監察御史蔣冕等就殿前殿之。上大怒。手誅之。并欲誅景隆。不果。上入宮。忽火發。皇后馬氏暴崩。程濟奉上變僧服遁去。燕王遂入宮。殺宮人女官內官略盡。惟得罪上者獨留。因指燼中后骨以爲上。燕王曰。小子無知。乃至此乎。用翰林侍講王景議。以王禮葬之。其時戶部侍郎郭任、禮部侍郎黃魁、左僉都御史程立本、翰林修撰王良、太常少卿廖昇、大理寺丞鄒瑾。給事中龔泰、陳繼之、御史魏冕、衡府紀善周是修、參軍高巍等。聞上崩。俱死之。御史葉希賢等四十餘人。遞去。臨安王楹及近臣茹瑄、蹇義、夏原吉、劉儁、古村、劉季篪、薛嵩、董倫、王景、胡靖、李貫、吳溥、楊榮、楊溥、黃淮、芮善、解縉、金幼孜、胡濙、陳洛、方賓、宋禮、王達、鄒緝、楊士奇、胡儼等。奉鑾輿迎降。上初入蜀。入滇。常往來廣西貴州諸寺。寺輒興云。天順中。出滇南。呼寺僧曰。我建文皇帝也。僧懼。白官衆見之。悚然。聞於朝。乘傳至京師。識老閹吳亮道遺事。迎入大內。崩葬西山。

史官贊曰。帝之亡。不亡於四年六月。而於諸王朝文華日已基之。夫諸王具英武資。善用兵。帝以微起。躋其上。諸王未嘗一日去諸懷。帝以文弱迂闊遇之。相去正左。及太祖崩。而告變者屢至。若信齊黃以議削奪。在無形聲之前。則帝爲殘忍。忮忌之主。安在數百年。父老多言。帝寬仁慈厚。少好文章禮樂。不喜任律法。操切人。又何以稱焉。跡其更改祖制。則考之遺經雜記。有所爲陞尙書爲一品。增六部侍中。改戶刑部四司名。罷都察院爲御史臺。改通政爲寺設卿。增補闕拾遺。改各司祭署名。寘資德院。復翰林承旨文學。改謹身爲正心殿。革左右布政設布政。改按察名肅政。增親王賓輔。降府州省縣邑。汰驛站。增巡檢耳。未嘗有縱欲敗度事。第不數月而戕骨肉。死者死。幽者幽。噫。已甚矣。蓋帝之失。前乏推恩之令。後失禦敵之策。以至於亡。而一時諸臣節義表表。甘死若飴。富貴若澆。非帝深仁厚德在人心不至此。雖然。風砂暴作。天玉其成。燕飛帝畿。途謁始驗。帝之亡也。悲夫。

明書卷五

本紀三

太宗文皇帝本紀

帝諱棣。太祖第四子。母孝慈皇后馬氏。於庚子年四月十七日癸酉生。初生光氣五色。照宮闕。經日不散。聰明英毅。讀書過目不忘。日從名儒講論。虛己納善。貌奇偉。美髯髯。舉動不凡。洪武三年。封燕王。納中山王達長女徐氏爲妃。十三年之國。督邊兵備塞下。列侯皆聽節制。上妙兼武事。射必命中。夙將皆自以爲不及。度量恢廓。任賢使能。各適其當。料敵制勝。常出人意料。由是威震朔漠。塞垣以寧。二十一年。大將軍玉征納答出降之。還師至北平。以名馬餽上。辭曰。馬未獻朝廷。而我先之。非所以尊君父。玉慚而心不懌。遂間於太子。道燕王國事。且曰。臣聞望氣者言。燕地有天子氣。宜慎審之。太子曰。燕王事我。恭勿多言。玉曰。貌耳。此安足信。時晉王亦見太祖殊愛上。自念己兄也。遂生嫌隙。方竝朝。上有疾。晉王數以語見侵。上內憂之。懇求歸國。晉王時遣人伺之。無所得。二十三年春。太祖命晉王西出。上北出。晉王儒僅出塞止。上獨引兵進抵迪都山。獲故元太尉等全部以歸。晉王忌上功。馳報太子。謂上違異。勞師冒險。使言於太祖。已而晉王旋師。太祖不樂。上捷至。大喜曰。朕無北顧憂矣。太子言晉王有張聲勢犄角功。燕王未可獨專。

二十五年再出塞。四月太子薨。秦晉皆長。有次及之望。太祖久屬意上。幾立。以劉三吾言而止。立皇太孫。二十七年勦捕野人平之。初上受封。卽元故宮爲府。隱然與京師竝重。亦天意也。上多招異術。僧道衍善卜筮。謂宜爲帝。薦寧波袁珙。以相術力贊之。謂上爲太平天子。時建都金陵去塞遠。上擁重兵。又嫖將略。及建文卽位。王府多變。周齊湘代岷諸國頗相煽動。遂謀削奪。周湘齊代漸次廢或死。上恐詐病。六月彘火。然陰簡壯士。朝廷益疑。屢遣人覘之。適燕山衛百戶倪諒上變。建文皇帝發符遣使逮燕官屬。密令謝貴張昺等圖燕。都指揮張及柰亨等洩其機。是日上召貴昺入。列衛士。因訶之曰。吾奉藩守土。未嘗一干有司。爾等何爲離間。又曰。吾何病。特爲奸臣所迫耳。遂殺貴昺等。命張玉等奪九門。於七月癸酉命將署官。兵起號靖難。誓於衆曰。予太祖高皇帝之子。今爲奸臣害。祖訓云。朝無正臣。內有奸惡。必訓兵誅之。以清君側之惡。今禍迫於躬。不得已也。義與奸邪不共戴天。率爾將士誅之。用命者有厚賞。不用命者有顯戮。罪人旣得。則法周公以輔成王。爾等其體予心。毋違命。先布告以爲誅奸臣黃子澄齊泰等。用兵凡四年。於建文四年壬午六月十三日乙丑入京師。丙寅榜文職。姦臣黃子澄方孝孺等二十九人。續榜周是修等二十六人於朝堂。令曰。凡官民人等有縛諸臣來首者。授爵有差。因列賞格。自是以擒獲得官者甚衆。丁卯戶部尙書王鈿。工部尙書鄭賜。侍郎黃福。自陳爲姦臣所累。上宥之。兵部尙書茹瑺乞宥吏部尙書張統從之。翰林院文學博士方孝孺。衰杖哭闕下。收繫之。令解散各處召募丁壯復業。先是入宮後復出駐龍江關軍中。己巳復入城。楊榮迎啓曰。殿下先入城耶。先謁孝陵耶。上悟。轉謁孝陵。遂歸。卽皇帝位。

復周王櫛齊王樽爵。詔改明年爲永樂元年。庚午。凡建文所改易悉復故。詔革除建文年號。以是年稱洪武三十五年。復舊門殿名。辛未。製皇帝親親之寶。贈徐增壽爲武陽侯。諡忠愍。壬申。葬建文皇帝。遷與宗孝皇帝主於陵。仍稱懿文太子。遷呂太后懿文陵。時武臣皆歸附。獨魏公輝祖不屈。命下之獄。癸酉。陸功臣朱能等官祿有差。定征討城守功次。召淮南總兵官駙馬都尉梅殷還京。對忤旨。上銜之。降封懿文太子子吳王允燧爲廣澤王。衡王允燧爲懷恩王。徐王允熲爲敷惠王。隨母呂氏居懿文陵。尋革允燧允熲爲庶人。已皆殺之。族殺兵部尙書齊泰。太常寺卿黃子澄。御史中丞練子寧。及泰外親之親二十六戶。澄外親之親幾五百人。子寧外親之親尤衆。召文學博士方孝孺草詔。不屈。殺之。并殺孝孺宗族八百七十三人。殺御史高翔。凡高氏重其稅。命發其先墓雜畜骨。殺戶部侍郎郭任。卓敬。太常寺卿盧原質。蘇州知府姚善等。餘詳忠節傳。族殺兵部尙書鐵鉉。禮部尙書陳迪。刑部尙書暴昭。前後族殺幾萬人。剽大理寺丞劉瑞。王高。以縱孝孺息樹陰。秋七月壬午朔。祀南郊。詔赦天下。惟榜有名者不赦。宥尹昌隆爲北平按察司知事。詔悉焚建文遺策。許逃軍自首。張純以憂懼自殺。戊子。諸藩王次第來朝。書諭世子於北平。詔修周齊二府宮殿。召廢謫官陳瑛爲右副都。定來朝官員賞格。八月。左僉都御史景清犯駕。磔殺之。逮谷府長史劉璟下獄。勒縊死。遣使祭告闕里及天下諸神祇。初建內閣。以解縉黃淮胡靖楊榮楊士奇金幼孜胡儼俱以翰林官入直文淵閣。商機密。承顧問。詔吏部及翰林院舉文學行誼才識之士。初鑄平羌征南征西三將軍印。勝諭軍民安業。毋疑懼。賜谷王穗樂七奏。金鎗大劍。葉仲惠修太祖實錄。直書靖難。

事爲逆。上怒。殺之。籍其家。寧王權請封杭州。不許。以卽位詔諭四夷君長。止天下耆民來朝者。廬陵民嘯聚。諭散之。復定罪人輸作例。晉王濟燔來朝。以缺餉命自雜犯死罪以下輸粟贖罪。再檢建文遺貯封事。除兵刑錢穀。餘悉焚棄。上因問縉等曰。爾等宜皆有之。衆未對。李貫稽首前對曰。臣實無之。上曰。爾以無賢耶。食其祿。宜任其事。當國家危急。在近侍。獨無一言可乎。前事建文則當忠於彼。今事朕則當忠於朕。不必曲自遮蔽。貫慚退。詔免應天五府今年丁役。柳州蠻亂。遣官諭散解之。九月甲申。大封靖難功臣。邱福爲洪國公。朱能爲成國公。張武陳圭而下侯十五人。伯十三人。餘陞賞有差。追封張玉榮國公。陳亨涇國公。譚淵崇安侯。改遼王植國荊州。谷王穗國長沙。許回回寧夏市馬。定功臣死罪。減祿例。申明木鐸教民之令。齊王搏復國。青州賊寇開原。拒卻之。冬十月己未。復修太祖實錄。定北平守城功賞。詔還掠得女子。初選力士長大者爲將軍宿衛。改建周府於洛陽。十一月。冊妃徐氏爲皇后。加北平布政郭資爲戶部尚書。仍任。以僧道衍爲左善世。新作奉天殿成。陳瑛請追戮建文死事臣黃觀等。上弗之。十二月。許功臣年老者免朝參。嚴武臣冒襲之禁。定官吏軍士俸糧支米鈔格。修東吳水利。以守保定功陞知府雒僉爲刑部尚書。仍任。詔求隱逸。寧王權來詔。改封南昌。定塚軍更代法。永樂元年癸未。春正月。以陳瑛爲左都御史。安輯北平流民十三萬餘戶。罷浙江銀坑。徙周府汝南。王有勳於雲南。以建文時告變。二月。詔以北平府爲北京。改順天府。設行府部等衙門。置官屬如京師。復周齊代岷四王故封。命嚴立誣告法。遣使通好韃靼。可漢鬼力赤。遣司禮少監侯顯往西域徵尙師哈立麻。上

耕籍田。琉球入賀貢方物。三月。有司請立皇太子。不許。改行都司於保定。以大寧昇兀良哈。詔徙澤潞等處無田者於裕州。命平江伯陳瑄理海運。詔疫死牛免牛戶賠補。夏四月。命戶部尙書夏原吉往浙江治水。復古三江入海之跡。朝鮮入賀貢方物。楚世子孟煊奏請於河南買人口。諭止之。賑順天饑民。嚴鈔法。禁民間以金銀交易。命王府非奉詔不得役軍民。斂財物降代府岷府官屬。進封駙馬都尉袁容等爲列侯。續封李彬等七人爲侯伯。五月。改上皇考妣諡號曰太祖聖神文武欽明啓運俊德成功統天大孝高皇帝。考慈昭憲至仁文德承天順聖高皇后。宥逆黨連坐者爲民。禁私茶。革宛平大興縣學隸順天府。改修太祖實錄成。蘇湖水。量免今年租稅。赦海島逃民。代王桂有罪。削三護衛戒諭之。秋七月。始聽軍民畜馬。八月。遣官賜海外諸國金幣。簡南直十郡浙江等九省富民遷實京師。初設雲南楚雄儒學。補各省鄉試。九月。重議製太祖樂章。詔舉賢才。下歷城侯盛庸於獄。尋殺之。遣太監馬彬使西域。雲南車里士官刁暹答作亂。遣勅諭之。遂謝罪。制農器給山東被兵軍民。賜各衛夷官姓氏。冬十月。日本來貢。再賞戰守功臣。復修祖陵。興北京屯田。西洋諸國來朝。免其私稅。十一月。殺長興侯耿炳文并其諸子。鬼力赤入犯。大敗之。遁去。復兀良哈及三衛夷官。罷洪武中定免租供役夫轉運糧一百五十七萬於北京。柳州山賊作亂。平之。閏十一月。靖江王贊儀就國桂林。福建兵擊倭破之。癸亥。皇長孫至自北京。十二月。賑畿南。訪求太祖遺文手蹟。詔有利民事。不拘各色人許敷奏。徙天下富民實順天府。

二年甲申。春正月。定屯田賞罰例。道士獻方書。命斥去之。禁民舟下海。二月。命襄城伯李濬平永新賊。除

蘇州絕戶田糧。修海隄。三月。策士。賜曾榮等進士及第。出身有差。選楊相等六十人爲庶吉士。許武臣一體薦。抱德懷才之士。開遼東馬市。改封懿文太子第四子允熾爲甌寧王。奉懿文祀。夏四月。定日本使十年一貢。簡東宮官。文武大臣兼之。親定蹇義等。命僧道衍復姓姚。賜名廣孝。爲太子少師。甲戌。立世子高熾爲皇太子。妃張氏爲皇太子妃。封子高煦爲漢王。高燾爲趙王。罕東等衛以茶易馬。改給布絹。丁丑。上天暑清獄囚。宜釋者釋之。招撫慶遠等處洞蠻一千三百戶。有奇來歸。兀良哈貢馬。五月。準武陽侯徐增壽進襲祖爵。定國公。倭寇浙東。六月。汰冗官。諭安南使臣還思明故地。青田縣民劉貂進太祖賜其祖誠意伯基手書及祭文。留賞之。朝鮮貢牛萬頭。詔送遼東屯田。封哈密阿克帖木兒爲忠順王。賑蘇州海寇亂。勅勦捕之。秋七月。勅宣府備敵。勅李景隆以本爵歸第。鄱陽民朱季友進書。以謬妄杖毀之。八月。沒李景隆田僕屯軍年六十者免比較。九月。周王橐來朝。進騶虞。徙山西民一萬戶實北京。冬十月。定江南官田折布民田折粟法。日本來貢。獲暹羅通好琉球海船上。修好是番邦美事。令縱之去。十一月。黃河清。至次年三月始復舊。上錄囚於奉天門。設天津衛。鬼力赤貢馬。真臘來朝。減崑山荒田租稅。西北諸胡來朝。上賜宴。謂侍臣曰。人恆言以不治治夷狄。夫好善惡惡。人情所同。在撫之有道耳。山西有司言。介休出五色石。可取爲器用。命急斥之。下李景隆於獄。禁錮死。十二月。分遼東邊外建都司衛所。黃巖賊伏誅。令各衛所屯田耕墾者。有司毋得起科。

三年乙酉。春正月。詔曰。凡同勞苦者。安逸亦當同之。嘗見前世人主至富貴。則忘向來所共艱難之人。朕

甚不取其順。天永平保定。免田租二年。答意五岩生苗。刻箭歸附。誅雒僉夫妻。二月。蜀王來朝。韓觀請勦蠻寇。諭以嘉意。綏來。毋輒進兵。三月。浚溲陽胭脂河。復定屯田賞罰例。各王世子來朝。市馬開原。賑淮安。邳州饑。令文職官犯罪至死者免決。記罪奏請。夏四月。除免天下絕戶田糧。韃靼酋倫都兒灰等來朝。貢駝馬六千。賜姓名官爵。賞賚有差。賑蘇松嘉湖饑。令文職官犯杖罪以下三犯始坐。五月。肅王來朝。六月。遣太監鄭和等往諭西洋諸國。拓西安門外城。秋七月。增贖米。招未服黎母山民。八月。遼王來朝。免江南田租。九月。周王橚齊王樽多不法事。及用箭烙諸刑。降勅戒之。再徙山西民萬戶實北京。加封張輔爲新城侯。冬十月。譚深趙曦殺梅殷。鞠治之。對曰。上命也。上怒。令武士以金瓜撞其齒。立斬之。封許成永新侯。十一月。封宋晟西寧侯。序班楊善許庶吉士章朴收藏方孝孺文集。上怒。遂殺朴。晉善官。十二月。開雲南銀冶。谷王慶王來朝。

四年丙戌。春正月。考察天下文武官員。封安南胡奩爲順化郡公。勅日本國王道源義彥島寇。奏捷。遣使賜璽書及金幣器用。褒賚之。琉球進闕人。卻之。二月。命趙王高燧居守北京。南陽盜起。討平之。三月辛卯。幸太學。謁先師孔子。丙午。策士。賜林環等及第出身有差。復設開平衛。軍官有罪謫戍者悉復職。胡奎。其故主陳天平。因殺使臣。辭巖等。改江殷等十三人爲庶吉士。招諭海島流人。夏四月。齊王樽入京。謝罪。己卯。購遺書。五月。鑄征夷將軍印。集兵征安南。勅沐英興師調糧。以備征伐。廢齊王樽父子俱爲庶人。安置廬州。大古刺入貢。六月己未朔。日有食之。回回國進玉碗。卻之。秋七月。命成國公朱能爲征夷大將軍。

率左右副將軍及二十五將軍沐晟張輔等與兵部尙書劉儁等分道討安南癸卯禡祭出師申嚴誹謗之罪閏七月初建北京宮殿遣官分道採木八月勅宋晟等練兵防邊九月設陝西甘肅北京遼東四苑馬司西番諸國朝貢冬十月朱能卒以張輔代之大修北京城垣諭占城遏安南晉王來朝免廣西歲辦黑鉛張輔等克猛烈棚華關隘賊遁去築堡屯兵造舟平江伯陳瑄擊倭於沙門敗之十一月龜茲入貢十二月安福叛賊朱務良及廣濟妖僧皆伏誅辛卯大赦張輔等大破安南賊於嘉林江搗其東西二都賊焚宮室倉庫遁入海輔至交州晟追至木九江計獲首級幾四萬他物稱是尙師哈立麻至京入見上待以殊禮仍賜儀仗從人辛亥甌寧王允熯暴薨懿文祀絕徵天下道士至京修舉金籙齋法兀良哈饑乞以馬易粟詔許之

五年丁亥春正月輔等合兵擊賊連破走之己巳建五臺山佛殿浮屠天下私披剔請度牒者悉發邊充軍二月朵顏頭目把禿等率妻子乞省母於京師許之三月丁巳封尙師哈立麻爲大寶法王其徒孛隆等爲大國師下駙馬都尉胡觀於獄以黨李景隆故甲子有大木自山浮於江賜其山曰神木設四夷館輔等上安南軍民降表言其耆老等言陳氏無後當爲郡縣戒守衛官皇城下誦經者改上林署爲苑監以中官相兼夏四月平陽王濟熿入朝卻之辛卯皇長孫出閣講學初增各省管屯僉事五月輔等追賊於羅海口擒黎蒼及其父季孛子澄等檻送京師安南平河南饑有司不以聞逮罪之仍遣賑徙山東西民五千戶實上林苑六月以安南平詔天下設交趾三司及府州縣各官有差僉都李士吉巡浙江還獻

瑞應頌。上怒曰。爾以大臣巡視。不奏民瘼年穀水患。而進諛詞。何以爲大臣。叱擲之。徵用交趾人材。柳潯寇叛。討平之。內臣矯旨。採天花治之。秋七月乙卯。皇后徐氏崩。八月。議設海運都漕運使司。九月。安南俘獻黎賊及僞將相。悉下獄。赦其子孫。頒賞將士。太監鄭和西洋還。建龍江天妃廟。冬十月辛巳朔。日有食之。授交趾明經人官職。冊諡皇后曰仁孝皇后。增設北京苑馬寺二十四苑。廣西蠻平。韓王松薨。十一月。特遣戶科都給事中胡濙探訪異人張三丰。垂十年乃還。十二月。以太祖戒飭功臣鐵榜及勅旨。頒賜武臣。

六年戊子。春正月。朝鮮世子李禔來朝。削岷王榷護衛。罷其長史等官。開鑪爲鹽井。遣太監王安使迪西。二月。定巡狩禮。肅王樸有罪。勅切責之。三月。定交趾賦稅。夏四月己卯朔。日有食之。楚王楨遣內使市雲南。勅切責之。始命雲南開科。五月。日本入貢。頒詔交趾。赦詔。招北京流民未歸者。免賦稅三年。設遼東自在安樂二州。六月。命官令沿河軍民運木燒輒。輔等上交趾地圖。秋七月。敕平南功。進封輔英國公。晟黔國公。及王友等侯伯。餘陞賞有差。八月。設北京會同館。交趾簡定等作亂。命晟等討之。丙戌。詔曰。成周營洛。肇啓二都。有虞勤民。尤重巡省。朕君臨天下。祇承典彝。統御之初。已陞北平爲北京。今國家無事。省方維時。將以明年二月。巡幸北京。命皇太子監國。親王止離。王城一程迎候。官吏軍民於境內朝見。非經過之處。毋得出境。凡道途供應。皆已節備。有司不得有所進獻。九月。淳泥國古里。蘇門答刺於闐。榜葛刺。呂宋。同時十二國入貢。冬十月乙亥朔。日有食之。沐晟等與交趾賊戰於生厥江。敗績。都督呂毅尙書劉儁。

等皆死之。於是復命英公輔等益兵二十萬合討之。十一月決囚。十二月鑄行在府部諸衙門印。罷溫處銀鉛坑冶。

七年己丑春正月。復遣太監鄭和航海。大通西南夷。元宵節。賜假張燈弛夜禁。楊榮起復。二月壬午。車駕發京師。命皇太子監國。惟除拜朝貢調發上行在。餘悉聽處分。茹璫下獄死。取天下貢士陳繼等一百人。三月平安暴卒。設京師二十五門及水門各城門郎一員。壬辰。車駕至北京。大賚官吏軍民。召文武大臣及翰林遊宴萬歲山。夏四月。遣給事中郭驥諭□□可。漢本雅失里不屈死之。閏四月。海寇掠欽州。擊敗之。行在錄囚。設奴兒干都指揮使司。設北京寶鈔提舉司。五月。作壽陵於昌平之黃土山。賜山名天壽。簡定稱上皇。立陳季擴爲越皇帝。命淇公福帥師北征本雅失里。封瓦剌三部長爲王。六月。遣御史考察守令。命楊榮齋敕於甘肅處置降酋。楊溥起復。征南兵破賊。屢以捷聞。秋七月八月。丘福等出塞遇敵。戰失利。福及王聰火真王忠李遠五將軍全軍皆歿。餘軍稍敗還。九月庚午朔。日有食之。甘肅總兵何福撫定亦集乃諸酋。封甯遠侯。妖賊王金剛及叛賊李法良皆伏誅。輔等擊鄧景異等大破之。十月。徙丘福家屬於嶺南。皇太子擢副榜第一。孔子五十七代孫鶚爲中允。陳懋敗敵。進封甯遠侯。火州及哈烈皆入貢。十一月。輔等擒賊首簡定等。檻送京師。惟陳季擴鄧景異遁走。詔舉通書史者。十二月初。立東廠。刺事內官一人主緝訪。

八年庚寅春正月。張輔敗安南賊阮師檜於東潮川。召輔還。令沐晟等節制諸軍討季擴。俘簡定至。伏誅。

二月上以親征北敵詔天下命皇長孫留守北京以夏原吉等輔之命趙王高燧整理北京兵馬刑部尙書郭資督餽軍免濟甯等運糧處所差役一年丁未車駕發北京命學士等官胡儼楊榮金幼孜等扈從野人那溪及禿刺與哈魯各頭日以次來朝賜賚有差庚戌度居庸壬戌蹕興和命王友循野狐郭亨往宣府各督運皇太子免黃巖鹽糧三月丁卯分布五軍哨掖十將軍涼州降寇復叛費瓏等討平之丙子次凌霄峯開四川內江鹽井丙申次清水源忽平地甘水湧出賜名神應夏四月癸卯勒銘於玄石坡曰維日月明維天地壽玄石勒銘與之悠久日本貢方物戊申次楊林免諸將朝琉球貢馬壬子勒銘於擒胡山曰瀚海爲罽天山爲鏐一掃氛塵永清沙漠甲寅勒銘於清流泉曰於鑠王師用殲醜虜山高水清用彰我武庚申次威遠無水載水以饜日暮上未饑近臣奉饌上曰軍士未食朕何忍先飽視各營俱食乃饗五月丁卯次臚胸河庚午獲敵謀五人及馬四匹皇太子命賑南直隸饑交趾總兵沐晟敗陳季擴於虞江生擒其神龍將軍黎弄斬獲無算戊寅次兀古札河敵遁去率精騎夜倍道追之交趾督兵指揮江浩與鄧景異戰失利己卯上追敵至幹難河擊敵大破之本雅失里以七騎遁去全獲首僉物畜無算辛巳旋師壬午以班師詔天下肅州寄居回回叛守將討平之琉球官生模古都等願入國學皇太子厚賜從之壬辰命凡從征亡沒者復其家招祭邱福敗沒將士陷敵者多得還朝鮮貢馬及方物六月甲辰車駕次飛雲壑阿魯台詐降上覺逆戰大敗之遁上追擊進兵長秀川收其畜物互百餘里斬獲無算阿魯台以其家屬遁去皇太子免潁州等處水災田租庚戌虜赴行在降者甚衆辛酉車駕次長樂命於沿

途瘞遺骸。王友劉才紆道相失。軍士乏食多餓死者。上切責之。因勅英公輔收友等。琉球貢方物。秋七月壬午。上至北京。甲申。賜皇長孫輔導官鈔幣。八月。進封安遠伯柳昇侯爵。賑陝西。修築寶應塘。甯海侯何福從征。違節制。自懼死。九月己巳。幸天壽山。長沙妖人作亂。皇太子命李彬討之。占城貢方物。城高郵衛。敕擒簡定功。命番僧繇思吉等爲國師。冬十月。乞忽古里來朝。丁酉。上發北京。丁巳。侍行賢妃權氏薨。皇太子蠲廣昌疫戶田稅。周王請於國祀高皇帝。諭止之。十一月甲戌。上還京師。降虜虎保赤叛出塞。悔罪歸。赦之。十二月。城汴梁。楚王楨。周王橚。寧世子磐。斌來朝。阿魯台來歸。孔彥縉襲封衍聖公。隆平侯張信有罪。下法司雜治之。交趾賊陳季擴請降。許之。授以官。尋復反。詔凡風憲官不得用吏員。著爲令。瓜哇暹羅等國各進方物。重建醉仙樓。

九年辛卯。春正月。命英公張輔會兵討交趾叛寇。命李彬等往福建剿倭。免祁州田租。允楊榮奔喪。二月。以秦王尙炳傲慢。械長史等於京。增北京國子監官。如京師。築沂州及武陟河口。瓦剌貢方物。下陳瑛於獄。死。籍其家。浚福山渠。及中灤河。倭掠廣西。開濟寧惠通河三百餘里。凡丁役免他役。及今年田租三月。策士賜蕭時中等及第。出身有差。選楊慈等十一人爲庶吉士。敵犯內地。免溫州警。浚黃河故道。夏四月。詔諸王來朝。長幼以次而至。五月。倭寇浙東。修揚州河隄二萬丈。吐魯番及赤斤皆貢馬。城鄆州。六月。太監鄭和自西洋俘錫蘭國王以獻。釋之。尋立支屬爲王。遣歸。楊榮起復。秋七月。輔晟敗鄧景異於月常江。尋復敗黎蕊於臨安。殲之。賑臨城。滿刺加國王率妻子來朝。上厚遇之。寧夏寇亂。遇破之。九月。以楊榮侍

諸皇孫讀書。冬十月。命姚廣孝等再改修太祖實錄。十一月。英公輔率師追陳季擴於海上。盡殲之。自是廉福皆平。丁卯。立皇長孫瞻基爲皇太孫。十二月。宋顏侵掠。諭納馬贖罪。閏十二月。命百官條上軍民利病。詔薦舉堪任牧民風憲者。定連坐法。鑄永樂通寶錢。

十年壬辰。春正月。封吳允誠爲恭順伯。元宵節。賜宴觀鰲山。夏。原吉侍母觀。上聞。賜鈔。誅叛賊察罕歹。徙罪人於良鄉。永平耕田。二月。設陝西金州所東西洋關。趙王高燧還北京。免山西河南八年以前逋租。置河間衛。加國師班舟藏卜爲大國禪師。免湖廣五寨貢硃砂。庚辰。削遼王植護衛。三月。命李彬討甘肅叛寇。戊子。復策前未及廷試士。賜馬鐸等及第出身。有差。選蔣禮等十七人爲庶吉士。增寘應天都稅司。陞順天爲府尹。秩正三品。夏四月。治衛河。肅州回叛。殺御史陳琦等。以馬英激變磔之。五月。請發廣西銀礦。不許。丙戌。詔修北京壇廟。六月。建武當山宮觀。免湖州役田逋糧。秋七月。築蘆溝橋。八月。輔兵破賊於神投海。命皇太孫兼習武事。淳泥國王來朝。重建天禧寺。九月。築寶山於青浦。爲海舟表幟。築海門隄三百里。冬十月。丁卯。皇太孫演武於方山。寘遼東四十五站。通入貢者。交趾僞少保潘季祐等來降。十一月。定武官襲職比試法。復遣太監鄭和使西洋諸國。甘肅老的罕來降。十二月。遣官採木於四川。廣西蠻平。築眞定隄。乙亥。詔明年巡狩北京。廢安定王尙炆爲庶人。安置泗州。殺浙江按察使周新。復鑄行在各衙門印。

十一年癸巳。春正月。辛巳朔。日有食之。停運大木。賜阿魯台金綺。丁酉。仁孝皇后梓宮發。京師。漢王護行。

詔弛齊黃黨禁。叛酋弩兒伯顏等至京。宥之。發戍廉州。伯顏復叛。捕殲之。倭寇昌國。擊敗去。免徐州田租。天壽山定陵名曰長陵。二月。遣中官楊三保使西域。乙丑。上巡狩北京。命皇太子監國。皇太孫從行。丙寅。葬仁孝皇后於長陵。夏四月。駕至北京。五月。定贖罪無力者。發天壽山種樹。端午節。駕幸東苑。擊毬射柳。皇太孫發皆中。上喜。命諸王羣臣四夷貢使及耆老聚觀。西藩亦攀舟來歸。封安定王。敍長陵功。封王通成山侯。餘陞賞有差。設甘肅馬市。秋七月。阿魯台貢馬。封爲和寧王。八月。申恤刑令。湖廣台羅苗叛。命顧成率師剿之。九月庚辰。命扈從軍士於京城外種麥。冬十月。錄囚。十一月。馬哈木窺邊。命諸將行邊。大會兵於北京。十二月。英公輔等大破賊於愛子江。擒陳季擴。檻送京師。餘黨悉降。交趾復平。

十二年甲午。春正月丙子朔。日有食之。復遣太監楊三保使烏思藏。丁亥。大修曲阜孔廟。台羅叛苗平。征南兵斬鄧景異等。漢王高煦固請還京。上不憚遣之。二月。詔親征瓦剌胡寇。分五營。八將軍。三月庚寅。上發京師。皇太孫從行。夏四月甲辰朔。駐輿和。五軍盡出塞。開雲南黑鹽井。五月。大閱武於楊林茂。分撥尙書以下爲督陣官。六月甲辰。上次雙泉海。前鋒破敵。命兼程追之。戊申。發蒼崖峽。遇敵。諸將力戰。敗之。鄭亨追擊中流矢。及指揮滿都戰死。上躬擐甲胄。率師大破之。追度兩高山。又破之。馬哈木等宵遁去。庚戌。班師。阿魯台遣人來朝。秋七月。上駐宣府。己亥。至沙河。八月。上還北京。陳季擴伏誅。免北直隸糧芻三年。海西諸國來朝。大賞隨征將士及運糧官軍。九月。封平陽王濟熿爲晉王。丁丑。榜葛刺獻麒麟。開北京南海子。乙未。伊王橈薨。閏九月。以迎駕緩下。東宮官蹇義黃淮楊士奇楊溥芮善金問等於獄。尋釋。士奇冬

十月免江陰侯吳高爲庶人。英公輔等班師。十一月甲午朔。日有食之。廢晉王濟煇爲庶人。郢王棟薨。十二月增山後守塞軍。

十三年乙未。春正月。天下官朝於北京。前交趾參議解縉死。詔獄。徙其家於遼東塞。居庸池北山口。上元午門燈山火。都督馬旺焚死。遣御史分察天下。詢民瘼。設保安州。三月。始會試於北京。大賚征南將士。三月。策士賜陳循等及第。出身有差。選洪英等三十人爲庶吉士。罷海運。以淺船從惠通河運糧。三百萬於北京。夏四月。以英公輔鎮交趾。五月。丁酉朔。日有食之。開清江浦河道。命漢王高煦出居青州。秋七月。鄭和自西洋還。始召商中鹽北京。八月。庚午。唐王樞薨。賑北畿河南山東饑民。冬十月。命死罪皆五覆奏。交趾叛寇陳月湖伏誅。太監李達上西域十七國圖。十一月。命諸王各選步騎五千送真定操練。十二月。定北京計丁牧馬法。

十四年丙申。春正月。免河南山東逋租。山西妖賊劉子進作亂。討平之。復開潼川鹽井。三月。改封趙王高燾於彰德。夏四月。修龍虎山上清宮及懿真觀。郎中周訥請封禪泰山。尙書呂震贊決。上不許。以胡應爲文淵閣大學士。五月。壬辰朔。日有食之。山西寇平。賑畿南。賑山西。六月。命都督蔡福緣海捕倭。秋七月。紀綱有罪伏誅。免應城伯孫巖革城門郎。八月。蜀王椿發谷王穗謀不軌。獎賞之。召穗入京。丁亥。作北京西宮。九月。奪漢王高煦選撥諸衛軍。戊申。駕發北京。冬十月。癸未。上還京師。十一月。詔羣臣議營建北京。召英公輔還。十二月。修曲阜顏廟。周王橚。楚王楨來朝。徙山東西民三千餘戶於保安州。

十五年丁酉春正月倭寇浙東二月廢谷王穗爲庶人三月命漢王高煦居樂安州交趾始選貢士至京命罪人北京輸作以贖北京建靈濟宮設貴州按察司壬子上發京師夏四月丁巳朔日有食之西宮成五月丙戌駕至北京御新殿倭寇海涯閏五月汀州賊劉聖孫交趾賊阮貞等伏誅六月建北京郊廟宮殿視京師有加交趾黎核等作亂討平之太監張謙航海遇倭戰敗之秋七月冊皇太孫妃胡氏八月甌寧人進金丹及方書斥毀之福建賊陳天保等嘉興賊倪弘三等伏誅再定應天江北養馬例丁卯孔廟成己巳前吳王降庶人允燿薨冬十月癸未朔日有食之蘇祿國王來朝

十六年戊戌春正月交趾黎利叛李彬遣兵討利敗走二月行在會試三月策士賜李騏等及第出身有差選周敘等十六人爲庶吉士初令民運夏四月復代王護衛及官屬五月高皇帝實錄成昌平妖人劉化伏誅禮部左侍郎胡濙還遣如京偵皇太子久之以皇太子誠敬孝謹七事密奏上遂不復疑皇太子秋七月賑陝西荒靖州賊平冬十月令侯伯年少者入國學讀書安定王尙烝狂諄召至京訊之十二月詔曰昔唐太宗惡官吏貪濁犯賊者必寘之法故吏尙清謹民免培尅貞觀之治所以爲盛朕屢勅中外諸司不許妄役一人擅斂一錢而不才官吏恣肆自若百姓苦之繼今犯賅官吏必論如法

十七年己亥春正月廢尙烝爲庶人瓦剌貢馬三月蹇義起復夏四月黎利敗走老撾六月遼東總兵劉江圍倭於望海埚殲之封爲廣寧伯秋七月官軍還自西洋頒御製佛曲八月交趾土官潘遼叛追敗之走玉林州九月滿剌加等十七國入貢召探木尙書宋禮還京冬十月擒斬交趾叛寇俘獻京師十一月

拓北京南城。十二月。肅王榘薨。

十八年庚子。春正月。擢薦舉人才馬麟等爲各省布政司官。閏正月二月。山東妖婦唐賽兒作亂。命安遠侯柳昇討捕之。三月。詔凡夫匠營北京者悉復其家。柳昇等圍賊。破。賽兒走。山東賊平。以賽兒未獲。命山東尼道姑悉送京師。仍大索之。夏四月。交趾參政侯保馮貴禦黎賊。戰死之。秋七月八月丁巳朔。日有食之。召皇太子。期歲杪至北京。遣太監侯顯使西域。冬十月。衛卒丁俺三告周王橚謀不軌。召入京。十一月。改北京爲京師。去行在稱。京師改稱南京。詔天下革北京行部及苑馬寺。乙亥。召皇太孫於南京。期與太子同入京師。皇太子過山東。遇民饑。命發倉賑濟。上聞之喜曰。昔范仲淹之子。猶能舉麥舟濟其父之故。況百姓吾之赤子乎。太子所行甚善。十二月己未。皇太子皇太孫至京師。敕營宮殿。功封辭祿。爲陽武侯。餘陞賞有差。

十九年辛丑。春正月戊辰。詔曰。朕荷天地祖宗之佑。統馭萬方。祇勤撫綏。夙夜無間。乃者倣成周卜洛之規。建立兩京。爲永遠之業。爰自經營以來。賴天下臣民殫心竭力。趨事赴工。今宮殿告成。朕御正朝。祇事天地宗社。眷懷黎庶。嘉與維新。弘敷寬恤之仁。用洽好生之德。大赦天下。阿魯台入貢。其使人要劫行旅。戒責之。自是朝貢不至。定各蠻夷朝貢賞格。二月。敵犯寧夏。宥周王橚遣之國。三月。策士賜曾鶴齡等及第出身有差。選衛庶等十五人爲庶吉士。夏四月庚子。奉天華蓋謹身三殿災。肆赦。詔求直言。李時勉等上封事。上納之。主事蕭儀上言遷都不便。上怒。以謗訕殺之。乙巳。下詔遣官分二十六道問民疾苦。悉除

政令之不便者。五月。周王辭護衛。從之。交趾屯田。秋七月。禁自宮。己巳。上將巡邊。分五將軍。諜阿魯台北。遁。罷徵兵。八月辛卯朔。日有食之。詔天下兵明年春集京師。冬十月。阿魯台數寇邊。赦黎利爲清化知府。十一月。議北征。夏原吉。吳中。鄒師顏。忤旨。繫掖庭獄。兵部尙書方賓自殺。上怒。戮其屍。辛巳。李時勉下獄。命山東山西南北直隸造車。發丁壯運餉於口外。

二十年壬寅。春正月己未朔。日有食之。除烏程絕戶租二萬有奇。考察貪吏。謫戍。二月。命英公輔同列侯。豫北征餉。三月。阿魯台攻興和。殺守將王煥。丁丑。上告廟。發京師親征之。命皇太子監國。夏四月。倭寇浙東。上在宣府。盡收馬入城。六月。上次威遠川。開平報敵攻萬全。諸將欲分兵還擊之。上曰。不然。此詐謀也。敵恐大軍搗其巢穴。故作牽制之術。不足虞。當自退。已而果然。秋七月己未。上至沙瑋原。阿魯台遠遁。獲其輜重畜物。旋討兀良哈。命五將軍分道疾進。上以精騎追之。及敵於屈裂河。大破之。斬獲幾盡。收其餘衆。降者釋之。皇太子免兩直隸山東河南水災糧六十萬。八月己酉。以班師諭皇太子。詔天下。九月壬戌。入京師。西域諸國入貢。皇太子定各官在京應出京。在家應入京。而逗留者。遣戍。疏通鈔法。封朱榮爲武進伯。辭貴爲安遠伯。冬十月。分廷臣檢天下倉庫。閏十二月。乾清宮災。

二十一年癸卯。春正月。召諸大將至京。二月壬戌。蜀王椿薨。討廣西峒賊平之。三月。盜竊大祀壇蒼壁。二。黃琮。二。夏四月五月。指揮孟賢。彭旭。僞遺詔。謀不軌。立趙王高燧。王瑜告變。鞠實伏誅。六月庚戌朔。日有食之。秋七月。上親征阿魯台。分列侯七將軍爲中軍。左右前鋒各將軍。壬寅。車駕發京師。甲辰。次土木。

河大會諸將。八月乙亥。上次沙城。召晉庶人濟熿及其子美圭入見。封美圭平陽王。奉父就國。還其舊人。赦餘黨。九月。虜僞知院古納台等率妻子來降。冬十月。上次上莊堡。王子也先土干等率衆來降。封爲忠勇王。賜名金忠。餘陞賞有差。遂下詔班師。十一月甲申。上至京師。賜忠勇王金忠誥券。金印。玉帶。文錦。十二月。朝鮮貢馬萬匹。厚賜之。交趾貢是年獨贏。

二十二年甲辰。春正月。下朝覲官錢糧不完者於詔獄。尋釋之。阿魯台寇大同。勅諸將整兵候北征。二月。長興賊吳貴伏誅。戊辰。楚王楨薨。三月。策士賜邢寬等及第出身。有差。選徐賢等六人爲庶吉士。戊寅。大閱。分列侯及忠勇王金忠十二將軍隨駕征阿魯台。建大報恩寺成。夏四月己酉。車駕發京師。皇太子監國。五月壬午。遼王植薨。浙閩盜起。撫定之。甲申。上次清水源。晨召楊榮等曰。朕夜夢神人告云。上帝好生。如是者再。此何祥也。豈天屬茲部乎。楊榮對曰。陛下誠格於天。宜仰承天意。勅使諭敵。赦其不臣之罪。班師還京。上曰。此朕意也。遂遣中官史力哥往諭虜中。六月壬戌。次蒼石岡。敵遁去。分兵大索。數百里無所見。抵白邨山。糧盡南還。秋七月庚辰。勒石於清水源石崖。丁亥。次翠微岡。上御幄殿。召榮問曰。計程何日至京。對曰。八月中。上領之。旣而曰。東宮涉歷年久。政務已諳。還京後。軍國大事悉付之。朕可優游暮年。榮對曰。殿下孝友仁厚。天下歸心。允稱皇上。付託。上喜。賜宴而退。己丑。上次蒼崖。不豫。庚寅。次榆木川。上大漸。召英公輔等受遺命。傳位皇太子。十八日辛卯。帝崩。壽六十五。司禮太監馬雲等密召楊榮等入御幄。羣議以六師在外。去京尙遙。遂祕不發喪。命工部官斂軍中錫器。召匠成棹。權斂銅之。殺匠。載以龍輦。

朝夕上食奏事如常儀。益嚴軍中號令。八月甲辰。楊榮至。自行在。致大行皇帝遺命。皇太子哭。羣臣皆哭。命皇太子親王以下馳赴開平迎龍輿。己酉。皇太孫迎至鷓鴣谷。遇梓宮。哭迎。軍中始發喪。初十日壬子。梓宮至京師。九月上諡號曰體天弘道高明廣運聖武神功純仁至孝文皇帝。廟號太宗。十二月葬長陵。史官贊曰。雄才大略之主。必不矜細行。拘曲節。如帝之英毅絕倫。自其爲童穉時。言語氣概。常出懿文諸王之上。太祖已識其不凡。雖名號已定。終不能抑有心者於人下。噫。數也。帝臨幾剛果。機智如神。制敵決勝。以帝王之器具大將材。所以兵一起而易天位。厥後五出三犂。夔絕千古。銳意圖治。馴至蠻夷琛貢。重譯遠歸。貽子孫以久大之規。天下磐石。有古貞觀之風。說者謂以救死而興。得聖之權。彼三王諸君子。胡爲者。然而鄒緝解縉。楊士奇之倫。言人人殊。皆能名狀神武。歌咏駿烈。是以革除之後。休風孔章。使好古者覽之。有餘慕焉。若非以太祖之嫡胤。纘緒光大。後世鮮不目爲篡云。

明書卷六

本紀四

仁宗昭皇帝本紀

帝諱高熾。太宗文皇帝第一子。母仁孝皇后徐氏。生於洪武十一年七月二十二日。生之夕。皇后夢冠冕執圭者上謁。寤而生。上自幼沈靜端重。言動有經。喜讀書。手不釋卷。日從諸儒論說。不厭騎射精絕。既冊爲燕世子。太祖特召秦晉周燕四世子親教之。命分閱皇城衛士。還奏獨後。問故。對曰。旦寒甚。諸軍方食待畢。乃閱。太祖以能恤下甚喜。又命分閱章奏。取關大計者以陳。略其語字謬誤者。太祖指示之。對曰。小過不欲瀆天聽。嘗問堯湯久水旱。民何所恃。對曰。恃聖人恤民。太祖大奇之。曰。孫有人君之度矣。燕兵起居守慎。固撫綏人多畏悅。李景隆來圍北平。上悉力守禦。會太宗引兵至。擊退景隆兵。時二郡王高煦從軍。三郡王高燧同畱守。宦者黃儼黨高燧。離間譖上。將以北平應京師。高煦因而實之。太宗未信。會京師用計密書來投。上不發。立械其使。并書送軍中。而儼已先報。太宗大疑。會上所送至。乃歎曰。幾殺吾子。謀不得行。江上之戰。太宗殊憊。高煦率番騎至。太宗倉卒激勵使戰。曰。事成天下爲汝有。高煦決死進。敗建文兵。遂渡江。功成羣臣請立上爲皇太子。太宗猶豫久之。而淇國公邱福以元功亦黨高煦。旁德惠之勢。

危甚。然終以天序難奪。太祖所册徐妃孝敬及解縉等力言不可。嘗題虎顧衆彪圖。大有省悟。又曰。好聖孫。蓋指宣宗也。二年四月。始册立爲皇太子。高煦爲漢王。高燾爲趙王。漢王終怏怏。謀益狡且急。會邱福敗歿。外黨稍散。而黃儼等日侍左右爲蜚語。陷死解縉。漢王日益橫。上覆露日益至。太宗微聞之。久乃得實。徙漢王樂安州。事始定。而黃儼等又奉趙王伺上過。失。太宗終以上性緩不似己。意常不懌。遣胡濙往京師密廉。時適北征。迎後且失辭。遷怒輔導官。下獄有死者。上益恭謹。每日盡心子職而已。他非所計也。濙還奏上仁孝誠敬七事。上聞。太宗悅。事乃大定。十八年。北京宮殿成。召上及皇太孫會朝。正而儲位大安。趙王事亦敗。二十二年。太宗北征疾甚。口自語曰。太子賢孝。賢孝若面命云。八月甲辰。報宣遺命。上哭幾絕。強起拜受。遣皇太孫迎喪。立授監國印。曰。有軍國事。以此封識來。顧謂楊士奇曰。昔大行臨御。儲位久未定。浮議喧騰。今卽付之。浮議何由興。其明決如此。集大臣。命釋夏原吉於獄。同議典禮。分召大營兵精銳者先入京。餘番軍分鎮南京。壬子。龍輦至京。易梓宮。丁巳。上卽皇帝位。大赦。改明年爲洪熙元年。詔罷西洋寶船。雲南取寶石。交趾採金珠寶石。各直省徵錦緞及書畫。迤西索馬。密場造齋器。採辦木板。進貢海味異果。竝諸擾民者。悉皆罷之。釋諸大臣株連繫掖庭及詔獄者。復三公三孤官。曰。此皇祖之制也。皇者聰明天縱。可不眞此。予見未廣。不無望於師保。楊士奇入奏事。上望見。喜。顧侍臣曰。學士奏事必有理。試共聽之。士奇奏言。恩詔甫下。而惜薪傳旨賦北直山東棗八十萬斤。合炭民何堪。上喜曰。固知學士來言必有理。日來宮中叢脞。急遞中不暇致審。卽命減四十萬。赦解縉妻子還鄉。官其子汰冗官。召漢王。

高煦入京。太常卿周納來朝。上曰。伊在太宗朝請封禪。諛佞豈宜玷朝班。黜之。琉球占城貢方物。丁卯。賜保母金氏爲翊聖恭惠夫人。下成公勇等於獄。以居大行喪失禮。尋宥之。發國子監習禮。九月癸酉。上太宗文皇帝諡號。母仁孝皇后進諡仁孝慈懿誠明莊獻配天齊聖文皇后。都督方政等討黎利。戰敗績。指揮伍雲死之。尋指揮陳忠亦戰死之。廢巴東王貴煊。遠安王貴燮。父死不奔喪。皆爲庶人。弛都城外山林樵採之禁。河溢。免河南田租。有司請卽吉。上曰。梓宮在殯。豈忍從吉。羣臣執以祖宗舊制。廿七日而易。上退。次日朝。猶麻經。獨英公輔及諸學士不易。上歎曰。輔及諸學士知禮。衆乃有不及。漢王還國。哈密貢方物。虜刺哩等來歸。詔工部合用物料。必徵於所產之地。若混派擾民。必誅不宥。免李懋芳爲庶人。甯王權欲來朝。請改封。上詔止之。和甯王阿魯台入貢。冬十月。浙西蘇松水。詔糧一石止輸布一匹。選朝臣爲東宮官。甲辰。賜衍聖公宅於京師。己酉。冊妃張氏爲皇后。并冊貴妃郭氏等四妃。壬子。立皇太孫瞻基爲皇太子。次瞻埈。鄭王瞻墉。越王瞻垠。蘄王瞻塏。淮王瞻埜。滕王瞻埒。梁王瞻埏。衛王漢世子瞻坦。趙世子瞻垓。詔告天下。命內外官訪舉才德。嚴連坐法。審錄重囚。十一月。宥建文諸臣家族歸鄉。給還田土。趙王辭護衛。許之內官馬騏等請往交趾採辦金銀。上怒斥之。命御史湯煢等十四人分巡天下。考察官吏。令天下不許擅役屯田軍士。罷海子及西湖巡視官。十二月庚申。葬長陵。廣西獠賊亂。鎮遠侯顧興祖擊破之。作觀象臺。令各都司官軍更番於京師備操。徙封韓王於平涼。敵犯雲州。陽武侯薛祿擊敗之。遁去。

洪熙元年乙巳春正月大祀天地於南郊奉太祖太宗配大赦初建弘文閣以楊溥掌閣事有司請凡朝觀官給馬牧養上不許二月黜漢第二子瞻圻居鳳陽寘武英殿門待詔乙卯遣官祭各陵及歷代帝王陵闕里山川丙辰耕籍田陽武侯辭祿再破敵於赤城除誹謗之禁三月命榮昌伯陳智率師討黎利命皇太子率文武大臣往祭皇陵孝陵就留守南京漢王請入朝諭止之趙王高瞻之國彰德長興賊殷先朝伏誅上欲還都南京命北京各衙門悉稱行在復設北京行部等衙門夏四月盡罷一切官置物料及山東淮徐田租之半勅平江伯陳瑄停採運大木定太宗廟佑享功臣朱能等四人薊州指揮陳景先襲寇破之諭禮部科場取士分南六北四選文臣贊理各邊軍務壬子皇太子發京師五月蠲水旱蝗地方田租修太宗文皇帝實錄倭犯浙江擊破之詔曰農者生民衣食之原耕耘收穫不可失時自今一切不急之役有當用民力者皆俟農隙前代蓋有不恤農事而以徭役妨耕作召亂亡者矣其罷之又詔曰朕恭承大統爲生民主惟我皇祖皇考愛民之仁祇率不怠朝夕思念人命最重哀矜庶獄惓惓在懷夫刑以禁暴止邪道民於善豈專務誅殺哉故律令之制善善長而惡惡短罰之輕重咸適其中顧執法之吏不能平有虛飾其情傳致死罪而比附謬妄尤甚枉人朕深憫之夫五刑莫甚於大辟自今有犯者依律科斷其餘罪犯法司勿得昧情失實以致冤濫若朕一時過於嫉惡用籍沒及凌遲之刑法司再三執奏至於五奏仍同三公大臣執奏必允乃已永爲定制文武諸司不許用鞭背等及宮人自宮者皆罪之除大逆連坐餘止及身至於誹謗一切勿問如或違者必罰不宥庚辰上不豫召憲義楊士奇黃淮楊榮

至思善門。降勅馳召皇太子。辛巳。上大漸。詔天下傳位皇太子。上崩。壽四十八。以皇太子未至祕喪。六月辛丑。皇太子至自南京。始發喪。秋七月己巳。上諡號曰敬天體道純誠至德弘文欽武章聖達孝昭皇帝。廟號仁宗。九月葬獻陵。

史官贊曰。明之初興。若太祖太宗。皆雄烈之主。高明而少柔克。而國家元氣。培於仁宗實多。在位十月。不啻必世之久。淪浹肌髓。人樂盈甯。其最難者在監國時。讒譖交作。委曲篤至。仰事英明之父。慈幃先背。傲弟肆耽。儻中藏未誠。安能消釋萌隙若此。況太宗干戈土木。日勤於北。民無怨違。事皆有濟。皆根本得人。固結羣心之明效也。至御極後。大鬯厥施。仁心卓識。德音孔嘉。於危疑震撼之餘。眷然有反本之思。顧念舊京。又以山陵初卜。不忍離棄。託之於子。覃敷惠澤。天下歸仁。遺詔初下。百官軍民。如喪慈父。號稱至仁。其無愧歟。

明書卷七

本紀五

宣宗章皇帝本紀

帝諱瞻基。仁宗長子。母孝誠皇后張氏。生於建文元年二月九日。時太宗謀起兵。一夕夢太祖授以大圭。命之曰。傳之子孫。永世其昌。拜受而寤。心喜。遲明報上。生彩光騰煜。仁宗來謁。太宗熟視。見面有瑞色。益喜。彌月見太宗。太宗指曰。天日之表。英氣溢面。似過其父。太宗卽大位。仁孝皇后攜至南京。方四歲。儀容儼恪。羣臣望見咸驚異。相傳爲異日太平天子。稍長。孝敬日隆。喜讀書。太宗設講席於華蓋殿之東。敕宮僚協心輔導。永樂七年。駕北狩。立爲皇太孫。從行。太宗每令上過田家。徧覽器具及其衣食。諭以農民勤苦之事。曰。此帝王先務。不可不知。遂作務本之訓。示仁宗及上。詳言農事憔悴。王業艱難。及它政要。又命儒臣集聖學心法以授上。上服膺惟謹。一日數行。大義瞭然。覽必盡卷。輒默識不忘。羣書尤博洽。太宗一日問帝王心法。獨以精一執中爲對。太宗大悅。稍暇侍制。應答無不愜。吟咏騎射皆精妙。太宗出塞。畱守北京。時政事填委。左右以艱大爲言。上曰。皇祖悉有成法。要在遵行。揮斷如流。衆皆驚服。十一年。午日。擊射西苑。獨中。太宗嘉勞之。因令屬對。口占曰。萬方玉帛風雲會。上應聲曰。一統山河日月明。太宗大喜。

十二年。從征哈立麻。太宗命帥中軍精銳。每摧敵無不破者。一日以百騎覘敵。至九龍口。敵萬人圍之。左右皆大懼。上神色自若。指揮躍馬。貫陣而出。先邏騎奔告太宗。妄言已歿。太宗大驚。急帥兵往救。未二里。上至。太宗且喜且泣曰。非子英武。鮮不殆。仁宗嗣位。冊爲皇太子。洪熙元年五月辛巳。仁宗崩。六月庚戌。上卽皇帝位。大赦。改明年爲宣德元年。先是南京地震。仁宗欲還舊京。歎曰。南京根本重地。往年皇考北巡。委朕畱守。可無內顧憂。今災異如此。朕當亟往。但山陵初定。何忍遽違。非皇太子不可。召諭以意。泣而遣上。方謁孝陵。聞仁宗不豫。京師頗傳凶問。人情洶洶。侍臣請集兵戒嚴而行。或請從間道。上曰。君父在上。天下歸心。豈有他虞。且予始至。遽歸。非衆所測。召不俟駕。豈可稍遲。遂由驛道馳歸。六月辛丑。入都。時仁宗已崩二十一日矣。方上未至。喧傳高煦舉兵犯闕。諸將勒兵闕下。上以暑月。悉命撤去。曰。有天命在。是何能爲。及卽位而事宴然。辛亥。敕諭南京守備及各邊鎮臣。奮勵勿怠。免雜職官。明年朝賀。詔停市。賈及造辦。賑山東饑。數大同屯田。立遼東學校。瓦刺亦速等來歸。召辭祿還京。秋七月己巳。上大行皇帝諡號。詔天下。乙亥。尊母后張氏爲皇太后。立妃胡氏爲皇后。并冊淑妃劉氏。惠妃何氏。止諸王朝賀。選交趾教官。調降罰官爲交趾有司。廣西桂平賊亂。平之。閏七月。給事中傅安使撒馬兒罕。二十餘年始歸。厚賜之。琉球貢馬。命修仁宗實錄。以安順伯辭貴等巡塞外。庚戌。滕王瞻墀薨。丁巳。周王橚薨。交趾賊黎利圍我兵於茶籠州。七月不解。廣西寇覃公旺等作亂。顧興祖討之。尋平。收弘文閣印。八月。減蘇杭織造之半。舉堪任守令者。免貴州食鹽鈔。徵山林通經之士。九月壬寅。葬獻陵。冬十月丙寅朔。日有食之。給邊軍。

煖衣狐帽。慶王勳請復居韋州。不許。十一月。淳泥國入朝。討安定。曲先敗之。其王來謝。邊境悉平。嚴敕交趾總兵官陳智等。速勦黎利。仍召侍臣諭以先帝曾有復立陳氏息民之意。十二月。琉球占城入貢。廣西宣山賊平。有司以造器請買於民間。上曰。漢文復御。帷帳無文繡。史稱其恭儉愛民。朕方慕之。以儉約率下。所用者就庫藏中取給。不必滋擾。

宣德元年丙午。春正月。孔孟顏三氏子孫及潞陽王郭昇來朝。金幼孜起復。漢王高煦獻燈。侍臣曰。所遣者多窺瞰意。上曰。朕惟推誠待之。免邊衛軍士歲辦薪炭。宥罪人運糧於宣府城。南丹貴州刺惹蠻服罪。罷兵。有司造軍器。請買鐵江南。上曰。鐵物重滯。遠運勞民。命於遵化開冶。二月。盡除荒田逋稅。遣官分祭諸陵。闕里。歷代帝王陵。山川丁丑耕籍田。修葺南京郊壇。三月。陳智等討黎利。敗績。勦戚請民田不與。仍戒諭之。夏四月。以成山侯王通爲征夷將軍。帥兵討黎利。尙書陳洽贊軍務。削陳智等官爵。免黃巖稅糧。五月。赦交趾王寅。冊孫氏爲貴妃。特製金寶。六月。潯州蠻亂。討平之。召辭祿還京。賑山東山西河南災。秋七月。嚴鈔法。諭六科。凡係內使傳旨。必覆奏。始行諸司。以翰林官授小內官書。免山東田租之半。白葛達國入貢。修山海抵居庸關隘。蜀蘇州糧十一萬有奇。岷世子徵掖擅赴京。止之。八月壬戌。漢王高煦反。移檄遠近。以輔臣夏原吉等亂政爲辭。辛未。上親征。駕發北京。以襄王鄭王居守。分列侯爲五將軍。從討之。先遣使以書諭之。云。人言王反。朕初不信。及得王奏。知王志在禍生靈。危宗社。朕與師問罪。不得已也。王太宗皇帝之子。仁宗皇帝之弟。朕嗣位以來。事叔父不少虧禮。何爲反耶。朕惟張敖失國。本之貫高。淮南

受誅成於伍被。自古小人事藩國。率妄圖富貴。而陷主不義。及事不成。則反噬主。以圖苟免。今師已壓境。王能悔禍。擒倡逆者來。朕與王削除前過。恩禮如初。儻若執迷。僥倖萬一。當率大軍乘之。成擒何難。或麾下以王爲奇貨。執以來獻。王何面目見朕。雖欲保全。不可得矣。王審圖之。辛巳。再諭之。已復三諭。高煦謀遁。壬午。遂擒高煦。乙酉。班師。差內臣爲鎮守。九月。遣使以書諭趙王高燧。繫高煦於逍遙城。王斌朱恆伏誅。冬十月。唐王瓊涇薨。賜朝鮮書籍。十一月。王通擊黎利敗績。尙書陳洽死之。赦高煦餘黨。十二月。免通州以南大軍過處秋糧。減免天下稅糧六萬有奇。命列侯柳昇等六將軍分道討黎利。于謙爲監察御史。

二年丁未。春正月。趙王高燧上書謝罪。辭護衛。從之。上召輔臣諭曰。朕思交趾一事。昔徵舒弑陳靈公。楚子討之。殺徵舒。旣縣陳。申叔時以爲不可。楚子旣復封陳。古人之服義如此。前太宗初得黎賊。定交趾。卽欲爲陳氏立後。時廷臣不能順承。今朕欲承先志。使中國之人安於無事。但叛賊在所必得。稍甯。當求陳氏立之。輔臣對曰。此盛德事。賜趙王書。并示以告反及羣臣封事。二月。黎賊攻交趾城。守將擊敗之。三月。策士賜馬愉等及第出身。有差。晉王濟熿以陰事被告。辭爵土。賜書止之。湖廣旱。免輸征南軍餉。夏四月。廢濟熿爲庶人。安置鳳陽。黎利陷江城。指揮李任死之。王通約和黎利。遣人同其使進降表及方物。未幾。陷諒江府。知府劉子輔死之。五月。簡用罷黜庶官。四川官憚交趾行。激變番寨。械治之。番寨尋平。六月。悉召鎮守內臣還京。秋七月。汰南京監生三千四百人爲民。黎利陷隘。畱關。顧興祖不救。逮下獄。辭祿復出。

開平。襲敵破之。八月。蜀南北畿山西河南水旱租稅。九月乙未。征南兵至隘。畱遇賊。柳昇陷伏死。兵潰。冬十月。王通復與黎利盟和。棄交趾還師。黎利以陳暲至。求立入貢。十一月。遣官求陳氏後。撤還官兵。乙未。皇長子生。是爲英宗。赦天下。黎利送還尙書黃福。曲先部落聽撫者四萬二千餘帳。十二月。薛瑄爲御史。內官張善監造鑿器。貪贖伏誅。賑陝西。減陝西糧十萬有奇。遣工部侍郎李琦等立陳暲爲安南國王。棄其文武諸司四百七十餘所。得還者八萬四千六百四十人。被留者無算。

三年戊申。春正月。書諭阿魯台。二月戊午。立皇子祈鎮爲皇太子。允慶王櫛復居韋州。宥交趾逃軍罪。詔凡貢舉人才。皆引內庭考試。以劉基孫豹爲刑部照磨。上御講幄。侍臣講孟子伯夷避紂章。未暢。上曰。皆稱聖人者。以太公之心在當時。伯夷之心在萬世。總爲民生計耳。衆悅服。廢皇后胡氏爲靜慈仙師。冊貴妃孫氏爲皇后。增生員數。阿魯台入貢。免畿民運薪。免山西役。夏四月。罷南京工。新作公主府於十王邸之南。閏四月。下王通等于詔獄。誅蔡福朱廣。褒贈死事諸臣。封戚畹孫忠爲會昌伯。免汝南王有勳新安王有熹爲庶人。松藩苗平。禁採番禹鉛砂。籍沒王通家。革爵。山西饑。民入河南。命官撫之。五月。陳暲卒。黎利表乞守國。俟命。復命李琦等訪陳氏後。六月。下工部尙書吳中於獄。中以官料送太監楊慶作私第甚壯。上知惡之。尋釋。秋七月。甯王權遣人進扇求鐵笛。上曰。古人謂笛者滌也。所以滌邪穢。雖無此物。當新製與之。八月。皇第二子祁鈺生。是爲景皇帝。召廷臣遊西苑賦詩。有草舍數椽。上指示曰。此朕致齋之所。非敢比古茅茨不翦之意。庶幾不忘儉也。上親釣魚得數尾。卽具饌賜羣臣。盡歡而罷。革北京都督府甲

辰。上以防秋農事畢。親行邊。命蹇義等扈從。駙馬都尉袁容等侍皇太子居守。丁未。發京師。分英公輔等爲將以從。九月辛亥。次喜峯。兀良哈侵邊。入大甯及寬河。上率師出喜峯。遇敵。悉萬衆來戰。上以鐵騎爲兩翼夾擊之。上親發三矢。殪其前鋒三人。諸將及軍士歡聲震天。大破之。餘潰走。敵望見龍旗。知上在行間。皆下馬羅拜。縛之。復分將搗巢穴。俘獲無算。甲子。詔班師。癸酉。上還京。冬十月。妖人樓濂伏誅。韓王請徙封長沙。不許。十一月。城獨石。遂棄開平。十二月。獲廣東賊譚圓及嘉興盜平康等。皆伏誅。

四年己酉。春正月。定納米贖罪例。二月。羅汝敬等使交趾還。黎利入貢。進代身金人謝罪。三月。朵顏來貢。宥罪。并還其家屬。倭寇福建。免四川茶戶徭役。遣李琦如安南。再訪陳氏子孫。夏四月。代州署訓導舉人曹鼎奏。年少不堪爲人師。願入太學。或就別職。上喜。命爲泰和典史。準會試。定薦舉人材。會官考覈例。弛極刑家屬入仕之禁。五月。寬獄。放者二千二百餘人。吳中請修代州圓果寺。不許。初。設鈔關。六月。改貴州。從雲南鄉試。敵犯赤城。方敏追敗之。遁去。秋七月。戶部上戶口數。八月丁丑。鄭王襄王荆王淮王梁王各之國。楊溥起復。九月初。遣將出塞燒荒。放免監生年老無成者。遼東寇數擾邊。治守土文武官罪。冬十月。命朝鮮止貢土物。免金銀器。上閱武近郊。數幸文淵閣。咨輔臣政事。賦詩。十一月。許阿魯台市馬。初。給京官柴薪。著爲令。十二月。罷採泰安州天麻。南海民請開銀礦。不許。免兩畿糧十七萬有奇。秦王尙潔辭三護衛。令留其一。命列侯率師巡宣府。

五年庚戌。春正月。大觀考察。獲文登妖僧明本等。壬戌。兩朝實錄成。二月上。以春和頌寬卹之詔。三月乙

未上奉皇太后率皇后謁陵。五日還京。路見耕者。以數騎往視之。禁從者勿警蹕。下馬從容問稼穡事。因所執耒耜三推之。耕者初不知爲上也。旣而中官至。乃驚羅拜。上顧謂侍臣曰。朕三舉已覺其勞。若輩乃常事此。苦莫如農。命賜之鈔。製耕夫記。侍郎李琦還自交趾。黎利入貢。送還羈留人萬六千餘。并言陳氏無後。請權國事。上命再索以聞。改民運爲兌運。免平陽糧三十二萬餘石。乙卯。策士賜林震等及第出身。有差。選薩琦等八人爲庶吉士。平江伯陳瑄密奏言。楚王兵強國富。恐有異圖。宜托漕運抽護衛。翦其羽翼。上曰。王素無過。朕待之加厚。何庸過慮。增寘嘉興府秀水嘉善桐鄉平湖四縣。夏四月。命侍郎成均督江南屯務。諭勿得擾民。五月。盡徙開平軍民於獨石。以尙書黃福總理屯田。六月。使太監鄭和如西域。賑河南饑。仍悉蠲逋稅。增寘邊堡。寘萬全都司。曲先邀劫使臣。討之。秋七月。鄭州妖人申敏伏誅。八月己巳朔。日有食之。諭吏部舉廉潔之士。寬連坐之禁。九月。罷燒造齋器。冬十月。丙子。上巡近郊。度居庸。獵岔道。壬辰。還京。十一月。柳州蠻亂。平之。楚王孟烷以人言上三護衛。上命留其一。招撫河南流民十萬五千戶。餘戶免徭役一年。罷溫處銀礦。十二月。築浙江捍海隄。選京衛軍十萬隸五府訓練。獻曲先俘。閏十二月。封昭皇后弟張昇爲慶安伯。

六年辛亥。春正月。罷湖廣採木。甘肅以布易馬。命南北畿開荒。永不起科。分山東河南民戶養馬。二月。御史陳祚請上講大學衍義。上怒。逮下詔獄。并其父母妻子禁錮者五年。太監鄭和自西域還。仍命往諭。停邊海官舍。赴京操練。蠲山東店課。夏四月。阿魯台來歸。賜遣之。溧陽妖人錢成伏誅。六月。諭黎利權署安

南國事乙丑。藩王模藹再免河南逃糧。秋七月。上微行。以四騎出幸楊士奇第。詳士奇傳。寘宣府龍門衛。西僧孤納芒葛刺有罪。斬之。許三衛互市。復儀真壩。八月。趙王高燧薨。太保忠勇王金忠卒。九月。戶部先以地。曾施崇國寺。請其稅。上曰。地爲小民衣食之資。乃以俾僧。且求免稅。甚無謂。令亟還民。冬十月。罷嵩縣銀礦。設甯夏甘州二河渠。提舉司丙午。上巡近郊。五日還。十一月。詔各關津設把守軍。多邀阻。罷之。城宣大鎮。伊王辱知府李驥。上書戒之。逮其長史等官。內官馬俊唐受等伏誅。

七年壬子。春正月辛酉朔。日有食之。遣使如西域。二月。黎利入貢。丙午。修南京太廟。令甘肅降衆處涼州。上御文華殿。召輔臣等曰。憶朕五年二月。論寬恤事。今又兩閱歲矣。民隱不又有可恤者乎。侍臣對曰。前詔如官田減租一事。戶部至今格不行。上曰。戶部可罪也。今再下寬恤詔。當舉此爲第一條。因列二十二事。命士奇草詔。三月庚申。頒寬恤詔於天下。諭禮部。凡詔語有司。無得廢格。違者奏聞不宥。免太原平陽糧及芻。夏四月。免山西省逋糧二百四十萬。募商輸粟塞下中鹽。五月。修新津堰。六月。貴州蠻亂。破擒之。拓皇城東。偏建朝天宮。罷內官入番買馬。以水災。蠲開封糧五萬八千餘石。秋七月。肅王瞻焰上護衛之半。從之。癸未。駕幸萬歲山。召儒臣講論古今。已而歎曰。此元築山也。世祖知人善任。信儒術。愛民力。故能有此。使順帝能恭儉守其祖法。天下豈爲祖宗取有。又曰。茲山乃順帝爲游宴之地。豈不可感。八月乙未。詔舉賢才。寘天下預備倉。收穀備荒賑民。九月。蠲蘇松海溢租稅。及河南秋糧。冬十月十一月。白葛達及天方等國入貢。大修祖陵孝陵。改文廟左衽像。

八年癸丑春正月上躬祀天地於南郊歸始視朝二月阿魯台改道遼東入貢三月策士賜曹鼎等進士及第出身有差選尹昌等六人爲庶吉士詔優恤軍士選京衛幼軍一萬隨侍皇太子覲京衛餘丁歸有司夏四月葺廣寒清暑二殿貯書籍五月日本來貢增獨石戍卒六月開平守將擊敵於紅山破之朝鮮攻建州敕止之命官馳賑江西南水旱災秋七月申嚴通番之禁八月汰冗官七十七員閏八月遣官申諭黎利瓦刺入貢九月敵犯涼州擊敗之冬十月罕東劫使臣討之鑄宣德通寶錢十一月賜朝鮮書選前科進士徐理等十三人爲庶吉士十二月甘肅被寇命天下關津凡遇薙髮人捕送原籍罪之詔修南京宮殿

九年甲寅春正月二月妖僧李梟謀反伏誅三月文武百官朝皇太子於文華殿黎利死安南亂士官阮公庭等來歸夏四月安南黎麟使人入貢上閱囚縱千三百人五月遣官祭黎利秋七月罕東番就撫八月江西亂民夏九旭等作亂尋捕伏誅命文武羣臣以九月巡邊上御左順門試修撰等官及庶吉士親第高下賜賚之九月癸未上發京師度居庸次岔道駐宣府己亥大獵冬十月丙午駕還京册黎麟權安南國事松藩蠻平罷陝西買馬十二月甲子上不豫廣西破大藤賊

十年乙卯春正月癸酉上大漸停南京工役及各處採辦乙亥帝崩於乾清宮壽三十八是月甲申上諡號曰憲天崇道英明神聖欽文昭武寬仁純孝章皇帝廟號宣宗六月葬景陵

史官贊曰帝迄今二百有餘年每誦所爲古文辭詩賦想見其君臣喜起雍容大度有唐虞風至一駕而

平絕幕。再駕而靖強宗。聲色不動。措天下於休康。未嘗不服其英武恢宏。有祖宗之烈焉。仁宗茂德寬平。涵濡天下。不竟厥施。而帝以純誠浹洽於後。故聲教昭宣。禮樂明備。海宇底定。且懷儉德。勤蠲卹。一時名卿循吏。襃然濯拔。皆良材。終帝之世。官稱若職。於天下新脫湯火之餘。乃能順民與之休息。可謂文武恭儉之主矣。第開平交趾。疆土促棄。而宮闈之好。鮮克有終。雖無害於大化之成。識者惜之。然而十年間。政無謬。整人無苦窳。水旱不能爲災。非帝之勵精所致不至此。嗚呼盛矣。

明書卷八

本紀六

英宗睿皇帝本紀

帝諱祁鎮。宣宗長子。母壽聖皇后孫氏。於宣德二年十月十一日己未生。生時日下五色雲見。天質秀傑。明年二月立爲皇太子。甫能言。宣宗問上曰。它日爲天子。能令天下太平乎。曰。能。又問有干國紀者。敢親統六師往征乎。曰。敢。宣宗知其勇決。長知書。意豁如也。初。宣宗立后胡氏。多病。屢舉不育。諸妃姬皆無子。壽聖時爲貴妃。孕時多奇徵。旣生。宣宗大喜。胡后亦喜曰。上有子矣。私謂孫妃生子。吾安得久據妨母以子貴之誼。宣宗廢胡后爲靜慈仙師。先是。宣宗猶遲疑不能決。謀於閣臣楊士奇。力贊。遂廢之。立上生母爲皇后。宣德十年春正月三日乙亥。宣宗崩。上方九歲。皇太后取金符入內。浮議有迎立襄王之說。太后聞之。立至乾清宮。以上召廷臣泣曰。此新天子也。廷臣皆頓首呼萬歲。浮議乃息。壬午。上卽皇帝位。丙戌。朝鮮入貢。撤各處鎮守內臣。仍敕所在三司官勤爲撫綏。大賚親王宗室等有差。丁酉。上大行皇帝諡號。辛丑。免貴州屯糧。邊衛官備操京師者皆遣還。二月壬子。尊聖祖母皇太后張氏爲太皇太后。生母孫氏爲皇太后。辛亥。封弟祁鈺爲郟王。頒詔天下大赦。封平陽王美圭爲晉王。釋前御史陳祚於獄。復其官。以

成公勇提督大營。省各衙門冗費。三月。樂安賊曾子良作亂。討平之。放教坊司樂工三千八百餘人。減光祿料米九萬石有奇。停勳臣私馬日料。夏四月。命免江南歲進鳥獸。減在京韃官月俸。免順天漣糧。壬寅。以元學士吳澄從祀孔廟。五月。減南京歲費。招撫北直河南山西流民。革部院交趾司。有進煉丹方者。卻之。台州盜起。六月。敵入大同。辛酉。葬景陵。占城入貢。秋七月。敕修宣德實錄。命司禮監太監王振偕文武大臣閱武於將臺。免山西今年田租。禁下海捕魚。八月。限僧道田。餘田皆撥給貧民。減光祿廚役四千餘人。戊申。淮王瞻墺徙饒州。九月。敵犯涼州。冬十月。重建孝陵及長陵碑。出京庫布甘肅市馬。建天下衛學。日本朝貢。十一月。戊辰朔。日有食之。十二月。督民種桑棗。濬河南金龍口。進士李賢奏請徙韃官於外。以防患。不報。甘肅兵連破敵王阿臺等。

正統元年丙辰。春正月。遣官祭各陵。闕里及山川。歷代帝王陵。己卯。開經筵。時王振用事。考功郎中李茂弘上言。可憂者君臣之情不通。今經筵進講。不過應故事。以粉飾太平。而睽隔蒙蔽。未必無意外之憂也。不省。撥京軍屯田。減苑馬寺官。二月。命卹逃民復業者。禁法司煨煉。凡勳臣家各除教官一員。訓其子弟。三月。策士賜周旋等進士及第出身有差。選王鑑等十四人爲庶吉士。夏四月。始享太廟。賚公侯以下鈔有差。遣官分道捕蝗。重建三殿。校從祀先賢名爵位次。安南及占城入賀。五月。敵犯肅州。罷南京冰池。遣番僧。始設提學官。以修撰編修檢討御史副使僉事爲之。六月。許流民隨處附籍。免糧一年。徙甘涼寄居。回回於江南凡五百戶。徙在京降虜於河間德州。裁主事二十餘員。汰天下吏員。閏六月。罷陝西織造院。

謁敵犯肅州及鹽池。西洋十一國入貢。人還救諭其國王。詔先聖先賢子孫復其家。秋七月。徙封襄王於襄陽。貴州賊亂。討平之。命都督蔣貴率兵勦寇。瓦剌順甯王脫驩求市馬。許之。八月。給還解縉家產。汰錦衣官校。九月。命京官不得連姻宗室。封黎麟爲安南國王。冬十月。重建太學。俘獻甘肅賊。修建京師九門樓。十一月。上親閱武於將臺。駙馬都尉薛桓發中。賜卮酒。觀者歎謂萬乘閱武如此。不如王太監去年有殊恩。免兩浙逋鹽課。復遵化鐵冶。十二月。給金牌遣還老搃等頭目及先後瓦剌使臣。諭京官三品以上各舉堪爲御史者。

二年丁巳。春正月。太皇太后欲誅王振。上及大臣救之。不果。敵數犯甯夏。命方政史昭合蔣貴三路討之。武官自都督以下入京學讀書。二月。設行在欽天監渾儀。革甘肅苑馬寺併於陝西。諸御史媚王振。遂次第差巡行天下及屯鹽關務。三月。貴州賊阿哈等平。遣官治南北河道。夏四月。收訪山林才學之士。禁天壽山樵薪。增南京軍月糧。七月。虜酋把禿索羅入莊浪。王驥遣魏榮率兵勦之。擒其部落。遂遁去。九月。阿爾臺入犯。王驥督諸軍禦之。冬十月。王驥等大敗敵於梧桐林。擒其頭目三十餘人。轉戰二千餘里。俘敵三千。畜物無算。虜酋率數十騎竄去。敕方面郡守有缺。準三品以上保舉擇用之。十一月。于謙奏革邊將役軍耕種之弊。盡入其田爲軍屯。馬龍甸蠻亂。討平之。

三年戊午。春正月。王驥大破敵於塞外。阿臺朵兒只伯走死。裁各夷朝使廩餼。災傷。免畿南糧九萬有奇。二月。命工部侍郎李庸專造兵器。三月。修宣大城堡。停鹽場內官。禁天下祀孔子於釋老廟宇。夏四月。宣

宗實錄成。總裁纂修官陸賞有差。尙書王驥等出鎮夷關。襲敵。連破之。追至黑泉而還。餘黨皆降。五月。建太倉庫。革貴州馬羅府。遷十庫於內府。瓜哇來貢。六月。麓川思任發。累侵南甸等處。敕撫諭之。命木邦等處會討麓川。秋七月。修沁河。減南京吏食鹽。八月。蠲菜稅及蘆鈔。乙卯。慶王櫛薨。九月。荆王請徙河南。不許。疏潞州渠。免南北直湖廣子粒六十三萬有奇。命黔公晟進討思任發。冬十月。召王驥還京。封蔣貴爲定西侯。餘陞賞有差。遼王有罪。召入京議之。

四年己未。春正月。大計朝覲官。遣刑部主事楊甯諭撫思任發。不聽。二月。貴州苗金蟲等叛。討平之。沐晟等進兵金齒江。襲破賊柵。斬獲三千餘。方政乘勝深入。遇伏戰死。益以湖貴兵進勦。更定贖罪例。閏二月。貴州苗復叛。免淮揚糧十九萬有奇。增北直隸等處撫民官六十四員。三月。大赦。庚戌。策士賜施槃等進士及第出身有差。廢遼王貴烺爲庶人。黔國公晟以疾卒於軍。夏四月。倭大掠浙東。至桃渚。安南入貢。謝罪。禁外夷市銅鐵器。五月。以晟弟昂督軍。召商陝西納馬。周王有燉薨。六月。開甯夏五渠。越王瞻墉薨。秋七月。汰冗官八十員。命太監吳誠吉祥監諸將討思任發。敗績。八月。僉都王勦捕浙江盜。盡獲之。召入京。罷遣監生二百四十人。九月。參將楊洪追叛寇。遇兀良哈戰勝之。冬十月。造海運船。十一月。延綏兵邀寇破之。十二月。修乾清宮。造渾天璇璣玉衡簡儀。徙封荆王於蘄州。

五年庚申。春正月。繫定國公徐顯宗於獄。尋宥之。禁御史不得辦雜務。都御史于謙撫流民三萬四千餘戶。上褒諭之。二月上耕籍田。以班軍三萬營宮殿役。三月。捕徙京富戶逃者充軍。戊申。興大工。遣大臣賑

畿輔山西荒。夏四月。立存積常股鹽法。征南兵退走。諸將以次逮治。五月。倭寇浙東。定受贓科斷例。六月。免山西逋糧六十五萬有奇。秋七月。少師大學士工部尙書楊榮卒。沐昂討思任發勝之。招諭廣西賊章公等。不聽。命討之。寘屯田僉事。增設御史五員。九月。封張昇爲惠安伯。思任發上書謝罪。命沐昂察之。十一月。令言官論事必以實。沐昂請大征麓川。從之。十二月。大增鄉會試額。

六年辛酉。春正月乙亥朔。日有食之。大學士士奇侍郎何文淵侍讀劉球各請止麓川兵。王振不從。遂命定西侯蔣貴爲征彝將軍。太監吉祥爲監督。尙書王驥爲提督。率兵十五萬。轉餉半天下。賜貴等蟒龍緋衣。金兜鍪。細鎧。并轉餉及贊畫官數十員啓行。夏四月五月也。先入貢。設京衛武學。命大臣詳審內外刑獄。秋七月丙申朔。日有食之。修玉牒。免甯陵寓居孔氏子孫役。八月。雲南兵破思任發。九月。三殿兩宮成。冬十月。瓦剌入貢。封沈清爲修武伯。十一月。詔定京師於順天。去行在字。以應天爲南京。大赦。改各衙門印。封譚廣爲永甯伯。免河南山東鳳陽糧四十四萬有奇。王驥等大破賊於上江。閏十月。思任發遁入孟養。召吉祥還京。王驥等還師。

七年壬戌。春正月。革陝西茶馬司。以布政領之。遣廷臣巡視各地方旱蝗。停國師禪師口糧。二月。大計朝覲官。漳州賊平。修觀星臺及會同館。城玉林。罷給大臣酒飯。上祭陵。五日還。三月。免陝西屯粒之半。策士賜劉儼等進士及第出身有差。夏四月。建京師宗人府等衙門公署。設南京武學。免河南糧五十九萬有奇。五月。增遮洋船。壬申。進定西伯蔣貴爲侯。封王驥爲靖遠伯。州縣始設機兵。倭寇浙江。六月庚寅朔。日

有食之。秋七月。命大臣賑圻輔饑。倭深入大嵩。命討之。八月。王驥再鎮雲南。九月。永平守將請勦三衛。不許。置太倉庫。冬十月。太皇太后張氏崩。上諡曰誠孝昭皇后。癸丑。上始御門視事。敵犯內地。十一月。復以定西侯蔣貴等討思任發。任發走緬甸。遂班師。十二月。襄王瞻巒來朝。王振盜去太祖禁內臣宮門鐵牌。八月癸亥。春正月。再敕王驥靖麓川餘孽。二月。汰省南京各衙門官。淮王瞻墀。荆王瞻墉來朝。作司禮監。許徙荆王於蘄州。命鄭王移懷慶也。先入貢。三月。獨石兵破敵。三王各還國。夏四月。以災異詔求直言。王振矯旨。下侍講劉球於獄。遂殺之。王振構陷下大理少卿薛瑄於獄。尋出除名。册立皇后錢氏。六月甲申朔。日有食之。秋七月。王振誣構祭酒李時勉。荷校監生石大用求代。疏救者數千人。釋之。復先儒周程朱司馬氏子孫。九月。倭寇浙東。冬十月。大學士士奇以子稷有罪伏法。上賜書慰之。十一月。故皇后靜慈仙師胡氏崩。十二月。免山東復業逃民田租二年。

九年甲子。春正月。新建太學成。上幸學謁先師。辛未。命成公勇等四將軍分道出塞勦寇。王驥破鬱川。思任發遁去。獲其妻孥。徐亨等破敵於土河北川。三月。少師大學士兵部尙書士奇卒。以出塞功加成公勇太保。封陳懷等爲伯。夏四月。沙州夷饑求糧。與之。五月。敵入陝西。殺守將。免浙江糧十四萬有奇。秋七月。王振構陷駙馬都尉石璟。下詔獄。福建開銀礦。免河南糧三十萬有奇。兀良哈入寇。命成公勇等率列侯兵二十萬分道討之。於小興州擊走。進泰甯復大敗之。八月。禁口服。免陝西米四十八萬有奇。九月。免南京屯粒五萬有奇。卽鬱川地立隴州宣撫司。冬十月。丙午朔。日有食之。校道藏經。拓甯夏城。十一月。也先

復入貢。

十年乙丑。春正月。大覲考察。乙亥。舉天下智謀之士。思機發入貢求救。三月。策士。賜商輅等進士及第。出身有差。停處州礦課。夏四月甲辰朔。日有食之。免山東及雲南逋糧十三萬有奇。六月。賑陝西饑。斃京城內垣。秋七月。勦廣東徭賊平之。八月。免江南糧四十九萬有奇。再諭撫民官免復業民租。二年九月。瓦剌來朝。冬十月。上獵於南海子。許武臣有才略。自陳試用。十二月。增設山東曹州。也先求醫藥占候諸書。不許。處州礦賊葉宗留作亂。命官戢撫之。始命閣臣與各衙門大臣會議大政。雲南千戶王政獲賊首。思任發斬之。

十一年丙寅。春正月。大賜太監王振等銀幣。命其姪林爲錦衣指揮世襲。命大臣分如江以北捕蝗。也先乞賜國師號及銀印。不許。二月。廣東徭賊亂。三月。英公輔及列侯二十六人入國子監聽講。駕謁天壽山。八日乃還。每年以爲常。廣西藤峽賊大掠。夏四月戊戌朔。日有食之。倭寇浙西。六月。免湖州等府糧十萬有奇。秋七月。少師禮部尙書大學士楊溥卒。復稅課司。八月。作暑影堂。甘肅兵將收捕沙州來歸。冬十月。疏常州孟瀆河。上閱武近郊。十一月。加蘇杭織造數。給也先金印。十二月乙巳。代王桂薨。增設廣西巡檢三十六所。

十二年丁卯。春正月。也先移牧近邊。命嚴備之。二月癸巳朔。日有食之。頒佛道兩藏經於天下寺觀。三月。獎襄陵王冲炆孝行。遣官冊封琉球。夏四月。免蘇州等四府糧八十八萬有奇。閏四月。五月。賑江北山東。

丙午修南奉先殿及帝王功臣廟。思機發叛，討敗走之。秋七月，于謙起復，冊封占城。逮南京都御史周銓及十三道御史范霖等悉下獄，以公堂詬詈銓死獄中。餘遣謫有差。八月庚申朔，日有食之。九月，命天下生四十以上者赴京收考，禁斃器與外彝交易。冬十月，思機發請降。十一月庚寅，皇長子生，是爲憲宗皇帝。瓦剌貢馬四千餘匹，嚴私茶禁。

十三年戊辰，春正月，思機發復叛，命王驥等率兵討之。釋李景隆家屬增枝等三十八人，禁邊方交易兵器。二月丁巳朔，日有食之。上幸大興隆寺。三月，諭孟養不宜黨匿思機發。庚子，策士賜彭時等進士及第出身有差。選萬安等三十人爲庶吉士。兩廣蠻亂，官軍討之，敗績。夏四月，免浙江、江西秋糧六十六萬有奇。福建鄧茂七反，僭稱閩王，命都督劉聚等率兵討之，免湖廣糧八十九萬有奇。五月，通鈔法，禁用銅錢。安南侵占城，執其王，諭解之。河決陳畱。六月，廣東獠賊大掠電白等縣。秋七月，官軍討葉宗留不利。陳詔敗死。八月，衛卒趙旺等還自西洋。凡十八年，三百人止。三人還。九月，廢永和王美塢爲庶人。戊戌，甯王權薨。冬十月，再命王驥等討思機發。葉宗留流劫金華及崇安諸縣，免濟甌糧六萬有奇。十二月，宣府總兵楊洪破敵阿臺於塞下，封昌平伯。王驥至金沙，思機發遁去。遂旋師。建甯知府張瑛擊鄧賊破之。

十四年己巳，春正月，命甯陽侯陳懋爲征彝將軍，率列侯率師討鄧茂七。以太監曹吉祥爲監督軍務。建甯知府張瑛禦鄧賊戰歿。鄧賊攻延平，劉聚等禦之。茂七中流矢死。賊復推其兄子鄧伯孫爲主。據九龍山。都御史張楷等屢破之。江西妖賊蔡妙光作亂，捕平之。以錦衣都指揮徐恭等討葉宗留。賊圍處州。浙

江參議耿定等討賊戰死。賊自福建入江西。二月也。先入寇大同。三月。尤溪賊鄭永祖攻延平。擒之。陳懋等破賊餘黨。浙江平陽賊起。殺指揮劉安。總兵徐恭等討浙賊敗績。三司官沈璘等皆沒。閩賊陷瑞金。湖廣苗賊亂。陷五開等處。夏四月。葉賊掠崇安。殺都指揮王瑛等。金華知府石瑁擊賊破之。斬其賊首稱將者二人。温州兵擊海賊破之。免濟南。東昌糧十八萬有奇。平蠻將軍靖遠伯王驥獲苗蟲富伏誅。尋召驥還。遣御史李俊等十三員辦浙福銀場。劉聚等悉平。鄧茂七。敕回勦處州賊。五月。川貴苗獠作亂。沙縣賊陳政景等攻汀州。擊斬之。陳懋等破鄧茂七賊巢。獲其家屬并僞官二百餘人。南安妖人羅天師伏誅。福建先後巡按匿賊不聞。逮斬籍其家。六月。甌甯賊林拾得殺右參政張瑛。南京各殿門災。詔赦天下。選京兵備宣大邊。嚴海禁。秋七月。命三品京官舉賢才。遂昌民鄭仕本斬賊首葉宗畱。陳懋獲閩賊鄧伯孫。福建平。虜也。先大舉入寇。上不謀大臣。從王振意。遂行親征。百官伏闕上章懇畱。不從。己丑。定議命郕王祁鈺居守。分英公輔及列侯都督爲十七將軍。率六師以從。九卿學士十六人扈行。甲午。駕發京師。乙未。次龍虎臺。軍中夜驚。丁酉。度居庸。辛丑。上至宣府。會風雨大至。軍懈。振懼。上命越日班師。不果。壬寅。復進。次雞鳴山。敵卻誘我。甲辰。次懷安。天象異變。頻見。庚戌。駕東還。夜宿雙寨。雷電以風。軍中亂。西甯侯宋瑛等遇敵。全軍覆沒。敵追將及。朱勇等率兵五萬禦之。入鷓兒嶺。敵邀殺殆盡。兵部尙書鄺埜請上疾驅入關。王振怒曰。爾腐儒。安知兵事。奉上從宣府還。癸丑。次白登。庚申。恭順侯吳克忠等戰沒。辛酉。駕次土木。敵衆大合。掘地二三丈。無水。衆惶惑。敵使持書通和。召曹鼐。草赦許之。王振奉。上急移營。未四里。敵四面攻。

圍兵士潰。敵蹂入陣。僞呼解甲者免死。衆袒受刃。上與親兵乘馬突圍不得出。是時宦侍虎賁近臣被矢如蝟。上無恙。英公輔、尙書堃、學士鼎等數百人皆死之。上下馬坐樹下。衆識之。也先至。問衆有殺加犯者。伯顏帖木兒止之。遂擁上行。居伯顏營。計師二十餘萬。馬騾駝等三十萬。器械輜重稱是。敵卷而去。錦衣校尉袁彬及哈銘侍上。甲子也先始見上致禮。擁上至宣府。招諸將不聽。復涉河而去。是夕雷震也先馬。復見上有赤光。明日也先進熟食及衣物寢具。以胡婦司起居。上遣喜甯入京取金幣。乙丑報至。京師大震。皇太后遣使齎金銀珠玉段匹等物詣也先營。求上還。戊辰皇太后召百官集闕下。命郕王攝國。於午門南面見百官啓事施行。以于謙爲兵部尙書。速宣大總兵楊洪、石亨等於詔獄。辛未皇太后詔立皇長子見深爲皇太子。時年二歲。仍命郕王輔之。族誅王振、甲戌敵擁上至大同。守將郭登禦敵。卻之。復擁上道宣府。己卯上復出塞。九月上在敵營。癸未郕王卽皇帝位。遙尊上爲太上皇帝。十月也先以送上爲名。與脫脫不花入寇。是時太監喜甯、胡種也。盡洩中國虛實。也先擁上皇入紫荆關。殺指揮孫祥。遂薄都城。于謙、石亨率師出德勝門禦卻之。喜甯嗾也先遣使來議和。且索大臣迎駕。乃以參議王復充禮部侍郎。中書趙瑩充鴻臚卿出迎。敵以非大臣。復縱騎大掠。焚陵殿。過宣武門南逾蘆溝橋。還攻城。于謙遂督軍用礮攻。大勝之。石亨捷彰。義門孫鏗、王通等數敗敵。殺傷甚衆。敵復擁上出紫荆。遇雨雪艱行。袁彬執鞚。哈銘隨之。也先來見。宰畜燎肉以進。曰勿憂。終當送還。十一月也先復使人索大臣迎駕。且言使不至。來月必入塞。上北至小黃河。伯顏妻阿達阿刺哈設帳進酒上聖壽。也先以蟒貂裘進。敵欲以妹女上。上使

譯使答曰。汝妹朕固宜納。但不可野合。待朕還國。當以禮聘之。又進胡女數人侍寢。上曰。待妹聘後。此等爲嬪御可也。也先服上盛德。十二月。敵常見帳上有赤光若交龍狀。遂共驚異無他志。時彬銘侍上。謹致意。伯顏妻勸伯顏送上還。伯顏妻曰。我女人何能爲。雖然。當謀之一日。伯顏獵得雉。并酒來獻。設比喻。上納之。是時喜甯誘虜以駕從甘州直趨南京。不果。景泰元年春正月。上在敵營。也先設宴賀正。妻妾皆歡飲奉酒。二月上遣使持書至朝。索大臣迎駕。事寢不行。三月。喜甯欲殺袁彬以竄上。上與彬謀曰。不殺甯還無期也。彬遂誘甯至宣府。守將執而殺之。六月上至大同。敵大掠。已而遣使請和。景帝難之。乃以李實爲通好使。至敵營見也先。也先曰。大明皇帝落在我手。若你每得我。畱至今乎。實等以仁厚贊之。既見上。上居皮帳布幃。席地。實等進紵絲及米酒。泣上曰。當初朕非遊畋而出。乃爲生靈計。不意被畱。皆王振所致。也先實欲送朕還。而屢爲喜甯阻。遂問聖母及景帝安。復問舊臣存亡。泣曰。在此踰年。始見卿等。極言寵王振太過。以至於此。上曰。振未敗。孰爲朕言。今恠何及也。先置酒宴實等曰。敕書但言講和。不曾言接駕。畱在此。是一間人。我欲送還。以圖千載畱佳名。你每歸務令大臣來。卽遣人送去。實等辭上歸。以聞。左都御史楊善慨然欲往。景帝從之。至懷來。遇李實。與俱出塞見上。上曰。彼請和非僞。慎勿疑阻。朕需少物作人事。汝歸取來。儻朕南還。願守祖陵爲庶人。亦甘心焉。實等還。具言迎復事。景帝曰。待楊善歸。實又言得大臣隨其使出迎。景帝乃止。以書敕附其使。把秃等回塞外。善歸。羣臣復以爲言。乃遣善復出塞。己巳。楊善至敵營。善說之。語在善傳。庚午。楊善見上皇。辛未。也先設筵餞上。自彈琵琶。妻妾行酒。也先令善坐。

善曰不敢失君臣禮。八月癸酉上駕起也。先率衆送。以伯顏護行。辛巳駕至野狐嶺。伯顏曰。皇帝去矣。何時得見。率衆慟哭歸。以五百騎送上入塞。時朝議奉迎禮未定。千戶龔遂榮寓書於高穀。言奉迎禮宜從厚。主上當避位而後受命。乃可穀以書示廷臣曰。武夫尙知此禮。況儒臣乎。胡濙欲奏。王文止之。陳循見之。甚乃下遂榮詔獄。乙酉上抵居庸。遣使入京。誥諭避位。免羣臣迎。上以御衣及也先所獻裙賜袁彬。丙戌入安定門。百官迎道左。入東安門。景帝出拜。上亦拜。相持哭。各述授受之意良久。乃送上至南宮。羣臣就見而退。詔赦天下。宴使人於奉天門。丁亥宴南宮。陞賞敵使有差。景泰二年辛未。上在南宮。三年壬申。上在南宮。四年癸酉。上在南宮。五年甲戌。上在南宮。六年乙亥。上在南宮。七年丙子。上在南宮。八年丁丑。春正月。景帝有疾。內外以皇儲未定爲憂。羣臣願復事上。惟王文與太監王誠欲立襄世子。陳循輩知之。已而景帝大漸。太監興安請復故皇太子見深。僉以爲宜。王文曰。雖請之。知其欲誰立乎。蕭鎡曰。旣廢不可再。時議論紛起。羣臣疏請擇元良。遂競傳已齋金牌取襄世子。石亨度景帝必不起。乃與張軏、張輓、楊善、徐有貞等謀迎復上。遂陰結太監曹吉祥、蔣冕、入白太后許之。十七日壬午。上復卽皇帝位。詔卽今年爲天順元年。

天順元年丁丑。春正月丙戌。大赦天下。加徐有貞學士入閣。執少保于謙。大學士王文及王誠、舒良等於詔獄。加徐有貞兵部尙書。陞袁彬錦衣指揮。哈銘百戶。諸臣有加宮銜者辭。許之。逮陳循、蕭鎡、商輅、俞士悅等於詔獄。敍迎駕功。進石亨忠國公。張軏太平侯。張輓文安伯。楊善興濟伯。太監曹吉祥等弟姪各錦

衣官。丁亥，殺太子太保兵部尚書于謙并王文等，籍其家，謫陳循等爲鐵嶺軍，罷蕭鏌，商輅爲民，封孫鏗懷甯伯。餘進官有差。二月丁未，皇太后誥廢景泰帝仍爲郕王，歸西宮。戊戌，命郕王所立皇太后吳氏復爲宣廟賢妃，廢皇后汪氏復爲郕王妃。欽天監正湯序奏革除景泰年號，上以不忍不許。癸丑，郕王薨於西宮。命妃唐氏以下俱死殉葬。湖南苗平，免江北秋糧二十一萬石有奇。頒書諭諸王，貶右都李實爲民。安遠侯柳溥等破廣西蠻寇方英等，討湖廣賊破之，分遣廷臣祭告諸陵。及闕里，帝王陵、山川，賜伯顏帖木兒諭，令來歸。三月己巳，復長子見深爲皇太子。第二子見濬德王，見澍秀王，見澤崇王，見浚吉王，封徐有功武功伯。大賚文武軍民，賜耆民冠帶，召陝西定羌驛丞廖莊爲大理左少卿，莊曾請問上。臬忤景泰帝，出郕王汪妃居舊王府，書迎襄王瞻墀入京。戊寅，策士賜黎澹等進士及第出身有差。命石亨往延綏勦敵。賑山西，復趙王瞻墀歲祿。夏四月，石亨請罷提督軍務文臣，許之。湖廣賊平，免浙江糧五十四萬有奇。冊貴妃周氏及諸妃。襄王來朝，敵入甯夏，參將種興戰死。五月，追復王振官，立祠祀之。迪北酋孛來朝，賀。毀景泰壽陵。大賑直隸，山東饑。甯夏兵追敵敗績。石亨還。六月，錦衣官門達劾耿九疇附有貞等彈石亨，遂逮徐有貞、李賢等下獄。彗星連見，御史張鵬等合劾石亨招權事，上怒，收鵬等下詔獄。拷訊主使之，人降。徐有貞、李賢、耿九疇官餘謫戍，薛瑄懇乞致仕，許之。冊李賢爲吏部侍郎。石彪破敵於磨山，奏捷。秋七月，敵使皮兒馬等率族屬來歸，資給居之京師。石亨等陷徐有貞，復下詔獄。安置金齒。復李賢吏部尚書，掌文淵閣事。大赦，封石彪爲定遠伯，釋建庶人及吳庶人母楊氏十八人居鳳陽，聽自便。命工部造石

亨第聘江西處士吳與弼。十一月，蠲山西稅四十萬有奇。十二月，封太監曹吉祥兄子曹欽爲昭武伯。命安遠侯柳溥率師於甘涼勦敵。也先爲其下所殺。

二年戊寅，春正月，上皇太后孫氏徽號曰聖烈慈壽皇太后。下詔赦天下。下兵部尙書陳汝言於詔獄，瘐死。籍其家多資。上召大臣入視，曰：景泰閒任于謙久，籍沒家無長物。汝言未期，何賂多如是？怒甚。亨等不敢答。上悟謙冤，入白太后。太后乃言于謙多匡濟功，迎立外藩之誣，上大悔。永福賊平，禁陝西鉛鑛。有司請皇太子出閣講讀。上親定講讀官，禁私度僧道。李來犯陝西，柳溥禦之敗績。召還京，罷太傅。二月，復設提督軍務巡撫官。閏二月，畱寄居東昌夷於京師。三月，倭寇廣東。夏四月，差中官辦浙閩雲南銀課。夏四月，皇太子講學於文華左坊。詔獄囚逸，尋獲之。處士吳與弼入見，授諭德。辭，遣使送還鄉。漳州布衣陳真晟詣闕上書，不報。詔繪南京地圖。五月，減天下田租十之四。六月，涼州兵破敵。秋七月，革甯王護衛。八月，敵入南州。兩廣巡撫葉盛率兵攻瀧水獠，擒其首鳳弟吉，獻俘京師。九月，始命大臣推兩員點用。冬十月，上校獵於南苑。十一月，立忠義營收報效子弟。免山東被災糧五十萬有奇。十二月，廣西賊流劫廣東。罷保舉經明行修賢良方正儒士。

三年己卯，春正月，石彪等破敵於安邊。都督周賢戰死。駙馬都尉趙輝求封爵，不許。命採珠於廣東。石彪有罪，逮下獄。禁文武大臣科道錦衣官往來交通。敕僉都李秉爲民。三月，浚吳淞江一萬三千七百餘丈。夏四月，增建南內殿宇，賜東宮諸王莊田。進石彪、陳友爲侯。白圭、方瑛勦東山苗，破之。五月，田州蠻呂趙

爲逆。都御史葉盛率兵討之。趙伏誅。秋七月。布衣陳眞晟復上書報聞。命巡撫以八月赴京議事。下石彪於詔獄。遣官冊封滿刺加國王。九月。出石亨親屬官於外。革奪門冒功孫宏等官。上謂李賢曰。迎駕奪門功誠可錄。賢對曰。迎駕則可。奪門二字豈可垂示後世。景泰帝不諱。陛下宜復大位。天命人心無有不順。門何必奪。上然之。冬十月。城順聖川。石亨閒住。命奪門冒功者許自陳。逮石亨下詔獄死。籍其家。己未。上獵南苑。十一月。南內離宮成。十二月。命奏疏文移不許用奪門二字。虜酋孛寇宣府。戶部尙書沈固乞休。上賜宴并鈔。命公卿祖於都門。令每年於霜降後會審。定方面官入班。遞降京官一等。四年庚辰。春正月。大覲考察。敵犯榆林。守將擊敗走之。改冒迎駕功官四千餘人。二月。重造大興龍寺。丁卯。斬石彪於西市。駕幸南苑。三月。策士賜王一夔等及第出身有差。選劉健等十五人爲庶吉士。免開封糧十三萬有奇。辛卯。上幸仰山窪。夏四月。遣內官開辦各省銀課。德秀諸王出閣讀書。停三品子孫奏請入監。壬子。襄王瞻墻來朝。令百官朝於邸。免蘇松糧四十萬有奇。乙亥。襄王還國。五月。免畿南浙江糧三十三萬有奇。勒羣臣所受景泰君鑑錄進還。停蘇松織造。罷忠義營。六月。止朝鮮子弟入太學者。秋七月。乙亥朔。日有食之。徵逋匠三萬八千餘名。八月。敵犯大同。高陽伯李文禦之敗績。戊午。上親諭戶部。免天下災傷糧。九月。西苑殿館成。上臨幸。召大臣遊賞。敵圍大同右衛。免江西糧四十萬有奇。冊封安南占城等國王。冬十月。上幸西苑。閱列侯諸將騎射。閏十一月。幸南苑。己未。幸鄭州壩村閱馬。十二月。廢臨川王盤輝及其子奠墪爲庶人。命官勦貴州蠻寇。放徐有貞還籍。

五年辛巳。春正月。遷大同郡王六府於蒲澤等州。召還安南冊使。二月。免山東糧二十四萬有奇。三月。召民開松江荒田。命都督顏彪征兩廣獠賊。湖廣征獠。擄破之。免蘇松四府糧五十三萬有奇。夏四月。城滄州。革冗食。敵入莊浪。擊敗之。命白圭督陝西兵禦敵。五月。敵犯宣府。免河南糧二十六萬有奇。勒弋陽王奠盤母子自盡。門達陷弘農。指揮李斌謀反。斬之。秋七月。李入寇。仇廉敗績。命懷甯伯孫鏜。兵部尙書馬昂帥師禦之。庚午。太監曹吉祥及姪曹欽反。殺恭順侯吳瑾。左都御史寇深。值鏜昂出師。就討之。吉祥等伏誅。免應天等府糧五十九萬有奇。白圭至邊。敵引退。尋班師。虜酋李來三上書求和。遣使諭之。八月。進孫鏜爲侯。餘陞授有差。宣城伯衛穎破西番於涼州。以擒逆賊。詔天下布寬恤。開言路。九月。戊戌朔。日有食之。敵入河套。冬十月。命都督許貴勦松潘叛羌。十一月。復設提學憲臣。釋陳循爲民。程鄉賊羅甯等作亂。攻掠旁邑。都御史葉盛討兩廣諸蠻大捷。斬獲無算。平之。考天下生員四十以上者入國子監。

六年壬午。春正月。戶部侍郎楊鼎請漕運三門之上。小河涇通延綏。上從之。旣而不果。顏彪等攻大藤賊破之。二月。罷陝西屯兵。丙戌。建東安東上二門。冊封安南國王黎灑。三月。征西將士還京。免河南糧二十八萬有奇。夏四月。南和伯方毅有罪革爵。詔東宮選婚。遣使如琉球祭弔冊封。揭陽民亂。殺指揮劉琛。五月。禁內外一切酷虐刑具。六月。戊辰。淮王祁鈐來朝。甯夏及大同兵擊敵走之。秋七月。妖人宋普貴等伏誅。丙申。淮王還國。樂平王府徙封韶州。八月。江西亂民朱紹綱及湖廣賊阿同等伏誅。九月。乙未。聖烈慈壽皇太后孫氏崩。冬十月。停造龍鳳鸞器。免兩淮鹽課三十萬引。十一月。甲午。章皇后合葬景陵。李挾二

衛入貢甯夏兵擊敵破之。十二月，詔修曲阜孔廟。

七年癸未，春正月，大觀考察。二月，試院火，舉人死者七十餘人，改試於八月，提調等官降謫有差。三月，上杭賊平，下寬恤詔。夏四月，遣內官如蘇杭織造。五月己丑朔，日有食之。六月，遣迪北報使。秋七月，鑿三河以通運道，免陝西秋糧及子粒九十一萬有奇。閏七月甲戌，諡故皇后靜慈仙師胡氏爲恭讓誠順康穆靜慈章皇后。八月，復海甯伯董興世襲，下錦衣衛指揮袁彬於獄，尋釋之。冬十月，濬潁陽鄭白故渠，免陝西糧一百八十萬餘石，敵使入貢馬三千匹。辛丑，上不豫。

八年甲申，春正月乙卯，上不豫，命皇太子視事於文華殿，己巳，上大漸，書遺詔，其一命東宮卽位百日成婚，其二皇后錢氏名位久定，當盡孝養，異日合葬，惠妃以下次第祔葬，以正名分，其三命勿以嬪御殉葬，其四德王等俱擇善地，其五殯殮器服從舊。庚午，上崩於乾清宮，壽三十八。二月癸未，上號諡曰法天立道仁明誠敬昭文憲武至德廣孝睿皇帝，廟號英宗。五月庚申，葬裕陵。

史官贊曰：終帝之世，蠲租之詔屢聞，命官賑救，若焚溺切身，稽其數不下鉅萬，亦可謂留心民事，愷悌爲懷者矣。正統初，帝在冲年，權總太后，小人眈眈不敢逞，故政治稱小康焉。及太后崩，而狐鳴虎噬，咆哮帝側，土木之變，社稷幾危，然原情揆勢，蓋爲繼祖烈，振生民計，與遊畋殊，而不知非其時矣。及復辟之後，敬天勤民，進賢遠佞，嘗曰：朕小心翼翼，未嘗一日忘艱難時，以故明慎精覈，號爲治平。至於禮孝莊，諡恭讓，出建文後，以至止殉葬嬪妃，高出千古。夫帝以一人之身，前後不啻徑庭，蓋前以未諳世故，屢明禕之危。

後以險阻備嘗。成賢明之治。古云。殷憂啓聖。多難興邦。帝之謂矣。雖然。皇皇帝主。至於身陷羸廬。而卒獲榮坦。豈非天哉。豈非天哉。

明書卷九

本紀七

景皇帝本紀

帝諱祁鈺。宣宗次子。母賢妃吳氏。宣德三年八月三日生。十年。宣宗崩。英宗卽位。二月。冊爲郕王。正統十四年八月。英宗北征。爲監國。土木駕陷。己巳。皇太后命上攝輔。皇長子見深。庚午。上御午左門。左都陳鑑等合奏。王振罪狀。朝臣摔捶死。指揮馬順等執振姪山誅之。并夷其族。辛未。封楊洪爲昌平伯。命官安撫畿內軍民。遣官分守居庸。紫荊。白羊口。石亨封武清伯。督京營。廷臣交劾。扈駕官下顧興祖等於獄。諭拒北來一切黃紙文書。榜示擒敵賞格。罷各處車船收鈔。取南庫內軍器備用。皇太后命于謙爲兵部尙書。丙子。羣臣以國籍長君。請皇太后立上爲皇帝。九月戊寅。皇太后詔曰。皇太子幼冲。未能踐祚。理萬幾。卹王年長。宜早正大位。安國家。癸未。上卽皇帝位。詔改明年爲景泰元年。大赦。遙尊英宗爲太上皇帝。進陳循。高穀。商輅。彭時。並直文淵閣。召邊將孫鏜等赴京。敵也先遣使致書。辭悖慢。于謙進防禦方略。上嘉納之。宥顧興祖。楊洪。石亨於獄。御史李著上書。稱上曰殿下。自稱曰下官。召入。上曰。御史醉耶。著曰。今日宜聲罪致討。迎還主上。而先據大位。失藩王禮。上遂殺之。癸巳。皇太后命以金幣至上皇處。報郕王卽位及

立皇太子日月。召安遠侯柳溥於廣西。廣東賊黃蕭養作亂。辛丑。敕各邊召募壯士。陞李鐸爲都指揮使。使迪北奉書上皇。并遣乜先書。冬十月。上皇在迤北。敵乜先悉衆擁上皇至大同。知府霍瑄出見。獻鵝酒。上皇密諭固守也。先使來議和。遂入寇。京師戒嚴。詔列侯諸將文班大臣分戰守。及監軍。敕尙書于謙總督各營兵馬。命石亨總帥京城內外兵馬二十二萬。命孫泰守倒馬關。申嚴各營軍令。敵破紫荆。孫祥走死。白洋口兵潰。通政使謝澤死之。敕促各鎮兵將入援。戊午。上皇次蘆溝。致書三。一奉慰皇太后。一致上。一諭羣臣守城力戰。己未。敵焚三陵祭器。擁上皇登土城。索大臣出迎。各鎮兵次第至。敵薄德勝門。于謙石亨擊破之。斬其弟那那孩。孫鏜戰西直門。斬其先鋒。敵益兵圍鏜。毛福壽高禮來援力戰。禮中矢死。石亨率兵至。敵引退。王敬武興等復戰彰義門。卻之內官爭功躍出陣。亂敗走。武興死之。援兵大合。乃去。敵攻居庸。楊洪擊卻之。壬戌。敵擁上皇還。掠良鄉。進石亨武清侯。欽天監正彭德清匿天文不報。誅之。楊俊襲敵於居庸。走之。遇楊洪軍復戰。走石彪。又破之於清風店。甲子。上皇出紫荆。止各藩及遼東勤王兵。召楊洪入京。撤各城門文臣回任理事。辛未。修三陵祭器。塞居庸以西山口。十一月。上皇在迤北。詔南直浙江造盍甲九十萬。逮斬逃陣及各關失守官。甲申。詔天下宣府參將紀廣追擊敵。收所掠而還。進楊洪爲侯。安撫各處流移。分派各鎮守參贊監軍官。脫脫不花遣使獻馬。賜賚有加。增巡河御史爲四人。頒詔朝鮮。盡免畿府稅糧。十二月。上皇在迤北。尊皇太后孫氏爲上聖皇太后。母賢妃吳氏爲皇太后。立妃汪氏爲皇后。册太子生母上皇嬪周氏爲貴妃。徙上皇后錢氏居仁壽宮。定郡王喪禮。止有司致祭。不遣官分

諸將爲三大營。以石亨、楊洪、柳溥統之。選翰林爲講讀官。敵入大同。擊卻之。鳳陽流民煽動。撫定之。衛經歷袁斌自請入塞問慰上皇。廣州圍急。救急進討。仍調兵益之。乙亥。上皇書至。初令京府寄牧。景泰元年庚午。春正月。上皇在迤北。選河間東昌達官往貴州勦賊。分廷臣協守紫荆諸關隘。開納粟入監例。築城天壽山南。勒邊將出塞守堡。癸未。上皇書至。廷臣請遣官北進物物。上以有稔識。上皇者行。羣臣俱謝罪。繳奏。事遂寢。丙戌。遣使祭告諸陵。及闕里。歷代帝王山川。益兵討沙尤賊。閩賊破清流。徐溝妖人王文簡伏誅。閏正月上。皇在迤北。嚴逃軍令。凡官校緝捕者許爲辯理。停南京文武官食鹽。下都督孫鏜於臺獄。尋釋之。初開經筵。增築紫荆關城。及倒馬關內城。大同總兵敗敵於沙窩。再敗之於栲栳山。封登定襄伯。京城外立墩瞭望。二月上。皇在迤北。戊寅。耕籍田。命石亨爲鎮朔大將軍。率兵鎮大同。楊能往宣府。悉召各銀場官還京。增南京堂上官各一員。罷三品以上各舉所知例。朝鮮貢馬。壬辰。太監喜甯伏誅。招避寇逃民復業。三月上。皇在迤北。敵犯朔州。都督杜忠邀破之。官土木死事諸臣子有差。討廣賊勝之。敵分道入宣府。禦卻之。停採野味。敕諭安南占城息爭。大賞卻敵將士。募民納米。岷王榷薨。夏四月。上皇在迤北。召浙江撫鎮官還京。大同兵擒虜酋虎察。召王驥還京。都督董興破廣州賊黃蕭養。餘黨悉平。大同總兵許貴請許敵和不許。分大將屯兵鎮易。涿。真。保。五月上。皇在迤北。敵犯山西。貴州兵征苗走之。解平越圍。設紫荆。倒馬。白羊三千戶所。敵入宣府。朱謙戰卻之。石彪破敵於威遠城。副使陶成征蘭溪賊。戰死。予贈廕。阿剌知院貢馬請和。賜書諭之。六月。運臨清糧三萬於紫荆等處。立京營團操法。戮左都

督楊俊於市。癸酉。廷臣請因敵求和。遣使迎上皇。令更議。勿貽後患。敵入大同。郭登擊卻之。丙戌。敵擁上皇至大同。郭登設伏邀駕。不果。敵驚遁。大同參將許貴等破敵。敵犯懷來。于謙進守城。阿剌知院請入貢。許之。也先使至京師。秋七月。上皇在迤北。遣禮部侍郎李實等同敵使如迤北。敕可汗及也先脫脫普花王入貢。瓦剌使來議和。貴州賊阿趙伏誅。瓦剌使乞遣同往大臣。令俟李實還再議。右都御史楊善等偕瓦剌使出塞慰安上皇。癸亥。侍郎李實及也先使把禿等至自瓦剌。願送上皇還京。廷臣懇請奉迎。令李實方回。楊善已去。不須再遣使臣。李實及廷臣數請迎上皇。令詳議之。瓦剌使把禿還。敕諭也先還大駕。廷臣請以李實同往。不許。城臨清。己巳。楊善至塞營。庚午。見上皇。辛未。敵餞上皇。八月。癸酉。上皇發迤北。太常寺卿許彬往宣府奉迎。辛巳。敵衆送上皇至野狐嶺。辭去。以五百人入護行。是夕。蹕宣府右衛。壬午。宣府都督朱謙及其子以兵迎。癸未。上皇命寫罪己敕。諭文武羣臣。仍遣祭土木陣亡將士。甲申。商輅出迎。乙酉。駕入居庸。遣使諭避位。免羣臣迎。丙戌。上皇還京。遜位南宮。頒詔大赦。加楊善左都。餘陞賚有差。晏送駕北使。甲午。上晏北使於南宮。九月。上皇在南宮。武清侯石亨世襲。封朱謙撫甯伯。脫脫普花王使使入貢。冬十月。設京城內外捕盜。武臣修復獨石等處邊城。也先遣使三千人入貢。命嚴備之。十一月。兵部侍郎孫原貞進討溫處叛寇。擒斬賊首陶得二等。江西重行均徭法。也先使歸。賜書賞賚。諭敵使悉還所掠人口。償以綵幣。荆王瞻峒請朝上皇。不許。十二月。有司請賀上皇正旦。不許。停提學憲臣。二年辛未。上皇在南宮。春正月。始命科場官親屬迴避。大覲考察。保定伯梁瑤等討湖貴蠻。屢破之。翰林

學士周敝請復常朝面奏議事制不許。二月幸太學也。先入貢。皇后命瘞戰亡骸骨。三月策士賜柯潛等進士及第出身有差。選吳匯等二十五人爲庶吉士。總督貴州王來率兵平香爐山。擒其酋王韋烈等。餘黨悉就撫。遣官獎賚之。賑江北諸郡。夏四月禁軍職理民詞。詔顏孟子孫世襲五經博士。命大臣賑陝西。敵犯宣府。命諸將勒兵以備。脫脫普花王入貢。五月諸大臣屢請報使也。先不許。有司屢請賞給。從之。徵天下軍器輸京師。六月戊辰朔日嘗食不食。頒詔安南。秋七月詔于謙子授千戶。辭不許。妖僧趙才興及蔚州妖人王伯通伏誅。辛巳復午朝舊制。復國師禪師供養。初用御史印馬。九月定午朝。許翰林官先奏事。申明奪情起復之禁。冬十月敵遣使通好。求我使往報。詔絕之。閩浙盜平。中書舍人何觀言大臣如尚書王直、胡濙等皆阿附權奸老猾。不宜在左右。又言北敵來歸。宜置南方。上命杖謫之。減巡河。停捕盜御史。減京師稅課也。先貢馬三千餘匹。十一月均湖州田稅。廣通王徽燄等通苗。廢爲庶人。十二月加也先使人左都督等官。選官軍十萬分五營團操。壬辰也先弑其主脫脫普花王。有司請朝賀上皇。不許。三年壬申上皇在南宮。春正月詔舉才行優長下僚及隱逸。與罷廢官立連坐法。罷納粟補官例。免廣平糧二萬有奇。于謙請討也先。不許。二月撤天下追馬官也先。敗脫脫來獻捷。督還開平。逃避家口。三月敵犯廣甯。禁會飲。命錦衣探訪。賑徐州饑。夏四月廣西都指揮使繫獄論死。黃璠請易太子。命廷臣會議。乃請立見濟爲皇太子。上欲易太子。恐廷臣不從。命太監王誠等先唱內閣及諸大臣金寶。命廷臣俱兼東宮官。五月甲午立妃杭氏爲皇后。廢皇后汪氏居別宮。立上長子見濟爲皇太子。廢皇太后所立皇太子。

見深爲沂王。上次子見清榮王。見濟許王。大赦天下。頒賚羣臣有差。復黃瓊原職。尋陞都督。六月。岷王乞從封。不許。秋七月。命大臣分行天下。考察官員。九月。京官兩俸停其一。築沙灣隄。閏九月。復開處州銀場。冬十月。召王來梁瑤還京也。先入貢。仍奏求使臣往來及緞匹。不許。邊報也。先欲入寇。敕于謙。石亨嚴飭待戰。十一月己未朔。日有食之。壬午。見濟薨。都督楊俊請大伐寇。于謙奏止之。十二月。立團營。定布按仍三品以上京官保舉。餘吏部推選。敍征苗功。進保定伯梁瑤爲侯。餘陞賞有差。

四年癸酉。上皇在南宮。春正月。遣官如暹羅吊冊。撤捕盜御史及官校還京也。先遣使入貢。自稱大元天勝大可汗。議以復書稱瓦剌王。從之。改各處鎮守侍郎爲巡撫都御史。二月。湖廣盜復起。仍命王來。梁瑤討之。巡撫羅綺討松潘。破黑虎砦。平之。乙未。皇太子見濟冠。減近侍日給酒肉價。乙卯。故皇太子沂王見深冠。三月。賑山東。夏四月。五月。王文憂去。詔均應天等府官民田。命御史從巡撫理事。尋罷之。上密止徐有貞爲祭酒。六月。福建民鄭懷胃等作亂。捕平之。停武職納葺陞官世襲例。秋七月。仍命尙書石璞治沙灣決河。八月。召大同總兵定襄伯鄧登還。九月。定會試同考用科第官。不許取教官同考。王文起復。冬十月。貽書瓦剌可汗也。先也。先入貢。自改元添元元年。使臣幾二千人。十一月。皇太子見濟薨。諡懷愍。遼東報警。禦卻之。十二月。瓦剌貢馬。

五年甲戌。上皇在南宮。大觀考察。命大臣江以北安撫軍民。三月。策士。賜孫賢等進士及第出身有差。選丘濬等十八人爲庶吉士。賑順天河間饑民。都御史馬昂擒廣賊僞將軍周鐵等。夏四月壬午朔。日有食。

之貴州兵大破四川草塘賊。擒其首黃龍等。播州平。定私茶比鹽法例。大隆福寺成。擇日臨幸。太學生楊浩疏諫。罷行。五月。安置谷庶人齊庶人眷屬於南京。禮部郎中章綸御史鍾同請復東宮。逮下獄。秋七月。給事中徐正請出故太子沂王於國。增高南城。伐其樹。錮門鎖。上怒。黜爲雲南經歷。御史高平請伐南宮樹。上命盡伐之。南京大理少卿廖莊請問慰上皇及上皇諸子講學。不許。八月。頒君鑑錄於羣臣。冬十月。巡撫四川羅綺以鄉人告受番金罷之。籍其家。雲南送思機發等伏誅。

六年乙亥。上皇在南宮。春正月。初命太監班佑鎮守兩廣。馬昂破瀧水賊。三月。命舉到人才非經學者。吏部自考。夏四月丙子朔。日有食之。霍邱妖民趙玉山伏誅。遣官冊封琉球。五月。運河濬功成。六月。處州盜亂。平之。閏六月。授朱熹裔孫樾爲五經博士。秋七月。黜御史不職者十二人。八月庚申。杖廖莊。章綸。鍾同。莊謫驛丞。綸。同死。杖下。九月。授程頤裔孫克仁。周敦頤裔孫冕。俱爲五經博士。冬十月。免山西糧十萬有奇。益孔廟贍田。

七年丙子。上皇在南宮。春正月。于謙病。上遣興安往視。藥需竹瀝。上親幸萬歲山伐竹製之。二月。定天下秋鄉試增額。庚申。皇后杭氏崩。諡孝肅。營建壽陵。三月。許五經博士劉祿世襲。夏四月乙卯。思任發子思卜發入貢。祈宥。平定州妖人趙能伏誅。六月。沙灣隄成。秋七月。封吳安爲安平伯。裁天下添設官一百六十七員。八月。大學士陳循王文子鄉試落。奏劾考官劉儼黃諫不公。上特賜循子英文子倫爲舉人。許會試。九月。湖廣苗叛。命兵部尙書石璞率兵討之。冬十月。命聘崇仁處士吳興弼。十一月。削甯府護衛。十二

月癸亥上不豫。

八年卽天順元年丁丑春正月己卯羣臣請立東宮上命卽日視朝不許庚辰上大漸內外憂懼王文與太監王誠謀取襄世子爲東宮事漸洩僉謂故太子宜復位惟王文不然李賢因問蕭鎡鎡曰旣退何復文曰今第請立東宮事在朝廷衆遂覺有異謀越明日辛巳文武集左掖門公請蚤建元良左都蕭維禎曰更建字爲擇字何如奏上不許朝廷傳文謙已遣人齎金牌取襄世子禮部復集百官請故太子復立商輅草疏略云天下者太祖太宗之天下傳之於宣宗陛下宣宗之子見深宣宗之孫以祖宗之天下傳之於孫此萬古不易之常法疏入未報壬午武清侯石亨等左都御史楊善等毀南宮門牆見上皇遂共掖駕前導升奉天殿登御座先是有旨十七日視朝羣臣皆入有頃南城呼譟震地來羣臣相顧愕然須臾鐘鼓大鳴上皇復卽皇帝位羣臣遂入賀上聞伏枕問曰何爲左右曰上皇復辟矣上頷之曰吾兄也好好是日遷上於西宮二月乙未以皇太后誥廢上復爲郕王癸丑薨於西宮壽三十諡曰戾禮如親王葬金山成化十一年十二月尊諡上爲恭仁康定景皇帝稱景帝陵

史官贊曰英宗轅北國無主無主則亂帝逢多難爲之主乃能任賢選將使危如一髮之宗社轉而爲治南征北距天柱弗搖雖臣之功帝可謂明於知人者矣英宗不復顧然於天下臣民之上而帝卒傳位皇太子雖古誼辟何以加焉卒之聽鐘聲則曰吾兄好悲夫然而焦勞固圉神器有歸厥功豈細哉

明書卷十

本紀八

憲宗純皇帝本紀

帝諱見濡。初名見深。英宗長子。母貴妃周氏。於正統十二年十二月二十日庚寅。生上於宮中。赤光騰耀。若旌旛。時海宇清稔。己巳。英宗北狩。景皇帝監國。奉皇太后命立爲皇太子。已。景皇帝卽眞。奉英宗爲太上皇帝。逾年。英宗歸居南宮。上侍皇太后居坤甯宮。雖幼。岐嶷如成人。讀書卽悟大意。景泰三年。輒立其子。遂廢上。改沂王。英宗復辟。上還東宮。越明年。出閣講讀。初名見深。至是。詔書更今名。失言其故。海內驚疑。久之始定。上廣額豐頤。威容如神。英宗每撫之曰。此太平天子。福德非吾所及。天順八年正月十七庚午。英宗崩。乙亥。上卽皇帝位。詔告天下。大赦。改明年爲成化元年。丙子。尊聖母皇后錢氏爲慈懿皇太后。生母貴妃周氏爲皇太后。壬午。太監牛玉奏下侍讀學士錢溥於獄。詞連朱奎、韓雍等。降罰有差。番使貢馬三千匹。賚之。釋羅綺。給還人口田宅。二月。命營山陵。大賚文武將吏。釋孫繼宗、石彪等爲民。癸未。上大行。皇帝諡號門達有罪。謫戍。召袁彬掌錦衣事。頒詔外國。戊寅。傳陞各衙門官甚衆。三月。減供用物料十之三。梧州蠻亂。放免宮人。廷試癸未。秋。補試貢士。賜彭教等進士及第。出身有差。選李東陽等十八人爲

庶吉士占城入貢。大學士李賢奏嚴宮禁。時番僧有入大內講經者。西番寇甘肅。宣城侯衛涇。都御史吳琛。分道率兵討之。俘斬七千餘人。畜物二萬有奇。南京吏部侍郎章綸奏言。諒陰不可行大婚禮。待百日。夜不報。兩廣賊大起。禁請賜寺額。四川賊流劫銅陵。內江諸州縣。夏四月癸未朔。欽天監奏日食不見。下天文生賈信於獄。命內官十二人坐營。命刑部進士同見任官問刑。番賊入岷州。命給事中童軒往四川撫賊。五月庚申。葬裕陵。遵遺詔免殉葬。自此定爲令。朝鮮入賀。復郭登爵。鎮守甘肅。屯順聖川。六月。禮部左侍郎兼翰林學士致仕薛瑄卒。贈尙書。謚文清。秋七月。遣官分祭諸陵。闕里。歷代帝王陵。山川。壬申。立皇后吳氏。召郭登還。八月。詔修英宗實錄。初開經筵。項忠捕番降之。九月。廢皇后吳氏。詔曰。先帝臨御之日。爲朕簡求賢淑。已定王氏育別宮。乃內臣牛玉等朦朧奏請。將已退吳氏冊立。德不稱位。是以請命皇太后黜吳氏。仍遵成命冊立王氏爲皇后。正牛玉罪。貶南竄。傳言後宮先有擅寵者。吳后杖責之。故有是命。后父俊戍登州。免運軍輸耗四萬有奇。增生員廩米。大察京官。冬十月。立皇后王氏。革迎駕奪門功。太平侯張瑾以下爵職。初立武舉法。十一月初立宮中莊田。敵數犯宣大延甯。復設京衛武學。四川妖賊起。延及襄鄧。都督何洪戰死。十二月。傳陞道士爲真人。始定朋合折買馬匹法。馬死者軍五民四合買補之。滿除文武官罪過。詔天下。命正統十四年以後功封者不準世襲。

成化元年乙酉。春正月。釋戍邊陳循。江淵等。并王文子宗彝。于謙子冕等。還給家產。遣官祭于謙墓。虜李來貢。都督趙輔佩征夷將軍印。率列侯征兩廣蠻。韓雍贊軍務。戊辰。西域諸國來貢。忠順王母弩温答失

力來貢。命御史二員約東南征軍士。二月。拂提進擢烏。卻之。甲午。遼東破敵。上耕籍田。三月。虜孛搆三衛入遼河。邊將禦卻之。初。命撫治荆襄流民。丁巳。上幸學行釋奠禮。建承天門。免陝西延安糧八萬有奇。夏四月。減孔氏子孫田租三分之二。遣錦衣官使西域。虜脫脫犯邊。獲磔於市。荆襄賊劉千斤等反。五月。命撫甯伯朱永。尙書白圭征劉千斤。擒賊陷南平。四川賊平。召諸將還。六月。革太平侯張瑾。與濟伯楊琮爲指揮官。秋七月。贈卹兩廣死事官。免天下軍衛屯糧十之三。丁巳。疏錢法。嚴自宮禁。官兵獲湖廣賊首苗蟲蝦。兩廣賊入江西。監生廖世傑率土兵敗之。賑南北畿。浙江。河南饑。八月。敵入河套。安南入賀。癸卯。玉牒成。九月。革甯夏河渠提舉司。禁陝西河南取鑛。冬十月。四川兵攻賊砦大破之。給三氏學印。兀南帖木兒乞農器。許之。敵犯延綏。趙輔。韓雍大破大藤峽蠻平之。

二年丙戌。春正月。復三品舉薦例。壬戌。皇長子生。韓雍班師。二月。定納荳贖罪例。敵入慶陽及保德。三月。策士賜羅倫等進士及第出身。有差。選林瀚等二十四人爲庶吉士。封趙輔武靖伯。大學士李賢奪情。辛亥。冊萬氏爲貴妃。停納米入監例。朱永。白圭大破荆襄賊。閏三月。銅鼓苗亂。討之。賑淮徐。命韓雍分勦廣西賊。夏四月。倭寇浙東。荆襄賊平。召白圭還。兩廣賊平。五月。鄭王瞻埈薨。六月。免天下屯田子粒十之三。荆襄賊首石和尚入四川復亂。命彰武伯楊信佩平虜將軍印。如延綏討賊。秋七月。敵入甯夏。安南入貢。套虜深入固原。定納馬贖罪例。授于謙子冕千戶。九月。西番入貢。免太原等處糧二十萬有奇。冬十月。擒石和尚等。賊平。免叛人疏族連坐法。十一月甲午。皇長子薨。平虜將軍楊信擒斬獻俘。大修陝西城堡。十

二月尚書白圭起復。

三年丁亥春正月廣西餘孽作亂命韓雍勦破之進撫甯伯朱永爲侯毛里孩寇大同命撫甯侯朱永爲平胡將軍率兵禦之二月丁酉朔日食旣毛里孩數上書求貢癸丑德王見潞之國濟南山都掌蠻叛李瑾討平之三月敵入大同王越等禦走之仍開浙江銀礦夏四月立十二軍法毛里孩入貢建州董山入貢五月荆門州訓導高瑤請復郟王帝號命有司議聞六月始收江南船稅秋七月敵入榆林湯埭勦戰死之留建州董山於廣甯遣其家眷往諭部落歸順八月英宗實錄成董山抗拒囚之命進討之九月賑江西湖廣給賜建庶人後冬十月趙輔討董山誅之進兵大捷十一月盜竊太宗神御冠器獲之左庶子黎澹奏高瑤妄言宜罪之不聽翰林編修章懋貢仲昭等諫上元張燈事上怒杖闕下調降之

四年戊子春正月朝鮮會討董山賞之趙輔進爲侯二月壬辰朔日有食之免高郵糧六萬有奇遣內官錢能往雲南鎮守改于謙子冕爲兵部員外郎三月禁皇親乞土田著爲令建州復請入貢夏四月封西僧爲大寶法王固原滿四反據石城指揮申澄死之諸將會兵進討敗績逮甯遠伯任瓚等下詔獄五月仍復附學生例六月免江南諸項糧二百八十八萬有奇日本來貢甲寅慈懿皇太后崩從大學士彭時議時合葬裕陵鑿徐州洪中流惡石禁內官家中鹽八月命都督劉玉等率兵討滿四敝山都功進李瑾爲侯餘陞賞有差上大行慈懿皇太后諡曰孝莊皇后九月西天佛子劄實巴乞河間靜海地爲寺田宛平民爲佃戶許之尋追還冬十月初定考官以身言書判例伏羌伯毛玉討滿四戰敗死都御史項忠力

拒乃定。十一月，項忠、馬文升等進攻滿四擒之，檻送京師伏誅。敵入延綏，擊敗之。十二月，丁亥朔，日有食之。石城賊復立火敬爲主，項忠等搜殲之。

五年己丑，春正月，大覲考察，任壽等謫戍。二月，立西安衛，敵入延綏，官軍禦之遁去。增固原衛軍，衍聖公弘緒犯令黜爲民。修南承天門。閏二月，三月，策士賜張昇等進士及第出身有差。選張璉等十八人爲庶吉士。敍平滿四功陞賚有差。真人張元吉凶暴淫橫，逮下獄。廷臣擬毀府第，絕廡封禁符籙，從之。旣而不果。夏四月辛巳，皇子生。五月，鹽盜錢厚等作亂，稱江海上公。都督董寬討擒之。六月癸亥朔，日有食之。命都御史張鑿撫甯夏降敵。秋七月，流賊李鬍子作亂，馬文升勦平之。八月，復視午朝。開靈州屯田。皇親周彧奪民田，刑部郎中彭韶、御史李琮執法還民。上怒，下獄。冬十月，敵犯榆林及延綏甯固。

六年庚寅，春正月，大同巡撫分兵延綏禦敵，敗之。二月，搜收淨身人。命侍郎等官曾輩等往無巡撫處撫安地方。秋成卽還。三月，免湖廣糧二十八萬，山東三十九萬有奇，蘇松六十二萬有奇，發內庫銀四十萬犒軍。以撫甯侯朱永爲平虜將軍，備延綏邊，編修陳音奏乞降佛子法王真人位號，不許。夏四月，免溧水等處糧三萬有奇。五月，毛里孩犯邊，獲之伏誅。陝西北敵近邊，命嚴備之。命各撫按考察屬官。王越卻敵，大造西山佛閣。孔弘泰襲封衍聖公。六月，戊申朔，日有食之。罷會官保舉。秋七月己卯，皇第三子生於西宮，是爲孝宗皇帝。修孝慈高皇后惠監生妻室紅板倉，賑京城及順天饑民。延綏及河套報捷。八月，免臨洮糧八萬有奇。下寬恤詔。阿羅出犯榆林，平胡將軍朱永等禦卻之。命御史專用科目，不拘內外考選。套

虜阿羅亦求入貢。九月，秀王之國河南，命雲南土官襲職歸黔公，發倉五十萬平糶。時京師米價騰湧，冬十月，宥張元吉，極刑戍肅州，免保定糧三萬有奇，河南糧及子粒三十八萬有奇，命監生歸籍聽取用，荆襄餘孽復反，命王越等搜河套，尋召還，免山東糧二十八萬有奇。十一月，都御史彭誼戰女直勝之，命官十四人大賑畿南，虜李羅入河套，與阿羅亦合。十二月，也烈忽寇陝西，擊卻之，再發京糧二十萬平糶。七年辛卯，春正月，命京官五品以上及科道官各舉所知一人，罷民運，行長運法，項忠勦襄鄧賊平，尋召還。二月，復蘇杭鈔關，久旱，詔求直言。三月，冊封琉球，始稅江南竹木，還套虜來使，遼東戰勝之，勒荆襄流民還故土。夏四月，築榆林邊牆，再發米十萬，石京師平糶。六月，處州礦賊作亂。秋七月，賑浙江山東盜入漢中。閏九月，設榆林衛，立學校，成邊牆千二百里。冬十月，浚通惠河故道，築滹沱白溝隄。十一月甲子，立皇次子祐極爲皇太子，頒詔大赦，尋薨，諡曰悼恭。星變，廷臣言君臣情隔不通，請召對，傳御殿，中官給廷臣曰：初見勿多言致厭，再見言未晚也。及見上，大學士彭時、商輅等止言京官薪俸不可減，上允行。羣呼萬歲而退，中官乃笑曰：見無奇謀，止呼萬歲，乃名爲萬歲閣老。十二月，荆襄賊首李鬍子等伏誅。星變，避殿撤樂，禁官司科罰。

八年壬辰，春正月，大覲考察，募民納馬，廣西獠作亂。二月，忻王見治薨。三月，策士賜吳寬等及第，出身有差，西敵犯內地，官兵擊走之。允張元吉子玄慶襲真人。夏四月，增築邊堡，錄囚，賑卹京畿，河南、山東，命趙輔、王越防河套。五月，韓雍討忻城寨賊破之。六月，增設慶陽衛，冊封占城國王，傳陞寫隆善寺碑人爲尙

寶少卿給事中王詔諫不聽。命工匠張定柱等三十人爲文思院副使。敵犯臨鞏。馬文升擊敗之。生擒平章鐵烈孫等。秋七月。九月乙卯。秀王見澍薨。冬十月。十二月。賑京城饑民。免眞定糧三萬有奇。

九年癸巳。春正月。免武昌糧三十一萬有奇。二月。禁鎮守中官理民詞。免山西糧五十八萬有奇。三月。減雲南銀課十之五。免淮安糧二十四萬。免湖廣糧六十萬有奇。塞外野燒。延近山陵。發軍萬人撲之。夏四月辛酉朔。日有食之。三衛結女直犯遼東。擊卻之。壬午。上大閱武於西苑。山東大荒。免今年稅糧。撥鹽引百萬。臨清倉粟十萬賑之。六月。徙延綏鎮於榆林。遣官如山東祭告海嶽。雨。免陝西夏稅及逋糧。秋七月。命都督李文等規復哈密城。免彰衛糧十六萬有奇。復設江南等處勸農官。八月。王越捕寇於河套。敵遁去。免南畿糧九萬有奇。九月。免平陽府夏麥二十五萬有奇。敵自花馬池復入陝西。高陽伯李文等率降敵討鎖檀阿力王。不克而還。冬十月。敵犯廣甯。上再閱武於西苑。十二月。暫停徵馬。免畿內糧十一萬。山西糧二十六萬有奇。重修靈谷寺。

十年甲午。春正月。命王越總督各路兵馬駐固原。命哈密酋脫脫不花居嘉峪城。二月。發糧銀二十萬給邊。三月。免湖廣逋糧。崇王見澤之國汝甯。申巡方考復例。免武昌田租五十二萬餘。夏四月。免太原平陽糧八十二萬有奇。免江北子粒一十七萬有奇。免西安夏稅四十五萬有奇。六月。命各王府給工價從宜。修繕勿役民。閏六月。秋七月。旱。免南昌等府糧八十六萬有奇。止遼府殉葬。八月。敵入宣府。命都督趙勝佩印督兵勦之。修南海子。九月癸卯朔。日有食之。免南畿糧五十九萬有奇。命助臣新襲及駙馬年少者。

入國子監讀書習禮。冬十月發太倉銀三十一萬給邊需。停遼東黑山取金。命妖人李孜省爲太常寺丞。十一月免河南等府稅麥三十四萬有奇。敵犯平涼。鞏昌十二月許大臣子弟入學。遣使如占城。不果入而還。備錄妖書名目。榜示天下以禁絕之。罷湖廣寶慶淘金。

十一年乙未。春正月。大覲考察。追取逃軍匠一萬六千餘名。命增孔廟樂舞。許品官立家廟。二月。閉宜陽銀洞。三月。策士賜謝遷等及第出身有差。夏四月。命御史十一人分道清軍。禁遷安銀礦。甲午。重建宮門。五月。免武昌、鎮江、漳州糧二十八萬有奇。丁卯。召皇子於西宮。賜諱祐。令文武羣臣見於文華門。免江北糧十三萬有奇。冊皇祖母紀氏爲淑妃。徙居永壽宮。六月。淑妃紀氏薨。諡曰恭恪莊僖。秋七月。朵顏三衛請開馬市。不許。浚杭州西湖。修南京太廟。八月。浚通惠河。北使入貢。閉秦州銀礦。九月。丁未朔。日有食之。浚大小清河。廢襄垣王仕壻爲庶人。冬十月。命查西洋水程。將差寶船。兵部寢之。十一月。癸丑。立皇子爲皇太子。詔赦天下。十二月。詔曰。曩者朕叔郕王踐祚。戡亂保邦。亦既有年。屬彌留之際。姦臣貪功生事。妄行讒搆。請去帝號。先帝尋知誣枉。深懷悔恨。以次抵姦於法。不幸上賓。未及舉正。朕嗣承大業。一紀於茲。敦念親親。用成先志。可追尊諡曰恭仁康定景皇帝。福建疫。遣使祭其山川。十二年丙申。春正月。初設鄖陽府及湖廣行都司。訛加思蘭寇宣府。二月乙亥朔。日有食之。三月。禮部奏。近來每年度僧萬餘。乞加限制。從之。靖州苗亂。李震破之。夏四月。罷常德採辦金課。五月。宣大各衛設備學。六月。趙王見潯有罪。革冠帶。秋七月。皇第四子祐杭生。是爲興獻皇帝。祭酒周洪謨請加孔子諡號爲

帝報寢。妖人李子龍伏誅。八月。監生袁慶祥極言買寶石之弊。不省。擅阿力入貢。增孔子樂八佾。籩豆十二。九月辛丑。初設西廠。命太監汪直率官旗詞事。冬十月。傳陞官二十餘人。冊萬氏爲皇貴妃。邵氏爲宸妃。都御史朱英招撫兩廣。獠獍爲編戶。十一月。禁東北邊市軍器。

十三年丁酉。春正月。以水災免浙江稅糧四十一萬有奇。二月。築遼東牆堡。西廠羅中書董嶼等於獄。籍沒都指揮楊睡家。閏二月。禁傳報旨意。以災傷免山東糧四十一萬有奇。水災免河南糧三十九萬有奇。三月。以廷臣切諫罷西廠。日本入貢。夏四月。復設西廠。以災異遣官祭岳瀆。刑部郎中武清廣西還。禮部郎中樂章等安南還。西廠擅繫京官下獄。不以聞。命太監錢億等械故少師楊榮家口百餘人下獄。大學士商輅等劾汪直。不報。五月。水災免鳳陽子粒十九萬有奇。詔罷西廠。召太監懷恩數汪直罪。遣韋瑛戍宣府。六月庚戌。以御史戴縉。王億奏復設西廠。秋七月辛未。詔翰林官內閣自考察。餘從吏部會考。水旱免江南糧四十二萬有奇。旱災免福建糧十五萬。八月。西廠收繫工部尙書張文質。上聞釋之。九月甲申。吉王見浚之國長沙。冬十月。南欽天監修大統厯。及回回厯城。復立哈密衛於苦峪口。十一月。許朝鮮市弓。嚴文武官乘肩輿。水災免江南糧五十萬有奇。定京官十年一考察。著爲令。

十四年戊戌。春正月。大覲考察。立不及調用法。己卯。襄王瞻墜薨。定軍官五年一考。著爲令。二月戊申。皇太子出閣講學。始設東宮侍衛官校。三月甲子。皇太子冠策士。賜曾彥等進士及第出身有差。選梁儲等二十八人爲庶吉士。以災免河南及杭州糧九十萬有奇。禁外夷進貢挾私貨。命馬文升招撫建州。閉烏

撒銀洞。復開遼東馬市。免江南收買花木。夏四月。山東、遼東、淮揚各災傷。免糧一百六十萬有奇。冊封琉球。定州縣官不用監生。著爲令。免遼東貢藥材。二年五月。廣西流賊大掠。六月。遣太監汪直處置遼東邊務。英公懋請停圓通寺工役軍。不允。秋七月。復趙王見濬爵。賑北直隸。山東饑。宣府兵禦敵敗績。八月。汪直至遼東。招撫未竟而還。封占城國王。免湖廣糧十六萬有奇。西廠執應天巡撫牟倬。侍讀學士江朝宗等於獄。九月。選舉將材。敵牧近邊。備之。冬十月。工部尙書王復奏。法王國師勿給墳塔費。罷內官侯伯。烙馬。歸其事於太僕。水災免北畿糧二十萬有奇。雲南勦叛夷平之。

十五年己亥。春正月。水災免山東、湖廣糧一百四十萬有奇。二月。復遣太監劉佃鎮守江西。水災免遼東折租銀十三萬六千有奇。三月。遼東總兵韓斌、都御史陳鉞激變建州。逮之。鉞誣文升。尋西廠執文升下獄。戍四川。夏四月。傳陞李孜省爲太常寺少卿。江北水災。免麥米四十萬有奇。敵入大同。禦卻之。五月。以不言牟倬事。謫牟倬等。廷杖科道官五十六人。免湖廣、河南田租七十六萬有奇。六月。雲南討蠻賊破之。秋七月。旱。免山西糧二十九萬有奇。三衛入貢。八月。溫處礦盜平。命汪直行邊。廣東妖人劉佛翹伏誅。九月。貴州苗叛。冬十月。遣汪直率兵伐建州。閏十月。革華陽王申鐘爵。十一月。汪直等掩殺建州入貢人六十餘名。復出塞焚其廬舍而還。十二月。建州以復讐爲名。深入遼東大掠。陳鉞不報。錄遼東功加朱永保。國公。餘陞賞有差。水旱免江西、四川、湖廣田租合二百一十八萬有奇。十六年庚子。春正月。命汪直監督團營。復命汪直督兵如延綏禦敵。禁雲南官民通夷。免鳳陽稅糧三十

八萬有奇。劉吉起復。兵科給事中孫博切言東西廠旗校中傷大臣。非禮。乞禁之。不聽。二月。詔天下於孔廟前立下馬牌。千戶張定進寶石。命掌鎮撫司理刑。遣孫博詣汪直軍紀功。大同禦敵卻之。滿都魯數寇榆林。以旱免湖廣糧七十五萬有奇。大修闕里。減畿內一切征徭賑之。汪直、王越等襲寇於威甯海子。破之。尋封王越威甯伯。三月。發倉米三十萬石平糶。夏四月。御史強珍劾汪直、陳鉞隱匿失機等罪。不聽。五月。兩廣擒田州苗黃明會。逐知府岑溥。平其寨。奏捷。水災免河南糧三十五萬有奇。敵犯薊州。秋七月。汪直誣強珍乖方。下詔獄。誦戍文武官俸折布。裁山西行太僕寺少卿。八月。女直入遼東。免補解順天富戶。九月。僧繼曉乞乘傳詣湖廣九峯寺。許之。逮巡撫陝西都御史秦紘下獄。籍其家。僅蔽衣數事。上歎其廉。賜鈔釋之。調河南。冬十月。南京科道共劾陳鉞姦邪。不報。十一月。察東宮管莊內官有占民者。悉歸之。番入洮州。申禁僧田。敵入大同。汪直、朱永、王越督兵禦之。罷市舶。

十七年辛丑。春正月。免浙西糧。及淮鳳稅。太原田租。合九十五萬有奇。修南苑殿宇。二月。王越等師出窟夏禦敵。卻之。汪直奏改陳鉞爲兵部尙書。三月。策士賜王華等進士。及第出身。有差。戊寅。徽王見沛之國。鈞州山東及淮徐水。免秋糧四十五萬有奇。傳陸戴縉爲右都御史。西域貢獅子。遣中官迎之。都督王信撫定湖廣諸蠻。夏四月。敕太監懷恩會官錄囚。設山西平虜衛。五月。江南海子劉通反。尋捕擒之。敵犯宣府。守將吳儼被圍。命汪直等赴援。未至。儼弃師出。六月。築遼東鳳凰等城堡。秋七月。賑陝西。遣官冊封暹羅國王。八月。傳陸李孜省爲右通政。建州求貢。不許。九月。定權量。諭吏部調御史于大節爲推官。賜海外

諸國敕。冬十月。湖廣災。免田租十之六。水災免河南及大名。蘇州糧四十二萬有奇。十一月。御史許進白湖廣總兵李震冤獄忤直。以疏字訛杖之。尋震百口得釋。取戶部銀三十萬入內。十二月。命汪直。王越提督各路兵馬。開府大同。

十八年壬寅。春正月。賜太監梁芳淮鹽五萬引。二月。何喬新敗敵於灰溝。陸賞報捷。人汪銓爲都督。三月。賑蘇松。夏四月。琉球王請陪臣子弟入監讀書。從之。復罷西廠。免山西糧五十四萬有奇。五月己巳朔。日有食之。六月。閉建昌銀礦。秋七月。劉吉起復。水災免蘇州。濟南。湖廣。麥粟布糧合一百八十二萬有奇。免陝西糧十之八。哈密乞藥物。與之。許珠池內官兼捕盜。免鳳陽等府糧九十萬有奇。遣內官杜福等如常州等處求書畫。八月。遣官徧查災傷賑之。免浙江。陝西。河南糧一百五十萬有奇。閏八月。廣東賊入江西大掠。冬十月。取太倉銀四十萬入內。十一月。禁各王府不得與親屬爲婚。傳陸劉峩爲禮部尙書。李孜省分獻郊祀。十二月。賜顏氏廟戶。免東昌及湖廣水災糧三十萬。甘肅破敵。

十九年癸卯。春正月。延綏破敵。定貪酷官不得援赦例。三月。免掌欽天監太常寺卿童軒官。己酉。月食。旣。四川巡撫孫仁討大掌壩番寇平之。夏四月。免河南及邵武糧八十萬有奇。五月。減浙江銀課三分之一。汪直請達官禦敵。不許。六月。調太監汪直於南京御馬監。遣官浚漕。丹藥道士高宗諒遣歸。秋七月。敵犯大同。許甯敗績。敵尋去。朱永復至大同。八月。敵入渾源。遂至鴈門。宣府巡撫秦紘擊之。破走。山西巡撫邊鏞復邀勝之。遂遁。御史徐鏞等劾汪直。上命廷臣會議。因降直奉御。王越除名。寘安陸。戴縉革職。張頤落

職起馬文升、強珍等爲原官。九月，陝西巡撫鄭時上言切直，上怒，謫爲貴州參政。授廣東聽選舉人陳獻章爲檢討，予告。傳陞李裕有爲右都御史，掌院事。妖人王臣使蘇，常索書畫花木，暴橫。南畿巡撫王恕疏劾，逮伏誅。僧繼曉請旌其母孝行，許之。母故娼也。冬十月，召朱永還京。十二月，廷臣奏諫傳陞之弊，命降李孜省等官，黜回籍，尋留之。

二十年甲辰，春正月，大覲考察。杖東廠太監尙銘，降充南京淨軍。浚薊州東西河道，免延安及大同糧三十萬。二月，廢陽曲王鍾鎬爲庶人。南御史孫需等奏繼曉罪狀，逮繫廷杖，尋釋之。二月，亦思馬因寇大同，命戶部尙書余子俊等禦之。三月，策士賜李旻等進士，及第出身有差。大同兵破敵，免淮安糧十七萬。有奇。夏四月，修天壽山陵及居庸隘口，以地震損壞故。革孟津王見濂爵。五月，大賑陝西，大同失機，逮巡撫郭鐙等下獄。六月，江以北大旱，遣官祀嶽瀆，冊封滿刺加國王。水災免延安等處糧六十萬。有奇。秋七月，命大臣分道賑江北畿南諸省大饑，冊封占城。九月，乙酉朔，日有食之。敵復入河套。冬十月，刑部員外林俊劾梁芳繼曉，上怒，廷杖之。免太原糧四十八萬。有奇。罷雲南銀坑。日本來貢，再發京庫銀十萬。河南米五萬賑陝西。敵犯宣大，命定西侯蔣琬爲平朔將軍，率列侯出師禦之。遁去。十一月，免山東、河南稅糧三十八萬。有奇。南戶部主事張倫請運漕糧二十萬，溯河賑陝西。從之。十二月，度僧道七萬人。濟山陝荒，封罕慎爲忠順王。入哈密。繼曉乞養母，并求空名度牒五百道，許之。內官傳進吏部尙書尹旻爲太子太傅。起丁憂中書杜昌。

二十一年乙巳春正月天變詔求直言廷臣各上封事李孜省等降秩有差繼曉黜回傳陸官二千餘人分別去留庚寅赦天下遣官賑山陝河南敵入延綏卻之二月放免傳奉官五百餘人德王請業南旺湖不許時言者益多上怒書言者六十人姓名於屏三月北虜小王子入寇邊將敗績命定西侯蔣琬爲總兵官率兵禦之上查內藏十窖俱罄上怒責內官梁芳韋興曰此祖宗積累未嘗用景泰頗取用英宗在南內聞之歎曰累世之積其盡乎復位視之缺一角因節它費補之今俱罄竭皆爾二人爲之興懼語塞芳對曰臣爲陛下造齊天之福因指顯靈宮之類上不懌曰後世必有與汝計者蓋指東宮也芳因惶恐時上愛興王或勸芳曰不如勸上易太子是昭德無子而有子興王無天下而有天下豈特免禍以言於昭德昭德感之因勸上易儲上曰此在司禮遂間召懷恩露其意恩免冠叩頭曰奴死不敢奉命甯陛下殺恩無使天下之人殺恩也伏哭不起上怒詔往鳳陽守陵次及覃昌昌曰以恩力猶不能回天況昌乎於是上謀之閣臣皆默不對事遂寢會泰山震欽天監奏曰東宮得喜乃解上曰彼應天象乎奏曰陛下上帝東宮上帝子上頷之遂爲東宮選婚册妃取回南京內官匠作夏四月申溺女之禁免山東江北糧五十七萬有奇閏四月給京師流民米五月南贛盜起命僉都閔珪撫治之六月開武官納粟許世襲例秋七月八月己卯朔日有食之九月災傷免陝西河南山東山西四川糧合二百五十五萬有奇安寘降夷於廣甯復諸傳奉官萬安劉吉嗾大學士劉翊致仕冬十月北敵入宣府西敵入臨洮二十二年丙午春正月次第免河南南畿廣東江西湖廣田租合三百五十四萬有奇二月丁酉朔日有

食之。罕東劫貢使。諭還所掠物。貴州苗亂。三月。敵入開原。夏四月。停給僧道度牒。廢充城王膺錕爲庶人。秋七月。廣西盜亂。尋平復。建大永昌寺。冬十月。命僧道官考試入選。始命錦衣官守登聞鼓。罷南兵部尙書王恕。免吏部尙書尹旻。其子侍講龍爲民。

二十三年丁未。春正月。大觀考察。辛亥。妃萬氏卒。監生虎臣諫萬歲山勿架棚遠眺。上奇之。時祭酒費闇鎖繫臣。上宣臣至左順門曰。爾言是。棕棚卽毀矣。命吏部與七品正官。閭慚甚。命京營指揮顏玉率兵如莊浪遏敵。破之。二月丙子。皇太子納妃張氏。次第免陝西。湖廣。江西。浙江糧二百六十三萬。有奇。傳陞李孜省爲禮部左侍郎。三月。策士賜費宏等進士及第出身有差。選程楷等三十人爲庶吉士。滿刺加國入貢。夏四月丙戌。上皇太后周氏徽號爲聖慈仁厚皇太后。詔赦。加恩廣東兵破賊捷。至六月。命四歲童葉珠入翰林。秋七月戊申。册封皇子祐杭爲興王。八月庚辰。上不豫。命百官朝皇太子於文華殿。戊子。上大漸。召皇太子受遺詔。己丑。上崩於乾清宮。壽四十一。九月壬寅。上號諡曰繼天凝道誠仁明敬崇文肅武宏德至孝純皇帝。廟號憲宗。冬十月壬午。葬茂陵。

史官贊曰。從來災異警告。至帝而極。而卒以垂拱獲治平。蓋帝值重熙之運。承祖宗撻伐之餘。雖有小醜。旋就恬夷。彭商贊襄於內。韓馬宣力於外。卽雜以劉萬汪。李巧媚蠱惑。終無所損焉。縱水旱頻仍。獨賑多至萬萬。是以上下熙熙。號稱極盛。至其尊禮孝莊。追崇景帝。保汪后。卹于謙。於愛憎恩怨間。毫無芥蒂。尤人所難。雖然。使帝能抑內寵。卻寶玩。斥遠宵小。以崇儉德。而奮剛斷。誠一守成令主也。噫。

明書卷十一

本紀九

孝宗敬皇帝本紀

帝諱祐樞。憲宗第三子。母御妻紀氏。先是己丑九月。憲宗幸昭德宮。幸上母。既娠。萬貴妃知而悲之。百方苦楚。胎不墮。憲宗令託病出居安樂堂。以痞報。而諭中官善事之。於成化六年七月己卯。生上於西宮。時有風雷之異。容貌奇聳。儼如龍形。太監張敏以粉餌哺之。西內廢后吳氏抱保惟謹。不使萬妃知。萬妃生長子薨。而皇太子祐極復薨。成化十一年。上生已六歲。太皇太后育之宮中。五月。憲宗宣示羣臣。命名冊。紀氏爲貴妃。六月。萬妃觴貴妃。暴薨。贈諡恭恪莊僖淑妃。上哀慕過甚。然天性沈默。深自斂晦。十一月。立爲皇太子。既出閣。聰明穎露。所受書未嘗錯誤。憲宗製文華大訓。時進講。必撤案降坐立聽。已乃復坐。書法飛動。不習而能。聖性堅定。學問淵博。中外喁喁頌德焉。成化二十三年八月戊子。憲宗崩。九月六日壬寅。上卽皇帝位。頒詔大赦。改明年爲弘治元年。是日。上大行皇帝號諡。妖人李孜省伏誅。僧繼曉發原籍爲民。方士趙玉芝等遣戍。內官梁芳南京閒住。法王國師領占竹等奪印敕儀仗。安寘四川光相寺。賜寶宗室及文武羣臣軍民人等。命查革異端冗官。進獻傳奉官。安南入貢。乙卯。尊皇祖母周氏爲聖慈仁壽。

太皇太后。皇后王氏爲皇太后。諡上母貴妃紀氏爲孝穆慈惠恭恪莊僖崇天承聖皇太后。冊妃張氏爲皇后。召懷恩於鳳陽。掌司禮。尋卒。冬十月。盡罷傳陞官。盡革僧道官。乙亥。徵號禮成。詔赦。封占城國王。古來爲王。敕安南還其侵地。朝鮮入賀。賜各邊官軍銀人各二兩。十一月。罷萬安。革內外倉場太監。召王恕爲吏部尙書。馬文升爲左都御史。十二月辛未。建祧廟奉安懿祖。升祔憲宗。別祀孝穆太后曰奉慈殿。御史曹璘請削萬妃諡號遷葬。上曰。止勿復言。壬午。葬茂陵。孝穆皇太后祔葬。免湖廣屯租十之六。內侍郭銜請選妃嬪。謝遷以上在諒陰止之。上是遷弗選。

弘治元年戊申。春正月。詔天下舉異才。敵入密雲古北口。戰敗之。閏正月。詔修憲宗實錄。詔錄用諸註誤官。遣官如廣西訪孝穆太后親屬。取回各處抽分御史。賜太監懷恩祭葬。二月。上耕籍田。辛丑。命興王等五王出閣讀書。令問刑官讀律。遣官祭諸陵。及闕里。歷代帝王陵。嶽瀆山川。敵犯廣甯。擊敗之。三月。幸學用太牢。允起謫籍遺逸。丙子。開經筵。賜齊庶人增宅及婚嫁費。仍令傳寫朝報。勒太監錢能於外。不許入京。考察京官。夏四月。山西流賊亂。討平之。五月。革南京武職冗員。小王子稱大元大可汗求貢。命嚴備之。卹高牆庶人。六月癸巳朔。日有食之。右庶子張昇劾劉吉。給事中胡重。御史魏璋附吉。反劾昇。不聽。許小王子五百人入貢。甯陽侯陳輔有罪。斥爲民。逮妖僧繼曉。伏誅。始命大臣督團營。以馬文升兼之。秋七月。日講畢。上曰。先生每辛苦。因賜程敏政等緋衣金帶。先朝留中疏悉付史館。禁雲南太監進貢。命詳讞疑獄。八月。停各處採辦貢獻。詔考正孔廟從祀名位。給守祖陵庶人銀幣。敵數犯宣府。甘肅。獨石等處。守將

禦走之。減雲南銀課。九月。北虜請報使。不許。請陸職。許之。孝穆太后親屬紀貴。紀旺至京。賜田宅人口。冬。十月。詔毀菴寺。汰尼解軍門。給配繆士。命考察王府官。不爲例。早免河南夏稅。代王獻海青。諭卻之。賑湖廣。四川。十一月。修南京國學。命彭韶爲都御史。清理兩浙鹽法。詔有勢豪阻撓鹽法者罪之。十二月。授沙狐狸金吾千戶。曾於虜中事英宗有功。上憫而官之。

二年己酉。春正月。禁中官及藩戚乞封武職。二月。大賑。四川免秋糧三分之一。免湖廣糧九十萬有奇。劉吉誣降庶吉士鄒智石。城吏目夏四月。王恕年七十五。免其午朝。及風雨朝。減浙江銀課。六月。敵犯關外。徽王請祀中岳。諭止之。盡革錦衣傳奉官。賑京畿。秋七月。以災傷。詔求直言。土魯番阿黑麻襲殺忠順王罕慎。遣使入貢。求爲哈密王。下敕切責之。八月。免南畿衛屯之半。敵犯赤城。九月。清查畿內莊田。有司請畿內閒田。給民耕。從之。寬三科舉人。不許會試。例冬十月。罷浦城銀冶。廣西兵破流賊。平之。山西妖賊王良等伏誅。命科道二人如廣西訪孝穆太后的派。十一月。徽王乞陞鈞州爲府。不許。發銀五萬兩。米十五萬石。賑順天饑。阿黑麻王由海道進。狻猊。卻之。十二月甲申朔。日有食之。贈于謙太傅。柱國。諡肅愍。立祠。選民兵。

三年庚戌。春正月。大觀考察。兩廣都御史秦紘。征瀧水野鴨山賊。平之。三法司勘太監蔣琮。降黜琮如故。再發倉米三十萬石。平糶畿南。二月。晉王乞建世子府。不許。疏直沽海口。水災。免直隸河南糧七十八萬有奇。三月。策士。賜錢福等進士。及筭出身有差。開成都灌縣堰。中官請鷹房牧地千頃。不許。夏四月。阿黑

麻王入貢。求歸城池金印贖使人。五月。岑欽攻田州府。逐岑溥。秦紘敗走之。復溥。六月。伯顏猛可貢馬。發洪武。永樂。宣德錢與古錢兼行。修南京城及門。秋七月。紀貴。紀旺詐冒事發。遣戍。廢武邑。王聰沐爲庶人。八月。增南奉先殿日供。立孝穆皇后廟於廣西。準袁彬世襲。閏九月。土魯番貢使由海道至京。罪經過官。司。冬十月。給事中韓鼎請選妃嬪廣儲嗣。許之。十一月。浙江礦賊亂。平之。癸卯。瓦剌太師入貢。停工作及撤江西燒造內官。十二月。詔大臣條奏軍民利病。時政得失。戴珊勦蜀盜野王剛平之。

四年辛亥。春正月。申禁胡語胡服。小王子來貢。營建太廟後殿。劉吉嚇御史鄒魯劾刑部尙書何喬新下詔獄。釋。尋致仕去。嚴自宮禁。三月。廣東黎賊反。討敗之。夏四月。番賊入河州。廣東德慶賊亂。貴州黑苗反。守將次第討平之。秋七月。北虜遣人貢馬。停織造。土魯番入貢。獻還哈密金印。八月己未。封諸弟祐楮壽王。祐棹汝王。祐橈涇王。祐樞榮王。祐楷申王。丁卯。憲宗實錄成。九月。皇長子厚照生。是爲武宗皇帝。頒詔天下。冬十月。改封興王於安陸州。漳平盜入安溪。官軍擊敗之。敵犯甘肅。丁卯。修太廟及神宮監。蠲應天糧。十二月。貴州苗也富稼作亂。革甯化王鍾柄等爵。癸亥。冊興王妃蔣氏。

五年壬子。春正月。遼府鎮國將軍思鑑及南渭王長子膺鑼罪廢。俱徙鳳陽。停陝西綵絨之半。二月。敵入宣。大甘肅禦之。三月。戊寅。立皇長子厚照爲皇太子。詔赦兩廣會兵討古田獐賊。禁永平銀礦。錄常遇春孫復。李文忠孫濬。鄧愈孫炳。湯和孫紹宗。俱爲南錦衣指揮使。劉基裔孫瑜爲處州衛指揮使。夏四月。江南浙西大水。賑之。五月。太廟祧殿成。奉安懿祖神主。六月。廢荆王。見瀟爲庶人。徙賓武昌。免畿馬十之三。

命鎮遠侯劉溥等討貴州蠻。秋七月。命工部侍郎陳政塞張秋決河。八月。劉吉致仕去。太后父張耜卒。追贈昌國公。命其子鶴齡爲壽甯侯。賑兩浙。九月。回回自海道入貢。卻之。始以銀中鹽。冬十一月。停納鹽事例。封溫處銀礦。免應天歲辦三之二。

六年癸丑。春正月。大覲考察。免山東鹽課六萬八千引。二月。給事中吳世忠乞褻遜國諸臣。下禮部議格不行。募民納米於貴州。敵入龍門。邊將擊敗之。三月。策士賜毛澄等進士及第出身有差。夏四月。選顧清等二十人爲庶吉士。甯王宸濠襲封。請復前革祿米。從之。五月。敵入甯夏。邊將敗績。停撫鎮以下俸。閏五月。水災。免應天等府糧一百八十萬有奇。禁勦戚奏乞田土。六月。兩廣賊平。湯陰王見準敗倫伏誅。秋七月。庶人見瀟不軌事發。勒令自盡。子女安奠武昌。復戶部各鈔關。冬十月。止番僧領占竹入京。十一月。詔舉山林才德。命衢州孔子裔孫彥繩爲五經博士。

七年甲寅。春正月。興王之國安陸。二月。加解州鹽四十萬引一年。貴州蠻平。命平江伯陳銳等治張秋決河口。三月。己卯朔。日有食之。夏四月。塞張秋隄成。濬南京天潮二河。發回夷使安置兩廣。詔閉嘉峪關絕西域貢。六月。土魯番來貢。還所掠哈密夷人。秋七月。敵犯昌平。九月。發內官蔣琮充孝陵軍。冬十月。西域貢獅子。卻之。以京軍修大內宮殿。十二月。敵屢入犯。

八年乙卯。春正月。募甘肅土兵禦敵。都御史許進上議哈密方略。詔可之。三月。乙酉朔。日有食之。革鄭府涇陽王見溢爵。夏四月。封朝鮮世子李儻爲國王。始設南贛巡撫。命撰三清樂章。大學士徐溥執不可。上

嘉納止之。六月。上杭盜復起。北虜別部款肅州塞內附。許之。野先克力來歸。厚賞勞之。秋七月。敵數入宣府。八月。命都御史金澤捕荆襄盜。九月。北虜擁衆入河套住牧。松潘蠻寇四川。冬十月。修舉社學。取前寘相光寺番僧入居慈恩寺。給事中柴昇疏諫。上讀疏曰。左右果欺朕也。卽敕止之。免雲南積逋礦銀。陝西妖僧爲逆。都御史張敷華擒之。都御史許進。總兵劉甯等帥師出嘉峪。入哈密。土魯番遁去。班師陞賞有差。十二月。詔停一切工役。流賊掠江西。修潮河川關。敵入古北口。禦走之。

九年丙辰。春正月。大觀考察。戶部主事胡瑾疏。諫災變屢告。由宦官李廣。楊鵬引用劉良輔等。以左道惑聖心。齋醮糜費致。上由是漸疏廣等。諭十六阿歹與興菴先孛刺結親和好。賞以幣布。科道拾遺。二月。增文廟樂舞。如天子之制。修孟廟。癸酉。皇第二子薨。追封蔚王。三月。策士賜朱希周等進士及第。出身有差。選顧潛等二十人爲庶吉士。廣賊劫信宜。官軍失利。乙亥。皇太子冠。閏三月。御文華殿。日講官王華以上方信任李廣。諷上講唐李輔國與張后表裏用事事。上聽之喜。命反復詳說。頷之曰。古昔然矣。卽撤御食。賜華日本入貢。土魯番復據哈密。夏四月。琉球入貢。妖僧張金峯等伏誅。武岡知州劉遜遵制減岷府祿米。王許奏。上怒。逮繫詔獄。科道等官申救。俱下獄。大學士徐溥等力救。上命并釋之。北虜入貢。五月。上命依劉遜削岷府祿。六月。尹直表賀萬壽。并上皇太子承華箴。上鄙之曰。此獻諛希恩也。卻之。秋七月。敵屢入大同。宣府。冬十月。停取寶坻銀魚。刑部吏請革東廠。發爲民。大學士徐溥疏請嚴早朝之節。復奏事之規。勵講學之功。優接下之禮。遠邪佞之人。斥誣妄之說。上嘉納之。

十年丁巳。春正月。奉御張瑄獻閒田爲東宮莊田。下詔獄罪之。北虜火篩犯花馬池。官軍禦於神木。敗績。二月。上遊後苑畢。御講筵。學士王鏊進文。王不敢盤于遊田。上悟。退責李廣等曰。今日講官所指。殆爲若輩好爲之。自是不復遊獵。考察京官。惟學士免考。三月。始纂修大明會典。上御文華殿。召輔臣議政事。每奏疏。反復詳審。乃行。自天順至此三十年始舉。其天質明睿如此。許進數鎮守太監劉瑯罪。瑯懼遁去。夏四月。災異。詔求直言。敵掩潮河川。指揮劉欽等二十七員戰死。大同禦敵敗績。命侍郎劉大夏等如宣。大整飭兵糧禦敵。選團營兵預征。秋七月。八月。上御平臺。召輔臣議政事。敵警禁訛言。冬十月。起左都王越。總甘涼經略邊務。十一月。土魯番歸哈密。敕印求入貢。切責之。十二月。虜寇赤斤。百戶劉達擊破之。復萬貴妃家官。王越率兵搗賀蘭山後敵。破之。巡撫甘肅都御史周季麟戰。勝之。多斬獲。兩廣兵征麓川。獠獠平之。

十一年。春正月。清宣。大屯田。二月。小王子入貢。三月。皇太子出閣講學。夏四月。五月。甘肅擊敵敗之。六月。敵犯莊浪。秋七月。兩廣都御史鄧廷讚會兵討盜李景光等。殲之。八月。王越請復封陝巴王哈密。從之。九月。壽王之國。冬十月。甲申。清甯宮災。時李廣以左道貴。幸。進言建毓秀亭於萬歲山。亭成。幼公主病。飲廣符水。殤。清甯隨燬。太皇太后怒。數廣罪。上亦悟。切責之。廣遂自酖死。詔籍沒其家。十一月。詔寬恤天下。閏十一月。戊戌朔。日有食之。詔停一切齋醮。十二月。停四川採大木。冊封安南。敵犯遼東。都指揮劉剛戰死。

十二年己未春正月大覲考察敵入遼東官軍連擊敗之二月定武職旁支襲官遞降法忠順王陝巴復入哈密三月下給事華昺學士程敏政以洩題及舉人唐寅徐經於詔獄甲戌策士賜倫文敘等進士及第出身有差敵犯宣府都御史馬中錫敗之丙子衡王之國夏四月古田獠撞作亂下督撫勦之命禮部議復建文君帝號五月水免江北子粒二十七萬有奇六月歸土魯番使人甲辰闕里先師廟災遣大臣祭告敵入甘州秋七月築山海抵居庸邊牆延千里繕城堡二百七十荆襄妖賊何淮僭稱王兵備李善擒平之八月雍王之國降石城王宸浮爲庶人甲申重建清甯宮成冬十月採珠於廉州十一月乙丑太皇太后還居清甯宮上高王宸濂嗣封甯王十二月詔大能仁寺國師那卜堅參等入宮設壇慶讚廷臣切諫上曰卿言是顧永樂閒亦有之旣而遂止不行

十三年庚申春正月火篩大寇宣大逼居庸京師戒嚴飭平江伯陳銳爲平虜將軍侍郎許進督軍務率師禦之分遣大臣守潮河川天壽山居庸紫荆倒馬諸關隘二月命詳定問刑條例夏四月上御平臺召廷臣親簡京營將帥敵入大同者八日五月甲寅朔日有食之丙申復召廷臣諭兵部推舉各官卽宣手敕六月戊戌許進陳銳無功下詔切責以保國公朱暉佩印召陳銳等還秋七月陝西巡撫熊狝得玉璽來獻禮部辨其僞上命置之庫己巳虜去召諸將士還九月福建賊入廣東討平之冬十月革鳳陽鈔關十一月敵入馬蘭谷十二月敵再犯大同尋引去火篩入河套

十四年辛酉春正月馬文昇因地震切諫上報以忠愛遂撤織叛使臣及停傳奉禁奏討中外稱慶二月

敵犯石匣城。禦走之。命征虜將軍保國公朱暉、都御史史琳等西禦敵。至河套敵遯。獲其畜物而還。三月。上躬閱列侯騎射。賞罰有差。仍賜武經命誦習。停江南導河夫役。夏四月。五月。賑山西荒。延綏兵破敵。賞之。六月。普安州女賊米魯反。會兵討之。敗績。海西酋尙古求入貢。秋七月。敵屢入甘肅。命南戶部尙書王軾率兵討米魯。閏七月。保定進白鴉。斥遣之。甯夏禦敵卻之。虜火篩寇固原。恭順侯吳瑾無功。罷之。以武安侯鄭英率兵禦之。八月。賑兩直隸。山東西。河南災。傷米魯等聽撫。革景泰以來內外鎮守。協守。分守等官。九月。丙子朔。日有食之。停武當山齋醮掛像。甲午。汝王之國。史琳無功。起秦紘代之。冬十月。米魯復叛。岐王祐榆薨。十二月。賑兗州徐邳等處。欽天監改造渾儀。

十五年壬戌。春正月。大覲考察。江西盜起。都御史林俊勦散之。傳陞盧龍衛指揮分守通州。三月。湖廣兵破賊李再萬平之。丁亥。策士賜康海等進士及第。出身有差。改胡煜等二十人爲庶吉士。命九門內官止督譏察。不可干預國課。夏四月。賑京師。壬子。涇王之國。敵潛入密雲。禦之去。五月。庚午朔。日有食之。唐王彌諦請諡號。美惡兼用。從之。秋七月。王軾破斬米魯。餘黨悉平。九月。減光祿寺日供。及鳥獸料食。敵入遼東。擊敗之。冬十月。水災。免江南糧三十萬有奇。

十六年癸亥。春正月。孟養思陸歸我侵地入貢。二月。上郊祀。賜閣臣蟒衣。鑄弘治通寶錢。詔取牡丹。廷臣諫。卽命止之。夏四月。六月。減蘇杭織造三分之一。秋七月。命守備內官不許多占軍伍。廣東討黎賊符南蛇斬之。停太倉織苧布。申王祐楷薨。進建昌伯張延齡爲侯。冬十月。停刻佛經道書。貴州阿方車等叛。平。

之。閉沂州銀礦。

十七年甲子。春正月。盜發慶恭王墓。詔封江陵世子彥汰嗣岷王。通渭王旭樾嗣韓王。都梁王祐欄嗣荆王。停福建取禽鳥。二月。廣東盜古三仔等伏誅。三月壬戌。太皇太后周氏崩。諡曰孝肅貞順康懿光烈輔天成聖睿皇后。立廟別祀。夏四月己酉。孝肅皇太后祔葬裕陵。閏四月。小王子入貢。辛酉。重修曲阜孔廟。成大學士李東陽致祭。五月。減光祿寺果品。取回蘇松織造內官。六月。回賊流劫江以北地方。大同兵禦敵。指揮鄭瑀力戰死之。敵遁去。敵入延綏。總兵白玉擊卻之。秋七月。上召廷臣至暖閣。議以京軍出援邊。兵部尙書劉大夏陳利害。遂止不遣。敵尋引去。八月。考察京官。學士免考。停止降虜世官入京操練。冬十月。上屢召廷臣至暖閣。議機密。初設武科。定三年一次。十一月。敵犯莊浪。環慶姦人劉山伏誅。敵圍靈州。邊將戰卻之。命看詳試錄。乖違者罪之。

十八年乙丑。春正月。大觀考察。岑濬據思恩。討誅之。命調宣大延綏兵。援花馬池。上召劉大夏戴珊曰。當朝覲。大官閉門謝客。若卿二人雖日延客。孰敢以賄通。手白金二錠賜。止勿謝。恐他人知。未免懷慚耳。二月。詔曰。朕圖新政。理樂聞讜言。除祖宗成憲不可紛更。其事關軍民利病。切於治體。但有益於致治者。無論大小臣工。咸直言勿隱。二月。禁密雲銀冶。上召劉大夏面諭之曰。事有可否。欲召卿議。又以事非兵部。今後有當行止者。具密揭以聞。大夏對曰。不敢。上曰。何也。對曰。先朝李孜省可爲鑑戒。上曰。卿論大政。豈被營私者比。大夏曰。揭行亦前代斜封之類。願陛下遠師聖帝。近法祖宗。凡事商之內閣。府部。如揭帖久。

則上下俱有弊。上曰善。戶部主事李夢陽指斥時政下獄。既而釋之。問廷臣曰。外議以爲何如。廷臣對曰。皇上釋李夢陽。中外頌聖德。上曰。夢陽奏有張氏二字。左右謂其語涉中宮。朕不得已下之獄。及詔獄讞。詞上。左右奏曰。此狂妄人。宜付錦衣杖而釋之。朕悟此輩欲重撲夢陽致死。以洩中宮之忿。朕所以卽釋之。不令法司擬罪也。廷臣曰。陛下此事真堯舜之仁。三月。策士賜顧鼎臣等進士及第出身有差。改崔銑等三十人爲庶吉士。夏四月。上召大臣至便殿。凡弭治盜賊。會推官員。鹽法。錢法。刑獄。徭役。一咨詢處置。日昃乃罷。如是者久之。每召對天顏和霽。問答詳審。藹然家人父子。中外稱慶焉。甲申。上不豫。五月庚寅。上大漸。召劉健、李東陽、謝遷入乾清宮。命近御榻。上曰。朕承祖宗大統。在位十八年。三十六歲。乃得此疾。殆不能興。與先生每相見少矣。健等曰。陛下萬壽無疆。偶而違和。漸須調攝。安得遂爲此言。上又曰。朕爲祖宗守法度。不敢怠荒。凡天下事。先生每可謂盡瘁。又曰。朕蒙皇考厚恩。選張后生東宮。今十五歲。尙未選婚。社稷事重。可命禮部速行。然東宮頗聰明。但年幼好逸樂。先生每勤勸之讀書講學。輔之作一好人。皆頓首曰。臣等敢不盡力。辛卯午刻。旋風大起。雲籠宮殿。空中若有人騎龍上昇者。都人皆驚視。俄傳上崩。六月。上號諡曰達天明道誠純中正聖文神武至仁大德敬皇帝。廟號孝宗。冬十月庚午。葬泰陵。掩壙時五色雲見於陵上。先是遺詔下。中外震悼。哭臨之日。臣民號慟不能興拜。梓宮所過。哭聲震野。其得人心之深如此。

史官贊曰。古稱周成殷甲。至今想慕風徽。以帝方之。厥庶幾哉。方其凝命璇宮。卽能崇御訓。隆師傅。謙恭

仁孝天下傳聞其盛節及御鴻寶紹休烈祖克親政務以弘邳隆勤緝熙之學優晉接之禮每決大疑斷大事必霽色怡顏與大臣從容慎審而後沛然見諸施行其上古都俞吁咈之風乎至於廣關言路獎廉懲貪經筵虛受每稱先生而不名君臣一德大復國初之舊萬尹一時罷去雖耐彈如劉縣花亦不能安其身且誅姦除佞使天下曉然知邪道之不可亂政怠荒是戒勤勵爲圖美政善言史不絕紀至於保念昭德友愛諸王而於祔廟一事尤能抑至情遵禮制古云惟聖盡倫惟王盡制惟孝子爲能享親惟天子建中和之極稱之以孝殆無愧焉終帝之世內外安甯幾至刑措朝多耆俊之臣民懷樂利之澤洋洋蔚蔚有豐芑棫樸之盛矣升遐之日萬方哀痛如喪考妣豈其偶耶說者猶曰外戚太厚賜予太廣此亦自兩宮起見耳若孝宗者吾殆無間然

明書卷十二

本紀十

武宗毅皇帝本紀

帝諱厚照。孝宗嫡長子。母張皇后。弘治四年九月二十四日。上生於宮中。支千類太祖。二歲冊爲皇太子。少顧視雄矯。及出閣。聰慧喜負。畧然有勝心。頗好騎射。孝宗每曰。東宮患聰明。柰逸樂何。常隨事訓迪。上往往撫對稱旨。十八年五月辛卯。孝宗崩。明日頒遺詔。以前孝宗素所擬十五事採入。頗多興革。壬寅。上卽皇帝位。詔赦天下。改明年爲正德元年。壬子。嚴宮殿門禁。募宣府土兵禦敵。六月。命清查團營兵。發延綏兵策應宣府。敵犯蔚州。命守各關隘。庚申。上大行皇帝號諡。賚各藩及文武軍民。占城入貢。求封敵犯至大同。邊將失利。命朱暉、史琳等率兵禦勝。郤之。秋七月。以太監張瑜、太醫劉泰等用藥不效。下獄。八月甲寅。尊祖母王太后爲慈聖康壽太皇太后。尊母后張氏爲皇太后。錄康茂才裔孫永、吳復裔孫江、俱爲千戶。復用遺詔。裁去監鎗內官二十四人。頒外夷詔。有司擬遣山川祭官。詔止。就近望祭。福建賊劉宗保等平。差太監王躡等往南京浙江織造。九月。賑延安。詔給餘鹽於房親張鶴齡。冬十月。建立皇莊七處於畿輔。以內官守之。朝鮮入賀。己未。祧僖祖廟。敵退。撤還官軍。庚午。葬泰陵。十一月。更易各處鎮守等內官。

十二月。敕修孝宗實錄。冊封安南國王。立仁壽宮等處皇莊。

正德元年丙寅。春正月上耕籍田。二月。幸太學。王鑿以上好遊逸。請復仁宗弘文館故事。不報。分祀諸陵。歷代帝王陵。及闕里。山川。閣臣屢疏求罷。不允。命操練東廳新選官軍。命內官分坐京營。夏四月。內旨授大同隨征官數百人。內旨收選淨身男子一千二百名入內。五月上始徵行。減蘇松織造之半。戒言官無得挾私舉劾。差內官查勘皇莊。六月。府部等衙門官張懋等疏諫馳獵。不報。大學士劉健等疏諫視朝太遲。遊幸太廣。寶玩非以崇儉。彈獵非以養仁。狗馬野物。不可育於朝廷。弓矢兵戰。不可施於宮禁。願親正人。聞正言。不報。秋七月。八月。戊午。冊立皇后夏氏及德妃沈氏等。九月。御經筵。罷內官抽運木植。五官監候楊源諫天變修德。杖之。謫死河南。冬十月。內旨差官往江西造磁器。閣部廷臣會劾內八黨。上命劉瑾掌司禮監兼團營。邱聚谷大用提督東西廠。內旨勒大學士劉健謝遷致仕。以太監王岳等交通外臣。下獄。尋殺之。李東陽乞致仕。溫旨答不允。分遣內官守備南京。及管各鎮兵馬。內旨晉焦芳王鏊入閣辦事。十一月。南京科道官合詞諫上黜權閹。留保輔。上怒。并逮下詔獄。內旨勒戶部尚書韓文閣住。罷李夢陽官。許鳳陽守備太監倪文兼轄江北軍民。十二月。兵部主事王守仁申救南京科道官。杖之。謫爲貴州龍場驛丞。景皇帝后汪氏薨。祔葬金山。悉除曲阜糧稅。始以中書李憲改給事中。二年丁卯。春正月乙亥朔。日有食之。內旨逮枷尙寶寺卿崔璿。按察司副使姚祥。主事張偉。以大臣救釋遣戍。劉瑾傳旨諭吏兵二部。凡進退文武官。會瑾議定。乃聞。閏正月。劉瑾傳旨諭兩京都察院。凡有奏章。

先揭瑾乃聞。內旨勒禮部尚書張昇致仕。命捕土豹於甘肅。內旨降李夢陽爲經歷。二月。奪故大永平長公主府第爲外廠。補各關隘守備內官。允鎮國將軍誠澈襲封秦王。修南海子行殿。裁冗官一百餘員。兩廣兵剿賀縣賊破之。邱聚陷御史王時中。枷杖遣戍。命琉球歲一入貢。陞僧官設署大功德寺。仍於大內建寺。召入誦經。三月辛未。敕文武羣臣列大學士劉健等五十六人爲姦黨。榜於朝堂。夏四月。命鎮守內官許理軍民詞訟。給專敕。敵入大同。擊卻之。詔預造鰲山燈架。五月。給事中陶諧疏諫。戒逸遊以保治安。逮杖爲民。內旨復寧王護衛屯田。六月。會選將材。廣東賊入江西大掠。秋七月。勒南吏部尚書王華致仕。命追奪弘治元年以後文官封蔭。雲南兵擒賊張華平之。八月。黃河清。慶雲見翼軫。辛巳。興王世子厚熹生。是爲世宗皇帝。改劉瑾姪塔埒監生曹謚爲千戶。詔造豹房公廡堂廡。丁亥。內旨召楊廷和入辦內閣事。九月。抑度猺獠。韋朝宣叛。官軍討平之。革參贊機務文官。冬十月。賜皇親沈傅吳讓莊田六千頃。內旨御史許讚改編修錄孔子裔二人。主尼山洙泗二書院。取進戶部銀五十萬。十一月。詔許王府無嗣皆擇代襲。遠各邊巡撫及管糧郎中俱下獄。旣而內旨命重徵糧價。商賈死者甚衆。內旨裁天下按察官。十二月。雲南夷阿本叛。討平之。

三年戊辰。春正月。大觀考察。復逮李夢陽下詔獄。尋內旨釋之。命朝覲布政各進銀二萬兩。二月。停巡撫官符驗。三月。策士賜呂柟等進士及第出身有差。改翰林編修檢討顧清等爲部屬官。內旨授焦芳子黃中官。賜劉瑾莊田於正陽門外。折毀民房三千九百餘間。發起民墳二千七百餘塚。夏四月。開武職納銀

補官例。始開武舉。宴於中府。哈密入貢。封劉瑾等八內官。父皆爲都督。五月。賑南畿。籍沒故尙書秦紘及強珍家。以競渡造龍舟。籍沒江西民吳登顯等家。以匿名帖子命朝官三百餘人。跪午門外。至未。暴烈日中。死者十餘人。餘俱下詔獄。逮致仕尙書韓文下獄。罰米三千石罄其家。命訪良馬。秋七月。諭慶成宴始用雜戲。戊午。榮王之國常德。內旨枷都御史劉孟於大明門。八月。逮前尙書劉大夏等發邊衛永成。宣大破敵。立內廠。以劉瑾領之。內旨進劉宇吏部尙書。九月。命有司不得奏災異。都察院錄囚。有劉瑾傳奉字。命十三道跪內廠數其罪。御史俯受之。冬十月。四川盜藍廷瑞等作亂。以林俊率兵討之。追奪馬文升。劉大夏等官誥。逮強珍子姪坐斬。賑江北。十一月。建玄真觀於朝陽門外。李東陽爲碑文。頌瑾功。十二月。罷各邊中鹽納內庫。

四年己巳。春正月。廣東清洞盜平。憲宗廢后吳氏薨。劉瑾欲焚之。廷臣力爭。命葬之。二月。內旨命吏部不時考察京官。不必照六年例。勒前大學士劉健謝遷爲民。著令餘姚勿得授京職。三月。敵入宣大。甲辰。御經筵。大學士王鏊致仕。廣東賊林貴等作亂。命都御史劉洪討之。江西賊起。大掠。夏四月。命毀大明會典。其預纂修官降革有差。內旨李東陽如故。五月。孝宗實錄成。改翰林侍讀徐穆等爲南部屬。以劉宇爲大學士。入內閣。六月。樂平盜起。秋七月。日本入貢。八月。內旨加都督神英。涇陽伯。九月。畿內盜起。增鑄靖南將軍印。閏九月。敵入延綏。總督才寬禦勝之。冬十月。奪平江伯陳熊爵。籍沒發全家。戍南海衛。敵入寧夏。才寬禦之。命列侯俱赴內教場演試。四川大盜劉烈僭號稱王。大掠至陝西。十一月。以義子朱鐸等爲錦

衣官十二月。四川賊藍廷瑞僭號順天王。大掠至湖廣。陝西兵禦敵破之。追奪劉健謝遷劉大夏韓文等原賜衣帶銀誥。連及者六百七十五人。

五年庚午。春正月。裁江西解額五十名。命刑部尚書洪鍾討四川盜。二月。日本復入貢。加楊廷和吏部尚書。進武英殿。召曹元入閣辦事。領吏部尚書。三月。降黜各道御史。改各部主事爲之。災傷免各處逋稅五十萬有奇。瑾矯詔出內官張永於南京。永覺。訴上前。與瑾相爭。殿諸內璫解之而罷。上大笑。沔陽水寇邱仁等作亂。官軍討之。敗績。洪鍾以計擒之。尋平。夏四月。慶府安化王寘鐸反。殺撫鎮官。自署官封拜。鑄符印。發檄以討劉瑾爲名。關中大震。總兵曹雄等率兵禦之不克。命指揮孫隆盡燬各壩積聚。未幾。遊擊將軍仇鉞執寘鐸。并其黨周昂等。遂平。頒詔天下。賑河南。敵犯遼東。禦卻之。上命涇陽伯神英及內監張永等率兵討寘鐸。以旣平還師。五月。湖廣討賊官兵敗績。六月。惠潮賊平。秋七月。四川巡撫林俊討藍廷瑞敗之。擒廖惠等。廷瑞奔紅口。會鄢本恕。俊復追擊。大敗之。賊棄輜重走。湖廣兵討賊破之。八月。張永還京。獻俘。寘鐸等伏誅。劉瑾謀不軌。伏誅。籍沒得家財鉅萬。及龍袍金印龍盔甲諸物。中外快之。罷劉宇。曹元。字子仁。爲民。焦芳及子黃中。以附瑾劾。并爲民。論平寘鐸功。封仇鉞咸寧伯。封內官張永。魏彬。馬永成。谷大用。義子朱德。俱伯爵。冊封占城國王。召諸翰林官於南京。革寧王護衛。奪神英伯爵。復陳熊伯爵。九月。詔復科道官三十一人。議復貶謫官尚書李傑等五十三員。冬十月。總兵馬安敗賊於景州。桃源賊汪澄三等反。紿撫復叛。陷安仁。滅九門錢鈔。張綵死於獄。石文義等伏法。十一月。命工部刊張永屬李東陽等

爲窮魚苦菜詩傳之霸州賊劉六等反。獲劉七宥。尋叛去。免蘇松常三府稅。十二月盜陷江津。殺僉事吳景等。轉入呂梁。殺主事伍全。甲申。上太皇太后王氏爲慈聖康壽太皇太后。皇太后張氏爲慈聖皇太后。蠲賑浙西。都御史林俊圍燒逆賊曹甫等於伏子岸。殲之。平。命太監喬忠如南京織造。許帶鹽引。關隘不許詰問。

六年辛未。春正月大覲考察。盜陷營山。播州蠻寇亂。命高崇熙爲副都討之。山東盜起。命都指揮李瑾討之。二月。停四川採辦。添修豹房寺觀。巨盜劉六等起畿輔。連陷州縣。命惠安伯張偉等率兵征之。三月。築浙東捍海隄。山東賊陷樂安濱州高苑諸州縣。河南賊流劫延津封邱諸州縣。巨賊劉寵等流劫山東。殺京營指揮六人。乙丑。策士賜楊慎等及第出身有差。選許成名等三十三人爲庶吉士。江西賊破新喻諸縣。敵入河套。擊卻之。賊犯闕里。禮拜而去。轉掠眞定大名。山東兵討賊勝之。河南兵敗賊於應山。夏四月。命太監張永會官釋囚。江西盜大起。贛賊陷新淦。執參政趙士賢。靖安賊據趙王嶺。華林賊陷瑞州。州州東鄉饒州姚源盜皆大掠。命都御史陳金率兵討之。貴州苗叛。五月。四川賊陷茂州。殺其官。遂陷劍州。諸處賜京民八十以上粟帛。賊劉六等自山東掠河南。轉掠湖廣。入江西南直隸。所在閉城自守。商旅斷絕。命太監韋興偕林俊專討藍廷瑞。六月。命洪鍾林俊藍璋合討四川賊。日本遣甯波叛民宋素卿來貢。敵犯延綏。敗去。山西盜李華起。合劉六與賊楊虎陷汜水諸處。陷棗強。知縣段豸死之。四川賊入貢川。自山西陷武安。燬臨洛。抄故城。復入文安。命都督張俊率京兵討之。藍廷瑞奔漢中。聽撫。劉賊自霑化陷卽

墨武城濟陽而南。秋七月。免河南稅糧。江西盜攻臨江府。官兵敗績。八月。四川賊入貴州。陷婺川諸州縣。左都馬中錫招劉六等就撫。廷臣執不可。賊叛去。永順土舍彭世麟擒藍廷瑞等。官軍剿餘黨破之。內旨召張偉等還。命陸完統其軍。賊陷固安大城。靜海青縣。天津兵禦勝之。還秦紘籍沒家物。下馬中錫等於獄。九月。流賊劉六等擁衆向都城。京師戒嚴。陸完合諸將大敗賊於固安。山東賊張興等起。主事張嘉謨征敗於高麗店。殲平之。官軍屢勝劉六等。至保定戰。敗績。命太監谷大用協同陸完討賊。廷臣屢求建儲不報。四川盜復起。冬十月。劉六等東掠破日照諸縣。廣福賊入江西連破州郡。劉六等焚運舟千二百餘艘。敵犯山丹。敗去。十一月。賊攻徐州。轉掠南陽至江北。免山東粟豆二十四萬。敵犯宣府。趙瑛戰死。復寇涼州。邊將擊敗之。命改東關倉爲義子朱德私居。十二月。陸完督諸將破賊於濰縣。賊分六股。遂由濰縣突廣平入河南。至虹縣。陸完追破之。

七年壬申。春正月。敵犯甘肅。擊破之。賊犯霸州。京師復戒嚴。命伏羌伯毛銳駐河南。谷大用陸完駐畿南。分諸將隸之。四川兵破賊於川南。毛銳遇賊於真定。敗績。撤還。南昌知府李承助破華林賊。二月。賊各陷利津萊州梁山睢甯蕭碭諸處。河南兵擊賊破之。都督馮禎戰死。江西廣西雲南各破賊捷聞。夏四月。賊復掠畿內。發倉糧二十萬石賑畿南山東。五月。陸完討賊勝之。劉六等奔登萊。諸將邀破之。南追至淮。賊遁去。劉賊自遂平趨朱皋。土兵擊敗之。盜殺湖廣都御史馬炳然。湖廣兵破賊。劉六溺死。閏五月。四川及大帽山賊方四張旺等伏誅。賊掠黃陂據羅田。河南賊平。敵入嘉峪。擊破之。六月。劉七自黃州劫掠至九

江入鎮江。秋七月，川賊曹甫餘黨降。江西副使周憲討華林賊，戰死之。免谷大用西廠辦事。八月，劉七等犯南京。陸完促之掠淮安，自通州復遡九江，又轉南京。三往反，至狼山，舟畢集，遇颶風，舟覆，賊盡死。九月，論平賊功，封谷大寬等爲伯，進仇鉞爲咸甯侯。陸完及內閣加秩封廕。一時冒功授都督指揮千百戶者千餘人，賜義子百二十七人國姓。冬十月，內旨調邊兵入衛。廷臣極言不可，上不聽。遂召大同遊擊江彬等領兵入衛。十一月，江西羣盜平，冊封占城。十二月，詔建鎮國寺於大內，西域四川賊廖麻子等大掠，命都御史彭澤合兵討之。山西妖人李五以幻術作亂，尋敗平之。

八年癸酉，春正月，詔建延壽寺於西內，殿內爲夷鬼淫褻之狀，鉅細千餘。金函藏所謂佛骨之類，不下千百片。江西賊王浩八等復大掠，命都御史俞諫等討之。尋平，以降虜充御馬監勇士。二月，川賊降。三月，敵入大同，邊將禦之敗績。夏四月，甯王宸濠修陽春書院，僭號離宮，詔開皇店。五月，敵入山西，邊將敗績。六月，科道劾江彬妄殺良民，不報。秋七月，詔立皇莊五處。滁陽王奉祀郭琥革職。九月，賜江彬國姓。冬十月，以義子錢甯掌錦衣衛，東鄉桃源賊復叛掠，尋平之。十一月，追贈劉基及諡。

九年甲戌，春正月，大覲考察，會舉將材。慶成宴始至設燭，上張花燈於乾清宮，不戒火。都御史彭澤討重慶賊平之。二月，上御豹房。四川羣盜平，上偕錢甯等微行黃花鎮等處，歸入教坊司。廷臣請上擇宗室親賢入京，不聽。江西反賊平。三月，策士賜唐臬等進士及第，出身有差，再復甯藩護衛屯田。夏四月，甯王宸濠自稱國主，護衛爲侍衛，令旨爲聖旨。五月，江西賊復起，敵入宣大，諭吏部凡言事遷謫官永不起用。秋

七月商洛盜起。敵犯宣府。命張永等率兵禦之。八月辛卯朔。日有食之。敵犯白洋口。敕邊將固守。九月。編修王思疏諫。佞倖蠱惑上心。上怒。杖門下。謫嶺南驛丞。冬十月。敕建乾清坤甯二宮。十一月。梁穀妄陷魯府歸善王當。降爲庶人。王觸牆薨。廣西盜起。殺指揮李鎮等。選團營勇士四衛兵萬二千人入西內操。練以江彬提調之。十二月。分諸太監爲守備。及督鹽採珠市舶等務。

十年乙亥。春正月。敵入潮河川。二月。命都御史陳天祥修各關隘。三月。上出自西安門。經宿而還。廷臣諫不報。夏四月。考察京官。閏四月。兀良哈寇馬蘭路。參將陳乾戰死。五月。都御史王倬等擊敵於花馬池。六月。命兵部侍郎陳玉等率兵討兀良哈。秋七月。四川苗作亂。擒斬之。八月。都御史邊憲敗敵於花馬池。敵大入陝西。九月。命都督張洪率兵西出禦敵。冬十月。江西按察副使胡世甯奏甯王不法事。下敕責之。甯王宸濠復奏副使胡世甯離間誹謗。內旨逮下獄。幾瘐死。尋解。十一月。經始乾清宮。十二月癸丑朔。日有食之。敵入雲州。復入渾源州。以養畫眉鳥食謫光祿寺少卿楊瑋於外。

十一年丙子。春正月。上御豹房。引邊將江彬許泰劉暉及錢甯皆名義子。同狎近。號外四家。二月。以王守仁巡撫南贛等處。並設東西兩官廳。以內豎及外四家統。上自統閣人有力者爲黃兵。上與諸近倖生格。虎豹爲所傷。不視朝久之。三月。武官馬昂進有娠妹。上幸之。官都督。賜第太平門。無少長。賜蟒玉。科道呂經等諫不聽。上幸其第。酒酣。召其家婦。忤旨。上怒。疏其女弟。勒昂以病歸。夏四月。敵入宣府。總督侍郎丁鳳禦卻之。秋七月。以貨郎趙璜俞琳晉憲職。分修畿輔武備。八月。四川熨蠻作亂。招撫不聽。進兵討之。次

年五月卒。衆復入宣府。命內官張忠等督兵禦之。復以成公輔等節制。九月。官軍禦敵於龍門。敗績。上猶岐山。各盜起。尋俱平之。敵退。官軍還京。冬十月。副使陳九疇敗土魯番於肅州。

十二年丁丑。春正月。大覲考察。上獵於南苑。二月。上幸功德寺。三月。策士。賜舒芬等進士及第。出身有差。選汪佃等三十四人爲庶吉士。王守仁討信豐賊。敗之。夏四月。上微行至石經山。湯泉峪。蹕玉泉亭。十餘日。乃還。命大臣賑畿內。土魯番陰使寫亦虎仙以祕術進。上納之。預義子列。甯府典寶閻順等告宸濠陰謀。杖發孝陵。許湖廣太監杜甫經歷比較。雲南盜起。官兵敗績。始權進貢番舶。都御史王守仁率兵攻何塘洞賊。平之。六月乙巳朔。日有食之。詔許秦藩封壤。廷臣以祖宗著令不與藩封。力爭不聽。擒江西賊首陳日能。平之。秋七月。上微服幸昌平。大學士梁儲等追至沙河。諫止。不聽。己酉。上欲出居庸。巡關御史張欽諫阻閉關。上怒。還幸馬房。戊午。上夜御奉天殿視朝。賑湖廣。八月丙寅。上夜出德勝門。宿昌平。辛未。度居庸。幸宣府。命谷大用守關。毋得縱人出追。九月甲戌。上在宣府。營鎮國公府第居之。壬辰。上駐陽和。始稱總督軍務。威武大將軍。總兵。行印信鈞帖。丁酉。萬壽節。百官遙行賀禮。戊戌。上獵大同。遂幸陽和。是日敵以數萬犯陽和。上命諸將擊之。敵引去。庚子。取戶部銀一百萬。解赴陽和。冬十月癸卯。上駐順聖川。丁未。上親督列侯諸將禦敵於應州。敵遁。辛亥。敵復入犯。尋去。十一月癸酉。上駐大同。四川蠻平。命陝西織造龍絨。戊寅。上還宣府。冬至節。上在宣府。盜焚故大學士費宏家。巡撫孫燧捕之。左溪賊平。十二月壬寅。上在宣府。復開納銀事例。廷臣至居庸請駕不得度。乃還。閏十二月。上在宣府。戒諭京城守門內官毋放

廷臣出城。封江彬爲平虜伯。許泰爲安遠伯。閏十二月立春。上迎春於宣府。備諸戲劇。命大車載僧與婦女數千人。褻戲。上視之大樂。

十三年戊寅。春正月丙午。上還京。郊祀畢。復出關遊幸。江西兵平瀾頭賊。及討九連山賊。平之。百官進遊。幸還朝賀儀。上賜以銀牌。惟翰林官無賀儀。不賜。辛酉。上復如宣府。二月。上在宣府。己卯。慈聖康壽太皇太后王氏崩。越三日。上於宣府發喪。三月。上還京師。上太皇太后諡號孝貞純皇后。都給事中石天柱刺血上疏諫。不聽。尋內旨調爲推官。上遣中官如烏思藏迎活佛。廷臣屢諫。不聽。夏四月。上以大行太皇太后將祔葬。親告六陵。遂如黃花鎮等處遊獵。賑淮徐饑。五月己亥朔。日有食之。上次喜峯。欲招三衛夷人納質宴勞。御史何士元等力諫。不報。戊申。上還京師。六月。教坊司奉鑾臧賢乞閑。溫旨留用。甲申。葬太皇太后於茂陵。秋七月。錄應州功陞賞者九千五百餘員。敵犯甯夏。上復議北征。廷臣諫。不聽。仍自稱威武大將軍。太師鎮國公。更名壽。巡邊。以江彬爲威武副將軍。令內閣草敕。廷臣奏爲邇者上時出巡邊。久不親政。天下人心無不危懼。又復爲此。萬一宗藩中或有援引祖訓。指此爲名。具本上請。不知陛下之左右及臣等代言之臣。將何自解。上不省。屢遣中官促之。於是楊廷和稱疾。上御左順門召梁儲。草敕。儲曰。敕不敢草。陛下爲君。乃自卑而例於臣。是以臣名君。不可。上怒。手劍曰。不草。齒此劍。儲免冠解衣伏地流涕。曰。臣逆命願就死。敕不敢草。良久。上擲劍起。更命廷和草之。丙午。上發京師。敕楊廷和居守。丁未。出居庸。命守關如前。命鳳陽太監兼廬淮揚三府督捕。上自宣府如大同。八月。上在大同。敵入陝西。九月。上在大

同庚子。至偏頭關。自改稱鎮國公。賑南畿。冬十月戊辰。上渡黃河。己卯。駐榆林。十一月。上在榆林。十二月。上在榆林。復渡河。幸石州。文水。諸州縣。遂駐太原。召娼家劉良女幸之。四川。棘蠻復叛。

十四年己卯。春正月戊辰。上發榆林。丙子。駐宣府。詔改郊期。二月乙丑。上發宣府。先是宣府建行宮。費不資。實珍玩婦女於其中。上每謂曰。家裏欲居之。以從臣力諫。乃歸。壬申。還京。往返數千里。上卻輦。戎服佩弓矢乘馬。冒風雪。歷險阻。侍者病憊。上不以為勞。內旨江彬提督團營。丁丑。郊。遂獵南海子。楊廷和上居守敕。上曰。朕不時巡狩。可勿還。命工部侍郎趙璜採運大木。備營建。廷臣請建皇儲。以安宗社。不報。三月。詔曰。朕欲南巡。觀風天下。歷秦岱。經徐揚。抵金陵。覽興龍之勝。概下蘇杭。浮江漢。登武當。徧觀中土名勝繁麗。其以管家將指揮朱湧等四十七人爲錦衣官扈從。官舍一千人。充御馬監勇士。時甯藩反。形已具。廷臣憂之。一時上疏諫者集闕下。陸完迎之。謂曰。上聞直諫。取引刀作刎狀。今日撒賴矣。以沮言者。一時言官多陸黨。遂沮。於是翰林修撰舒芬。吏部郎中夏良勝。禮部郎中姜龍。兵部郎中張鳳。刑部郎中陸鳳。兵部郎中黃鞏。次第疏諫。上大怒。逮夏良勝。下詔獄。命舒芬等百二十人跪午門外五日。復各杖謫。有差。一時死者陸震。余廷瓚。劉校。何遵。林公輔。劉珏。孟陽。李紹賢。劉平甫。李翰臣。詹軾。十有一人。是日京師陰霾晝晦。宮內池水溢四五尺。折橋下鐵柱。有金吾衛指揮張英。言車駕出必不利。乃肉袒露刃以死諫。遂不出。夏四月。修苑中宮殿。分義子提督東西二關。五月。命安撫各處流民。敕遣太監賴義等往戒諭宸濠。革其護衛。詔發兵索宸濠偵卒於臧賢家。不獲。六月丙子。甯王宸濠反。巡撫都御史孫燧按察司副使許

達死之。遂攻陷九江。南康兵備曹雷知府陳霖等遁走。及諸衛州縣皆陷。己卯。興王祐杭薨。都御史王守仁往福建。聞變易服。走臨安。復走吉安。與知府伍文定等起兵。土魯番進貢。己丑。宸濠兵圍安慶。知府張文錦等守禦卻之。秋七月。逮太監蕭敬及陸完。錢甯臧賢下詔獄。尋釋敬。籍錢甯臧賢家。都御史王守仁知府伍文定討宸濠。遂入南昌。宸濠解安慶圍還救。至鄱陽湖。擊敗之。丁巳。復戰。遂擒之。奏上。未至京。八月。下詔南征。大學士梁儲蔣冕從。命江彬許泰太監張忠張永等先率六軍。由大江如江西。癸未。上發京師。以楊廷和居守。廷臣諫不聽。王守仁上疏止駕。不聽。丁亥。上次涿州。江西平表至。留中。九月。上次保定。禁民間畜豬。著爲令。戊戌。次臨清。復單舸疾歸。至張灣。載劉良女同往。崇明海盜起。冬十月壬午。發臨清。十一月甲辰。至淮安。屏從人步行。幸總兵顧仕隆宅。命拘錢甯於臨清。收其家屬。己未。大漁於寶應。汜光湖。十二月丙戌。上至南京。謁陵祭廟。太監張永還見上。言守仁之忠。并江彬等欲害之意。上不聽。命太監張忠等率兵擒宸濠餘黨。時已平。羅織死者不可勝計。詔純皇后大祥告祔。及觀察策士以次行。改王守仁巡撫江西。

十五年庚辰。春正月。上在南京。廣西兵討獠賊破之。二月。上在南京。三月癸丑朔。日有食之。楊廷和等奏言。純皇后大禮在邇。及朝覲官久集京師。殿試及期。自南巡。諸司奏章八月不下。乞回鑾。不報。三月。上在南京。夏四月。弛豬禁。賑淮揚饑。四川焚蠻平。五月。上在南京。幸牛首山信宿。軍中夜驚。乃還。始發。大察疏。六月。上在南京。一夜江彬索城門鑰。南兵部尙書喬宇守弗與。宇倡百官數請回鑾。不聽。秋七月。命南巡。

大學士梁儲等執奏跪宮以止之。八月，上在南京。閏八月，上在南京。九月，上在南京。以大將軍鈞帖令王守仁重奏捷。守仁節略前奏入。江彬、張忠等上之，遂受宸濠俘，發龍江漁。壬寅，如瓜州，入民家，夕宿望江樓。癸卯，自瓜州登金山，如鎮江，幸致仕大學士楊一清第一清厚獻。上大悅。凡五幸焉。幸方故大學士靳貴第，撫樞嗟悼，命番僧誦經薦福。庚戌，發鎮江。癸丑，至揚州。庚申，至寶應，復漁汜光湖，如淮安。都御史叢蘭等進金牌花紅綵幃，上簪花騎入城，過山陽，至清江浦，幸太監張陽第，幸積水池。上自棹小舟，舟覆溺焉。左右掖出，遂還南京。冬十月，上自南京班師凱旋。十二月，駐通州。宸濠及逆黨皆伏誅。海外佛狼機始入貢。盡召內閣府部勳戚大臣赴行在。甲午，上還京師。

十六年辛巳，春正月，免徐州鳳陽糧稅。癸亥，上不豫，寢疾豹房。廷臣請還宮，不聽。二月，陝西盜起。三月，癸丑朔，日有食之。乙丑，上大漸，惟太監陳敬蘇進在左右。上曰：朕疾殆不可爲矣。爾以朕意達皇太后。天下事重，其與內閣輔臣議處之。丙寅，上崩於豹房，壽三十一。內官奔告慈壽皇太后，乃移殯於大內。是日傳遺詔曰：以朕疾彌留，皇儲未建，朕皇考親弟興獻王長子厚燾，年已長成，賢明仁孝，倫序當立。遵奉祖訓，兄弟終及之文。即日遣官迎取來京。嗣皇帝丁卯，遣定公光祚等詣安陸奉迎。大學士楊廷和、毛紀等奉皇太后懿旨，逮江彬籍其家，尋伏誅。罷威武團練營官軍，還各邊。革各處皇店，并其官校。各邊鎮守太監留京者遣之。外夷進貢者厚賜，令還國。豹房番僧及少林寺拳和尚、教坊人等，遣去之。中外稱慶。五月，上號諡曰承天達道英肅睿哲昭德顯功宏文思孝毅皇帝。廟號武宗。九月庚午，葬康陵。

史官贊曰。無德易亡。辟則爲僂。斯言其不信哉。明當十葉際。十五載之濁亂。綠林橫噬於外。昏椽肆燄於內。而且金根野覲。鐵馬宮馳。然而鷓鴣厲風。鬼燐白晝。莫此時爲甚。觀帝身勞苦。乘馬佩弓矢。數千里不倦。蓋亦有爲之資也。慨然興鞭笞沙漠之志。乃郊圻之外。星彗旄頭。虎豹之關。塵駭馬跡。七萃之士。頻從三洲之詩已奏。雖沸羹爇鼎而旋見肅清。良由頤根久茂。是以弗至披撥也。嗚呼。不亡不僂。亦云幸矣。悲夫。

明書卷十三

本紀十一

世宗肅皇帝本紀

帝諱厚燠。憲宗孫。興王祐杭長子。憲宗生十子。長孝宗。次卽興王。次岐益等八王。弘治甲寅。興王之國安陸。妃蔣氏卽上生母。於正德丁卯八月十日。生上於興邸。生時黃河清。慶雲見軫翼楚分。上穎敏岐嶷。王口授經書。靡不領略。其於孝經尤所究晰。進止凝重。虔秉禮度。正德十四年六月己卯。興王薨。諡曰獻。上受敕理國事。十六年三月丙寅。武宗崩。遺詔奉迎。戊寅。諸臣至安陸。進金符。上受符朝見羣臣。夏四月壬午。辭興獻王寢墓。癸未。發安陸。辭母妃。妃曰。吾兒此行荷重任。慎無輕言。上嗚咽曰。謹受教。遂行。丁亥。內閣楊廷和等具儀。由東安門入宿文華。如皇太子卽位禮。上覽。謂長史袁宗皋曰。遺詔以吾嗣皇帝位。非皇子也。廷和再請不允。遂請於皇太后。由大明門入謁几筵。朝太后。見皇后出。癸卯。卽皇帝位。頒詔改明年爲嘉靖元年。大赦。時日正中。久旱霖雨忽霽。萬象咸新。識者知爲更新之兆。甲辰。命大臣自陳無功。封拜之人許自劾。引誘蠱惑姦黨。言官參奏。各衙門弊政。俱遵祖制改正。發宣府貯銀二十萬備賑。義子勒令復姓。丙午。諭閣臣迎母妃於興邸。以錢甯等家資濟邊代民賦。戊申。諭議興獻王主祀稱號。下王瓊等

於獄。奪謫有差。罷湖廣鎮監李鎧。復太監王岳。范亨官。恤其家。革鎮平伯陸永等爵。五月。錄忠諫諸臣陸震等。死加贈廕。餘次第起用。凡內外內官一遵舊制。奪其旗牌諸物。不許干預他事。閉大理府礦場。革先朝冒濫軍功官。遣使存問謝遷。命禮部及羣臣會議興獻王典禮。詳具郊祀志中。己未。上大行皇帝諡號。庚申。賚勳戚文武軍民。取回各非舊制內官。晉袁宗皋。禮部尙書文淵閣大學士。召還使朝鮮內官丙寅。補策士。賜楊惟聰等進士及第出身有差。改廖道南等二十四人爲庶吉士。壬申。錢甯伏誅。追奪內臣兄弟姪封廕。畿內皇莊查給本主。六月。楊廷和請開經筵。四川松潘番亂。討平之。陝西賊田迪亂。討平之。戊子。江彬與其男及黨伏誅。乙未。縱內苑禽獸。釋宸濠甯彬等。誣誤者二百餘人。丁酉。革冒濫錦衣官旗三萬餘人。裁南京內府各監局官員。革傳陞僧道教坊官三百餘員。盡削內外金剛老及把總大管家名色。禁珠池內官干民事。停織龍絨。秋七月。進士張璫上大禮疏。下有司申嚴奪情之禁。敵犯莊浪。禦卻之。禁東廠受民詞。再議興獻王稱號。瀋王河。毀西市鎮國府及宣府離宮。寤亦虎仙伏誅。發倉米五十萬賑京師。及平糶。黜取佛太監。流刺麻國師二十七人於遠方。以儀真皇鹽爲官俸。甯津盜起。尋平。誅妖僧瑞竹。廢元明等宮寺。甲子。上手敕尊父爲興獻皇帝。母爲興獻皇后。祖母邵氏爲康壽太皇后。閣臣封還手敕。格之。八月。有司請考孝宗。母慈壽皇太后。不允。議出使外國用文臣。禁各處內官抽分。詔諭朝鮮。免應天耗糧十三萬有奇。戊申。祧仁祖。九月癸酉。上母妃次通州。以稱號未定。駐留。上聞之。號泣。奏皇太后。願避位奉母歸藩。內外及廷臣惶懼。必如手敕所稱。上乃悅。壬午。至京。由大明門入。上迎於闕內。山東盜平。江

西閩廣賊悉平。庚午，葬武宗於茂陵。冬十月，進士張璪進大禮或問。上嘉納之。十一月，敕修武宗實錄。賑江西，築遼東邊垣。敍江西功封王守仁新建伯。敵犯大同，發正德留中疏八百六十本於史館。甲戌，乾清宮成。罷廣東貢香。十二月，上手敕加興獻帝后尊號皇字。廷臣力爭。上曰：卿等所言，朕已悉知，但哀哀之情，不能自己。罔極之恩，報亦無方。況朕奉昊天至情，不拘於史志，可勉從朕命。乙亥，慈壽皇太后誥諭選淑女大婚。

嘉靖元年壬午，春正月己未，郊。乾清宮後室災。楊廷和等因奏言：豈興獻帝后加稱，祖宗神靈或有未協者乎？上於是心動，乃稱孝宗爲皇考，慈壽皇太后爲聖母，興獻帝后爲本生父母，不加皇字。上初卽位，裁抑佞幸，諸途俱清。至是，興邸舊人夤緣遷敍。至庖匠、廝役、寄祿、錦衣、階資、廕敍，幾於數百。而皇親邵喜等狎恃恩寵，請乞無厭。舊閣蕭敬等仍留大內，寺觀仍舊存葺。民產不盡歸還。左右近習，時有移易。於是給事中朱鳴陽、御史朱衣、主事高尚賢、鄭佐等，各疏諫，不報。馬平盜起，都御史張嶺討之。尋平。二月己丑，遣官分祭諸陵。闕里，歷代帝王陵寢。山川，敵犯遼東。考察京官，停各巡撫入京議事例。河南盜流入陝西，參議陳鼎平之。三月，上諭內閣，興獻帝册文，朕宜稱孝子，女直貢豹，卻之。甲寅，幸太學，謁先師。乙卯，耕籍田。去雜戲。丁巳，詔曰：自古帝王以孝治天下，尊親之禮，其來遠矣。仰惟聖母慈壽皇太后，敬相皇考孝宗皇帝，訓育皇兄武宗皇帝，蔚有顯聞。皇嫂皇后，表正宮闈。母儀有年，重念祖母。貴妃事我憲祖，澤隆佑啓。本生父興獻王聰明仁孝，本生母興獻王妃莊敬儉勤，誕育眇躬，丕承前烈。謹奉册寶，上聖母徽號曰昭聖。

慈壽皇太后。皇嫂曰莊肅皇后。又祇奉聖母懿旨。上聖祖母尊號曰壽安皇太后。本生父母曰興獻帝興國太后。大禮既舉。洪恩誕敷。布告天下。遣官詣安陸。上興獻帝尊號。侍郎賈詠題其主曰興獻帝神主。不稱考及叔。亦不敍子名。上念翊戴功。封楊廷和。蔣冕。毛紀。及指揮邵喜。蔣輪爲伯。駙馬都尉崔元爲侯。餘陞賞有差。山東礦寇王堂。流劫河南。久之乃平。夏四月。禁京城造酒。治馬。吳等獻女之罪。立穎公友德等廟於雲南。額曰報功。行熱審法。恤囚。著爲令。戊戌。御經筵。五月。罷封楊廷和。蔣冕。毛紀。伯爵。餘加恩如故。錄功臣韓成。裔鳳翔。給冠帶祿米。六月。禁內官弟侄官錦衣。著爲令。秋七月。免江西逋租。詔國子監及提學官修補殘缺經史。免安陸田租十之三。敵入寧夏。指揮楊洪等戰死之。八月。封乳母宮媼劉氏等爲夫人。廷臣諫不聽。江西災。免漕米二十萬加賑。釋李夢陽於獄。九月辛未。冊立皇后陳氏。冬十月。冊恭妃文氏。順妃張氏。賑南直隸湖廣江西廣西十一月。廣西賊黃鏐伏誅。庚申。壽安皇太后邵氏崩。敕覈畿內皇莊二十萬九百九十頃有奇。還民者二萬有奇。餘命曰官田。十二月。上壽安皇太后諡曰孝惠康肅溫仁懿順協天佑聖皇太后。山東賊流入河南。流劫大名。轉入南直隸。命隨處捕之。禁言官獨劾大臣。隨以諫官言除之。

二年癸未。春正月。大覲考察。給事中黃臣諫。內官蕭敬久竊重柄。復開傳乞之門。宜斥而禁之。不報。流賊至考城。官軍討之。敗績。指揮趙泰等戰死。敵入沙河。禦卻之。二月。山東賊自散。丙申。葬孝惠皇后於茂陵之右。修京師北城。三月。策士賜姚涑等進士及第。出身有差。酌卹高牆庶人。夏四月。詔興廟樂。用八佾。命

兩京三品官各舉所知堪爲守令者。閏四月。廷臣諫齋醮。上曰。卿等亦忠愛言也。其停之。陝西盜楊錦等伏誅。五月。日本貢使大掠寧紹。敵犯密雲。復命興獻帝后加皇字。廷臣執不可。六月。災傷免江浙稅十之五。山西賊陷陵川。山東賊劫萊蕪。掠金鄉淄川諸縣。敵入甘肅。殺邊將。上賜都督陳萬言房基。工部尙書趙璜執不可。萬言銜之。訴於上。上怒。逮營繕郎中葉寬於詔獄。吏部侍郎奏言。陛下卽位之初。禁黜左道。邇來修設禱祀。溷瀆宮庭。且向來神氣精明。近則天顏異舊。豈鼎盛之年。忘在色之戒乎。不報。秋七月。給事中劉最疏劾太監崔文誘上齋禱。靡費無算。且與錦衣千戶陶澆羅織縉紳。大蠹反以賄脫。復匿錢甯厮養。上怒曰。劉最妄言。命黜爲廣德判官。尋遣戍。八月。進張鶴齡爲昌國公。詔留漕糧三十萬賑南畿。敵入畝嶺口。復寇遼東。九月。遣官以銀二萬糧九十萬賑山東河南湖廣江西。冬十月。遣內官蘇杭織造。命廷和草敕。廷和諫不聽。乞休。允之。南京刑部主事桂萼上大禮疏。上嘉納之。

三年甲申。春正月。停解造軍器。免嘉湖稅糧。興國太后壽節。命婦朝賀。宴賀之。二月。昭聖皇太后壽節。免命婦朝賀。廷臣諫不聽。禁內外官交通藩府。賑淮鳳饑。敕伍文定捕盜賊。招張璉桂萼於南京。召席書霍韜於家。共議大禮。三月。詔定安陸州松林山爲顯陵。南京主事黃宗明。經歷黃綰。同璉萼上疏議大禮。夏四月己酉。上昭聖皇太后爲昭聖。康惠慈壽皇太后。興獻帝爲本生。皇考恭穆獻皇帝。興國太后爲本生。母章聖皇太后。皇考立室奉先殿側。曰觀德殿。詔誥天下。遣官迎獻帝主於安陸。魯迷貢獅子犀牛。編修鄒守益。修撰呂柟。爭大禮。下詔獄。五月。停端陽龍舟戲。六月。鎮江海寇亂平之。陞張璉桂萼翰林學士。方

獻夫侍講學士。科道官七十四人。會劾璫等。下御史段續陳相於獄。餘宥之。修撰楊慎等三十六人。劾璫等。奪俸。鴻臚卿胡侍。吏部員外薛蕙。以辯大禮下獄。謫降之。秋七月乙亥。改稱本生聖母曰聖母。章聖皇太后。戊寅。何孟春等二百二十餘人。跪左順門內。大呼高皇帝。孝宗皇帝。聲徹於內。上使內官諭退。朱希周復入內閣。要毛紀。費宏。石瑋。同跪。言周廟之禮。至重至大。而本生二字爲安。陛下上承天命。以臨九有。所恃者人心。若不從人。何以爲治。上復諭之曰。獻皇帝神主將至。冊祝文悉已定。羣臣且退。仍伏不起。上乃下爲首者豐熙。張紳等八人於詔獄。楊慎等撼門大哭。聲徹上聽。上益怒。命逮馬理等一百三十四人於詔獄。尋詔何孟春等二百二十人戍邊。杖豐熙等一百八十人於闕下。死者十有七人。己卯。尊上聖母號冊。己丑。再杖楊慎等七人於闕下。甲申。獻皇帝主至京。奉安觀德殿。八月。大同兵變。殺巡撫張文錦等。命侍郎李昆齋赦宥之。代王出居宣府。九月丙寅。定孝宗稱皇帝。伯考。昭聖太后爲皇伯母。獻皇帝爲皇考。章聖太后爲聖母。詔告天下。冬十月。議遷顯陵。尋停。十一月。敵入延綏。大同兵復亂。尋定。十二月。四川賊陷黎川等縣。代王還大同。四年乙酉。春正月。命諸郡織幣改貢金。始權山海關。敵犯甘肅。邊將禦卻之。許魯迷入貢。詔免蘇松常逋稅三十八萬有奇。二月。日本使宋素卿伏誅。餘放還。獲大同叛卒爲首者斬以徇。事平。三月。詔纂獻皇帝實錄。光祿署丞何淵請立世室祀獻皇帝於太廟。比太祖太宗。廷臣諫不聽。璫等皆以爲非。乃止。辛巳。昭聖皇太后所居仁壽宮災。延及玉德安喜景福諸殿。詔特立獻皇帝廟爲世廟。夏四月。查放宮女。五月。復

查革錦衣官九十餘人。六月。赦高牆庶人家屬二百餘人。聽自便。惠州延平盜起。尋平。庚子。進武宗實錄。秋七月。追封故皇兄爲岳王。諡曰懷。八月。詔司設監兵仗局。收工匠千名。冬十月。災變停工役。十一月。許市舶太監賴恩。巡海有警。得調官軍。閏十二月乙卯朔。日有食之。

五年丙戌。春正月。大覲考察。遣內官督修真人府。廷臣請復議禮。痛斥諸臣。不報。二月。以上林鳥獸食肉。歲萬六千觔。米豆五千餘石。廷臣力言宜放遣。不報。徵龍虎山道士邵元節爲真人。賜銀印。賑畿內。三月。策士賜襲用卿等進士及第出身有差。選袁袞二十人爲庶吉士。復遣內官督織龍絨。天方入貢。夏四月。敵犯宣大。拒卻之。五月癸未朔。日有食之。肇慶獠賊殺官大掠。久之乃平。六月。獻王寶錄成。命姚鏌率兵討田州逆官岑猛。秋七月。魯迷復貢獅子。世廟成。九月己亥。上奉章聖皇太后謁世廟。岑猛奔歸順州。知州岑璋擒斬之。冬十月。旱災。免南畿山東浙江糧稅有差。十一月。營仁壽宮。

六年丁亥。春正月。詔曰。朕思民間疾苦。情狀不一。時所見或有未盡。匹夫匹婦。多有不被其澤者。其令諸司四品以上。及科道官條疏利民事宜。以備采酌施行。所言務切政事。合民情。忠誠明晰。足以彌災變。以副敬天恤民之意。二月。改觀德殿爲崇先殿。召羅欽順爲禮部尙書。不至。三月。虜入宣府。參將關山戰死。考察京官岑猛餘黨盧蘇等陷田州。據之。夏四月。改起羅欽順爲吏部尙書。不至。五月丁丑朔。日有食之。敵襲神木。六月。以新建伯王守仁總制兩廣。發內庫銀十五萬濟宣府饑。賑畿南。免馬價。增世廟武舞。秋七月。敵入甯夏塞。尙書王寬等禦卻之。斬首三百餘級。免山東稅糧。八月。命桂萼署刑部事。張璠署都察

院事。方獻夫署大理寺事。同讞逆賊李福達獄。先是李福達逃。曾以方術干武定侯郭勛。歸河南更名張寅。巡按馬錄擒之。遂求勛祕書干錄。錄奏聞。行撫按及布按訊之。皆言真。逮至京。會訊不決。復會訊闕廷。於是以桂萼等平反。因釋之。因逮繫馬錄、李珏、章綸、馬豸及刑部尙書顏頤壽、侍郎劉玉、王啓、左都聶賢、副都劉文莊、大理卿湯沐、少卿徐文華、顧佖及太僕卿汪元錫、光祿卿余才、給事中劉琦等十餘人。御史姚鳳鳴等十餘人。郎中評事劉仕等。於詔獄編戍杖黜有差。一時凡詞連助者皆罪之。助曾與萼、璉議大禮。合故有是獄。於是大禮稍忤者盡矣。九月。張璉以署院考察御史。黜謫十二人。冬十月。選提學官。詔翰林汪佃等十七人外補。以各衙門官代之。初定用京官外省主鄉試。十一月。修顯陵。十二月。大學士楊一清奏召閒住太監張永提督團營。

七年戊子。春正月戊寅。廢秦府誠溧父子爲庶人。開新河。敵襲開原敗去。二月。命復築甯夏邊城。官軍討青羊賊。敗績。庚申。命建敬一亭於兩雍。及天下儒學。田州平。三月。雲南定武土舍鳳朝文作亂。命伍文定討之。夏四月。五月辛未朔。日有食之。討斷藤峽賊平之。六月。明倫大典書成。追奪議禮諸臣官。楊廷和等革削有差。秋七月。加上皇祖妣爲孝惠康肅溫仁懿順協天佑聖太皇太后。皇考爲恭睿淵仁寬穆純聖獻皇帝。聖母爲章聖慈仁皇太后。詔告天下。冬十月。命禮部大書天下災異進覽。丁未。皇后陳氏崩。諡曰悼靈。後改諡孝潔。青羊賊平。閏十月。十一月丙寅。冊立順妃張氏爲皇后。新建伯王守仁卒於南安。十二月。詔散豹房諸禽獸。牙木蘭來歸。土番以入貢犯邊。邊將擊敗之。禮部侍郎嚴嵩使顯陵還。上靈異事并

立石紀之上悅。

八年己丑春正月大覲考察詔曰王守仁捷音多近誇詐其有功官軍俟查明敝實然而擅離重鎮非事君之道其學術邪正功事真僞封拜當否其會官集議以聞廷臣上議曰守仁事不師古言不稱先欲立異以爲名則非朱熹格物致知之說知衆論之不與則著朱熹晚年定論之書招致生徒互相倡和才美者樂其狂遂流清談庸鄙者借其聲遂敢放肆其門人爲之標榜辨謗至謂杖之不死投江不死以上瀆天聽幾於無忌憚矣若剿漳寇滅逆濠功固足錄但賊平而縱殺不已報捷而誇張不實罪亦難原議上上曰守仁放言自肆詆毀先儒用詐任情壞人心術至於宸濠之變仗義討賊功疑惟重封爵乃先朝信令准其終身仍諭天下敢有踵其邪說非聖者罪之二月初命臺諫官監收錢穀上計簿桂萼入閣辦事賑襄陽放鷹隼田犬置哈密諸夷於肅州三月祭酒陸深請於經筵凡天下政事得依經比義條悉奏聞降爲同知辛亥策士賜羅洪先等進士及第出身有差禁京師佛會海賊掠常熟桂萼奏革選庶吉士更定翰林官銓補法於是盡逐舊官置所陰厚朝野傷之復以人言選胡經等二十人爲庶吉士尋寢不行夏四月命廷臣四品以上各舉堪任知府翰林科道各舉堪任州縣者各一人旱免畿南稅糧及量免山東江北秋七月甲辰詔訪遺佚命採珠於廣東給事中孫應奎陸燦等疏劾張璠桂萼顯恣不法上怒下敕曰張璠自用自恣負君負國桂萼尤而效之言官屢劾朕不敢私論法當置典刑特從寬貸璠令還家創悟以資後用萼奪散官并學士致仕去孫應奎等職居言官爲朕耳目素知大臣若斯卻乃坐視至今

首劾者免罪。餘下法司。九月，罷楊一清，召張璠還職，尋謫陸燦爲驛丞。餘降有差。復桂萼所奪官。冬十月，癸亥朔，日有食之。停外戚世封。有軍功者免停。詔免陝西江西災糧。敵犯榆林，王瓊禦卻之。十一月，停山海內官征稅。召桂萼復任。十二月，姜戎寇鞏昌，王瓊剿平之。革天下鎮守內臣。中外大悅。

九年庚寅，春正月，詔曰：周禮耕蠶分南北郊，其蠶於禁中，唐人便安之制，不可爲法。有司其於北郊建先蠶壇，酌治蠶之禮，定壇墼之向，制採蠶之器，擇掌壇之官。皇后親蠶，以供純服。凡制殺先農十一，建具服殿蠶室如古制，仍於西內營織室以終蠶事。戊戌，敕有司議以太祖太宗配天及社稷。二月戊辰，郊祭先農，耕籍田。三月，廷臣奏議郊祀典，逮霍韜下都察院獄。語詳郊祀志。初建朝，日夕月壇。丁巳，皇后行親蠶禮於北郊。遣官賑北畿河南山西陝西湖廣饑。詔曰：邇來遠近之民，餓孳載道，覽諸奏牘，深用憂戚。內外臣工，皆有分理之責，而部院大臣，又百僚庶司之首，不可不佐朕安民。其雜議救濟之實以聞。於是發銀十五萬及免田租，發倉賑之。夏四月，楊一清削籍，霍韜還職。五月，興四郊工，以給事中夏言爲僉都御史，不拜。敵入漁陽。六月，議定樂律。乙丑，詔曰：朕覽天下土田之數，不及國初之半，必多欺隱。其括之。秋七月，革大臣補廕例，罷姚廣孝配享太廟。八月，方獻夫免。九月，給事中公請黜邵元節，下詔獄。冬十月，詔選妃嬪。命大臣子弟不得改翰林。陞夏言侍讀學士，仍給事中。改奉孔子爲先師，易像爲主，立啓聖祠及釐正從祀諸儒。十一月己酉，初有事於南郊。詔大赦。十二月初立九嬪。桂萼罷，賜張璠名孚敬，士魯番入貢。始祀先聖先師於文華殿東室。大報禮成，釋囚千八百餘人。詔行郊祀禮。

十年辛卯春正月詔曰祖宗三途並用。允爲良法。近來專務科舉之學。偏重進士之選。以致人尙浮辭。不修實行。今後三途並用。必求得人以稱朕用賢澤民之意。戊子。初行祈穀禮於大祀殿。奉太祖配。行特享禮於太廟。初正太祖南向位。命有司集議禘祭大雩。秋報禮。二月庚辰。初朝日。建太神殿於南郊。藏太祖神主。建土穀祇先蠶壇於西苑。議建太歲壇。三月。始立西苑耕種。召張孚敬等同遊賦詩。定西苑土穀壇。曰帝社。帝稷。敵入大同。西虜犯莊浪。賜女直都督速黑忒金帶綵幣。始用道士爲太常官。夏四月丁巳。皇后親蠶於西苑。甲子。上行大禘禮於太廟。修仁壽宮。五月壬子。初有事於北郊。革邊隘鎮守內官。四川盜平。六月。召方獻夫爲大學士。閏六月。復誠意伯世爵。及鄂曹衛信四公。後各爲侯。以劉基配享太廟。大裁內外冗官。秋七月。彗星出東井。張孚敬罷。八月癸未。初祭夕月壇。再議遷顯陵。辛丑。改安陸爲承天府。縣曰鍾祥。免太原稅糧十之二。丁未。上觀穫於豳風亭。召大臣賦詩。九月乙卯。上親祀風雲雷雨及山川神。丙辰。罷南京郊祀。冬十月。停遷顯陵議。敵犯大同。建零壇。恤甯府庶人。濬蘆溝等六河入海。十一月甲寅。大祀園丘。癸酉。欽安殿啓建祈嗣醮事。以夏言爲監禮使。大臣以次上香。侍郎許鼎臣進步虛青詞。丁丑。召張孚敬還。十二月。以劾召用王瓊。下南御史馬敷等十人於詔獄。大修西苑諸殿亭池館。十一年壬辰。春正月。大覲考察。遣官賑畿內。留入覲四品以上官陪祀祈穀。辛未。祈穀。二月。幸南內。敵犯榆林。祈嗣於地祇壇。望祭天下山川。三月。策士。賜林大欽等進士及第出身有差。乙巳。皇后親蠶於西苑。夏四月。封常元振懷遠侯。李性臨淮侯。鄧繼坤定遠侯。湯紹宗靈璧侯。劉瑜誠意伯。初營九廟。五月。遣官

詔琉球。秋七月。雲南貴州盜起。尋皆平之。八月己卯。彗星復見東井。勒張孚敬致仕去。甲午。上親祭歷代帝王廟。九月。賑陝西。冬十月。編修楊名以星變劾汪鏊郭勛邵元節等。及請釋議禮諸臣。停各工役。上怒。命逮繫詔獄。五毒慘酷。侍郎黃宗明救之。上怒曰。楊名死有餘辜。卽死何至傷仁之治。命並逮鞠之。尋名戍邊。宗明貶黜。選進士錢亮等爲庶吉士報罷。再敕選呂懷等二十一人爲庶吉士。南京御史馮恩劾張孚敬方獻夫汪鏊罪惡。逮下獄論死。十一月。遣官冊封琉球。庚申。祀園丘。敵犯寧夏。拒卻之。西域九十五國王入貢。十二月。歲暮行大祿禮。

十二年癸巳。春正月。復召張孚敬入內閣。三月。上幸太學。謁先師。初開經筵。己巳。皇后親蠶於西苑。夏四月乙酉。上幸南內。召輔臣共閱馬賦詩。戊子。上幸西苑。召輔臣遊觀。詔求曾子裔孫。五月。西夷入貢。逮昌國公張鶴齡及延齡。詞連定公光祚。京山侯元。悉下詔獄。六月。彗星見於五車。方獻夫罷。秋七月。鳳陽撫臣請城鳳陽。不許。八月辛未朔。日有食之。香河縣忽自開新河一道。遣官祭之。己丑。皇第一子生。麗妃閻氏出。詔赦天下。獨大禮大獄不赦。九月。命按察司官得糾彈御史。廣東賊趙林花反。破平之。冬十月。海賊掠浙東。乙亥。大同兵譁。殺總兵李瑾。代王復走宣府。命劉源清等討之。丙子。張延齡論死。革鶴齡爵。停京考官。己卯。皇長子薨。諡哀沖。度天下道士一萬人。詔罷京官主考省試。十一月。劉源清討大同亂兵。戰於城下。遂圍之。十二月。敵犯寧夏。邊將禦大敗之。

十三年甲午。癸卯。廢皇后張氏。冊德嬪方氏爲皇后。嬉嬪沈氏爲宸妃。麗嬪閻氏爲麗妃。大同叛卒引敵。

入塞大掠。遣官於各邊募兵禦之。時邊將失利。劉源清不能制。欲屠大同不果。遂謝事去。尋敵退。以戶部侍郎張瓚代平之。閏二月。詔令朝鮮使臣得出館遊觀。賑大同。三月。上幸學。謁先師。夏四月。復正陽門開稅。五月。上幸南內。六月。土魯番入貢。以非期卻之。南京太廟災。秋七月。建神御閣於南內。奉祖宗御容。八月。建皇史宬。吉囊入榆林塞。大掠。月餘乃去。九月。建九五齋恭默室。定九廟皆南向。逮劉源清等於獄。冬十月。命邵元節馳驛還山。詔免行刑。十二月。移置大同從叛武官於遠衛。

十四年乙未。春正月。大覲考察。詔革諸管倉內官。莊肅皇后夏氏崩。諡曰孝靜莊惠安肅毅皇后。祔葬康陵。二月初建九廟。三月。御經筵及日講。以大行皇后喪。夏四月乙未。策士賜韓應龍等進士及第。出身有差。甲申。更定郊廟雅樂。上御文華殿親試。改趙貞吉等三十人爲庶吉士。五月癸酉。上祭地於方澤。建啓祥宮於獻皇帝誕生之處。於內作清虛欽安等殿。六月。釋御史馮恩戍邊。時汪鋹欲殺之。左都王廷相曰。祖宗朝不殺言官。然不可自今日始。會其母與子行。可上寃狀。上爲之動。命釋之。秋七月。汪鋹罷。初命貴州開鄉試。秋八月。吉囊入榆林。守將梁震擊敗之。甲辰。上祭夕月壇。乙巳。上幸西苑。召輔臣同遊。九月。建內西海神祠。遼東兵變。巡按御史曾銳撫定之。冬十月。選補嬪御。十一月。冊端嬪曹氏。延津縣民李拱辰獻女。上納之。上祀園丘。詔再選女百人入宮。田州土目盧蘇殺其主岑邦相。

十五年丙申。西番烏斯藏入貢。二月。女直入貢。冊昭敬靜三嬪。九廟成。廖道南獻禋頌。廢韓府高平王融煒爲庶人。三月丙子。上奉皇太后率皇后發京師。如天壽山謁陵。丁巳。駕還。夏四月。詔曰。朕法祖宗。預作

幽宮。茲擇地於長陵左十八道嶺。諮問臣民。僉云宜建。有司其經理之。薦西苑新麥於內殿。敵自賀蘭山入犯。邊將數破走之。改建武學。以文武重臣主教事。丙申。行大禘禮。增皇初祖神主。癸卯。復幸天壽山。改十八道嶺爲陽翠嶺。命拓景陵。癸丑。還京。五月。重修宋史。上幸西苑。召郭勛。李時夏。汎舟。上親製行幸大武龍威冠服。詔求紅黃玉禮神。除禁中佛殿。建慈慶慈寧兩宮。焚佛骨萬三千觔。毀金銀銅佛像一百六十餘座。六月。釋劉源清等。秋七月。斷藤峽賊攻殺戍卒。命侍郎蔡經討之。詔陵殿并祀孝肅孝穆孝惠三后。八月。陽曲王府宗室知斌等結衆於中條山。捕之。尋獲平。九月。各邊立武塾。教將士子弟。敵入延綏。官軍四戰皆敗之。入寧夏。又敗之。庚申。冊七妃。四嬪。庚午。上如天壽山。丁丑。還。冬十月。戊子。皇第二子生。詔赦天下。更世廟曰獻皇帝廟。改諡悼靈皇后曰孝潔。遷主於奉先殿西室。加諡孝靜皇后曰孝靜莊惠。安肅溫誠順天偕聖毅皇后。十一月。寇入山西。尋去。免被寇地方田租一年。十二月。詔文武人才各舉所知。薊州開採。閏十二月。詔曰。朕創昭穆羣廟。以祀祖宗。彰太祖爲常尊之主。復作太宗廟於羣廟之外。表著功德。享祀百世。更創皇考廟曰獻皇帝廟。止修時祀。以避豐禰之嫌。由是致孝慈闈。恭上皇伯母徽號。曰昭聖恭安康惠慈壽皇太后。聖母彰聖慈仁康靜貞壽皇太后。慶禮旣備。推愛宜頒。故告萬方。廢后張氏薨。初祀先醫於聖濟殿。

十六年丁酉。春正月癸卯。上第三子載坫生。是爲穆宗莊皇帝。二月。以福建廢寺田給貧民。閉永平礦。刑部上文武坐事應赦者一百四十二人。上曰。馬錄。李經。馮恩。楊慎。王元。劉濟。豐熙。邵經。邦不赦。餘宥之。罷

皇后親蠶。癸酉。上奉皇太后。率皇后如天壽山。三月。命建離宮於沙河。費直七百萬。甲申。還。以郭英從祀太廟。夏四月。上幸金山視行宮。癸丑。還京。進封貴妃王氏等。五月。有司請立皇太子。不許。請預擇師保賓客。許之。六月。開天下礦洞。貴州凱苗叛。尋平。戊戌。謹身殿災。詔求直言。作養心殿。秋七月。溼王祐樞薨。無子國除。八月。敕兩廣守臣會討南安。敵入大同。九月。以應天策文有譏。戎祀語。逮試官江汝璧。歐陽衢。詔獄。革應天鄉貢士。應制南宮。清江南田賦。逮張鶴齡於獄。瘐死。冬十月。作崇德殿。十一月。命大臣被論不必互辯。傷國體。

十七年。戊戌。春正月。大覲考察。天方國入貢。二月。開房山銀洞。許應天貢士入國子監肄業。給真人張彥鵬敕書。再訊張延齡籍其家。告許人劉東山。荷校死。濬青登萊新河。濬薊州運河。三月。策士賜茅瓚等進士及第出身有差。敵入薊州。馬永戰卻之。夏四月。增西苑督農尙書。停遣安南文武大臣。賑京師。甲申。上雩。敵犯大同。張世忠破走之。五月。復設鎮守內官。革臺諫官監收錢穀。定武舉試卷分邊復南字。詔毀天下書院。六月。詔廷臣集議。明秋饗禮。秋七月。旱。免山東夏稅。八月。吉囊犯河西。劉天和禦敗之。九月。改太宗廟號成祖。獻皇帝廟號睿宗。以睿宗祔享太廟。詔告天下。乙未。上如山陵。行秋祭禮。丁酉。還宮。冬十月。行大享上帝禮於玄極殿。奉睿宗配。十一月。改上皇天上帝大號。改太祖及高皇后諡。詔赦天下。十二月。癸卯。章聖皇太后崩。議遷顯陵於大峪口合葬。壬子。上親詣相度。發京師。甲寅。還宮。己未。詔停遷顯陵。自往承天相視修拓。丁酉。上諡曰慈孝貞順仁敬誠一安天誕聖獻皇后。

明書卷十四

本紀十一

世宗肅皇帝本紀二

十八年己亥春正月詔曰朕惟孝子事親送終爲大皇考陵寢建造狹隘雖嘗增修猶多未稱朕將躬詣陵下與諸大臣周閱山川更卜吉兆重建玄宮以安皇考皇妣之靈擇於二月望日子夜發京師中外其悉知之進封武定侯郭勛翊國公起大學士翟鑾改兵部尙書兼右都充行邊使因發帑金五十萬分勞沿邊將士嚴防關隘造御寶十一方二月册立皇次子載灃爲皇太子封三子載坻爲裕王載坻爲景王載皐載壑載墳載壘俱殤追封諡爲穎殤王戚懷王薊哀王均思王鑄嘉靖通寶錢道士邵元節死贈少師諡文康榮靜遺表薦其黨陶典眞俗名仲文封爲神霄保國宣教高士南巡以郭勛爲都護將軍成公希忠副之咸寧侯仇鸞東寧伯焦棟爲左右副將軍率六軍從行命皇太子監國時四歲敕宣城伯衛輝遂安伯陳鏞同大學士顧鼎臣等輔導留守張瓚贊機務文武大臣十八員守九門乙卯駕發京師中宮從行所至望祭山川遣官祭所過帝王聖賢祠墓乙丑次彰德趙王厚煜迎於漳水朝行殿丁卯上次衛輝汝王祐棹來朝夜行宮火延及御寢上倉卒莫知所避錦衣指揮陸炳排闥負上出煙火中宮婢死者

數十人。法物燬者半。上命括遺物。逮巡撫易瓚。巡按馮震。及布按諸臣於詔獄。有司縛前驅侍郎。蔡經平藤峽賊。捷回行在。以供具不辦黜保定巡撫陸鈞等。三月己巳。渡河。周世孫朝。壩來朝於鄭州。辛未。徽王厚爝朝於鈞州。乙亥。唐王宇溫朝於南陽。伊王訐瀆失郊迎。宥之。己卯。上至承天。入舊邸。壬午。謁顯陵。祀龍飛殿及社稷山川。乙酉。大祀顯陵。楚王顯榕來朝。戊子。上相度顯陵及山川。乃宣諭羣臣。遂寢遷陵議。時侍讀學士廖道南居憂。以緋衣朝上。獻南巡江漢賦及慶雲頌。上怒其居喪衣緋。奪其官不敍。後四獻箴頌不報。辛卯。上以回鑾告祭。遂發承天。命改戶部侍郎顧璘於工部。營顯陵。免承天田賦三年。湖廣諸府十之四。河南十之三。夏四月。上次滎澤。見饑民。發白金二萬賑之。良鄉離宮成。壬子。上還自承天。告廟。以選宮寮及進敕草遲慢。奪夏言勳階散官。及括所御賜記劄。尋言抵潞河。上念之。召還。五月。命承天寘興都留守司。甲申。獻皇后靈輜發京師。停大峪口。上更定宮寮。六月。賚扈侍南巡官。秋七月。閏七月。遼東兵亂。馬永討平之。免湖州田口十之四。斷藤賊復平。庚申。顯皇后合葬顯陵。敕咸寧侯鸞兵部尙書毛伯溫南征。八月。考察京官。壬辰。建皇穹宇。九月乙未朔。日有食之。冬十月。太僕卿楊最上言。皇上端居恭默。保復元陽。不求仙而自仙。黃白之術。金丹之藥。不可服用。上覽大怒。命逮下詔獄。瘐死。十一月。上祀園丘。十二月。賑河南饑。

十九年庚子。春正月。行邊使翟鑾復以原官入閣。二月。御史姚虞上承天流民圖。上命賑之。罷武舉科。營興邸。用白金四十七萬。三月癸巳朔。日有食之。營仁壽宮。敵入榆林大掠。尋破走之。竹谿盜起。尋平。夏四

月。羌僧入貢。沙寇秦璠叛。詔都督湯慶討之。修宣府邊二萬五千丈有奇。日本入貢。五月。選淑女一百人入宮。秋七月。土魯番入貢。卻之。八月。詔南京鑄嘉靖通寶錢。敵入寧武。十餘日乃去。九月。劉天和等大破敵於花馬池。冬十月。罷各處礦場。十一月。加方士陶仲文少保禮部尚書。十二月。許鳳陽守備太監統攝江北府州縣。安南莫登庸來降。

二十年辛丑。春正月。大覲考察。免蘇松稅糧。御史楊爵奏諫。上失人心。致危亂者五。上怒。命長繫詔獄。二月。以黃白方不驗。下方士段朝用於詔獄。敵入甘肅。戰勝之。三月。策士賜汝坤等進士及第。出身有差。夏四月。辛酉。九廟災。詔天下停工。詔極言得失。罷大禘禮。賑畿內旱蝗。五月。起工部侍郎潘鑑督採木。罷鑄錢。山東盜起。詔安南國爲安南都統使。司以莫登庸爲都統使。六月。毛伯溫班師。賑山西。開原虜求增人入貢。不許。大掠邊將劉大箴等破卻之。秋七月。隆慶州妖賊張雄等反。討平之。八月。辛酉。昭聖皇太后崩。諡曰孝康靖肅莊慈哲懿翊天贊聖敬皇后。虜俺答入大同。掠山西。入寧武。總兵丁瑋等戰死。尋出塞。郭勛被劾下獄。詞連英公鎔。惠安伯張鑾。亦下獄。上曰。郭勛受朕恩眷。卻乃交結逆囚。包藏禍心。迹此一端。其他可知。朕以倫序當立。張延齡謀爲不軌。人孰不知。勛也敢復黨之。其詳讞以聞。九月。勒夏言致仕。尋復。冬十月。賑山西被寇地方。十一月。復停采礦。辛卯。敬皇后合葬泰陵。郭勛論斬。瘐死獄中。上親考庶吉士。欽取高儀等三十三人。十二月。免山西糧稅有差。

二十一年壬寅。春正月。二月。安平伯方銳進爲侯。城臨清。夏四月。召墾沂州荒田。五月。瓊州黎賊反。平之。

閏五月六月夏言免上手諭其罪狀虜俺答十萬騎入寇過朔州至馬邑及廣昌邊將周宇戰死之入鴈門犯太原平陽澤潞秋七月己酉朔日食旣以不糾夏言降道科十三人奪俸六十人平陽知府聶豹勒兵禦敵斬零級敵北走命翟鵬總督山西山東河南兵敵回掠太原忻崞代出鴈門自白草溝北走前後二十一日副總兵張世忠追敵力戰死之予贈立祠發庫銀十萬賑山西仍免田租二年嚴嵩入閣言官羣劾之不聽九月上命修雷廟於黃州工部員外郎劉魁諫杖錮之冬十月郭勛死宥其妻子免籍沒丁酉上幸曹妃宮宮婢楊金英等怨上共謀弑以組經上頸以釵股刺其囊上幾危宮婢張金蓮走白后后馳救上蘇后命收曹妃及金英等磔於市族其家上知曹妃冤甚憫之上移御西苑自是不復還大內加太醫許紳尙書太子太保十二月詔修三皇廟以古醫三十四人從祀

二十二年癸卯春正月丙午朔日有食之貴州苗亂流劫湖廣二月七陵工完上如天壽山五日還毀大慈恩寺逐番僧夏四月安南入貢命五開諸蠻附貴州鄉試五月千戶火力赤襲敵斬獲而還賞之秋七月上大雩獲雨敵犯延綏擊敗之嚴嵩陷御史葉經杖闕下死冬十月復太廟合饗制

二十三年甲辰春正月徵各鎮官戍大同大覲考察復鑄嘉靖通寶錢三月敵犯宣府邊將禦破之策士賜秦鳴雷等進士及第出身有差諏訪絕力人夏四月安南入貢秋七月取太倉銀十萬入內敵入大同周尙文擊走之免畿南田租之半賑湖廣江北復設武舉科冬十月敵攻膳房堡邊將郤永禦之不得入自萬全右衛入掠蔚州入浮圖峪至完縣京師戒嚴命列侯督營衛都城敵從天城去十一月方士陶仲

文竝加三孤。

二十四年乙巳。春正月。大修宣大山險。己酉。楚世子英燿弑其父楚王顯。裕事發。尋伏誅。閏正月。命廷臣見皇太子。二月。撤元世祖像并祭。三月。考察京官。賑應天饑。夏四月。停開納事例。日本來貢。卻之。五月。壬戌朔。日有食之。遣內官封朝鮮國王。復開納事例。六月。旱。免陝西田租。皇乾殿成。秋七月。收原賜勳戚旅舍。定太廟。不論昭穆。以太祖居中。左成宣憲睿。右仁英孝武。西海敵來降。八月。加陶仲文伯爵。辭許之。敵犯大同。總兵張達等力戰遁去。令文選司於各部調用。發內帑金四十萬於邊。冬十月。大同宗室充灼等謀反。覺。捕鞠之。尋伏誅。十二月。戊申。復召夏言至京。令長史官以經義祖訓授諸王子。

二十五年丙午。春正月。沅江土舍那鑑殺知府那憲。命討之。取河南山東民兵備敵。三月。四川白草番叛。命都御史張時徹等討之。夏四月。以曾銑總督陝西三邊。五月。敵入延綏。隱敗。奏捷。逮治總督張珩等。秋七月。收山場陂湖河道稅。敵犯保安。入慶陽。深抵西安。尋去。敵入宣大。邊兵敗績。水災。免畿內山東糧。冬十月。曾銑請復河套。上方略萬言。詔修復河州屯地。墾萬餘頃。延津人李拱辰子應時復獻其妹。上納幸之。

二十六年丁未。春正月。大觀考察。賑延綏。賜徽王厚熹真人金印。詔南將歸南。北將歸北。著爲令。定兩雍官選風憲。選淑女三百人入宮。二月。朝鮮執獻倭船三百餘人。三月。策士賜李春芳等進士及第出身。有差。上親賜題。考取亢思謙等二十八人爲庶吉士。山東汶上盜田斌等作亂。都御史詹瀚擒平之。白草

番平。夏四月。虜俺答求入貢。拒之。五月。曾銑襲虜破之。六月。加陶仲文柱國。兼支大學士。俸任子爲尙寶。丞。秋七月。倭寇浙東。八月。災傷免湖廣山東田租十之三。閏九月。兀良哈寇遼東。冬十月。兀良哈糾建州同入遼東。曾銑復陳復河套方略及圖說。十一月。宮中火。詔釋獄囚。乙未。皇后方氏崩。諡曰孝烈。丁酉。詔曰。曩者虜據河套。爲國家患。朕軫懷宵旰。有年。念無任事之人。今銑前後上方略。爾兵部卽會同廷臣協忠。攄謀以圖廓清。其定策以聞。十二月。曾銑劾甘肅總兵咸寧侯仇鸞貪暴。逮鸞。下詔獄。令諸臣雜上復河套議。

二十七年戊申。春正月。嚴嵩陸炳陷夏言黨。信曾銑。上怒。奪言師傅罷之。賑漢中。二月。仇鸞噬逮曾銑讞之。遂逮夏言。坐銑交結近侍官員律。三月丙子朔。日有食之。癸巳。上殺總督三邊侍郎都御史曾銑。流其妻子。及籍其家。無餘貲。天下冤之。夏四月。讞大學士夏言。坐前律。五月。定壽陵名曰永陵。葬孝烈皇后。日。本入貢。周府中尉勤熨疏諫。上厭萬幾。興齋醮。引秦皇漢武爲比。上大怒。降爲庶人。發高牆。六月。海賊亂。官兵擊敗之。秋七月。夏言妻蘇氏請代言死。不許。辛巳。鄭王厚烷上箴及連珠。以簡禮怠政飾非惡諫。求仙土木爲規。上怒曰。爾探知宗室有謗訕者。故茲效尤爾。真今時之西伯也。欲爲則爲之。八月。加陶仲文伯爵。俸。敵攻大同不得入。周尙文出塞戰彌陀山。勝之。九月。敵入宣府。邊將力禦之去。冬十月。癸卯。上殺少師大學士夏言。賜遼王憲爚道號真人。敵復入宣府。抵懷來。大掠而去。十二月。兩廣兵討連山賊破之。築潮河川城。

二十八年己酉。春正月。套虜自西海還掠鎮羌。邊將禦卻之。敵入大同塞。指揮江瀚等迎擊。無援戰死。周尙文帥師來援。大破之。斬獲頗多。總督翁萬達引兵至。敵遂遁去。二月。教場閱列侯武職藝。指揮鄭璽詔言寇至。衆驚。逮革之。虜求貢不許。三月辛未朔。日有食之。乙酉。皇太子冠。丁亥。薨。諡莊敬。夏四月。崇陽王顯休毆兄有罪。賜死。秋七月。徙肅州屬夷於塞外。七百餘帳。九月。敵寇榆林。擊卻之。水災免。嘉湖秋糧。加賑。冬十月。詔總督張嶽帥兵討銅仁叛苗。甲申。孝烈皇后祔廟。十二月。令郡王不得封繼妃。

二十九年庚戌。春正月。大覲考察。上會計錄。三月。策士。賜唐汝楫等進士及第。出身有差。命郭勛子守乾襲爵。夏四月。黃河決。入淮。逼祖陵。開直河以通下流。封陶仲文爲恭誠伯。辭許之。六月戊午。敵犯大同。總兵張達等戰死之。閏六月。旱災免。北畿南畿山西夏稅十之三。秋七月癸卯。命保定巡撫楊守謙督二將軍駐通易。總兵劉鼎等六將軍分戍關隘。西海夷及套虜朵顏合十餘萬。近邊謀深入。詔各邊嚴備。旱免。陝西夏稅。八月甲子。敵入犯宣府。大掠。入窺大同。仇鸞奏敵東行且薊遵。恐近京師。乃移軍居庸。以邊兵京兵益諸隘口。敵東走。攻古北口。都御史王汝孝以火攻卻之。敵乃佯督衆攻。而別從間道至黃榆溝。丁丑。入塞。汝孝兵大潰。敵轉掠懷柔諸縣。聞保定兵駐城中。戊寅。遂逼通州。巡按王忬先期駐通州。艤舟潞河西。阻之不得渡。分掠畿輔。忬令人夜走京師請援。上聞。命王儀率兵赴援。而分文武大臣守九門。以吏部侍郎定西侯蔣貴總督之。虜大衆營白河。是時仇鸞以大同兵至。楊守謙首以保定兵至。徐仁以延綏兵至。已而宣府山西遼兵皆至。凡七鎮。上乃拜鸞爲平虜大將軍。總諸鎮兵。賜玉帶。密敕曰。朕所重惟卿。

一人陞守謙爲兵部侍郎。專衛都城。陸炳督諸門事。譏察都御史商大節防內釁。於是宥獄中戴綸。歐陽安從戎。分京兵屯巷陌。京兵見敵皆泣不前。時勤王兵皆輕騎。至不齋糗糧。上命犒之。文移往復。三日後僅得數餅。既發粟。釜餽無辦。士卒饑疲甚。上怒責計部官。皆禡服。辛巳。敵渡潞水西北行。大掠焚廬舍。火逼空壬午。薄都城。執御廩內官去。見。曾曰。若歸見天子。好爲我致書。書多嫚語。求入貢。上召嵩等入見。授劄令各陳所見。羣臣相顧莫敢發。司業趙貞吉抗言。此不必問。恐後生懦夫。關於事。敵犯都城。震宮闕。乃許之。貢。何異城下盟。不可檢討。毛起曰。時事孔棘。姑許之。俟出塞。乃卻。貞吉叱其謬。業已上聞。奏入。時。晡上見烽火逼都門。甚懼。馳騎召貞吉入奏。貞吉大言。陛下宜御奉天。下罪己詔。速獎故都督周尙文功。并釋沈束獄。以作人心。士卒不力。以主將多冒首功耳。今募一首。予百金。捐十萬敵。且立盡。上乃詔貞吉兼御史。齋萬金往募首功。癸未。敵自鞏華犯諸陵。轉西掠眞保。皆震。甲申。亭午。上出御奉天殿。敕逮都御史王儀。王汝孝。總兵羅希韓。卽訊。汝孝道梗不及逮。時儀守通州。會鸞兵掠食村落。儀捕得斃之。鸞兵譁。爲御史劾。逮至削籍。超擢王忬爲都御史。守通。時承平久。忽遭變。兵部尙書丁汝夔束手無措。卽偵報皆不。前祇以避寇者訛言入報。再遣亦然。日數十報。城中日數驚。於是大同故爲寇裝。掠畿輔無所忌。卽捕之。曰。遼軍鸞方寵盛。人不敢忤大同軍。而上又以入援爲諸鎮先。不繩以法。汝夔輒令曰。勿捕大同軍。故益橫。又自稱遼軍。遂謗汝夔私其鄉人。及敵薄城。汝夔受計於嵩。令諸將勿戰。敵飽自去耳。諸將固不敢戰。乃諉曰。汝夔禁勿戰。語稍稍聞禁中。而鸞故率軍屯遠郊。詭云擊敵酣戰。惟守謙屯城下。兵少不能戰。城

中望見之。而鸞之恆怯無從驗。時寇多殘。中官莊園。中官遂謗守謙貳於寇。上怒。命執守謙下獄。卽軍前。逮守謙。丙戌。刑部彭黯等會訊。擬守謙斬。具爰書少緩。上益怒。并逮黯等。廷杖之。時敵東去。丁亥。上殺兵部尙書丁汝夔。都御史楊守謙以徇。廷議貞吉狂誕。謂其巧申理。周尙文沈束。齎金不獲首功。杖謫之。己丑。敵滿載北去。欲西奪白羊出塞。乃留餘寇疑我師。乃西至昌平。猝與鸞遇。縱騎蹂躪。鸞軍潰。幾不免。幸脫。敵遂自古北出塞。鸞獲殘寇先後二百級。廷臣劾宜驗真僞。上竟進鸞太保。賞賚甚厚。汝孝雖被逮。未至。躡敵獲首功。未減戍邊。九月辛丑。敵盡出塞。立戎政府。以仇鑾入理戎政。發銀米賑被寇地方。散遣入援官軍。命科道七人分道募兵。壬子。廢鄭王厚烷爲庶人。發高牆。免山西遼東屯糧。冬十月。城通州。祧仁宗廟。祔孝烈皇后。十一月。以易昌通爲三輔。置經略大臣。廣開事例。募富民出粟助邊。十二月。仇鸞率師襲敵。無功而還。不問。張嶽征諸苗破之。

三十年辛亥。春正月。錦衣經歷沈鍊劾嚴嵩父子姦貪十大罪。上怒。杖闕下。發邊外。三月初。許虜通馬市。兵部員外楊繼盛極言開市之非。上曰。小臣狂妄。撓阻邊計。因訊杖降典史。湖廣苗寇亂。張嶽分兵破之。考察京官。盡徵天下餘銀給馬市。夏四月丙戌。遂開馬市於大同。寬海禁。五月。命宣府咸甯一體開市。六月。仇鸞請騎兵行營許食民禾。不允。秋七月。勒諸王進銀助邊。八月。流江盜那鑑殺雲南布政徐樾。官兵討之不克。改部屬及進士於制誥兩房。災傷免江西湖廣稅糧。冬十月。虜俺答獻我叛人蕭芹等於塞上。侍郎何棟獲逆人哈舟兒等。獻俘伏誅。十一月。虜求以牛羊易穀豆。不許。因入寇大同。

三十一年壬子春正月敵犯大同二月復犯大同上怒曰虜寇日擾邊官兵不能防禦顯是專倚互市不爲隄備故命一意戰守罷馬市敵殺指揮王恭南孫懷仁營復內教場修太和山玄帝宮三月裕王景王行冠禮戊子詔仇鸞率兵如大同勦敵命造二王府第海寇犯瓊州殺官大掠夏四月補築宣大邊牆益兵守之禁王府收置民田仇鸞出塞斬寇首五級亡官卒一百五十餘人賞之上促鸞勦寇鸞畏縮不敢動嵩白其狀上自是知鸞不足恃倭掠漳泉五月召仇鸞還京六月仇鸞請調京兵戍宣大不許城順義秋七月八月奪仇鸞大將軍印敕鸞恚死選翰林爲二王講讀官己巳二王出閣講讀梟仇鸞示九邊籍沒其家敵聞鸞死遂引去停各邊馬市水災蠲賑淮徐冬十月敵屢入犯仇鸞敗上曰楊繼盛言驗矣遂復爲兵部員外郎侍郎張嶽獲龍許保等平之十二月選民間女三百人入宮

三十二年癸丑春正月戊寅朔日有食之大觀考察南兵勦那鑑自殺餘黨悉降庚子楊繼盛上言劾數嚴嵩專擅十大罪惡引二王上怒曰何爲引二王繼盛對曰非二王誰不憚嵩者且二王家事甯不慮爲嵩敗耶錦衣文致其詞命杖之令擬罪刑部何鼐受嵩指論絞郎中史朝賓持不可嵩申法謫之時王學益贊鼐遂成獄二月乙卯册李氏爲裕王妃倭犯温州守將湯克寬擊破之三月賑陝西戊子策士賜陳謹等進士及第出身有差選萬浩等二十八人爲庶吉士敵犯宣府參將史略戰死孫邦丁碧禦卻之閏三月城京師外關夏四月倭寇浙東入南畿殺官掠民命湯克寬討之革三輔經略山東盜李之強流劫江北尋平秋七月敵大舉入犯抵渾源廣昌攻紫荆指揮袁鐸力戰死不得入遂入甯靜口關南大震遊

擊陳鳳朱玉等力戰卻之。八月，河南賊師尙詔入歸德，破柘城睢州二十餘州縣，官兵敗之。尋平。九月，敵自大同掠山西，二十一日乃去。冬十月，免畿內浙東秋糧，倭船至興化，殲之。十一月，城浙東平湖等五縣。十二月，敵攻古北口，侍郎楊博拒卻之。

三十三年甲寅，春正月，賀疏失擡杖六科都給事張思靜等各四十。壬子，康妃杜氏薨，是爲穆宗生母。官軍圍倭於南沙，不克，賊遁去。二月，敵犯大同，薛夔戰死。三月，令凡軍官犯罪，子孫革職。倭入江北，犯青州。夏四月，楚盜起，倭轉掠浙西，破州縣。五月，御史宋儀望請疏桑乾河，通宣大餉，不果。六月，敵入大同，總兵嶽懋戰死，隨射書求市，不許。秋七月，倭自松江入海，俞大猷追敗之。八月，敵犯朔州，六日乃去，命市龍涎香。九月，停蘇松租一年，倭寇海門，副使張景賢殲之。生番犯陝西，擊卻之。冬十月、十二月，敵入大同，總督許論、都御史王忬共擊走斬獲，追出塞。

三十四年乙卯，春正月，命豐潤伯曹松督兵於孝陵防倭，蠲蘇松逋賦。二月，罷開膠萊河。三月，湖廣、遼及四川、容山、苗平。夏四月，倭復犯淮揚，總督張經再破倭於江口，淮揚兵破倭於狼山。五月，倭至日照。甲午，張經督兵大破倭於王江涇。己酉，督察趙文華陷速張經，下詔獄，賞趙文華銀幣，開建甯鐵冶。六月，俞大猷破倭於海浦，又戰於平望及馬蹟山，皆破之。至馬頭鎮滅之。秋七月，播州寇亂，平之。新倭復入犯南京。至溧水。八月，賜徽王載堉號真人，給金印，參政任環討倭破之。趙文華攻倭於華亭，敗績。敵犯宣大，擊遁去。都御史曹邦輔邀擊倭於澠野，殲其一股。台州兵擊倭殲之。九月，選女子一百六十人入宮。冬十月，壬

戊。裕王第一子生。庚寅。上殺兵部員外郎楊繼盛。十一月壬辰朔。日有食之。倭掠海鹽。迎擊殄之。閏十一月。趙文華督西陽兵。遇倭大敗。奔蘇州。諸軍皆敗。十二月。開四川山東礦洞。壬寅。山陝河南同日地震。死者八十二萬餘人。趙文華乞還京許之。

三十五年丙辰。春正月。大覲考察。給事中梁夢龍劾吏部尙書李默剛褊貪汙。詔不問。二月。遣官祭山陝河南山川。詔罷直浙總督楊宜。以胡宗憲爲兵部侍郎代之。三月。逮繫吏部尙書李默於詔獄論死。以大學生李本攝吏部事。於是與嚴嵩共鋤排異。己以懼衆。遂請品第諸臣以爲去留許之。其上二十有八人。吳鵬。趙文華。嚴世蕃等。其中七十人。鄒懋卿等。其下十五人。宜斥免。南京吏部尙書楊行中等。又考察科道三十人。罷黜降調有差。留用御史二十人。各杖四十。顯陵成。修營十年。董督官陞賞有差。策士。賜諸大綬等進士及第出身有差。恩榮宴。特命錦衣陸炳坐尙書班。夏四月。倭寇温州。同知黃劍逆戰死之。據詔安。官軍破殲之。倭薄崇德。遊擊將軍宗禮等逆戰於皂角林死之。倭焚運船。五月乙亥。倭泊漁山。洋聽撫。以趙文華總督浙江。建眞武廟於齊雲山。六月。俞大猷追倭於海洋大破之。秋七月。廢徽王載榦爲庶人。自殺。巡按趙孔昭等與胡宗憲招撫毛海峯賊。散其黨。會兵進圍乍浦巢。大破平之。八月。詔採芝。九月。敵襲喜峯口。王忬禦走之。冬十月丙戌朔。日有食之。趙文華還京。敵入內地。殺總兵殷尙質。己未。免大學士嚴嵩廷賀。肩輿入直。錄平倭功。趙文華等陞賞有差。十二月。俞大猷破温州殘倭及舟山倭。殲平之。三十六年丁巳。春正月。閉近畿銀礦。二月。城寶應。考察京官。三月。敵入榆林。陳鳳戰死。倭復寇甯波大掠。

胡宗憲議招納不擊。夏四月丙申。三殿奉天門午門災。建奉天門及午門。辛丑。告郊廟。詔赦天下。五月。量釋高牆庶人。六月。虜入薊鎮。副總兵蔣承勳戰死。寇宣府。祁勉戰死。乙酉。副使于德昌破倭。斬其酋。乃開洋走。秋七月。九月。奪趙文華職。戊其子懌思。冬十月。天下獻芝一千六百餘本。楊順路楷希嚴指。殺前錦衣衛經歷沈鍊。任順子錦衣千戶遷楷太常卿。順復殺鍊二子。嫡子襄幾死。順楷敗乃脫。重建奉天等殿。十一月。蜀山東糧賑之。十二月。嘉湖妖賊馬祖師作亂。討平之。祖師遁。災傷免浙東及遼東糧稅。敵圍大同兩閱月不解。

三十七年戊午。春正月。琉球國王破倭還難民。降敕獎之。二月。廣東倭亂。官兵攻之敗績。三月。楊順路楷欺蔽。逮問遣戍。遣官賑遼東。戊辰。右衛將尙表出城突戰。斬獲而還。給事中吳時來。刑部主事張翀董傳策。各劾嚴嵩父子欺橫罪惡。各廷杖遣戍。夏四月。遣官冊封琉球。新倭大至。犯福浙。裕王妃李氏薨。命楊博率兵援右衛。虜遁圍解。發銀賑之。五月。福建參將尹鳳破倭於海口。蜀大同稅糧。秋七月。會舉將材。閏七月。敵入內地。擊走之。八月。敵犯赤城。九月甲戌。冊陳氏爲裕王繼妃。冬十月。天下進芝一千八百餘本。命職方司郎中唐順之如浙。協胡宗憲勦倭。十一月。番夷犯莊浪。蜀江北湖廣水災糧有差。三十八年己未。春正月。王忬率兵大破敵於內地。斬首八百有餘。遺器畜物無算。甲午。賜嚴嵩苑中乘肩輿。支伯俸。二月。募兵山東赴浙江。三月。敵入自遵化大掠畿輔。五日而去。策士賜丁士美等進士及第出身有差。夏四月。裕王長子薨。追封裕世子。鄒懋卿嗾方輅劾忬。逮下獄。世蕃文致其讞論死。參將黎鵬破。

倭於福州副使劉景韶殲倭於通州。盧鏜敗倭於三沙。都御史李遂討倭大破之。遂出海走。五月倭走梅花洋。官軍邀擊破之。六月募民開宣大荒田。改楊博總督薊遼。秋七月劉景韶復破倭。八月江北倭盡爲劉顯所殄。賑遼東。冬十月定死事條例。

三十九年庚申春正月修都城。從嚴嵩奏以鄒懋卿總理天下鹽政。二月大同總兵劉漢出塞擣敵大勝而還。敵徙幕遠去。上以請建皇儲殺中允郭希顏。仍傳首天下。三月南京兵亂。殺督儲侍郎黃懋官。侍郎李遂撫定之。斬首逆。夏四月賑畿輔。五月潞城府中尉俊彙有罪自殺。秋七月敵犯大同。轉掠五臺。崞縣。十四日乃去。冬十月上殺侍郎都御史王忬。及給事中楊允繩。庚申趙王厚煜自縊。歸罪彰德府官。謫斬有差。十一月方士陶仲文死。諡榮康惠肅。

四十年辛酉春正月分遣御史於天下訪求仙術異人及符篆祕方。二月辛卯朔日有食之。丁未景王之國常德。夏四月獎慶王薰枋賢行。敵入延綏。殺繕卒三千人。閏五月免嚴世蕃母喪守制。建仁和宮。秋七月己丑朔日有食之。九月敵犯居庸。圍總兵姜應熊。參將胡鎮力戰救出之。廣賊袁三作亂。自江西流入福建。轉掠浙江。冬十月廣賊復入江西。守將戚繼光擊破之。遁去。十一月萬春宮成。萬壽宮災。上移居玉熙宮。十二月重營萬壽宮。

四十一年壬戌春正月萬壽宮成。內建壽源萬春太玄仙禱諸殿。極其宏麗。壯過大內。上見之悅。加賚有差。大覲考察。二月詔罷親耕親蠶禮。三月策士賜徐時行等進士及第出身有差。夏四月乙卯上御新宮。

五月詔停選庶吉士。漉安知縣海瑞見世蕃不屈，鄢懋卿嗾御史袁漉劾之落職。御史鄒應龍劾嚴嵩及子世蕃、孫鶴鴻、家奴嚴年中書羅文龍等惡蹟，詔嵩致仕。世蕃等戍繫有差，遷應龍通政參議，免嵩黨劉伯躍等官。六月，廣東盜張連伏誅。秋七月，九月，諸殿閣門成，更命名。詔天下冬十月，刑科給事中陸鳳儀劾胡宗憲罪惡，逮下獄，尋釋削籍。復遣御史姜倣等分訪法士方書，倣陷興化，劉顯兵不動，乘機擄掠，賊據興化三月乃去。十一月，裕王第二子翊鎗薨，追封藍田王。

四十二年癸亥，春正月，詔復淮鹽舊額百萬爲六十萬。二月，大察京官，御史姜倣進祕書，倣陷甯德及平海衛。三月，御史王大任進祕書。夏四月，嚴嵩進祈鶴文符及法祕，命纂興都志，副總兵戚繼光等大破倭於平海衛。海寇悉平。五月，安南入貢，復逮胡宗憲下獄。宗憲仰藥死。六月，不雨。秋七月，詔罷江南加派兵餉。八月，癸亥，裕王第三子翊鈞生，是爲神宗皇帝。總兵楊照出塞襲敵，中矢死。副將線補袞力戰，斬二百餘級，還其屍。九月，廢伊王典樸爲庶人。方士趙添壽獻法祕，賜冠帶，賑徐州。冬十月，九日乙未，宣大報敵東行，兵部尙書楊博檄邊將爲備。丙寅，攻陷牆子嶺，擁衆大入。丁卯，屯平谷，掠通州，促勤王兵。以總督江東統之，命文武大臣分守城門。鎮遠侯顧寰集京兵分布中外，以劉漢護山陵，馬芳衛京城。戊辰，薊遼總督楊選尾虜至，姜應熊等兵次第至。總兵胡鎮大戰於通州，裨將孫贖死之，獲首虜甚衆，敵乃北去。甲戌，江東率諸將邀擊古北口，斬獲無算。丁丑，追逐出塞而還。京師戒嚴，逮楊選及薊州都御史徐紳下詔獄。選棄市，紳削籍。餘敍功陞賞贈廕有差。壽恩宮成。十一月，城張灣。十二月，琉球入貢。

四十三年甲子春正月選民間女三百人入宮二月伊王典模發高牆國除戚繼光勦閩殘倭悉平之閩二月禁王府宗室私置田宅三月扶溝民盧欽獻其孫女納之夏四月大雩五月壬寅朔日有食之西番入貢建太素殿六月西域貢獅子廣東兵大破倭於海豐秋七月賑淮安冬十月采方書御史回京俱陞侍讀學士賜第罷寶源局鑄錢十一月南御史林潤劾嚴世蕃羅文龍逮世蕃文龍下獄察京官鄒懋卿削籍安南入貢十二月南詔賊馬五作亂討之尋平是歲天下進祕方及靈芝仙桃白鹿兔鴈等物者不可勝紀上皆厚賚之如鹿兔生子龜生卵御幄得桃諸事羣臣皆表賀亦不可勝紀

四十四年乙丑春正月賑京師畿內饑民丁未景王薨無子迎葬西山大覲考察三月千步廊火壬子策士賜范應期等進士及第出身有差選陳經邦等二十八人爲庶吉士辛酉嚴嵩削籍籍沒子世蕃坐謀反市斬夏四月四川龍川會薛兆乾叛討擒之密諭輔臣欲禪位裕王徐階進言祖宗原無此例前代亦非美談惟有舉行冊立攝行政事斷自聖心使恩出自上乃可耳上意不許而議亦遂寢五月夷自浮海入貢方士藍田玉胡大順矯誣論死丙午上還宮六月金芝產睿宗原廟命作玉芝宮秋七月四川盜蔡百貫反討平之辛卯建毓德宮九月鑿新渠編畿南流戶入籍冬十月主事海瑞力諫上怒命下詔獄上復諭內禪輔臣力諫報罷十二月續修玉牒

四十五年丙寅春正月敵犯宣府邊將禦之乃去二月諭幸承天不果三月土魯番入貢夏四月壬戌朔日有食之濬九門河渠六月修太學命有司不職者不得改教官秋七月詔求大玉補六璽誅妖人李福

達孫李同。八月作紫宸宮。九月修顯陵。更建龍飛殿。嚴禁戒壇僧尼說法。冬十月敵入偏頭關大掠。尋去湖廣災。免屯糧十四萬。宥沈束。發爲民。丙戌上不豫。閏十月上不豫。雲南討鳳繼祖平之。十一月上不豫。十二月庚子上大漸。入大內。午時上崩於乾清宮。壽六十。輔臣徐階等啓裕王入主喪事。辛丑遣詔曰。朕以宗人入繼大統。獲奉宗廟。四十五年。深惟享國久長。累朝未有。乃茲不起。夫復何憾。朕奉列聖家法。皇考身教。一念惓惓。惟敬天勤民是務。祇緣多病。過求長生。遂致姦人乘機誑惑。禱祀日舉。土木咸興。郊廟之祀不親。日講之儀久廢。既違成憲。亦負初心。邇者天啓朕心。方圖改轍。而遽爾嬰疾。補過無由。每一進思。惟增愧恨。蓋愆成美。端仗後賢。太子裕王仁孝天植。睿智夙成。宜上遵祖訓。下順羣情。卽皇帝位。勉修令德。勿過毀傷。諸凡祔葬。悉稽舊典。其建言得罪諸臣。存者召用。沒者卹錄。鋼者卽釋。方士人等。查照情罪。各正刑章。詔告天下。咸使聞知。明年正月上號諡曰欽天履道英毅神聖宣文廣武洪仁大孝肅皇帝。廟號世宗。三月葬永陵。

史官贊曰。庸人之於親。力所可盡。盡焉矧天子耶。博施備物。大孝不匱。思禮志之。夫迎立之詔。豈眞武宗筆。摛詞者實茲二三大臣。若直書云。朕纘服大寶。青宮尙虛。眇德負慝。孝宗緒繼。謹遵祖訓。兄終弟及之文。咨爾興世子厚燁。入繼孝宗。勉抑至情。永承鴻業。卽以益王第二子厚炫爲獻王後。若不能割愛就義。則有益世子厚燁在。帝必於開讀之日。徘徊驚慮。有以處焉。諸臣識有未明。議有未豫。一則曰倫序當立。再則曰入嗣帝位。夫人違親就撫。事有或然。及太阿在握。乃逆使遺親。斷不能得之於庸人。而況英主臣。

之失也。帝何郵。帝方欲盡博施不匱之思。而臣拂之者屢。幾從容婉諭。而下持之愈堅。又臣之失也。帝何郵。雖然。當雷霆之威。伸憤鬱之氣。卽太虛猶然也。詩云。十月肅霜。霜之嚴物也。曰肅。禮未成不得不嚴。禮旣成而終嚴焉。肅也者。其譏之矣。至土木雲舉。萬姓食勞。喜怒觭情。忠直飲刃。權姦焚弃。用之不疑。方士異端。尊之過制。帝亦莫自解矣。臣乎何郵。嗚呼。迹其初政。雖古先哲王。奚多讓焉。

明書卷十五

本紀十二

穆宗莊皇帝本紀

帝諱載屋。世宗第三子也。母康妃杜氏。於嘉靖十六年正月二十二日。生上於宮中。及羅宰盤。第取龍旗玉印奉世宗。世宗獨心異之。己亥二月。與莊敬太子景王同日冊封爲裕王。是日五色雲見。太子冊寶誤送上所。世宗聞之。嘆曰。天命也。莊敬薨。中外係心焉。上凝重秀朗。意氣豁如。世宗惑方士二龍不相見之說。召見頗稀。有司以立儲請。世宗不懌。自後羣臣無敢言者。壬子。出閣講讀。立妃李氏。出居於裕邸。凡十餘年。妃薨。繼陳氏。上在邸第。小心敬畏。動遵禮法。禁戢左右。無敢肆者。性寬仁。周知民情。景王就國薨。世宗無他子。人心大定。世宗欲內禪不果。丙寅十二月庚子。世宗崩。立召上入主喪事。辛丑。頒遺詔。壬子。上卽皇帝位。頒詔大赦。改明年爲隆慶元年。癸丑。釋海瑞於獄。甲寅。命改隆慶大統曆。

隆慶元年丁卯。春正月。上大行皇帝號諡。己未。加上孝潔曰恭懿。慈睿安莊相天翊聖肅皇后。孝烈曰端順。敏惠恭誠。祇天衛聖肅皇后。上生母康妃杜氏曰孝恪。淵純慈懿。恭順贊天開聖皇太后。丙申。詔復召對舊典。令科臣隨入錄。建言得罪諸臣。通政使樊深等三十三人次第起用。是日。擢復原官陳瓚海瑞等。

十四人。第建言諸臣戮死者爲一等。贈廕諡祭。兵部員外郎楊繼盛等四人。杖死者太僕卿楊最等十三人。復職贈廕。繫獄戍黜死者侍郎唐胄等二十八人。皆復職贈官有差。吏部尙書熊浹諫止仙箕。御史楊爵彈擊權倖。與杖死者一例。議祔廟。止一帝一后。著爲令。復鄭王厚烷中尉勤熨父子爵。罷西苑督農尙書。追奪邵元節陶仲文官諡。方士黃金等論死。考察京官。放廠軍歸伍。鄆懋卿遣戍。二月。祭社稷。罷金海神祭。加元妃李氏諡曰孝懿皇后。冊繼妃陳氏爲皇后。詔革諸匠役官職。工部尙書匠役徐杲等。卿二人。參議員外五人。鴻臚光祿等官一百餘人。各歸原管。仍爲匠役。乙巳。加諡長子爲獻懷太子。次子爲靖悼王。減內府供應。三月。修乾清坤甯二宮。壬申。葬世宗於永陵。孝潔孝恪遷祔。專祀孝恪皇太后於神霄殿。孝懿皇后祔享。專祀孝烈於宏孝殿。革王大任姜儼等職。壬午。冊貴妃李氏等。毀紫極宮。命建翔鳳樓。以言官諫卽罷。敕修世宗實錄。夏四月。追贈王守仁爲新建侯。停進珍禽瑞獸。丁未。御經筵。詔正一真人不準世襲。革其真人號。奪印。五月。復前大學士楊廷和等十三人官。頒詔外國。辛巳。親祀方澤。六月。釋高牆禁錮庶人。秋七月。復李默原官。予祭。遣官分祭諸陵。闕里。及帝王陵。山川。朝鮮使臣乞留觀幸學。許之。八月。上幸太學。謁先師。召譚綸戚繼光入京。戊子。親祀社稷。九月。敵入薊鎮。掠昌黎及畿輔。尋去。冬十月。奪遼王道號及真人印。十一月。癸亥。郊奉皇考世宗配。詔改隆慶殿爲慶源殿。隆慶州爲延慶州。十二月。詔廷臣博訪人才。修玉牒。罷提督團營內官。鄭王厚烷復國。

二年。戊辰。春正月。大覲考察。減內府加增米四千餘石。二月。祭太社太稷。歲以爲常。乙酉。耕籍田。丁未。上

如天壽山謁陵。五日還宮。三月辛酉。冊立皇太子。詔赦天下。策士賜羅萬化等進士及第出身有差。選李長春等三十人爲庶吉士。丙子。上幸南苑。悔之卽還。遣內官蘇杭織造。夏四月。追陶仲文所請元祐宮田八千七百餘頃還官。許國子生郭禹收葬其父郭希顏。五月。命戚繼光練兵薊州。詔選鳥銃手三萬於浙。準王守仁世襲伯爵。丙寅。有事於方澤。六月。廷臣疏乞正中宮體。上曰。皇后多病。移別宮以遂優游耳。爾等不知內廷事。妄言之。疾愈卽還。乾清無多談。秋七月。復誠意伯世延爵。盜竊太倉銀。冬十月。以嚴世蕃遺產充南贛軍餉。遼王憲燾不法。廢爲庶人。發高牆。內官張進朝請赦選宮女。上怒。下獄擬斬。十一月。敵犯宣府。馬芳迎擊於長水。海破之。考察京官。免江西糧。太監李芳以直諫忤上。命錮於獄。戊辰。冬至。郊。十二月。有司奏災異。詔曰。朕夙夜憂惕。不敢怠荒。惟爾臣工。務實心體國。共圖消弭。以仰承仁愛之意。三年己巳。春正月。二月。廢輔國將軍厚燦爲庶人。發高牆。築沿邊烽臺三千座。成。荆世子常冷淫縱。降爲庶人。庚子。祭朝日壇。賜衍聖公孔尙賢敕。統束家衆。三月。陝西荒盜起。廣西討宜山獐賊破之。廢靈邱王。甯謙爲庶人。海賊曾一本自倭入寇。殺參將耿宗先等。廢景陵王載塹爲庶人。夏四月。遼陽副總兵李成梁奏捷。選民間女三百人入宮。取太倉銀十萬入內。開湖廣竹筒河。五月。御史詹仰庇諫。內官營造淫巧。杖爲民。辛未。有事於方澤。六月。廣東官兵擒殺宗先叛將周雲翔。誅之。閏六月。秋七月。修重城。詔停造鼈山燈。八月壬寅。親祭夕月壇。戊申。祭太社稷。廣寇曾一本平。各王府建宗學。內旨宥總兵田世威等立功。辛卯。上大閱武於教場。九月。詔舉邊才。冬十月。補京營軍足十萬。十一月甲戌。冬至。郊。十二月。命廠衛詞。

伺百官汰錦衣官旗一千餘人。工匠二千四百餘人。

四年庚午春正月乙巳朔日有食之。二月湖廣土官覃璧及四川蠻阿大等叛。盡復夏言原官。予祭葬。贈諡。溶吳淞江白茆塘。册英妃魏氏等五妃。貴州安國亨叛。官軍討之。敗績。三月禁天下聚徒講學。鑄隆慶通寶錢。裁南京冗官。夏四月敵犯山西。拒卻之。五月給事中李己諫買金寶杖繫獄。尋釋。六月詔戒酷刑。秋七月免昌平州養馬三年。八月城通州河西務。削陸炳職籍其家。賑陝西。免畿南秋糧。冬十月俺荅孫把汗那吉率屬來歸。命設教習勳胄館。以京營大臣主其事。考察京官。俺荅擁衆索那吉。拒卻之。尋納款。十一月己卯冬至郊祀園丘。十二月敵執我叛人趙全等來獻。受俘。賞賚有差。遣那吉歸。

五年辛未春正月大覲考察廷臣及來朝官謁皇太子於左順門。二月册封皇四子翊鏐爲潞王。遣內官往陝西督造羊羝。三月册封榮妃王氏等四妃。策士賜張元忬等進士及第出身有差。選趙用賢等三十人爲庶吉士。己丑封俺荅爲順義王。通貢市。夏四月命江西燒磁器十二萬有奇。五月敕廣西古田平寇功。李遷俞大猷等陞賞有差。六月三邊通貢市。順義王俺荅入貢。執叛人趙宗山等來獻。秋七月上御殿賞俺荅及其妻彩幣銀物有差。八月開泃河。九月按撫遼人使各有甯士。勿得渡海入山東。詔定薛瑄從祀孔廟。詔廷臣集議海運。冬十月安國亨求降。許之。西夷貢馬。十二月遼東總兵李成梁奏捷。陞賞有差。六年壬申春正月詔雲南廣東採珠寶。二月甲午皇太子冠。倭寇廣東。閏二月選東宮輔導官。三月戊子皇太子出閣講讀。廣東兵擊倭。破走之。夏四月建瓜州關。免湖廣秋糧十九萬有奇。五月賜順義王俺荅

鍍金銀印。先是上御門忽眩仆。輔臣高拱張居正共上殿扶掖。上蘇。握拱手曰。我祖宗至今。國有長君。社稷之福。東宮尙幼。奈何。拱對曰。皇上萬壽無疆。何出此言。上曰。有人欺朕。拱曰。何人無禮。有祖宗法在。良久。上曰。何事非內官敗壞。因攜拱手至乾清宮寢殿。升榻曰。朕一時如此恍惚。又曰。自古帝王後事。語低因不聞。須臾拱等出。漸平復。至二十五日己酉。上大漸。申刻。召高拱張居正高儀入乾清宮寢殿。上已昏。時皇太后皇后太子在前。於是太監馮保以白紙帖授皇太子。稱遺詔曰。朕嗣祖宗大統。今方六年。偶得斯疾。遽不能起。有負先皇付託。東宮幼小。朕今付之卿等。三人同司禮監。協以輔佐。遵守祖訓。保固皇圖。卿等功著社稷。萬世不泯。拱奏曰。臣受皇上厚恩。誓以死報。東宮雖幼。祖宗法度昭然。望皇上毋以後事爲憂。遂哭而出。庚戌卯刻。上崩於乾清宮。壽三十六。先是拱立恭默室候動定。有張居正吏姚曠持寸封甚密。拱問何爲。曠答曰。與馮公公。拱遂問居正何言。居正惶怖曰。乃遺詔事宜。辛亥。保復捧出一紙曰。遺詔與皇太子。朕不豫。皇帝你做一應禮儀。自有該部題請而行。你要依三閣臣并司禮監輔導。進學修德。用賢使能。無事怠荒。保守帝業。秋七月丙戌。上號諡曰。契天隆道淵懿寬仁顯文光武純德宏孝莊皇帝。廟號穆宗。九月壬寅。葬昭陵。

史官贊曰。鱗生萬歷中年。去穆宗時最近。每雜田間。研論農務。聞故老言。穆宗時天無水暵。餘糧棲畝。首目不睹戈甲。每飯飽午寐。酣足而寤。日未昃也。所謂化國之日。舒以長非耶。及覽中祕琬琰。謂帝純粹寬仁。穆然恭己。制節謹度。至不經之祀。無用之作。非藝之征。無名之獻。皆罷黜若將浼焉。嘗食驢腸甘。左右

請詔光祿供之上曰若爾則必日殺一驢以備用朕不忍也衣食供御必裁取最約者其恭儉好生惡殺如此言官觸忤雖震怒終必釋之且留心邊務穹漠之長慕德來王峒林之孽俛頭就縛卽古之鳴鍾清渭懸首北闕未足喻其烈也有肅宗之震厲不可無帝之如天如海以包育之雖享國未久規模宏遠矣

明書卷十六

本紀十三

神宗顯皇帝本紀

帝諱翊鈞。穆宗莊皇帝第三子也。母選侍李氏。生於嘉靖四十二年癸亥八月十七日酉時。李氏後進封貴妃。是爲孝貞皇太后。先是穆宗長子次子皆殤。而弟景王亦未幾薨逝。本支未樹。中外以爲憂。世宗雖諱建儲。然無時不勤貽謀之慮。及帝生甚喜。當時穆宗久居藩邸。以潛時乾惕之厲。登極之明年。卽冊封爲皇太子。又明年。出閣講讀。無間寒暑。從來儲訓。未有若是之豫者。帝聰明寬大。動必中節。隆慶二年三月。旣冊立。偶遇閣臣於御道西。正立召謂曰。先生良苦翼贊。輔臣頓首謝曰。願殿下勤學。答曰。方讀三字經。旣而曰。先生且休矣。睿晉清暢。聽者悚悅。方十歲。穆宗恭妃遣人持金壺遺其家。爲闈者所邏。奏之。帝乃以百金進。妃曰。家貧濟以此。此先朝藏器。不可出也。一日文華殿礎忽有天下太平四字。深入不滅。廷臣以爲瑞。帝不懌曰。僞也。從古天書之僞。善惑人主。往往如是。長而天表嚴重。廣額豐頰。龍行虎視。目光四射。指顧生威。臣下觸諱者。輒含容不爲動。喜作楷書。晚益精進。天性至孝。奉仁聖慈壘。兩宮備至。帝冲年禁中花發。召輔臣賞宴。廷臣偶言及仁聖。輒起往迎。賞宴甚歡。一切典禮。備極尊崇。每上册寶。飭拜甚

恭其儀註皆出帝手。臣下莫及。隆慶六年六月。卽皇帝位。詔以明年爲萬歷元年。詔赦天下。上大行皇帝尊諡。上兩宮徽號。太后陳曰。仁聖皇太后。生母李曰慈聖皇太后。帝御平臺。召對輔臣。部院官問陵寢及治安之要。諭邊臣謹備。敵勿懈。戒諭文武羣臣。捐私爲公。以奏治平。諭擇經筵官。酌定朝講日期。定三六九爲常朝儀。山陵禮成。禁誥敕體誇侈溢美。大學士張居正進帝鑑圖說。上嘉納之。安置黔公沐朝弼於南京免死。

萬歷元年癸酉。春正月。命具經筵儀。上出乾清宮。見一無鬚男子惶走。縛之。詞連大學士高拱。是日大風黑霧。刑官知其誣奏。送朝鞠已。暗遂斬於市。二月。嶺東平。俘斬賊首蘭一清等一萬二千二百有奇。捷敍賞賚有差。夏四月。秋七月。命諸司章奏及時覆行。冬十月。兀堂等乞質子。所在易鹽布。遂許市。十一月。築邊堡。

二年甲戌。春正月。西南夷都蠻平。所俘馘四千有奇。拓地四百里。得酋王三十六人。獲武侯侯所遺銅鼓九十三而還。二月。會試天下貢士。取三百五十名。三月。廷試。賜孫繼皋等進士及第出身。有差。上命吏部引天下廉能官赴會極門。面加獎賞。夏四月。重修太宗實錄成。秋七月。冬十月。遼東大捷。十二月。命書繪天下疆域及公卿而下郡守而上文武羣臣姓名於御屏。罷年遠親盡之廕。

三年乙亥。春正月。二月。申飭史職。夏四月。敕吏部。凡天下提學官。非方正博聞之士。宜勿遣。夏四月。敵犯大甯。官兵禦走之。秋七月。九月。北京重建貢院成。冬十月。上親灑宸翰。賜各講官。十一月。王杲糾敵犯邊。

東夷長王台擒獻。詔磔之。加台龍虎將軍。

四年丙子。春正月。二月。建三屯營城。夏四月。命重修大明會典。秋七月。八月。以水旱。詔免田租。敕有司加意牧養。九月。命民應賦粟。改折銀實公帑。寬民力。冬十月。防邊。

五年丁丑。春正月。朝覲考察。二月。會試天下貢士。取三百五十名。三月。廷試。賜沈懋修等進士。及第出身有差。命考試下第舉人。準署教職。仍許會試。夏四月。五月。詔修慈慶慈寧二宮。以聖母諭罷。六月。嶺西羅旁平。俘斬四萬二千有奇。宣捷。定大婚吉期。秋七月。九月。以首輔張居正奪情。杖翰林編修吳中行等。冬十月。大內火。十一月。世宗實錄成。

六年戊寅。春正月。行大婚禮。遼東大捷。上行冠禮。三月。大婚禮成。敕遼東功。陸廕賞賚有差。夏四月。秋七月。冬十月。命刊宗藩要例書。

七年己卯。春正月。二月。河工告成。三月。烏思藏僧鎖南堅。錯求通貢。許之。更定太廟祝文之稱。夏四月。詔停鼓鑄。以大水。詔減蘇松織造。緞疋。五月。蠲天下逋賦一百餘萬。命止徵見年。餘悉蠲免。秋七月。冬十月。趙鎖羅骨。窺邊。禦之。遁去。

八年庚辰。春正月。朝覲考察。二月。會試天下貢士。取三百人。三月。廷試。賜張懋修等進士。及第出身有差。夏四月。上躬耕籍田。秋七月。詔大度天下土田。冬十月。敵犯靈陽。官兵禦之。敗走。十二月。敕紅土城。封總兵李成梁伯爵。餘陸廕賞賚有差。穆宗實錄成。

九年辛巳春正月命翰林官分番入直侍上質問書義陳說治理如唐宋故事二月旌武義孝子王世名夏四月遣官賑江北饑民六月申飭朝儀服色秋七月詔優禮耆碩分遣官問民疾苦養老冬十月十一月命羣臣觀宣宗元兔圖賦詩成者三十五人

十年壬午春正月夏四月浙江兵亂都御史張佳允計定之六月丁亥朔日有食之秋七月山西大荒遣官賑之八月皇長子生詔告天下冬十月大破敵於曹子谷斬首千三十九級

十一年癸未春正月朝覲考察二月會試天下貢士取三百六十人三月廷試賜朱國祚等進士及第出身有差夏四月選庶吉士陳經邦等二十八人五月加上兩宮皇太后徽號仁聖加康靖慈聖加明肅六月起用謫外翰林官秋七月詔減浙江織造八月上躬祀山陵十一月隴川土目嶽鳳合緬甸叛分攻騰衝永昌官兵討之命折漕糧三分之一十二月阿台大舉入犯官兵禦卻之斬級二千二百二十二海西獻捷賞賚有差

十二年甲申春正月潞王出府成婚夏四月詔恤故輔臣張居正母秋七月敵窺邊防之冬十月以王守仁陳獻章胡居仁從祀孔子廟庭

十三年乙酉春正月夏四月詔減江西燒造磁器五月以大早上步禱南郊詔免天下災傷今年田租之半六月慈甯宮成秋七月申禁貪墨之吏八月皇太后御新宮內外賞賚有差九月四川松茂番作亂官兵討平之冬十月

十四年丙戌。春正月。朝覲考察。敕科臣摘參考成。二月。大學士申時行等請冊立東宮。不報。會試天下貢士。取三百五十人。三月。廷試。賜唐文獻等進士及第出身有差。夏四月。詔減蘇杭織造。停罷江西磁器。五月。考選李啓美等爲庶吉士。秋七月。天下水旱異常。命有司設法賑之。冬十月。命北方開水田。十五年丁亥。春正月。東阿盜起。官兵撲滅之。遣官賑山西饑。敕撫按禁遏糴。夏四月。羣臣再請建儲。不報。重修大明會典成。秋七月。冬十月。詔修決河。冬十一月。那林李羅犯邊。禦之。

十六年戊子。春正月。二月。御經筵。三月。國子監司業王祖嫡請復建文年號。改修景帝實錄。上是之。黃梅賊梅堂等作亂。官兵進討。蘄州判官陳策死之。尋擒斬解散悉平。夏四月。直隸浙江大饑。遣官賑之。嚴覈雲南功。閏六月。播州楊應龍進大木。賞賚之。秋七月。九月上幸石景山觀渾河。詔修黃河。護陵寢。冬十月。卜奠犯邊。官兵禦之。

十七年己丑。春正月。朝覲考察。二月。會試天下貢士。取三百五十人。三月。廷試。賜焦竑等進士及第出身。有差。夏四月。大學士王錫爵等請視朝建儲。不報。五月。考選王肯堂等二十二人爲庶吉士。秋七月。命有司恤災傷。申明憲規。冬十月。禮官請舉祫祭。十月。播州宣慰使楊應龍反。命官兵討之。十八年庚寅。春正月。上見皇長子於羣臣。夏四月。六月。夷入陝西爲市。命嚴防之。秋七月。九月。詔停刑。冬十月。廷臣合詞請冊立東宮。不報。十一月初。命科臣察覈九邊兵馬城壘。揚州大饑。敕有司賑恤之。十九年辛卯。春正月。夏四月。騷台住補貢。命厚恤之。秋七月。冬十月。命勘災荒。設法賑之。

二十年壬辰春正月朝覲考察二月寧夏土達悖拜反命官兵討之會試天下貢士取三百人三月廷試賜翁正春等進士及第出身有差懸購悖拜賞格夏四月命將出師援朝鮮五月考選王象節等爲庶吉士秋七月冬十月寧夏平奏捷十一月磔悖承恩等於西市蠲寧夏田租敍賚有差十二月上憫東征將士發帑金十萬犒之江西大旱命賑之

二十一年癸巳春正月平壤大捷大學士王錫爵請立東宮諭需後上命並封三皇子爲王羣臣爭之不報夏四月秋七月星變命羣臣修省冬十一月上召對廷臣於煖閣論以册立俟嫡之意

二十二年甲午命恤各省災荒二月皇長子出閣講學刑科給事中楊東明進饑民圖上納之三月河南進饑民所食鴈糞上覽惻然蠲是年田租仍發帑賑之秋七月增順天鄉試監生中式二十名冬十月命廷議日本封貢事

二十三年乙未春正月朝覲考察遣使封日本平秀吉爲順化王餘陞賞有差二月會試天下貢士取三百人三月廷試賜朱之蕃等進士及第出身有差夏四月考選高承祚等十八人爲庶吉士秋七月冬十月防西夷

二十四年丙申春正月夏四月楊應龍益橫改命官合五省兵討之冬十月

二十五年丁酉春正月湖廣苗亂命撫之二月復議東征夏四月遣總兵麻貴等征日本秋七月詔加兩京監生中式各十名冬十月楚民亂尋平之

二十六年戊戌。春正月。詔募江南水兵爲海運。朝覲考察。二月。會試天下貢士。取三百人。三月。廷試。賜趙秉忠等進士及第出身有差。夏四月。考選黃國鼎等二十一人爲庶吉士。秋七月。冬十月。安南進代身金人。宣東征捷。官兵悉還。

二十七年己亥。春正月。獻倭俘。夏四月。勘東征功罪。陞廕賞賚黜降有差。秋七月。冬十月。旌孝子李文詠等。

二十八年庚子。春正月。夏四月。秋七月。命廣天下解額有差。冬十月。十二月。獻播州俘於闕下。磔楊應龍等於市。命重修文廟。

二十九年辛丑。春正月。朝覲考察。二月。會試天下貢士。取三百人。三月。廷試。賜張以誠等進士及第出身有差。冬十月。冊立元子爲皇太子。詔告天下大赦。冊封皇衆子福王。瑞王。惠王。桂王。加上聖母徽號爲慈聖宣文明肅貞壽端獻皇太后。遣官存問在籍老臣申時行等。

三十年壬寅。春正月。夏四月。湖廣進魚鮮惡。詔奪布政使程正誼官。秋七月。冬十月。防邊。

三十一年癸卯。春正月。遣給事中夏子陽等封琉球國王。夏四月。秋七月。冬十二月。妖書事發。上震怒。命窮治之。

三十二年甲辰。春正月。敍平播功。總督李化龍等陞廕賞賚有差。朝覲考察。二月。會試天下貢士。取三百人。三月。廷試。賜楊守勤等進士及第出身有差。夏四月。失文淵閣印。命復鑄給。五月。考選駱從宇等二十

二人爲庶吉士。秋七月。冬十月。

三十三年乙巳。春正月。夏四月。冬十一月。皇太子第一子生。是爲熹宗。加上慈聖皇太后徽號。增恭僖二字。詔告天下。覃恩大赦。十二月。徙寬奠新疆居民六萬餘口。散寄遼東各衛所。

三十四年丙午。春正月。夏四月。秋七月。朝鮮報警。命嚴防之。冬。長至日。南京民劉天敘等謀亂。擒磔之。日本復與朝鮮尋盟。上諭加意偵防。從其私款。勿問。清理賜田。

三十五年丁未。春正月。朝覲考察。二月。會試天下貢士。取三百人。三月。廷試賜黃士俊等進士及第出身。有差。夏五月。考選林欲楫等十八人爲庶吉士。六月。特舉會推事。閏六月。發倉粟二十萬石。賑京師被水居民。冬十月。會議屯田法。

三十六年戊申。春正月。大學士葉向高請補缺官。不報。夏四月。南京科道官公請賑蘇松水災。從之。冬十一月。發內帑銀十五萬。賑江南。發兩淮鹽課銀十五萬。賑浙江。十二月。遴補宮寮。海會入貢。

三十七年己酉。春正月。北敵窺關。挾賞。二月。廷臣請東宮出講。時輟講已四年。夏四月。大學士葉向高疏請增補閣員。不報。秋七月。詔增遼東解額。冬十一月。命官纂修玉牒。是年。倭并琉球。執其王。侵閩廣。命嚴飭以待。

三十八年庚戌。春正月。朝覲考察。閣臣請皇太子及諸王出講。讀。不報。二月。會試天下貢士。取三百人。三月。廷試賜韓敬等進士及第出身。有差。夏四月。遼陽警報急。命官料理邊防。發帑金十萬。又中宮等捐銀。

五萬分遣官賑濟饑荒地方。六月。釋獄中輕囚。秋七月。冬十月。輔臣請補戶禮二部官。不報。

三十九年辛亥。春正月。京察。夏四月。怡神殿災。蠲直隸山西山東河南稅銀之半。秋七月。廷臣公請上殿。不報。冬十月。皇極門興工。十一月。兵部奏請敍薊鎮宣大閱視功。言諸臣多物故者。不報。

四十年壬子。春正月。夏四月。秋八月。以各省鄉試考官命不下。皆改期。冬十月。考選官。八月始命下。各就職。

四十一年癸丑。春正月。朝覲考察。二月。會試天下貢士。取三百五十人。三月。廷試賜周延儒等進士及第。出身有差。夏四月。都察院請差巡按御史。不報。廷臣請福王之國。不報。秋七月。禁百官擅去職位。考選會楚卿等三十三人爲庶吉士。冬十一月。延鎮三捷。十二月。福王請減莊田。詔嘉答之。

四十二年甲寅。春二月。皇太后崩。詔告中外。三月。上皇太后尊諡曰孝定。輔臣請補科道官。不報。福王之國河南。夏四月。詔減直隸稅額二萬。六月。山陵禮成。

四十三年乙卯。春正月。夏五月。有男子張差持梃入東宮。闖者獲之。奏送法司鞠審。有謂風癲者。有連鄭皇妃者。上震怒。召羣臣於皇太后靈次。令見皇太子。諭以太子仁孝之意。遂命誅差。秋七月。建州兵屯南關。預備之。

四十四年丙辰。春正月。朝覲考察。二月。會試天下貢士。取三百五十人。三月。廷試賜錢士升等進士及第。出身有差。革會試第一名有弊舉人沈同和。夏五月。倭寇福建。六月。清河兵私出松山被掠。禳蝗。冬十月。

賑陝西饑。是年我太祖卽皇帝位。國號大清。改元天命。

四十五年丁巳。春正月。禮部議諡例。擬雍泰等四十四人。上從之。二月。套寇乞款互市。許之。貴州苗叛。官兵討之。皇太子出閣講學。皇太孫就傅。三月。考察京官。夏四月。畿輔旱蝗。蠲田租。封福王第一子。由崧爲德昌王。賜印。五月。遣使冊封諸藩。六月。正陽門樓成。秋七月。命官勘山西旱荒。山東蝗災。賑之。八月。諭防邊。九月。命賑承天水災。命改折直隸屯田租糧。冬十月。寇犯喜峯。禦之。隆德殿災。延禧宮災。十二月。靈寶賊高二等作亂。擒斬之餘黨平。

四十六年戊午。春正月。夏四月。我清兵襲撫順。遊擊梁汝貴死之。閏四月。清兵歸漢人張儒紳等。齎番文請和。五月。清兵破撫安。以失城喪師。革巡撫李維翰。秋七月。清兵入鴉鵲關。直抵孤山。議徙寬奠人民於遼陽。徵兵往禦之。初。設援遼餉司官。九月。清兵破清河。下總兵麻承恩等於詔獄。十二月。大賞北關金台失等。

四十七年己未。春正月。朝覲考察。援遼徵調兵雲集。諭兵部議方略。頒賞格。二月。會試天下貢士。取三百人。三月。廷試。賜莊際昌等進士。及第出身有差。考選倪啓祚等二十三人爲庶吉士。遼東師潰。總兵劉綎等死之。五月。我清兵抵鐵嶺柴河諸處。秋七月。抄花寇十方堡。官兵禦之。遁去。清兵連破開原鐵嶺瀋陽。官兵禦之。熊官兒屯。以捷聞。九月。命贊善徐光啓以少詹事兼監察御史。專練京兵。冬十月。計遼餉。至三百二十四萬金。運車三萬七千輛。牛七萬四千頭。十一月。我清兵入龍潭口。

四十八年庚申。春正月。我清兵抵遼陽。三月。以訛言京師戒嚴。夏四月。皇后王氏崩。諡曰孝悼。五月。召見輔臣。方從哲於臥榻。蓋深居三十年。始有此召。六月。關陝永保援遼兵逃。上發帑金三十萬招撫之。秋七月二十一日酉時。帝崩於乾清宮。壽五十七。八月丙午朔。皇太子卽皇帝位。上尊諡曰範天合道哲肅敦簡光文章武安仁止孝顯皇帝。廟號神宗。是年冬。葬定陵。

史官贊曰。帝仁孝寬平。享國最久。絕晚近綜覈之煩。而臻古聖幾康之理。海內沐浴元化。幾五十年。百姓含鼓。目不見兵革。耳不聞戰伐。途歌巷舞。無愁歎之聲。洵明運之邳隆矣。初年精明英密。臣下莫可測識。晚頗厭怠。深居靜攝。幾三十年。而權不下移。亦可謂獨秉太阿者。至慈護光宗。始終無間。宮闈之中。了無慙德。蓋不世出之主也。第後來礦稅紛綸。頗覺驛騷。而懈弛之久。邊釁漸生。喪師蹙國。不能爲帝解矣。馮張初肆。旋就闕除。以號曰神。真不誣云。

明書卷十七

本紀十四

光宗貞皇帝本紀

帝諱常洛。神宗顯皇帝第一子也。母才人王氏。後封恭妃。是爲孝靖皇后。生於萬曆十年八月十一日。當時神宗春秋鼎盛。宮闈肅穆。以元嗣生大喜。詔赦天下。已上加兩宮聖母徽號。覃恩中外者再。聖母乃出宮。儲二十萬金犒京邊軍。上性孝敬寬仁。舉動中禮。每問安起居。多得神宗意。十四年正月。皇第三子生。出。皇貴妃鄭氏。鄭氏最愛幸。時儲位未定。臣下不無私憂。會輔臣申時行請冊立。神宗諭以元子嬰弱。宜少待。十五年正月。申時行等再以建儲封王爲請。不報。科臣部臣復有言之者。俱被謫。十八年正月。神宗召見輔臣於毓德宮。論奏良久。輔臣以冊立豫教請。神宗令宣長哥來與先生一見。帝至時。皇三子亦至。輔臣仰視睿容。皆稱賀。神宗曰。此祖宗德澤聖母恩庇所致。輔臣再進諦視。神宗引帝向明正立。輔臣因請早定大計。神宗領之。十月內。兩京九卿科道官合詞懇請。而輔臣請之益力。神宗詔切責。三輔臣皆引疾。獨王家屏再疏言。欲釋衆疑。莫若大信之蚤全。欲解擾亂。莫若聖志之蚤定。神宗諭以明年春夏。又明年。有三皇子並封之旨。首輔王錫爵以召至。密揭言建儲事。皇上前業有旨矣。乞乘此時從中降諭。決於

今春舉行使盛美歸之獨斷。神宗曰：祖宗立嫡不可易也。中宮尙年少，朕欲三皇子併封王，而虛儲位以待嫡，其爲擬諭錫爵隨言待嫡之說。臣未前聞，安敢奉詔。昔漢宋母后有養育庶子故事，無已，請令元子母中宮而正儲位。神宗不許。至十一月，乃諭禮部元子先行豫教，具元子出閣禮儀。奏已諭停，尋又諭。二十一年二月，帝出閣講讀，儒臣進說經旨，帝潛心聽受，多見旁通。一日講官焦竑仰叩以維皇上帝降衷於下民，若有恆性大義，帝應聲曰：天命之謂性是已。講官董其昌請問擇可勞而勞之，帝答曰：此所謂不輕用民力也。侍臣驚喜嘆服。二十六年二月，閣臣共以冠婚請，奉諭皇長子元氣單弱，少俟時月，後府部科道諸臣各詣文華門上疏，必得命乃退。神宗遣內官報聞。二十九年九月十八日，諭內閣傳示禮部，上冊立冠婚儀註。十月十五日，冊立爲皇太子。四十一年六月，武弁王曰乾上書告姦人孔學等受人指使，將不利於東宮，語涉翊坤宮。通政司具疏上，神宗大震怒，輔臣葉向高密揭言：此姦徒所爲，當靜處之，勿爲所動，動則紛擾，惟速定福王之國之期，以釋天下疑。神宗納之。中外始安。四十三年五月，有男子張差持挺突入東宮，璫輩共執之以聞，詔下法司，或主風癩者，或涉翊坤宮者，科道臣紛紛言：神宗乃因率帝及長孫諸王孫，召見羣臣於宮門外，諭曰：皇太子國家根本，豈有不愛不重。況諸皇孫振振，朕甚喜。外廷何過疑有他也。命決張差并中官等，帝請無株連，以傷天和。且代諭羣臣勿聽流言，爲不忠之臣。使本宮爲不孝之子。神宗大悅。四十八年七月丁酉，神宗崩，帝告於奉先殿，令禮部會翰林院議大喪禮儀，報訃於藩王，申飭閣部文武諸臣靖共率屬，并敕護衛官兵戒嚴，撤天下礦稅，內使發帑金一百萬犒九邊。

遵遺詔進封皇貴妃鄭氏爲皇后。禮部侍郎孫如游疏爭之。戊戌。頒遺詔。改戎政兵部尙書黃克纘爲刑部尙書。仍太子太保。以戶部倉場尙書張問達爲都察院左都御史。陞三邊總督張鶴鳴爲兵部左侍郎。湖廣巡撫徐兆魁爲左副都御史。太僕寺少卿蘇茂相爲僉都御史。巡撫浙江太常寺少卿胡來朝爲僉都御史。巡撫大同徐可求巡撫四川。俱都察院左僉都御史。起吏科都給事中李瑾爲太常寺少卿。戶科給事中黃運泰爲光祿寺少卿。陞吏部文選司郎中陸卿榮爲太常寺少卿。河南道御史王象恆。山西道御史馮嘉會。俱太僕寺少卿。起吏部文選司王三善爲太常寺少卿。己亥。再發帑金一百萬兩充遼餉。仍給腳價五千兩。不許騷動驛遞。申罪臣撫辯之禁。起山西副使呂純如爲光祿寺少卿。陞戶科都給事中官應震爲太常寺少卿。庚子。文武羣臣軍民耆舊等上箋勸進。不許。辛丑。再箋勸進。仍不允。壬寅。以勸進箋三上。諭文武羣臣軍民耆舊人等曰。皇考大行皇帝上賓。予哀慟悲號。五內摧裂。爾等以宗社基業至重。皇考遺命之嚴。上箋勸進。至於再三。義正辭懇。不得已勉從所請。諭禮部欽天監擇日具儀。祇告天地宗廟社稷。癸卯。王卜石免以貢市至邊。甲辰。諭邊臣共摠謀猷。早奏蕩平。各賜銀幣有差。乙巳。召還駙馬王昺復職。募南京浙江兵至京師。八月朔丙午。卽皇帝位。詔以明年爲泰昌元年。大赦天下。丁未。敵犯石塘路。諭萬麻舊錢使民通行勿壅滯。以督學御史周師旦言。罷開納生員事例。戊申。諭起建皇極門殿。撤回催榷使張樺等還京。陞河道總督工部右侍郎王佐爲工部尙書。南京大理寺卿王永光爲工部左侍郎。江西巡撫包見捷爲吏部左侍郎。鄖陽巡撫陳禹謨爲刑部右侍郎。起兵部侍郎汪應蛟爲南京戶部

尙書湖廣巡撫董漢儒爲工部右侍郎。左通政林學曾爲太常寺卿。尙寶司卿熊尙文爲太常寺少卿。吏科右給事中姚宗文爲太常寺少卿。福建道御史陳于庭爲太僕寺少卿。國子監司業李騰芳爲詹事府少詹事。兼翰林院侍讀學士。掌南京翰林院印。己酉。欽天監奏改造書厯。日年號報可。命吏部右侍郎兼翰林院侍讀學士史繼偕。南京禮部右侍郎沈灌。俱陞禮部尙書。東閣大學士入閣參預機務。起吏部右侍郎朱國祚爲南京禮部尙書。命截漕運以濟邊餉。庚戌。頒賜各王府銀幣。以福王潞王懿親有加。諭吏部用建言廢棄并礦稅註誤諸臣。其事關國本者。分別召用。卹錄。起陞南京刑部郎中鄒元標爲大理寺卿。浙江道御史李宗延爲光祿寺少卿。河南道御史馮從吾爲尙寶司卿。湖廣右參議朱一桂爲太僕寺少卿。河南道御史劉光復爲光祿寺寺丞。陞督餉戶部右侍郎李長庚爲左侍郎。陞寧夏巡撫右僉都御史臧爾勸爲戶部右侍郎。起補太僕寺少卿。周曰庠爲太僕寺少卿。大發兵援遼。定三六九日爲常朝之期。福建海寇平。諭聖母加上尊號。附皇考陵。起陞都給事中鍾羽正爲太僕寺少卿。添註吏部郎中饒伸爲光祿寺少卿。壬子。號神宗陵曰定陵。諭孝端皇后梓宮發引。召起禮部右侍郎兼翰林院學士顧秉謙。與侍郎韓爌同管纂修玉牒。癸丑。敕分督四鎮防秋。甲寅。起王德完。孟養浩。楊東明。俱太常寺少卿。胡克儉。何喬遠。俱光祿寺少卿。史弼爲太僕寺少卿。以許宏綱爲兵部尙書。協理京營戎政。以漕運戶部左侍郎王紀爲戶部尙書。總督倉場。陞陝西巡撫李起元爲兵部右侍郎。總督三邊軍務兼理糧餉。陞山東巡撫王在晉爲工部右侍郎。總督河道軍務。以太常寺少卿熊尙文爲右僉都御史。巡撫湖廣。以永平兵備

副使袁應泰爲右僉都御史。巡撫遼東。起左庶子公鼐爲國子監祭酒。起雲南道御史李本固爲太僕寺少卿。以湖廣副使饒位爲尙寶司卿。起右參政李維禎爲南京太常寺卿。起吏科給事中程紹爲太常寺少卿。釋罪宗充鈺於高牆。乙卯。帝不豫。丁巳。諭禮部上大行皇帝尊號。戊午。定御門引奏例。己未。諭九月初九日册立東宮。以廣西巡撫陳邦瞻爲兵部右侍郎。兼右僉都御史。總督兩廣。以巡撫李養正爲戶部右侍郎。兼右僉都御史。總督漕運。以山西左布政趙彥爲右副都御史。巡撫山東。庚申。黃河清。禮部司務孫學詩奏河清賦。詔付史館。陞太常寺卿張輔之爲南京大理寺卿。起洪文衡爲大理寺右少卿。起吏部文選司郎中白所知爲太常寺少卿。兵部主事王惟儉爲光祿寺卿。辛酉。上大行皇帝尊諡。允給事中王惟曾言。召募酌海運。起姜應麟爲太僕寺少卿。添註。壬戌。再諭進封皇貴妃鄭氏爲皇后。閣臣方從哲等疏爭之。得寢。加恩在京文武羣臣軍民耆舊人等。補六月大選。癸亥。賜朝鮮國王及其妃錦幣。甲子。制諭禮部。皇妣孝端皇后及聖母溫肅端靖純懿皇貴妃。加上尊號。命禮部左侍郎兼翰林院侍讀學士何宗彥。劉一燝。禮部左侍郎兼翰林院學士韓爌爲禮部尙書。兼東閣大學士。俱入閣預機務。定瑞惠桂三王封國。惠王漢中。瑞王荊州。桂王衡州。左軍都督僉事鄭養性奏請收進封皇貴妃成命。久之乃允。乙丑。起大學士葉向高於家。以南禮部尙書朱國祚爲大學士。同召入閣預機務。遣刑部大理寺官十五員於天下恤刑。以禮部左侍郎孫如游爲禮部尙書。兼翰林院學士。刑部侍郎何熊祥爲南京都察院右都御史。南京操江右副都御史陳道亨爲刑部右侍郎。湖廣左布政陳德元爲右副都御史。巡撫廣西。光祿寺卿

張我續爲右副都御史。巡撫河南。起吏部文選司郎中。張鳳翔爲南京太常寺少卿。湖廣襄陽府知府馮若愚爲南京光祿寺少卿。改南京戶部尙書衛一鳳爲南京兵部尙書。尙寶司司丞姚士慎爲光祿寺少卿。詔旌表節孝。丙寅。蠲永順宣大山西等處逋稅。并通灣房租。丁卯。制諭恭靜懿溫惠元妃郭氏。及昭肅恭和章懿才人王氏。加上尊號。戊辰。召見勳臣內閣。部院大臣及吏科河南道於乾清宮。煖閣。諸臣就御榻前問安。論藥。帝命皇長子出見。諸臣奏東宮天姿英偉。社稷之福。帝悅。羣臣退。命設金復道。海運督餉官起雲。南道御史鄒德泳爲尙寶司少卿。耿庭柏爲南京太常寺少卿。添註己巳。詔法司速審釋獄。因諭修郊祀禮儀。廢墜。敵犯甘肅。官兵拒卻之。庚午。上孝端皇后尊諡。及孝靖皇太后尊諡。諭封選侍李氏爲皇貴妃。并選侍傅氏封號。辛未。帝疾彌留。壬申。允御史蕭毅中請。開荒地以佐屯政。癸酉。以登極翼贊加恩。方從哲等有差。詔以東宮講官夙著勤勞。詔見任在籍者。優擢起用。已故者。從優卹錄。吏部聽選監生王應遴。請修政大統歷法。從之。颶風壞海運。甲戌。再召輔臣方從哲等十三員於乾清宮。諸臣問安畢。帝仍諭册立皇貴妃。從哲等對以册儲原卜期宜移近。蚤竣吉典。以慰聖懷。帝因顧皇長子諭曰。卿等輔佐爲堯舜。又語及壽宮。輔臣以定陵對。帝乃自指曰。朕陵也。諸臣言聖壽無疆。何遽及此。帝仍諭要緊者再。賜諸臣銀幣燒割。九月丙子。帝崩。在位一月。壽三十九。乃追存八月朔。以後爲泰昌元年。是年十月己未。上尊諡曰崇天契道英睿恭純憲文景武淵仁懿孝貞皇帝。廟號光宗。天啓元年八月壬寅。葬慶陵。史官贊曰。易稱久道化成。傳謂必世後仁。若光宗御極僅三旬。而升遐之日。深山窮谷。莫不悲號。何其化

孚若是之神也。以帝青宮之養德已久。天下歸心。而大寶初登。仁政沛發。捐朽蠹。撤稅使。臺諫振鷺。黃髮儀鴻。且虛懷三接。神宗靜攝而後。視茲盛舉。其孰不仰末承流也。其尤難者。處危疑之間。靜氣平心。以消反側。卒使庭流融洩。世種祥和。所全不已多乎。而猶惓惓遺命封皇貴妃。必鄭戚哀請而後止。抑何篤厚也。其淪人肌髓。又不在區區注措矣。使帝出震未及而幹蠱莫施焉。則三旬之聖天子。將與璇題之煙俱冷矣。悲夫。

明書卷十八

本紀十五

熹宗愍皇帝本紀

帝諱由校。光宗第一子也。生於萬曆三十三年乙巳十一月十四日。母選侍王氏。是爲孝和皇太后。神宗以元孫生。詔告天下。書諭宗藩一切恩賚優厚。悉赦諸臣之礦稅誣誤被繫者。一時海內歡聲雷動。四十八年庚申。神宗遺詔。皇長孫宜及時冊立進學。未及行。光宗立。八月。光宗大漸。召諸大臣受顧命。惓惓以輔帝爲堯舜。帝幼岐嶷。有小慧。每念光宗大業未究。雅志繼述。踐祚之初。任老成。搜遺逸。頗稱盛理。泰昌元年秋九月乙亥朔。光宗崩。是日羣臣聞變。入哭臨畢。請見帝於寢門。奉至文華殿行禮。已而還慈慶宮。諭大臣同欽天監。司禮內官相光宗山陵。丙子。頒遺詔。丁丑。大臣請選侍李氏移宮。帝諭擇吉行。戊寅。御史王安舜奏劾李可灼進光宗藥誤。帝令奪可灼俸。己卯。給事中楊漣言。選侍李氏宜移宮。即日移仁壽殿。庚辰。卽皇帝位。詔以明年爲天啓元年。大赦天下。壬午。諭尊光宗元妃郭氏才人王氏爲皇后。並議諡。甲申。上神宗尊諡。命戶部設專理新餉官。給關防。丁亥。上孝端皇后孝靖皇后尊諡。允禮臣請開經筵。擇講官。允給互市沙什台吉冠帶。己丑。諭上光宗尊諡。庚寅。詔以萬曆四十八年八月以後爲泰昌元年。並

書命寶源局仍鑄泰昌通寶錢。命設督運餉芻官。給關防。逮繫遼東總兵李如柏自殺。虎酋率衆挾賞。詔加銀四萬兩。癸巳。蘭州黃河清。以原任陝西按察使邢雲路品測修政歷法。江西大水。甲午。磨太監魏進忠兄釗錦衣正千戶。封乳保婦客氏爲奉聖夫人。並官其男侯興國爲錦衣正千戶。丁酉。發帑銀五十萬。修慶陵。戊戌。收用淨身男子三千人。遼東總兵賀世賢戰清兵於灰山。庚子。諭戶部。東事未平。加派不能遽免。其災傷地方加意優恤。十月丙午。葬神宗孝端皇后於定陵。孝靖皇后遷祔。賑江北水災。官客氏弟光先爲錦衣正千戶。壬子。遵遺詔加恩。東宮講官丙辰。祧英宗神主。丁巳。賞九邊軍士。己未。祔神宗及孝端皇后於太廟。上光宗諡。允禮臣請選大婚。辛酉。上御經筵。甲子。蠲雲南貢金二千兩。命以後勿徵之。民乙丑。考選科道官程明樞等五十人。丁卯。噦鸞宮災。戊辰。命大臣公舉風力科臣。如遼東勸功罪。癸酉。發帑金一百八十萬勞邊。十一月甲戌朔。頒天啓元年大統歷。丙子。上孝元貞皇后孝和皇太后尊諡。丁丑。撤回天津採取銀魚內官。專敕內官選后及妃嬪。甲申。允給事中張其庭奏。免畿輔加派一年。乙酉。上諭大臣不得輕於求去。言官不得任意雌黃。務協恭盡職。以全國體。命撫按官嚴覈驛遞。以蘇民困。戊子。發京營選鋒三千戍石塘路。癸卯。遣官賜尙方劍於遼東。經略袁應泰。十二月。命輔臣撰敕獎楊漣奏移宮爲公直。輔臣奏寢之。癸丑。上諭輔臣曰。邊軍勤勞。良可軫念。命戶部覈實加賞。庚申。以少詹事徐光啓兼監察御史。管理練兵。丙寅。允巡撫陝西都御史李起元奏。錄宋儒張載十四世孫文運爲奉祀。給冠帶。己巳。上諭羣臣勿得議論淆亂。自今凡大臣進退。取自上裁。小臣去留。一聽部議。忿爭者下廷議治罪。命

立武學於直省郡縣。收勇力技藝之人。其中服優免與儒學生員同。江西廣信大水。賑之。
天啓元年辛酉。春正月癸酉。命擇日開講。己卯。發帑金五十萬充遼餉。敕九卿科道官各條陳足餉清餉
畫一之務。壬午。詔選淨身男子三千人入宮。庚寅。大清兵破撫順。二十餘屯。敕嚴備之。乙未。賜瑞王惠王
桂王養贍莊田。丁酉。加冠謁廟。戊戌。復增收淨身男子二百人。辛丑。定知經筵及講讀侍班官。二月癸卯
朔。清兵至香爐山。禦之。殺傷相當。允戶科給事中趙時用屯田策。甲辰。言官請復當朝口奏及召對之典。
上從之。丁未。罷漕運總兵。命禮部選淑女以實宮壺。敕工部修葺國子監廟舍。仍命吏禮二部考稽生儒。
戊午。清兵攻虎皮驛。尋至大人屯。乙丑。安仁場火。辛未。命嚴禁左道。閏二月癸酉。免肅藩貢馬。己卯。以京
師久無雪。春旱。祈禱。命南京預建黃冊庫房。慎重圖籍。辛巳。復遼東科舉。甲午。命科道官各舉所知。丙申。
敕建文時兵部尙書齊泰戚屬後裔之在戍所者。戊戌。昭和殿災。庚子。海州廢弁劉光先反。據岫巖。總兵
劉光榮討擒之。三月庚戌。援遼兵士道亡。命撫招之。癸丑。清兵至頭目屯。進圍瀋陽。乙卯。清兵破瀋陽。總
兵官尤世功賀世賢死之。川浙總兵官陳策等援瀋陽。率兵戰於渾河。死之。上命襲贈有差。庚戌。上諭文
武官。凡職任封疆者。其策勵任事。不得諉卸。壬戌。遣官分祭嶽瀆。歷代帝王陵闕里。及徐王等墳。太和山
神。清兵破遼陽。經略都御史袁應泰。御史張銓。兵備副使何廷魁。僉事崔儒秀等死之。西酋杪花陷長安
堡。丙寅。命百官舉謀勇出衆之人。丁卯。命纂修神宗實錄。海州等四衛皆陷。庚午。發帑金一百萬充遼餉。
夏四月壬申朔。日有食之。癸酉。濟都城濠。安南遣使貢方物。初禁發鈔軍情疏報。丁丑。選得祥符生員張

國紀長女爲皇后。行大婚禮。命防海。戊寅。命演火器於都門外。四川妖僧政神作亂。擒之。甲申。命九卿科道公舉邊材。己丑。倭犯福建。彭湖官兵擒斬。敗之於虎井嶼。遁去。丁酉。允廷臣言練禁旅。戊戌。大婚禮成。己亥。贈卹遼陽死事文武諸臣。官廕有差。并朝鮮陣亡官兵。五月。烏思藏闡教王貢方物。丙午。敕延鎮監市勞。賜資。酋卜失兔。阿不害等有差。丁未。黔苗平。宣捷。集廷臣議兵餉緩急。癸丑。嚴禁各官考語。用駢麗語。命登州沿海接濟遼左避難官民三萬有奇。辛酉。固原延綏寧夏援遼兵皆潰。上命招撫之。發內帑銀一百萬充遼餉。丁卯。命開光宗實錄史館。己巳。命天下朝覲官順帶兵器交納。六月。辛未。敕撫按官嚴禁有司科斂。分遣御史各處募兵。甲申。敕貴州征苗功。陞廕賞賚有差。丁亥。加宗室及聖裔中式額。秋七月。庚子。優卹援遼死難四川石砮宣撫司秦拱明。給重慶衛地三十頃。辛丑。上神宗昭妃徽號曰宣懿。壬寅。添設遼東各監軍道。癸卯。敕所在官司嚴捕逃兵。陞客氏男爲錦衣指揮僉事。戊申。禁貢船夾帶私貨。卹陣亡兵千七百餘家。壬子。禁違例越奏。免織造新頒袍式三分之一。八月。庚午。贈土木死節諸臣。乙酉。土魯番貢方物。戊子。詔停杭州織造。辛卯。奉祧憲宗及孝貞皇后。升光宗於太廟。癸巳。詔免行刑。壬寅。葬光宗及孝和皇太后於慶陵。丁未。立武選法。甲寅。四川永寧宣撫司宣撫奢崇明叛。殺巡撫徐可求等。遂據重慶。僞號大梁。發兵討之。冬十月。癸巳。增宗貢名數。乙未。江都妖民武悟空伏誅。十一月。乙巳。套酋卜失兔等補萬厯四十七年貢馬。賞賚之。丙午。冬至。大祀天於圓丘。丁未。宴安南國陪臣於禮部。十二月。庚午。敘遼瀋死事諸臣。贈廕有差。及定逃竄官罪狀。癸未。安南都統使黎維新遣官補貢。丙戌。敕定陵工功。丙

申。台州兵王元民等作亂。擒之。旌表天下孝義節烈。

二年壬戌。春正月。朝覲大計官吏。詔以卓異中咨訪邊材。甲辰。復諸司註銷法。詔守令久任法。丁巳。清兵破西平堡。總兵劉渠。祁秉忠等死之。經略熊廷弼等逃。兵備高邦佐自殺。己未。禁修靡。壬戌。發兵部銀十萬。賑山東流移遼民。甲子。詔選留朝覲官強幹有智略者。乙丑。京師戒嚴。停殿工。申保甲法。是日成。都圍解。二月己巳。諭科道官有結黨瀆奏者。從重典。癸酉。水西土同知安邦彥叛。圍貴州。岷河西殉難諸臣。戊寅。蠲天下帶徵錢糧二年。並免直隸加派。辛巳。詔廣首科貢額。貴州報捷。恢復綏陽。眞義等處。辛卯。詔選用宿將。議款敵。丙申。議建銃臺於三協。三月。舉內操。御文華殿講讀。以爲常。辛丑。鑄天啓通寶錢。詔勳臣出募兵。甲辰。厲都門盤結法。甲寅。廷試貢士四百。賜文震孟等進士及第出身有差。丁巳。安會圍黔省。敕湖廣雲南廣西調兵合勦。發帑金三十萬充餉。戊午。京師大購捕姦細。民多枉累。大旱祈雨。夏四月。天津行屯田法。庚午。升祔孝端皇后神主於太廟。甲戌。敕臨洮斬獲功。賞賚有差。丁丑。貴州危急。詔速援之。允左都御史鄒元標請於三品京堂添註。以疏滯。癸未。罷寶和皇店稅。五月。四川梓潼妖賊白仙臺等就擒。乙亥。卹先臣方孝孺遺允。丙午。山東東平蓮妖徐鴻儒反。陷鄆城等處。命將討之。壬子。賞效力守禦。會哈喇等米布有差。己未。括直省存庫銀充餉。官兵復重慶。六月。詔諭山東愚民有從賊來歸者。赦之。己卯。發帑金五十萬於遼東築牆。辛巳。奢會僞總兵張武等就擒。僞丞相何若海等來降。壬午。皇極門工成。秋七月己酉。發帑金三十萬。蟒緞八百疋。撫敵。壬子。命賑山海二路雨災。詔撫集流徙遼民。予田產。庚申。貴

州官兵敗績。癸亥。畿南紅巾賊于志宏反。討之。丙子。命大學士孫承宗巡歷山海諸處。兵馬城守。丁丑。武夷妖賊平。甲申。禁百官私交。乙酉。敍四川死難諸臣。九月甲午朔。升光宗及孝和皇后神主於太廟。庚子。詔新增兵。照地畝起餉。乙巳。虎酋款邊。乙酉。設河間屯學。乙卯。冊封皇五弟爲信王。詔停刑。冬十月壬申。雲南官兵恢復霑平。乙亥。順義王補貢。敕止之。丁丑。戒有司混徵停減錢糧。辛巳。山東妖賊徐鴻儒就擒。平之。十一月丙申。四川獻俘。告郊廟。戊戌。慶陵工成。庚戌。命以舊甲裏數萬縫緝衣。京師貧民。丁巳。以天氣嚴寒。賜榆關督撫道將各貂皮有差。發帑金五萬賑遼民。命朱燮元爲兵部侍郎。督川湖陝西兵救黔。發帑金三十萬充餉。十二月甲子。暹羅國貢方物。丙寅。以宗室慎荃首登甲第。命選授京職。著爲令。己巳。貴陽圍解。以山東平。諭撫按官存卹孟氏子孫。修復孟廟。甲戌。泰寧福餘。宋顏三衛夷人進馬。賞賚有差。辛巳。停各衙門添註官。覈四川文武功罪。廕卹勸議有差。卹廣東死事將士。辛卯。旌表孝順節烈人等。三年癸亥。春正月。禁召募。舉保甲鄉兵法。工部尙書姚思孝奏織造病民。乞復舊制。不允。辛丑。募壯勇。舉屯鳳淮荒田充餉。壬子。貴陽圍解。宣捷。甲寅。易州妖賊侯德等就擒。乙卯。紅夷入澎湖。窺銅山等處。禦之。因遣人乞市。二月癸亥。考察京官。乙亥。貴州副總兵劉超大敗安賊於陸廣河。參將秦明屏復破之於乾溝。踏其五寨。戊寅。簡內庫軍器發遼東軍前。及銀十萬。蟒鱗緞。虎豹紵絲於遼。備戰賞番人。安把劄貢方物。丁亥。貴州鴨池陸廣兵敗績。三月甲午。廣西南丹州土官莫儁陰黨安酋。其祖母韋氏殺之。詔旌其義。紫荆妖民趙思武聚衆爲亂。推官范紹序討擒之。丁未。申明憲綱。庚戌。禁鈔傳機密軍情。雲南逆賊祿千

鍾犯尋高武定曲靖。官兵禦卻之。平夷霑益復補鮮。再犯越州。官兵大克之。斬獲甚多。甲寅。銀酋入犯。擊敗之。黃梅民熊宣等作亂。擒之。丁巳。登萊水兵出海。流球國中。山王世子尙豐遣使貢琉黃馬匹。戊午。汰各鎮操守千把總官。夏四月辛酉。申飭朝儀。壬戌。盜入元武門廊下。緝獲之。丙寅。諭各督撫選將材。辛未。兩廣總督胡應台進西洋習練火器人。命教肄之。戊寅。以牧地災傷。蠲薊州草場租。庚辰。停三部總理。戊子。貴州大水大捷。獲渠帥宋萬化僞軍師劉洪祖斬之。是時朝鮮國李倧篡其君。五月壬辰。順義王遣人貢鞍馬弓矢。甲午。詔選淨身男子一千人。以河決。蠲睢陳租稅二年。辛丑。免南京進鮮。四川永寧大捷。奢崇明父子敗走紅崖。丁未。冊封才人張氏爲裕妃。癸丑。卹山東死難諸臣。六月。詔再選淨身男子一千人。乙亥。光宗實錄及寶訓成。丙子。虜掠白馬關。禦之。御史劉之鳳請罷內操。不許。秋七月。奢寅父子敗走龍場。賜遼東死事諸臣祠額。丙申。遣官旌韓莊王妃董氏及韓王亶壻節孝。甲寅。廢太監王體乾。魏進忠子姪爲錦衣指揮。世襲。廷臣爭之不報。八月辛酉。以納銀助餉。曰遼生附儒學。戊辰。嚴巡方濫舉之禁。獲安酋僞總兵何中蔚獻俘。磔之。九月庚戌。錄四川死難總兵楊愈副使李維周等後。冬十月辛酉。平遼總兵毛文龍潛師夜復金州及滿浦呂城。錄遼東陣亡武臣後。癸酉。克安賊碗哈羊雀等屯。斬獲甚衆。丁丑。免行刑。辛巳。皇第二子生。蠲湖廣鮮貢。閏十月己亥。宣延綏等處捷。戊申。套虜貢馬。十一月乙酉。敕貴州擣巢解圍功。右都御史朱燮元等廩賚有差。十二月己亥。陝西韓城妖人李毛頭等作亂。討擒之。己酉。毛文龍與清兵大戰於閻王寨。庚戌。補給先臣楊繼盛全葬。甲寅。旌節孝貞烈。

四年甲子春正月王師進擣大方奏捷獲逆酋奢崇明及其妻子僞官蔡金貴等獲深州妖民聞香教主王好賢等誅之二月申舉諸祀典定吏胥稅役法以補民賦之不及免川廣閩浙香貢諭川貴總督朱燾元議處蘭地三月命吏部酌議銓司變通之法革乞恩空選例杭州兵變廢太監魏忠賢弟爲錦衣百戶夏四月戒奏疏冗漫擒獲龍華會首逆妖金科等誅之清兵攻旅順都司張盤禦之去五月欽定各省鄉試主考官福寧州軍變尋撫定之禁私鑄錢嚴朝覲官員科斂餽送之禁敍黔中解圍復城功六月左副都御史楊漣劾魏忠賢二十四大罪上不問矯旨殺工部屯田司郎中萬燦皇子薨恤錄貴州死事文武官吏秋七月藺酋奢史等都伏誅紅夷通倭寇福建禦之詔進大學衍義補給事中劉懋請罷內操不報河決徐州山東命賑之島師三捷八月黔中官兵克巖頭寨斬獲無算宣大備邊詔肅朝儀褒封五經博士孟所譽母張氏曰貞懿上耕籍田廣順天鄉試解額申明會典輿服之禁命恤商九月命直省搜求誌傳奏疏文集等書附進表朝覲官齎進以備纂輯發內運庫兵器於遼東詔停刑鄒泗盜平敍關外勞臣賞賚有加冬十月玉璽見於漳濱文曰受命於天既壽永昌福建兵破走紅夷焚其巢獻俘慶陵工成申飭監規改折江南漕糧十二月召還光廟建言諸臣

五年乙丑春正月朝覲大計辛丑賑江南被災民戊午雲南普安奏捷辛酉江南重災地方漕糧改折三分之一浙江帶運遼米暫折一年壬申停閩轉邊功勞陞例卹貴州死難副使孫先恕等錄其後戊寅白菱湖姦民楊桓等聚衆倡亂僞稱懿德元年潛礪山永城等處擒之二月謫去年鄉試策問語涉規正讖

諷者方逢年等。令後試錄。但錄原文。著爲令。辛丑。停準貢例。丙午。遣官冊封朝鮮國王李倬。三月癸丑。套虜入犯鎮番。官兵禦勝之。獲二百餘級。甲寅。臨太學。釋奠先師。癸未。水西師敗績。乙丑。以太監魏忠賢修肅寧城。廕弟姪爲都督僉事。丙寅。策試天下貢士。賜余煌等進士及第出身。有差。敕廉智大臣專搜括鹽筴錢法數項。以資邊餉。右參議馮時行進五車式。並車陣圖。上嘉納之。丁丑。北鎮撫司勘問中書汪文言。詞連趙南星。楊漣。左光斗。魏大中。繆昌期。毛士龍。周朝瑞等。俱逮問。夏四月。清捕營占役。癸未。定水西失事諸臣罪。丙戌。命鼓鑄於荊州。己丑。給事中霍維華借紅丸一案。參劾大學士劉一燝。韓爌等籍。甲午。毛文龍奏鐵谷捷。敕天下嚴保甲法。丙午。發出中宮等宮。諸王公主。及內官。閒住內官。助餉銀四十萬於遼。五月甲寅。詔黔蜀官久任。責其屯練。行宗室限祿法。六月乙酉。允御史楊新期奏。分地核兵。革虛冒。清加餉。丁亥。分布防秋兵馬。己丑。詔撫按不效責。吏部都察院同罪之。水蘭烏霑逆賊窺益。官兵敗走之。下都御史左光斗。楊漣。都給事中魏大中。於詔獄。次第殺之。壬辰。命修三案事爲書。庚子。改進士楊汝成等爲庶吉士。秋七月。滇南初開鼓鑄。切責鎮撫司嚴追楊漣等賊。八月壬午。以御史張納言。命毀天下講壇。免鄒元標等爲庶人。壬寅。熊廷弼棄市。傳首九邊。壬子。遼東副總兵魯之甲等謀襲錦州。渡河敗歿。冬十月丙子朔。皇第三子生。尋薨。免行刑。癸巳。諭經略尙書高第。開誠布公。集思廣益。大張撻伐之威。用慰宵旰之意。十一月。刊宗室限祿法。爲書頒之。川貴總督蔡復一。進勦苗寇。天保阿秩等。克一百七十四寨。上諭獎之。丙辰。廕魏忠賢族叔志德爲都督僉事。十二月。榜示東林黨姓名。刊書頒示海內。丙戌。廕魏忠賢甥

傅應星爲左都督。戊戌。改書院爲忠臣祠。祀遼東死難諸臣。壬寅。遣官賑河間旱蝗饑民。旌表節孝貞烈。六年丙寅。春正月。詔免權各處負販薪米者。命專官督理守城軍器。戊午。開館纂修三朝要典。丁卯。清兵營大凌河。庚午。清兵圍寧遠。辛未。寧遠圍解。二月。嚴逃兵之禁。丁丑。西夷入犯平川三山。官兵禦之。斬獲三百餘級。丙申。卹四川死難參政李忠臣等。錄其後。己亥。福餘等處夷人貢馬及方物。三月丁未。設各鎮監軍內監。封魏忠賢姪良卿爲肅寧伯。予誥券世襲。己酉。大學士顧秉謙馮銓屢諫內員出鎮之非。不報。遼東中後所火燬軍器民房無算。壬子。賜肅寧伯魏良卿土田七百頃。甲子。封西洋大礮爲安國全軍平遼靖虜大將軍。夏四月。賜魏良卿第宅朝房。乙亥。遣官分採花石。丁丑。諭括鹽河各項銀助殿工。開納生員例。海寇林七老等合紅夷爲亂。僭稱王號。官兵討平之。癸未。發遼人出關安插官給路費。辛卯。敍寧遠功。廕魏忠賢弟姪一人爲錦衣衛都指揮使。餘陞賚有差。喇嘛生吉合銀歹等會犯甘肅。官兵禦之。斬獲三百餘級。遁去。五月丙午。左春坊左諭德繆昌期卒於詔獄。戊申。京都王恭廠火。震死軍民無算。丙辰。貴州官兵大敗逆賊于威清。六月丁丑。皇太子薨。癸未。敕採雲霧山木植。戊子。河南盧氏縣姦民李宗善等聚衆爲亂。官兵擊擒之。吏部主事周順昌卒於詔獄。庚寅。三朝要典成。賞賚有差。閏六月。原任御史黃尊素。素應昇。昇卒於詔獄。己酉。順天府尹秦聚奎請罷官民捐助。詔譎之。秋七月。日食。陰雲不見。丙子。長陵寶城圯。命工部修築。停正旦中秋香蠟錢糧。殺揚州知府劉鐸。癸巳。安南遣使貢方物。八月。免四川災傷稅糧。丙午。賑陝西災荒。丙辰。烏思藏護教王遣使進方物。九月丁丑。初設關外餉司。庚辰。御史周起元卒於

獄。乙酉。封漕河神爲通濟元帥。免行刑。甲午。上初御皇極殿。百官行慶賀禮。有聲如怒濤。自殿中出。己亥。黃台吉以數萬騎屯塞下。挾賞。矯旨下。皇親張國紀於詔獄。魏良卿進肅寧侯。改給誥券。冬十月。詔加魏良卿土田三百頃。戊申。晉魏忠賢爲上公。加恩三等。己酉。三殿工成。詔誥天下。壬子。厲禁流言。癸丑。改修光宗實錄。敍殿工加賚有差。加魏良卿祿米。歲支五千石。加賜土田一千頃。貴州出師勦勻。哈克百餘寨。擒斬無算。戊午。命預徵七年加派租稅。壬戌。工部尙書薛鳳翔請帑銀五萬。爲魏忠賢建第。十一月。以修築邊牆。廕魏忠賢弟姪一人。爲錦衣指揮使。乙亥。河南盧氏縣鄉宦刑部主事李作乂輸粟一千石。賑饑民。降敕旌獎。戊寅。以重修孝陵工成。廕魏忠賢弟姪一人。爲錦衣指揮僉事。尋以關門修築。又廕指揮同知一人。又以捕礦盜。廕其甥傅之琮。爲錦衣指揮同知。發御前銀六千兩。煮粥賑京師饑民。癸巳。宣。甘鎮捷。廕忠賢弟姪爲錦衣指揮使。戊戌。閩寇楊六等率黨來降。十二月。庚申。朝鮮遣使送還漂海人丁。七年。丁卯。春正月。魏忠賢助餉銀三萬濟遼。廕弟姪一人。世襲錦衣指揮使。申選除王府官例。壬午。松虜銀歹糾結套虜土巴台吉。犯威勝等處。官兵分禦之。斬獲一百六十餘級。遁去。庚寅。命以汝福二王遺地。給信府。免咸陽潼關等處稅糧有差。二月。庚子。信王出府成婚。乙巳。命嚴登津等處海防。丙午。再敍寧遠功。廕魏忠賢弟姪一人。爲錦衣指揮使。餘陞賞有差。松潘龍安番賊出犯。官兵擊退之。丁未。進封魏良卿爲寧國公。給肩輿。丙辰。築中前所鐵場堡等城。己巳。遣官護送桂瑞惠三王之國。三月。辛未。清兵圍鐵山。遼撫袁崇煥發兵援之。壬申。豐城侯李承祚奏開採珠池銅礦。不許。戊寅。清兵入安州。攻黃州堡。庚辰。宣。

雲南平定武尋之捷。敍雲南功。廕陞賞賚有差。以擒獲姦細廕魏忠賢弟姪一人爲指揮使。戊子。清兵攻朝鮮。登萊兵赴援之。庚寅。命魏忠賢所廕指揮改尙寶寺丞。夏四月。姓木諸虜犯邊。總兵陳洪範官惟賢率兵禦卻之。斬首百八十級。辛丑。煖泉虜入犯。官兵禦卻之。擒獲阿班歹等。歸功魏忠賢。敍廕。壬子。以隆德殿工成。廕魏忠賢弟姪一人爲指揮使。五月乙亥。安南進貢。庚辰。松套虜合騎入犯。官兵禦卻之。斬獲百八十餘級。辛巳。清兵圍錦州。壬午。封銀礦洞口。以三藩竣役。廕魏忠賢弟姪一人爲指揮使。乙酉。命戶部開會計局。清天下賦役冊及九邊兵籍。丙戌。清兵圍塔山。錦州圍解。甲午。開濮餘孽鄭江等復作亂。官兵擊平之。六月。清兵攻寧遠。總兵滿桂等大戰。清兵退。奏錦州解圍捷。海寇一官老犯福建銅山等處。宣延鎮捷。秋七月乙丑。潯州賊胡扶紀作亂。就擒。餘黨尋平。丙寅。命開採一片石關鉛礦。己巳。申禁鄉會試錄文不得詆毀朝政。癸酉。帝不豫。詔遼士於山東鄉試中二名。己卯。敍錦州功。封魏忠賢四歲孫魏鵬翼爲安平伯。加少師。歲祿二千一百石。賜誥券。餘陞廕賞賚有差。賜魏鵬翼土田七百頃。戊子。旌表天下節烈賢孝。移內市於玄武門內。八月壬寅。以三殿工。廕客氏弟男各一人爲錦衣指揮使。乙巳。召見閣部科道官於乾清宮。諭以魏忠賢王體乾恪謹忠貞。可與商確大事。大學士黃立極等對曰。皇上任賢勿貳。諸臣敢不仰體。帝大悅。敍殿工。封魏忠賢姪魏良棟爲東安伯。賜予如鵬翼。餘各廕陞賞賚有差。是年薊遼總督閻鳴泰。巡按御史劉詔。倪文煥。梁夢環。請建魏忠賢祠於西協。賜名崇功。工部商人建於京師。曰崇仁。通州曰彰德。太僕少卿何宗聖建於三山。曰顯德。總督宣大張樸。山西巡撫曹思誠。巡按御史劉宏光。

建於五臺山。曰報功。建於太和山。曰昭德。建於鳳陽。曰旌德。建於建昌。曰崇德。工部監督郎中魯國禎。建於蘆溝橋。曰隆恩。監生陸昌齡。請建於國學。春秋祀。順天督撫。按建於宣武門外。延綏巡撫朱童蒙。建於本鎮。曰祝恩。工部侍郎盧大受等。建於京師。總督薊遼閻鳴泰等。建於景忠山。曰廣恩。登萊巡撫李嵩。巡按御史李精白。建於泰山。曰隆熹。並嶽河南巡撫郭增光。巡按御史鮑奇謨。建於開封。曰載德。江北曰瞻德。五軍都督府等衙門。建於京師。曰德芳。又曰茂勳。巡撫大同張翼明。巡按御史張浴。建於赤城。曰崇功。巡撫保定張鳳翼。建於真定。曰旌勳。總河侍郎李從心。漕運侍郎郭尙友等。建於濟寧。曰表勳。巡鹽御史許其孝。建於揚州。曰瞻恩。直隸提學御史李蕃。建於河間。題主曰九千歲。巡撫湖廣梁應澤。姚宗文。巡按御史溫臬謨。建於武昌。曰隆仁。承天曰宏惠。均州曰載恩。曰隆仁。總督三邊史永安。巡撫胡廷美。巡按莊謙等。建於太白山。曰懋彝。楚王華奎。建於武昌。曰隆仁。又建於通州。曰懷仁。建於遼東。曰元功。曰茂德。武嘗山曰昭德。上林苑曰感恩。松江曰德馨。蘇州建祠。後爲五人墓。皆欽賜題額。傳諭崔呈秀。進兵部尚書。加少傅。兼太子太傅。仍兼左都御史。甲寅。帝大漸。傳諭肆赦。二十二日乙卯。崩於乾清宮。壽二十三。遺詔以皇五弟信王嗣皇帝位。十月庚子。上尊諡曰達天闡道敦孝篤友章文襄武靖穆莊勤愷皇帝。廟號熹宗。崇禎元年三月。葬德陵。

史官贊曰。昔聞帝具智慧。運巧思。性好木工。自操斧鑿。運之成風。卽飲膳可忘。寒暑罔覺。嗣好漆工。製器美絕。能馳馬試劍。每手格獐狼狐兔。以爲樂。委太阿於逆闖。受楊竈於淫姆。天下至崩壞而不可收拾。使

明 書 卷十八

懷宗承之。懷宗之不幸。適逢其會矣。悲夫。

明書卷十九

本紀十六

懷宗端皇帝本紀

帝諱由檢。光宗貞皇帝第五子也。母孝元皇后。於萬曆三十八年庚戌十二月二十四日。生帝於東宮。少岐嶷穎悟。性至孝。孝元皇后早逝。帝每私遣人恭祭。凡發使反命。皆憾慼孺慕。淚盈盈下。光宗以帝早喪。母託莊妃李氏撫養。莊妃薨。帝哀痛如禮。其視慈母無異生母也。性喜讀書。十餘歲卽好靜坐。頤養。先是聞熹宗用立枷事。帝每愀然不悅。曰。此亦太慘矣。無事課內臣讀書。有口慚者。輒呵責之。曰。讀書羞。歌不羞耶。嘗辭贍田若干頃。天啓七年八月二十二日。熹宗崩。帝以遺詔遵祖訓。兄終弟及之條。卽皇帝位。在位一十七年。甲申三月十九日。都城陷。帝立視后及諸妃自縊。手刃諸公主。諭遣皇太子諸王。遂走經崩於萬歲山。壽三十五。大清命諡爲懷宗端皇帝。葬土城關外。曰思陵。

史官贊曰。帝恭儉聰明。凡禮樂刑政。皆其自出。至於防邊固圉。無不竭盡心力。第人經積玩。不能仰體帝心。以致屢繆。天祿永終。非帝之罪也。烈烈而死。從來亡國。未有如帝者。其堪與北地王埒英氣矣。諸凡行事。皆人所耳而目之。不敢臆斷。緣章奏散失。故籍不存。遂不能成本紀云。